



清代傳記叢刊・綜錄類 ②  
周 駿 富 輯

# 清史列傳 (二)

卷九至  
卷一六

清國史館原編



明文書局印行



清史列傳 卷九

大臣畫一傳檔正編六

吳興祚

吳興祚漢軍正紅旗人順治七年以貢生授江西萍鄉知縣再任山西大寧知縣十八年遷沂州知州尋以驛務遲誤降調康熙二年補江南無錫縣知縣十三年八月遷行人司仍留任十四年四月漕運總督帥顏保疏陳興祚莅任後清釐錢糧代輸前任歷年逋賦積弊一清又招徠流民復業捐給牛種陞科四千二百餘畝又立法徵漕倉場肅清盡除折勒之弊列疏保題吏部以吳興祚有本任未完漕項停陞之例議駁奉旨吳興祚准照該督所薦行十五年陞福建按察使時逆藩耿精忠降詔命仍留靖南王爵率所屬官兵進剿海寇逆賊朱統錫先是受耿精忠敕遠將軍僞印聞精忠已降遂自稱宜春王盤踞貴溪爲江浙閩三省大患興祚抵任輕騎至光澤招撫僞都督陳隆施廷宇等統錫竄入江潯山興祚計令投誠之僞聽兵蔡淑佯回賊營爲內應隨遣陳隆率所部導大軍直搗賊穴敗朱

統錫子朱義潛姪朱義質賊勢大蹙僞總兵馮珩等縛朱統錫以獻獲其僞救遠將軍銀印降僞官一百八員兵九千餘十七年正月擢福建巡撫時海上鄭錦以臺灣爲窟穴廈門爲門戶分遣其僞帥劉國軒等窺伺漳泉興三府興祚始受事漳泉屬縣相繼告陷泉州被困日久七月興祚率標兵由興化陸路進剿抵仙遊縣僞總兵黃球等擁衆數千結連沿山土賊萬餘屯踞白鷓嶺興祚分兵三道自當中路與敵遇自辰至酉敵殊死戰不退我兵從旁奮擊遂奪取白鷓嶺關口斬級六百餘墮崖溺水死者無算敵大潰復追敗於嶺頭灣克復永春縣城遂遣兵分左右翼進剿再復德化縣城敵帥劉國軒聞風遁去尋仍以巨艦數百出沒於赤嶼黃崎諸處興祚遣發水師總兵林賢等揚帆出海遊擊王祚昌徐德濟通判陳君翼同知陳子威等乘風前進千總陳春張景咸等以火箭飛射三路夾攻敵大潰焚沈敵船六十餘擒斬敵衆六千餘焚溺死者不可勝計興祚謂欲絕海寇全藉水師疏請增募水師二萬詔從所請七月興祚遣驛傳道王國泰等招降僞總兵蔡沖瑀林忠等三百八十五員兵丁萬二千五百餘人招回島民男婦一千二百人得其僞關防劄諭印記無算獲船六十有七分撥水師營是年敘功晉秩

一品十九年正月興祚疏言鄭敵盤踞廈門沿海數千里受其荼毒臣自去冬新造戰船工竣水師提督萬正色分配將士由閩安鎮駕出大洋操演惟視舊存大小船艘修理工畢江南礮手齊集卽行配駕相機進剿若過二月風汛轉南我師反在下風難以制勝今鄭敵悉調羽衆厚集海壇距我駐師之地咫尺相對恐敵船一得順風肆出侵犯我師必抽回內港以逆其鋒沿海各汛更滋擾累莫若乘風勢利便先攻海壇毀其門戶並水陸夾攻以分敵勢今議以水師攻取海壇臣統標兵赴同安會同總督將軍調度陸兵配駕八槳船由海倉松嶼潯尾石潯分路進取廈門疏下王大臣會議如所請行於是興祚自泉州港會同寧海將軍拉哈達總兵王英等赴同安進取廈門敵將分踞汭洲潯尾二處要口興祚發紅衣礮攻克之直趨廈門斬溺無算敵大敗潰散遂克廈門復遣兵取金門餘黨悉竄臺灣興祚因請留澳民防守蠲免荒田糧減關稅課提督萬正色亦疏請於海澄廈門等十四處設鎮分防上命兵部侍郎溫岱前往會同詳閱定議溫岱至閩姚啟聖與言克復海壇時正色與僞總督朱天貴密約投誠然後進兵並無殺賊攻克之處溫岱回京兵部據其言入奏上諭曰進剿海賊一事吳興祚萬正色會同

定議志靖海氛不俟荷蘭舟師乘機進取正色水師先行出洋興祚率陸兵聲援驅除海逆迅奏膚功不得以朱天貴密約投誠謂冒濫軍功仍卽與議敘二十年四月予騎都尉又一雲騎尉世職時海敵鄭錦死奉詔乘機規定澎湖臺灣以原任右都督施琅熟悉海敵情形充水師提督剋期進師施琅疏稱巡撫吳興祚決意進兵臣職領水師理應獨任且未奉督撫同進之旨奉詔吳興祚有刑名錢糧之任不必進剿二十一年正月擢兩廣總督興祚履任疏言粵民受逆藩數十年之害利在錙銖如鹽埠一項額課一十四萬有奇此蓋千百商民湊合資本行運逆藩以鹽爲利藪強占鹽田場埠鹽課無出商民並累此粵民受困之一端也廣屬渡稅三百八十餘處逆藩兵卒羅踞津口重加稅錢又不許增船分載往往人多載重渡民被溺此又粵民受困之一端也粵貨至境舊有落地稅名曰逆藩創立稅總店銅錫鐵木之屬已納稅者重加稅斂下至雞豚蔬果一概截抽此又粵民受困之一端也漁課舊額通省五千四百餘兩藩役委官重斂苛征稅銀鉅萬此又粵民受困之一端也至市舶一項原與民無害奸徒沈上達乘禁海之日番舶不至勾結亡命私造大船出洋爲市今廷議許番船自來在香山澳與商民陸

地貿易內地之民既不出洋仍與海禁無害然照舊抽稅以資國用伏讀恩詔有云逆賊盤踞地方橫征稅課該督撫查明悉行除免粵東一省如鹽埠渡稅總店漁課四項或應豁免宜聽部議施行奉旨悉行除免二十二年又疏請分駐廣東兩鎮官兵左鎮統陸兵一千水兵二千駐劄廣州分防要汛右鎮統陸兵三千駐劄韶州居中調度分防連陽英清各要汛事下兵部又疏奏舊例廣西南太思三府俱食廉鹽鬱林等府俱食高鹽折運良便後因鹽田盡遷改銷梧引今高廉二府鹽田既復請仍舊例改食高鹽路近價賤有便於民部議如所請行又奏請廣州沿海地畝招民耕種上諭曰前因海寇未靖故令遷界今若令民耕種採捕甚有益於沿海之民浙閩等省亦宜有之爾部遣大臣一員前往展界宜限期詳閱確議毋誤來春耕作之期二十五年疏論潮州水師官兵向裁歸潮鎮水師統轄今開洋貿易恐宵小潛蹤應以澄海協達濠營水汛官兵改歸南澳水師鎮統轄其南澳與碣石海汛相近令互相聯絡以密稽防部議允行初兩粵錢法不行興祚疏請撥銅設爐鼓鑄二十八年六月給事中錢晉錫御史王君詔疏劾興祚鼓鑄浮冒部議降三級調用奉特旨吳興祚效力行間悉知軍務著以副都統用三



十一年十二月奉命以副都統鎮大同右衛三十四年六月兵部疏劾右衛將軍希福等不收八旗撥送馬匹以致虛糜錢糧議希福革職吳興祚降三級調用從之時上親征噶爾丹興祚奉旨於沙克所坐臺三十六年奉旨復原官二月以病卒孫吳奕曾襲封騎都尉又一雲騎尉世職

馬如龍

馬如龍陝西綏德州人康熙十四年四月陝西提督王輔臣叛於寧羌副將朱龍應之陷延安綏德州失守如龍以十一年舉人倡義糾鄉勇據山立寨賊至屢卻之賊誘以葭州知州僞筭如龍殺其使賊驚去五月平逆將軍畢力克圖兵至如龍呈首僞筭從破賊復綏德州畢力克圖以聞並請以如龍署綏德州知州陝西總督哈占亦以如龍忠貞自矢不受僞筭且能倡義拒賊題請優敘部議以綏德銓補有人如龍應以知州先用十六年授直隸灤州知州十七年以查得灤州隱地議內陞十九年遷戶部員外郎二十年遷刑部郎中二十二年授浙江北新關稅務監督二十四年遷杭州府知府二十八年三月特旨授浙江按察使如龍訪治豪民王友聲王宗玉潘質卿等伏其辜海賊楊士玉竄海島自號將軍連土賊

胡茂金昌祐毛國標等橫劫商船如龍設法擒治首從俱置之法浙江巡撫張鵬  
翻閩浙總督興永朝先後據牒以聞二十九年遷浙江布政使先是如龍任按察  
時於覆審永嘉縣知縣申奇美温州府知府汪燠侵蝕錢糧一案扶同詳覆總督  
興永朝並疏參部議以如龍徇庇降五級抵銷嗣給事中郭渾劾如龍欺朦溺職  
應革任上以如龍於此案有無情弊可否留任命興永朝明白具奏至是永朝覆  
奏如龍於前參議處外無他弊應免議上允之三十二年六月擢江西巡撫十月  
疏言江省常平倉米八萬一千四百餘石新例在處賣米買穀以免浥爛但時價  
貴賤難預定請將舊貯米於春閒概行出借秋收時每米一石收穀二石還倉十  
二月疏言江西各州縣士民願每熟田一畝捐穀四合積貯計捐穀十一萬九千  
五百餘石請令州縣貯倉照錢糧盤查三十二年二月疏言饒州府浮梁縣景德  
鎮燒造瓷器貧民就工趁食五方雜處奸良莫辨鎮距縣遠四面皆水難於稽察  
向祇設巡檢一未能控制請以饒州府同知移駐諸疏入俱下部議行三十八年  
陞見賜御書老成清望扁額三十九年八月左都御史王澤宏以湖口設關甚險  
宜設九江舊關具奏部議令巡撫會同監督議奏如龍疏言九江大姑塘一帶水

消皆成陸地舟泊湖心危險甚於湖口查湖之北岸向無避風處故患溺臣履任初卽於虹橋港內疏塘可容舟二百近年來較前稍安但水涸則船不能進今若於塘外築石隄以禦西風並濬塘深闊使通江水且容多船或船大不能進口卽令稅員輕舟渡江收稅計築隄濬塘費不過萬金可久安無患較九江爲便疏入敕兩江總督阿山察看議奏嗣阿山履勘請照如龍所題並分設九江一口統於湖口關詔如議行十月江南道御史張廷梅疏劾如龍於南豐職員萬貴致萬祝元落溝殞命一案祇據署按察使劉蔭樞後詳臆題與督臣題疏互異徇庇溺職命如龍明白回奏如龍覆疏言萬貴一案臣以劉蔭樞問擬失當駁令確審後據劉蔭樞招詳以審出真情照例承問官免議是以未行題參但未將駁詰初招敘入致與督臣題疏互異請賜罷斥上原之四十年二月復以老病乞休得旨馬如龍雖年老居官尙好著行文阿山問彼病勢如何及能否辦事具奏十二月卒賜祭葬如例

傅拉塔

傅拉塔滿洲鑲黃旗人姓伊爾根覺羅氏康熙九年由筆帖式授內閣中書十七

年遷內閣侍讀十九年授山東道御史時海敵未平福建提督萬正色以總兵吳定方等攻奪敵船擒獲十一人疏請議敘部議以所獲有本汛奸人出境貿易者不准所請傅拉塔疏言內地奸民與海敵勾通往來既就擒獲不議敘官弁恐巡緝懈怠且有受賄隱縱諸弊非所以安民弭盜請敕部酌定章程得旨奸民出海貿易情罪重大其本汛拏獲者亦應議敘著爲令二十五年授陝西布政使明年三月內擢左副都御史七月遷工部右侍郎十月以商人採輸柎木工部監收遲延議降調上念傅拉塔在部未久且舊任布政使頗優寬免之十一月轉左侍郎二十七年二月命同禮部侍郎多奇往雲南察審提督萬正色與總兵王珍互訐事既啟行調吏部右侍郎四月授兩江總督傅拉塔至雲南鞠訊得實萬正色與王珍論罪有差七月傅拉塔陛辭往江南諭曰爾此行當潔己奉公前任兩江總督無如于成龍者爾效其所行可矣先是贛縣民控告知縣劉瀚芳私徵銀米十餘萬並蠹役不法事總督董訥發司道集勘傅拉塔甫抵任劾布政使多宏安按察使吳延貴贛南道鍾有德於吏役婪贓事不卽勘鞫遷延歲餘復從輕定擬曲爲庇護請敕部嚴議多宏安及延貴有德並罷任二十八年上南巡諭江浙爲人

文之地入學額數應酌量加增下督撫詳議傅拉塔會同浙江總督王鶚議就大中小各學取入原額每二名加增一名二十九年二月准徐所屬饑傅拉塔先發常平倉積穀賑恤入奏稱旨五月疏劾大學士徐元文原任刑部尙書徐乾學縱子弟招搖納賄爭利害民巡撫洪之傑徇私袒庇事得旨免究劾款令元文休致回籍流陽縣民周廷鑑叩閭訟降職侍郎胡簡敬占產誣良巡撫洪之傑瞻徇狀傅拉塔奉命勘鞫得實簡敬及其子弟治罪有差之傑革職先是給事中何楷奏定科舉額數部議每中舉人一名准生員六十名應試是年八月傅拉塔署巡撫監臨鄉試明年疏言臣於去年署巡撫事入場之際儒生千百成羣以未得與試環向泣訴臣以定額不敢私增慰諭散去第江南士子每科應試者俱萬有餘人今限以額數減去三分之二擔囊負笈而來不得觀光場屋一展所長殊甚憫惜若得廣增科舉之額必當益加砥礪以副作人之化疏下部議增六十名爲百名三十二年廣東巡撫江有良巡鹽太常寺少卿沙拜互訐命傅拉塔赴廣東察勘得受贓不法各狀江有良沙拜俱革職三十三年四月疏言淮揚所屬多板荒田撫臣宋犖曾疏請緩徵部議未允臣履畝詳勘鹽城高郵等州縣因遇水災業戶

逋逃者衆今田有涸出之名人無耕種之實小民積困之餘熟田額糧尙多懸欠何能代賠盈萬之荒賦儻拘責地保里鄰逃亡益多是使熟田盡變荒田於國課毫無裨益請恩賜蠲除則逃戶聞風懷歸安居樂業矣部議水浸之田業已涸出不准蠲賦上特諭曰糧從地出地爲水浸若徵錢糧則於民甚苦此水浸之田糧皆令免徵閏五月卒於官遺疏上得旨傅拉塔宣力年久簡用總督以來廉潔自持實心奉職懋著勤勞其從優議卹復諭大學士等曰兩江總督居官善者自于成龍以來惟傅拉塔一人能利而不流不畏權勢愛恤軍民深副朝廷委任之意特遣太僕寺卿楊紓赴江寧致祭傳諭江南官弁士民曰爾等悲感傷痛朕亦聞知向來在外官員濫逝從來未有此遣祭之例也尋部議賜祭葬命加祭一次贈太子太保諡清端給騎都尉世職以其子雙喜襲兩江士民爲建祠於江寧四十四年駕幸江寧經雨花臺上指其祠曰傅拉塔居官甚優大有氣節人雖被劾無銜怨者特賜額曰兩江遺愛世宗憲皇帝雍正十年入祀賢良祠

### 楊素蘊

楊素蘊陝西宜君人順治九年進士十年授直隸東明知縣十六年二月世祖章

皇帝詔吏部行取推官知縣考選御史素蘊以在任多紀錄兩經薦舉預選十七年六月授四川道御史七月疏言臣言官也宜以言爲事然今天下所患者正在乎議論多而成功少中外大小臣工苟且偷安息玩成習雖屢經天語申飭言官條奏總視爲紙上之空言終未有勉圖之實迹國家建官分職各有所職之事誠能人人振起精神事事勿因循推諉司舉劾者以進賢退不肖爲務籌財用者以瞻軍裕民食爲先任封疆者制鎮將之跋扈靖寇盜之妖氛理刑獄者弗容兇惡漏網不使良善含冤則平天下無餘事更願皇上推誠御物肅大閑而寬小眚俾人人得展才見長是尤端本澄源之要道也疏入報聞十一月疏劾吳三桂以分巡上湖南道胡允等十員題補雲南各道并奉差部員亦在其內深足駭異爵祿者天下之大柄綱紀者國家之大防前此經略用人奉有吏兵二部不得掣肘之旨亦惟以軍前效用及所轄五省各官酌量題請從未聞敢以別省不相干涉之處及現任京官公然坐缺定銜者也且疏稱求於滇省旣苦索駿之無良求於遠方又恐叱馭之不速則湖南四川去滇猶近若京師山東江南距滇不下萬里不知其所謂遠者將更在何方皇上特假便宜不過許其就近調補耳若盡天下之

官不分內外不論遠近皆可擇而取之則何如歸其權於吏部銓授爲名正而言順縱或雲貴新經開闢料理乏人諸臣才品爲藩臣所素知亦宜請旨令吏部籤補乃徑行擬用不亦輕名器而藝國體乎古來人臣忠邪之分莫不起於一念之敬肆在藩臣敷歷有年自應熟諳大體此舉卽從封疆起見未必別有深心然而防微杜漸當慎於幾先祈申飭藩臣嗣後惟力圖進取加意綏輯一切威福大權俱宜稟自朝廷則君恩臣誼兩盡其善矣疏下部知之十八年聖祖仁皇帝御極素蘊外轉川北道時吳三桂將追剿明桂王朱由榔於緬甸見素蘊前奏惡之上疏詆其意含隱射語伏危機詔素蘊回奏素蘊奏防微杜漸古今通義部議以含糊巧飾應降調遂罷歸康熙十三年三月尙書郝惟訥冀如錫侍郎楊永寧交章薦之惟訥言素蘊昔効吳三桂專擅云當防微杜漸在當日反狀未形似屬杞憂由今觀之則素蘊先見甚明且爲國直陳奮不自顧其剛腸正氣實有大過人者亟宜優錄得旨發湖廣軍前以原品用會丁憂旣服闋乃赴軍前總督蔡毓榮奏補湖廣學道部議不准令以現辦軍務參議道題補十七年二月蔡毓榮疏言大兵進剿叛賊楊來嘉洪福等襄陽爲咽喉重地全恃守道督率所屬供辦軍需接



應往來兵馬現任下荆南道黃隆才力不及應降調必得精明強固如素蘊者始克勝任於是授下荆南道二十一年遷山西學道二十四年任滿與江西學道高璜福建學道丁慈雲南學道鄒嶧貴州學道錢捷俱以公明尤著爲督撫保舉吏部議加一級以參政道先用素蘊獨得旨內陞京堂遂授通政使司參議洊遷奉天府府丞順天府府尹二十六年授安徽巡撫二十七年七月疏言各省驛站錢糧初因軍興充餉減四留六旋奉詔復二惟安徽以前撫臣薛柱斗疏稱所屬驛馬旣經裁省無需增復停止今湖廣裁兵夏逢龍等煽亂大兵進剿羽檄星馳急須分設腰站增添夫馬請如各省復二例以應復額銀五萬四千餘兩仍充驛費又疏言舊設撫標護衛兵五十名馬五十匹原在標兵一千五百步九馬一額數中經前撫臣薛柱斗奏裁停補歲省銀一千八百六十兩米一百八十石今湖廣裁兵蠢動皖城與爲鄰近請如舊充補以實標營而資緩急疏並得旨允行十月調湖廣巡撫二十八年九月疏言武昌荊州漢陽安陸等府所屬三十二州縣夏旱爲災入秋又旱民食維艱錢糧難辦請概予蠲免上遣戶部郎中舒淑員外郎金達善往同督勘奉詔蠲免二十九州縣本年及來年額徵當舒淑等初至武昌

時素蘊令布政使于養志隨總督丁思孔會勘越數日疏言臣入夏受暑泄瀉入冬沈重骨立形消精神短少醫藥罔功懇祈恩准解任歸里調養諭責其不親勘災荒託病求罷令革職回籍後卒於家

黃梧子芳度 姪芳世芳泰

黃梧福建平和人明亡海敵鄭成功加以僞總兵職令率衆守海澄世祖章皇帝順治十三年七月梧斬僞總兵華棟等率衆以海澄縣投誠大將軍鄭親王世子濟度奏入得旨與敕印封爲海澄公十四年八月總督李率泰奏增梧標兵合原額共足四千名仍駐漳州彈壓閩南九月梧同李率泰與提督馬得功都統郎賽水陸並進晝夜攻擊連破七城遂克閩安鎮十五年二月敍功賜甲冑貂裘等物尋因捐造戰艦一百加太子太保先是梧封海澄公敕印未至卽移牒總督李率泰言鄭成功飄泊海岸往來靡定欲撲滅之非熟悉情形者不能敬舉所知有委署都督施琅者讐賊甚深知彼知己胸有成算其輸款本朝已久一出受事卽著微勞且智勇兼優忠誠素矢宜假以事權俾盡展所長與梧戮力馳驅必能翦除海孽又牒言鄭敵猖獗全借內地接濟福寧沙埕爲木植絲棉所出晉江之福前

所同江之鼎美高浦爲油麻釘鐵所出海澄縣之南溪漳州之佛潭橋爲柴米之藪至閩粵錯壤則饒平縣之黃岡澄海之南洋米粟山積土穴陰爲轉輸粵糧養閩寇最爲大患宜先就接濟之地設法嚴禁又條列剿滅鄭敵五策一曰駐海濱以堵登岸成功乘春收之時散遣僞將四出派餉深入內地官軍駐筍城內尾後相追鄭已飽颺應分駐重兵於福興泉漳濱海要地往來馳剿則敵不敢登岸矣二曰造小船以圖中左成功恃中左爲三窟盈盈隔水一葦可航而陸地將弁殊無問津之意故負固至今請於漳州港口多造八槳小船伺潮渡海成功恐懼必盡撤各僞鎮護其巢穴身不敢離中左半步我師壓水而陣廣布招撫兼用間諜不出兩月內變必作成功可坐擒也三曰清叛產以裕招徠鄭敵及各僞鎮產業多詭託他姓掌管梧頗知其詳應奏請敕下督撫會同梧通行察出所收租稅永充兵餉今海上諸僞鎮願附者多當事蒿目乏餉而不敢收此項旣清卽以叛產招叛兵於以解散成功黨與易易矣四曰鋤五商以絕接濟成功於山海兩路各設五大商爲之行財射利梧在海上素所熟識近且潛住郡城爲其子弟營謀鄉舉邑庠爲護身之符其實陰通禁貨漏泄虛實貽害莫大應奏請敕下督撫嚴

提正罪庶內宄清而接濟之根可拔矣五日剗敵墳以快衆憤成功父子殘害生靈實戾氣所鍾聞其石井祖墓風水最險輿論咸謂宜剗掘以破其旺氣且快人心亦懲惡之一端也梧又密牒李率泰言成功父芝龍雖經禁錮尙未伏誅天下人心以爲朝廷欲留之以撫其子自海澄內隸以來成功勢力已絀猶藉其父齎書下海揚言撫局已成致沿海人情搖惑諸僞鎮之欲投誠者反多觀望官軍亦未敢盡力翦除必速誅芝龍則海上聯翩投誠而獨夫坐擒矣李率泰先後以梧所建議疏聞施琅得擢用申嚴海禁移兵駐防增造戰艦梧偕施琅會同提督馬得功總兵蘇明赴晉江縣之大覺山南安縣之覆船山橄欖山金坑山剗毀芝龍父祖及先世墳五芝龍初得旨流徙尙陽堡尋伏誅成功亦病死僞都督萬義萬祿楊學皋陳莽僞戎政總督陳輝僞平南將軍顏立勳僞總兵何義林明黃昌黃義余期英等先後就梧招撫相率來降聖祖仁皇帝康熙二年十月進剿廈門靖南王耿繼茂出潯尾梧同李率泰出蒿嶼督水陸官兵擊敗敵衆斬獲無算遂克廈門金門浯嶼三島十二月耿繼茂奏敵遁銅山時值隆冬未便進兵令梧統兵駐雲霄相機堵剿三年二月梧遣鎮海生員陳克峻入銅山招降僞伯周全斌僞

都督陳昇四月招降僞侯黃廷僞都督何政許貞李思忠等遂同耿繼茂李率泰提督王進功乘夜渡海拔銅山焚其巢穴成功子鄭錦竄走臺灣六年三月疏言臣自納土歸誠而後竊計報恩必先滅賊而滅賊必先用撫故一面隨征閩安一面陰行間諜十二年中共招撫過僞官二百餘員兵數萬餘名節經題報有蒙賜封侯伯且世襲者惟臣之公爵未知何等及承襲次數乞敕部定議得旨下部議以實心效力著有勞績封一等公襲十二次七年四月疏言臣標有給銜支俸者二百餘人銓授無期投閒可惜乞察其弓馬材技敕部錄用有年老願歸農者令地方官安插得所其有願終依臣標者亦另立一冊於臣標遇缺充補事下部議行尋廷議裁汰各省額兵列奏梧投誠時原帶官六十餘員兵一千二百名後續增歸誠願隸梧標下者官二百餘員兵三千八百名今沿海俱有額兵防守除梧自帶兵一千二百名酌留官三十員其餘自帶官三十餘員并歸誠願隸梧標官二百餘員兵三千八百名俱令移駐河南十三年三月逆藩耿精忠叛應吳三桂使人持逆書招梧值梧方病疽恚卒年五十有七子芳度陽以梧命答精忠而陰募兵自守凡兩月餘得壯士六千遂斬精忠所置僞都督劉豹等誓師登陣以蠟

丸函疏遣官黃藍間道馳齎是年八月至京得旨海澄公黃梧自海上歸誠殫竭忠盡鎮守巖疆勞績茂著今聞溢逝深用軫惻應從優議卹黃芳度設計全城擒斬僞將具見能繼父志卽令承襲公爵今大兵由浙江江西廣東三路進閩黃芳度偵何路先到可與迎會合剿十一月芳度疏言漳州介耿鄭兩敵之間獨力難守不得不百計圖全自八月以來堅與耿拒僞與鄭和因得陰行召募以練成勁旅萬人分布漳城及龍溪等五縣自守之勢頗成九月間耿逆遣兵來犯臣率衆迎擊擒斬無算觀兩人構怨已深勢必俱敗誠得粵省大兵克潮之後乘勝進取臣當率師迎會迅奏掃除之功十四年五月疏言臣拒耿餌鄭設爲固守萬全之計已歷一載有餘近兩人通好臣謀已洩鄭敵遂撤回各僞總兵蜂聚海澄備糧繕器臣揣其狡謀不測若南行則不利於粵擁兵留澄則不利於漳二者皆爲封疆之患臣乃於閏五月初三日宣布皇上屢頒恩旨及平南親王照會密劄遣總兵楊壯猷等扼守平和並令臣兄芳泰帶兵赴粵接引大兵鄭敵聞之率衆來圍晝夜攻擊臣連次出兵斬其將黃鼎新盧英等但臣孤城缺餉百計難支計粵路援師旦夕可至伏乞皇上密敕浙江江西兩路大兵迅速進發俾彼等不能相顧

臣可會合奏功七月疏言漳州自五月被圍日夜對壘至七月敵兵益集攻城愈急賴將士用命奮力堵禦西南北三門盡豎敵梯東門城堞礮毀三十餘丈鄭敵親督衆萬餘來攻臣率將士死戰用火器殲敵無算敵仍環圍不退城中兵單糧缺恐日久變生乞諭趣大兵速進三疏並得旨嘉獎趣統兵大將軍速即應援並撥近地錢糧接濟十月漳州城中糧盡芳度督衆死守叛將吳淑引敵陷城芳度率兵巷戰力竭赴開元寺投井死年二十有五敵戕其尸母趙氏妻李氏自縊死從父樞從兄芳名親弟芳聲芳祐並遇害期功男女從死者三十餘人敵又掘梧棺毀尸副將蔡隆遊擊朱武外委張瓊戴鄰陳謙俱罵賊死事聞得旨海澄公黃芳度矢志忠貞保守孤城剿殺逆賊屢建奇功叛將通賊陷城闔家殉難以盡臣節深可憫惻可優贈王爵諡以忠勇照多羅郡王例遣大臣致祭蔡隆朱武張瓊戴鄰陳謙贈官有差梧兄子芳世先於康熙元年齋梧疏入覲留京授一等侍衛及黃藍齋芳度疏告急芳世自陳生長閩疆深知道里情形乞隨大兵由廣東進援詔以芳世爲福建隨征總兵官諭曰爾在朕左右十有餘年凡事諳練嫻習弓馬特授此職宜勉力圖功以副擢用芳世至粵隨援兵前進會芳度遣芳泰自圍

中衝出與芳世合兵連破數城距漳州兩日程芳度戰沒詔以芳世襲海澄公爵十五年二月芳世兄弟俱在廣東爲叛鎮馬雄等誘附吳逆不從乘間脫走由三水至四會入山谷中晝伏夜行十一月至江西信豐遣黃藍齋疏具陳陷賊始末上嘉芳世不肯從逆間關冒險全節來歸加太子太保仍鎮守漳州黃藍由參將擢充海澄總兵官并令馳赴康親王軍前俟漳泉恢復收集海澄公散失官兵鎮守汛地十六年三月芳世疏言臣叔梧已故之身遭賊殘毀請與芳度一體議卹至臣叔樞罵賊而死臣弟芳名芳聲並奮力守城同日見害並請議卹得旨贈梧太保賜諡忠恪芳名芳聲贈太常少卿樞贈按察司僉事各予難廕賜芳世蟒袍弓矢鞍馬傳諭曰卿由粵東進剿忽遭兵變孤身涉險而出可見忠貞不貳顛沛不改其守十七年三月海敵將劉國軒吳淑率羽衆數萬犯海澄芳世與總督耶廷相副都統孟安等連敗之於觀音山拒石頭石瑪村等處敵退犯漳州芳世復同耶廷相孟安統標兵奮力堵剿斬僞將洪傑等殲敵甚衆又山賊蔡寅冒稱朱三太子與海敵勾通蔓延流毒芳世與營總都巴等擊敗之於天寶山斬其僞提督楊寧等得旨嘉獎四月疏言漳州亂後臣叔梧弟芳度所轄官兵俱已離散臣



漸次收集共得四千八百餘選補本標五營六百名此外無額可補竊思此項官兵遇變矢志一心報效今海氛未靖豈可聽其離散乞汰留三千照經制給餉另立三營付臣弟芳泰管轄分扼漳浦以資調遣部議芳泰已補授京口右路總兵官此項官兵如所請定爲三千卽令芳世自委標員管轄俟剿滅賊寇後再行裁減未幾芳世病卒遺疏言逆仇未滅區區此心齎恨無窮竊思封疆尙有緊要數大事其一水師戰船不可不備額船二百業已在省興造今沿海皆有敵船出沒不可不以習練之兵配此額船宜卽多募水兵使之操練其一投誠官兵不可不收今逆黨雖熾其中固有向仁慕義傾心歸附者急當厚給俸餉以示招徠再聞疆自甲寅亂後受害已慘而漳州之慘更甚近來山海交訌如平和漳浦等十餘縣處處蹂躪臣願大師底定之後皇上嚴飭有司輕徭薄賦甦此殘黎以固疆圉至臣弟芳度闔家殉難不遺一孤臣子黃溥年纔九歲臣弟芳泰久歷戎行備嘗險阻祈聖恩准與承襲公爵效力疆場以繼臣犬馬未竟之志諭曰黃芳世侍從有年才猷素著鎮守巖疆屢建奇功勤事以死深可憫惜下部議卹贈少保賜祭葬諡忠襄命芳泰襲爵時海敵陷平和芳泰遣參將呂孝德攻復之斬其將陳志

等及兵千餘尋總督姚啟聖疏言芳泰年少懦弱標兵八千不能管轄或裁減兵額或移駐內地部議令芳泰來京上曰黃芳泰乃功臣之嗣遷移來京乃保全至意可令沿途應付驛站食用芳泰疏請暫駐汀州爲兄芳度營葬啟聖復奏海澄公標下舊兵聞芳泰在汀州皆奔依之賊首劉國軒係汀州人今在汀在漳多冒充公府之人良頑莫辨有司不敢過問況僞將吳淑兄弟曾害芳度聞芳泰在汀州不敢來漳投順請敕芳泰速離閩省十八年十月芳泰抵都疏言臣年三十三久經行陣不爲幼弱兵民冒充有司何不察究臣離漳已十閱月吳淑不聞投誠督臣無計辦賊以臣藉口臣當此壯年正竭力報效之秋乞得仍駐海疆馳驅督剿以報主恩上慰諭之二十二年允其回藉營葬二十九年三月卒於里請以子應纘嗣芳度後襲爵四十九年應纘爲芳泰請卹議令閩省有司察覈上曰耿精忠叛時黃芳泰乘間至廣東請兵值尙之信叛芳泰同其兄芳世及巡撫楊熙力戰而出實心效力朕知之甚明可卽議卹贈太子少保賜祭葬如例今上乾隆三年四月應纘爲芳泰請諡部議不准特旨賜諡襄愍三十二年六月諭廷臣曰海澄公黃芳度闔門盡節忠盡可嘉業經准襲公爵十二次以酬義烈因思綠旗世

職向無承襲罔替之例但如黃芳度之捐軀授命大義炳然自應破格施恩賞延於世以昭褒忠盛典特加恩准其世襲罔替

施琅

施琅福建晉江人初爲明總兵鄭芝龍部下左衝鋒世祖章皇帝順治三年十一月大軍定福建琅隨鄭芝龍投誠遂隨大軍征廣東剿平順德東莞三水新寧等縣鄭芝龍歸京師其子成功竄居海島屢誘琅助已剽掠琅不從其父大宣弟顯及子一姪一皆爲成功戕害十三年琅隨定遠大將軍世子濟度擊敗鄭成功餘黨於福州授同安副將尋遷總兵官仍駐同安聖祖仁皇帝康熙元年擢水師提督時鄭成功已死其子錦糾衆窺伺海澄二年八月琅遣守備汪明等剿擊敵船於海門斬敵將林維獲其船及器械十月靖南王耿繼茂總督李率泰等攻克廈門羽衆乘船遁琅率所募荷蘭國夾板船邀擊之斃敵千餘乘勝克浯嶼金門二島敍功加右都督三年加授靖海將軍七年琅密陳鄭敵負嵎海上雖戢翼斂跡未敢突犯而沿海不寧朝廷兩次招撫尙梗頑如故若恣其生聚是養癰也宜急剿之疏上召至京面詢方畧琅言敵兵不滿數萬戰船不過數百鄭錦智勇俱無

各僞鎮亦皆碌碌若先取澎湖以扼其吭敵勢立絀倘復負固則重師泊臺灣港口而別以奇兵分襲南路打狗港及北路文港海翁堀敵分則力薄合則勢蹙臺灣計日可平事下部議以風濤莫測難必制勝寢其奏於是裁水師提督授琅內大臣隸鑲黃旗漢軍二十年七月內閣學士李光地奏鄭錦已死子克塽幼部下爭權征之必克因薦琅素習海上情形上遂授琅福建水師提督加太子太保諭之曰海上一日不靖則民生一日不寧爾當相機進取以副委任琅至軍疏言敵船久泊澎湖悉力固守冬春之際颶風時發我舟驟難過洋臣現在練習水師又遣間諜通臣舊時部曲使爲內應一俟風便可獲全勝二十一年四月給事中孫憲疏言征臺灣宜緩七月彗星見詔臣工指陳時務戶部尙書梁清標謂天下太平凡事不宜開端當以安靜爲主上因命暫停進剿臺灣九月琅疏言臣於水師營中已簡精兵二萬餘戰船三百足破滅海敵請令督撫趣辦糧餉給臣軍而獨任臣以討賊無拘時日但遇風利即可進兵詔如所請行琅旋復請調陸路官兵隨征並從之時鄭克塽雖仍其祖父僞爵稱延平王凡事皆決之僞武平侯劉國軒僞忠誠伯馮錫範共恃海道險阻致書總督姚啟聖言克塽願稱臣入貢不雍

髮登岸如琉球高麗例啟聖以奏上不許趣琅進師二十二年六月琅由桐山攻克花嶼猫嶼草嶼乘南風進泊八罩國軒據澎湖凡緣岸可登處築短墻置腰銃環二十餘里爲壁壘琅遣署遊擊藍理以烏船進攻敵船乘潮四合琅乘樓船衝突敵陣流矢傷目以帕漬血督戰益力總兵吳英繼之斬敵將及敵兵三千餘人克虎井桶盤二嶼旋以百船分別東西遣總兵陳蟒魏明董義康玉率兵東指雞籠嶼四角山西指牛心灣以分敵勢琅自督五十六船分八隊以八十船繼後揚帆直搗彼悉衆來拒我師聯絡齊進總兵林賢朱天貴突入敵陣八隊踴躍奮呼東西兩路夾攻波濤騰沸自辰至申焚敵船百餘斃其將及兵卒萬餘人遂取澎湖國軒乘小船遁歸臺灣與克塽及馮錫範等皆震懼無措乃遣使乞降琅爲奏請上許之八月琅統兵自澎湖入鹿耳門至臺灣克塽率屬薙髮迎於水次繳出延平王金印臺灣平上諭吏兵二部曰向來海敵竄據臺灣出沒島嶼窺伺內地騷擾不止雖屢經剿撫餘黨猶存沿海地方烽烟時警邇者滇黔底定逆賊削平惟海外一隅尙梗王化爰以進剿方略咨詢廷議咸謂海洋險遠風濤莫測馳驅制勝難計萬全朕念海氛不靖則沿海兵民弗獲休息特簡施琅爲福建水師提

督前往相度機宜整兵進征施琅忠勇性存韜鈴夙裕兼能洞悉海外形勢力任  
剋期可奏蕩平遂訓練水師整頓戰艦揚帆冒險直抵澎湖鏖戰立功大敗敵衆  
克取要地立奏膚功餘衆潰遁臺灣懾服兵威乞降請命已經納土登岸聽候安  
插自明朝以來逋誅餘黨始克殄除瀕海遠疆自茲寧謐此皆施琅矢心報國大  
展壯猷籌畫周詳布置允當建茲偉伐宜霽殊恩施琅著加授靖海將軍封爲靖  
海侯世襲罔替以示酬庸遣侍衛齎御用袍及諸服物賜之琅疏言臣蒙特簡征  
剿海敵受命之初竊意藉此可雪父子姪仇恨迨審量若輩情形要當服其心  
又不敢因私仇而致多傷生命幸仗聖主威德克成厥功且大海風濤尤賴各鎮  
臣吳英林賢等及協營將弁同心鏖戰臣又何敢貪爲己力茲荷恩加授靖海將  
軍爲榮已極乃錫封侯爵世襲罔替則不惟分所難當深恐武夫福薄弗克庇及  
子孫前此在內大臣之列蒙賜戴翎自離闕下夢想時榮伏乞皇上收回靖海侯  
世襲之成命仍恩賜戴翎俾有生之年雖遠在萬里猶如侍從班行日覲天顏臣  
願足矣疏上諭勿辭餘下部議部臣言在外將軍提鎮無議准給翎之例上特旨  
賜戴孔雀翎遣侍郎蘇拜往福建與督撫及琅議善後計時有議遷其人棄其地

者十二月琅疏言明季設澎水標於金門出汛至澎湖而止臺灣原屬化外土番雜處未入版圖然其時中國之民潛往生聚於其間已不下萬人鄭芝龍未歸順時以爲巢穴及崇禎元年鄭芝龍就撫借與紅毛爲互市之所紅毛遂聯結土番招納內地民成一海外之國漸作邊患至順治十八年明將鄭成功攻破之盤踞其地糾集羽衆脅誘土番騷擾海疆窺伺南北侵犯江浙傳及其孫克塽積數十年一旦畏天威懷聖德納土歸命此誠天佑皇上以未闢之方輿資東南之保障永絕海濱之禍患豈人力所能致善後之計尤宜周詳若棄其地遷其人以有限之船渡無限之民非閱數年難以報竣倘渡載不盡竄匿山谷所謂藉寇兵而齎盜糧也且此地原爲紅毛所有無時不在垂涎乘隙復踞必竊窺內地鼓惑人心重以夾板船之精堅海外無敵沿海諸省斷難晏然無虞至時復勤師遠征恐未易見效如僅守澎湖則孤懸汪洋之中土地單薄遠隔金門廈門豈不受制於彼而能一朝居哉部臣蘇拜撫臣金鉉等以未履其地莫敢擔承臣伏思海氛旣靖汰內地溢設之官兵分防兩處臺灣設總兵一員水師副將一員陸營參將二員兵八千名澎湖設水師副將一員兵二千名初無添兵增餉之費已足以固守其

總制參遊等官定以三年或二年轉陞內地誰不勉力竭忠其地正賦雜糧暫行蠲免現在一萬之兵仍給全餉三年後開徵濟用卽不盡資內地轉輸蓋籌天下之形勢必期萬全臺灣雖在外島實關四省要害無論彼中耕種猶少資兵食固當議留卽不爲紅毛荒壤必藉內地輓運亦斷斷乎其不可棄我朝兵力比於前代何等強盛昔年封疆大臣無經國遠猷矢志圖敵狃於目前苟安盡遷五省邊地以避其患致敵勢逾熾而民生顛沛往事不臧致延禍及今重遺宵旰之憂臣荷恩高厚年六十有餘頻慮報稱無由熟審其地形勢若今日不言後來倘或滋蔓難圖皇上必責臣緘默臣罪又何能自道竊謂棄之必釀成大禍留之誠永固邊隅會議之際難盡其辭不避冒瀆自行詳細披陳並繪臺灣地圖恭呈御覽事關封疆重大伏祈乾斷施行疏入下議政王大臣等會議仍未卽決上召詢廷臣大學士李蔚奏應如琅請尋侍郎蘇拜與總督姚啟聖等亦從琅議請設總兵等官及水陸兵並設三縣一府一巡道上允行琅又同蘇拜等疏言納土歸誠之鄭克塽應攜族屬劉國軒馮錫範應攜家口同明裔朱恆等俱令赴京僞武職一千六百有奇僞文職四百有奇應候部議降兵四萬餘人或入伍或歸農各聽其便



詔授鄭克塽公銜劉國軒馮錫範伯銜俱隸上三旗其餘屬官及明裔朱恆等命於附近各省安插墾荒二十四年三月琅疏言慮事必計其久遠防患在圖於未然邇者海禁既開設關差定稅額沿海商民增造海船飄洋貿易捕採紛紛水師汛防無從稽察據中軍參將張旺報稱劉仕明繪船出口給有官票往呂宋經紀載貨無多附搭人數一百三十三名一船如此餘槩可知弗爲設法立規節次搭載而往恐內地貧乏人民俱爲引去以臺灣難民尙荷皇上德意移入內地安插今內地之人反聽其相引而之外國殊非善固邦本之法卽觀外國進貢之船人數有限豈肯遺留一人在我中土更攷歷代以來備防外國甚爲嚴密今雖許其貿易亦須有制不可過縱況新造貿易之船皆輕快牢固礮械全備倍於水師戰艦倘或奸徒竊發借其舟楫攘其資本恐致蔓延蓋天下東南之形勢在海而不在于陸陸地之爲患也有形海外之藏奸也莫測且臺灣澎湖新關遠隔汪洋雖有汛守官兵一遭阻截聲息難通其時必復議禁止貿易採捕寧惟負我皇上子養億兆之德意將東南環海地方不又仰厪宸衷顧慮哉皇朝定鼎四十餘年偶有梗化之區精騎一到莫不降服獨此海氛積年負抗調發勞費動關億萬幸蒙睿

斷航海征剿甫爾蕩定而四省盡弛海禁出入無忌臣在閩言閩當此未然深知情弊伏乞敕部行令督撫各將通省之內凡可興販外國各港門議定船數每船酌定人數其採捕漁船亦設法使互相稽察以杜泛逸海外則禍患不萌疆隅永以寧謐矣疏上會監督閩海稅務郎中伍什巴請令防守海口官員稽察各船有關口照票者放行無則拏報上命左都御史達冷塔往會琅確議旋議令關口稽核船數人數仍歸督撫提鎮責成汛員防範是年琅疏請卹賞進剿澎湖傷亡及受傷兵丁部議令地方官再行察核上曰此等貧兵早給一日卹賞使得早受一日實惠此後一概速行議給二十七年七月琅入覲賜朝服先是二十三年七月內閣學士錫住奉使福建還上詢及陸路提督萬正色品行若何錫住以忠厚和平對上曰萬正色前督水師時奏臺灣斷不可取朕見其不能濟事故將施琅替換令其勉力進剿一戰而克二人今相睦否錫住奏曰二人陽爲合好陰相嫉妒上曰施琅居官如何錫住奏善用兵但行事微覺好勝至是上諭施琅曰爾前爲內大臣十有三年當時因爾閩人尙有輕爾者惟朕深知爾待爾甚厚其後三逆反叛虐我赤子旋經次第平定惟有海敵游魂潛據臺灣尙爲閩害欲除此患非

爾不可爰斷自朕衷特加擢用爾果能竭力盡心不負任使舉六十年難靖之患殄滅無餘誠爾之功也邇來或有言爾恃功驕傲者朕亦頗聞之今爾來京又有言當留爾勿遣者朕思騷亂之際尙用爾勿疑況天下已平反疑爾勿遣耶今命爾復任自此宜益加敬慎以保功名從來功高者往往不克保全終始皆由未能敬慎之故爾其勉之更須和輯兵民使地方安靜以副朕愛兵恤民並保全功臣之意施琅奏曰臣年力已衰封疆重大恐精神不堪上曰爲將尙智不尙力朕用爾亦智耳豈在手足之力乎三十五年三月卒於官年七十有六贈太子少傅賜祭葬如典禮謚襄壯子世綸仕至漕運總督世驃仕至福建提督世范襲三等侯世宗憲皇帝雍正十年以施琅入祀賢良祠

萬正色

萬正色福建晉江人由行伍起家康熙三年以招撫海賊陳燦等有功授陝西興安遊擊十二年逆藩吳三桂反四川叛應之正色隨西安將軍瓦爾喀進征叛賊譚洪等據陽平關遣賊黨拒戰正色率兵擊敗之於野狐嶺攻克陽平關擢山西平魯路參將尋授岳州水師總兵官時岳州久爲三桂所踞立樁木於洞庭之套

河峽阻我進剿十七年三月正色率舟師乘夜入亂葦中盡拔其樁木屢擊卻賊衆既而賊將江義巴養元杜輝等駕船二百餘犯柳林嘴正色偕遊擊唐善等擊毀賊船殲賊無算是年三桂死於衡州正色爲反閒計遣千總魏士曾齎書分致賊將十有四人於岳州城爲僞總統吳應麒所得士曾遇害應麒旋殺賊將之爲所致書者數人賊衆內潰僞總統陳華李超王度冲來降應麒遁大軍遂復岳州正色爲魏士曾請卹得旨魏士曾心存報國直抵賊營離間賊黨身被殺害殊可憫惻下部優卹贈守備廕子衛千總十八年正色以追敘恢復陽平關功加銜左都督時康親王傑書征福建逆藩耿精忠降而海敵鄭錦猶踞金門廈門陷海澄正色自以閩人素悉海上情形陳水陸戰守機宜言閩地負山枕海敵蹤出沒無常今宜擇官兵習於陸路者分布要害使敵不得登岸精於水戰者率戰艦自萬安鎮諸處順流攻擊直抵金門塞海澄以斷其歸路賊自廈門來援者則從金門掩擊更請敕文武諸臣蠲除沿海邊地雜派差役使民安居樂業不致窮而投敵又設法招撫善爲安置則投誠日多羽黨日散疏入詔曰萬正色剿寇洞庭著有勞績今岳州長沙諸處悉經恢復無煩水師且萬正色閩人稔知水性茲剿滅海

敵之際從優加太子少保調爲福建水師總兵率所部官兵剋期速赴閩中至日卽以所條奏事宜與大將軍康親王等會議酌行是年擢水師提督時議調船荷蘭國進取廈門正色疏言荷蘭船遲速莫必轉盼二三月閒南風一作卽難前進今新舊烏船俱集臣與撫臣吳興祚決計進討臣率水師直攻海壇興祚率陸兵爲聲援上是之十九年正月正色進征海壇分前鋒爲六隊親統巨艦繼之又以輕舟繞出其左右並力夾攻以礮擊沈戰艦溺水死者三千餘人遂取海壇僞將軍朱天貴等遁南日湄州諸澳正色追躡至平海澳天貴聞風遁崇武正色自平海南下敵迎戰正色率兵掩擊大敗之斬僞總兵吳丙僞副將林勳等會將軍拉哈達總督姚啟聖巡撫吳興祚提督楊捷等並力夾攻遂取廈門天貴來降鄭錦竄臺灣三月正色疏言海島澄清實借風潮利順相傳莆田縣林愿之女自宋時肇顯靈異明永樂中建廟龍江封爲天妃列在祀典邇者臣率舟師渡海虔申禱告方征崇武時敵恃南風揚帆直偪忽風從西發我師歡呼奮進遂以敗敵是固國家之福亦由明神默佑乞賜敕封以隆昭報疏下部議如永樂七年封天妃故事遣禮部官祭告四月正色疏請分兵鎮守濱海要地上命兵部侍郎溫岱前往

會議尋詔銅山廈門諸處量設總兵以下等官留水師二萬人分鎮之初海壇既克有旨下部議敘溫岱至福州總督姚啟聖與言海壇之役正色先遣人與朱天貴密約投誠乃進兵取彼空地無攻擊殪賊之事及溫岱還京兵部奏正色冒功不應議敘上曰萬正色志靖海氛不俟荷蘭國船領水師先行出洋驅逐海敵克奏膚功遵前旨議敘於是部議予騎都尉世職二十年六月改福建陸路提督二十五年調雲南提督二十六年十月鶴慶總兵王珍劾正色縱幕客家人借軍政造冊名索各營將弁銀數千兩正色亦劾珍侵挪捐造甲冑銀二千餘兩詔正色與珍馳驛至京質問雲南總督范承勳復劾正色婪取財賄侵蝕兵糧諸款上遣侍郎多奇傅拉塔往雲南察取衆證下部定讞王珍侵挪事辨釋別以誣良爲盜擬徒收贖正色納賄侵蝕事鞠實論絞得旨萬正色久歷行陣勞績甚多從寬免死著革去提督仍留世職三十年四月卒子吉祥襲職

### 拉哈達

拉哈達滿州鑲黃旗人姓鈕祜祿尙書徹爾格第五子也初任侍衛兄法固達襲父騎都尉兼雲騎尉世職世祖章皇帝順治七年因其祖額亦都以來世有勞績

晉三等輕車都尉尋卒拉哈達襲職兩遇恩詔晉至一等輕車都尉十七年授兵部督捕侍郎十八年擢工部尙書列議政大臣聖祖仁皇帝康熙三年授鑲黃旗蒙古都統八年調本旗滿洲都統十三年四月授鎮東將軍駐防兗州時逆藩耿精忠叛應吳三桂犯浙江拉哈達甫至兗州奉諭曰杭州爲浙江要地以爾素有才能遣往暫理杭州將軍印務並諭以浙江一應軍務與平南將軍賚塔總督李之芳等公同商酌毋分彼此七月賊自溫處犯金華拉哈達遣副都統沃申偕副將陳世凱等迎擊大敗之擒斬僞都督閻標等及其僞官百十餘兵七千餘時賊分犯黃巖台州寧波紹興俱騷動提督塞白哩屢疏告急上旣命康親王傑書爲大將軍統師赴浙貝子傅拉塔爲寧海將軍分兵赴台州援剿復詔康親王未至之先援剿事宜俱聽賚塔與拉哈達商酌以行及康親王至金華上命副都統雅塔哩署杭州將軍拉哈達仍以都統赴康親王軍前參贊軍務十四年五月拉哈達分兵擊賊於處州復松陽宣平二縣十五年九月隨康親王進征福建耿精忠乞降時海敵鄭錦踞漳泉興化其將許燿率衆三萬逼福州營於烏龍江之南小門山真鳳山拉哈達率兵渡江奮擊奪其營十四追奔四十餘里擒僞總兵四僞

副將以下三十餘人十二月授寧海將軍十六年同賚塔進剿興化連破敵營二十六斬僞總督趙得勝復興化僞總兵郭維藩以仙游降許耀竄泉州據城拒守拉哈達乘夜進圍之漏未盡梯城入斬許耀及僞總兵僞副將等泉州平遂復漳州及海澄等十縣沿途招降敵將四百二十二員兵四千一百七十名移師征潮州叛鎮劉進忠迎降拉哈達還福州十七年四月鄭錦之僞總統劉國軒陷平和犯海澄拉哈達遣副都統瑚圖等擊之於碧落泉潛石山河灣及紅蕉寨葛布山皆有斬獲敵斷江東橋及長泰同安諸小徑我師不能進海澄遂陷副都統穆赫林提督段應舉死之漳平同安惠安相繼失守敵復犯泉州詔責拉哈達不急援海澄俟事平論罪嚴趣其禦敵泉州拉哈達欲由長泰大路進值江水泛漲泥濘難行時侍讀學士李光地丁憂家居遣人來迎請爲嚮導拉哈達遂率兵由南靖之蒼峯嶺朝天嶺至漳平招降在城之僞總兵黃瑞標張勝等及僞官二十餘兵四百有奇復踰石柱嶺趨安溪進薄泉州敵乃竄遁十八年拉哈達遣遊擊趙雲剿之於泉州之臭塗澳斬五百餘級焚其寨先是敵逼泉州於沿海東石地築城掘壕扼金門廈門要害至是拉哈達遣副都統沃申率兵攻之水陸並進冒槍礮



登城斬僞參將遊擊數員擒僞總兵陳深及羽衆百六十餘人餘黨溺死者無算獲其僞印及船礮器械十九年拉哈達同巡撫吳興祚由同安港口進至潯尾招降餘黨分兵徑渡拉哈達居中吳興祚由左總兵王英由右直趨廈門而賚塔與總督姚啟聖提督萬正色楊捷總兵黃大來等皆如期至三面合擊敵不能支遂克之隨遣兵趨金門僞總兵吳國俊等迎降鄭錦遁臺灣詔康親王還京拉哈達與副都統馬忠文率兵千人守福州二十一年八月上以進取臺灣有綠旗兵及駐防漢軍足用滿洲兵可撤命拉哈達率之還京二十二年王大臣等議拉哈達陷海澄時不能救援應降世職爲三等輕車都尉罷都統任上念其隨康親王平閩有勞績且久任都統能稱其職寬免革任二十四年以老病致任四十二年七月卒年七十有七予祭葬如例子博雅柱襲

楊捷

楊捷先世家揚州以軍籍爲義州人捷初爲明裨將世祖章皇帝順治元年率衆投誠授山西撫標中軍遊擊二年岢嵐州土賊高九英等聚衆剽掠捷奉巡撫馬國柱檄擒斬賊衆毀其巢國柱旣任山西總督請以捷爲中軍參將尋擢副將四

年大兵既定廣東詔捷率宣化大同兵三千移鎮五年二月次池州值江西總兵金聲桓廣東總兵李成棟相繼叛征南大將軍譚泰請以捷駐防九江會剿聲桓上允所請授捷爲九江總兵官旋率兵復都昌獲僞官余應柱等斬之江西平敘功予雲騎尉世職十年隨靖南將軍喀喀穆剿滅廣東叛鎮郝尙久復潮州十一年改陝西興安總兵官經略洪承疇疏留原鎮是年冬加右都督銜充福建隨征右路總兵官十二年敘復潮州功晉左都督時海上鄭成功肆擾福建郡邑捷請剋期增修漳浦城垣以固守禦嘗剿賊雲霄銅山諸處所向克捷十六年擢江南提督會鄭成功突陷鎮江窺江寧特加捷太子少保充江南隨征左路總兵官統江西將校及兵三千防剿十七年奉旨駐揚州防江北要汛十八年署廬鳳提督尋調山東提督駐青州土賊于七敗竄入海捷緝其黨五十餘人皆伏誅聖祖仁皇帝康熙四年併山東總督於直隸移提督駐濟南七年河南提督許天寵以裁缺改山東命捷候缺九年許天寵遷鑾儀使仍以捷補授十二年調江南提督十五年海上鄭錦犯乍浦捷遣參將白可受等往剿獲其船俘斬無算十七年鄭錦犯漳州陷海澄上以捷謀勇兼優成效素著調福建提督兼轄水陸特晉少保兼

太子太保並諭捷攜綠旗兵之願往者隨征捷因疏言臣前隨征福建剿敵雲霄銅山間深知閩中土兵弗肯力戰用命臣自在江南提督召募材健至松江訓練有年堪資戰守擬選三千名並擇遊擊守備數員以備任用上允之捷至福州聞賊犯泉州卽統兵趨惠安賊不敢抗皆潰遁遂復惠安城僞總統劉國軒見我師甚盛因斷洛陽橋羽衆數千及船百餘拒守而自集海船爲遁計又以衆三千餘踞陳山壩阻我師捷遣遊擊李璉等襲破陳山壩而令總兵黃大來與副都統禪布等會師洛陽橋南兩路夾擊以礮破其船始大敗遁去泉州平時其將王一鵬復窺惠安捷令總兵張韜往剿捕斬略盡餘黨葉明紀朝佐等出沒德化永春間僞總兵蕭武等聚艘泊湄州窺興化捷復遣將防守策應而自移師赴漳州同副都統吉爾塔布等敗國軒於江東橋又分屯駐柯坑山鳳山萬松關諸險隘別遣將守榴山寨以扼衝要先是捷甫莅任卽請別設水師提督使已得盡力陸路專心剿禦至是得旨楊捷自簡任以來著有勞績授爲昭武將軍管福建陸路提督事十八年國軒以羽衆刦榴山寨並欲奪江東橋捷會平南將軍賚塔等分兵爲兩翼左右夾擊大敗之於下坑山及歐溪頭斬獲千餘及甲仗無算十九年國軒

糾衆屯獅子山又聯絡遠近羽黨以爲聲援捷親率精銳剿平烏嶼諸寨復以高浦與廈門相對爲海濱要地駐營設兵留標將防禦斷其歸路而自與總督姚啟聖總兵黃大來等分下玉洲三汶石碼等處十九寨復統兵進攻海澄僞總兵蘇侃以城降遂乘勝取廈門彼聚艦迎敵我師以巨礮毀其艦奮兵疾擊敵溺死者無算餘黨相率投誠金門廈門悉平國軒自銅山竄入臺灣捷疏請回駐泉州得旨俞允於是年九月以老病求罷命仍任江南提督諭曰卿效力巖疆功績茂著以閩地溼熱與卿病體不宜調爲江南提督不必求罷明年敘復海澄功晉世職三等輕車都尉准襲四次捷駐松江年久以病乞休者再俱奉溫旨慰留二十九年卒於官年七十有四贈太傅諡敏壯孫鑄襲職入籍揚州衛

### 徐治都

徐治都漢軍正白旗人二等男徐大貴之子也初任佐領兼參領聖祖仁皇帝康熙七年擢直隸天津總兵八年調湖廣彝陵總兵十三年正月逆藩吳三桂陷湖南沅州治都率兵赴援旋以四川巡撫羅森總兵譚宏等叛應吳逆治都奉詔自常德回守彝陵三月叛鎮楊來嘉劉之復等擁衆數萬乘舟犯彝陵治都率兵撲

剿賊衆登岸誘我兵往敵旋以飛棹猝薄城下治都布置嚴密水陸爲犄角之勢擊卻賊衆八月楊來嘉糾黨踞南漳各寨分路出犯治都同襄陽總兵劉成龍率兵合剿斬殺過半上嘉治都久守衝要下部議敍加左都督銜初治都赴援常德其妻許氏聞鄰境兵民多從逆權以治都令約鎮標將弁撫慰士卒曉以大義並脫簪珥服飾以資犒勞彝陵右瀕江總兵官廨在江濱十五年四月賊衆駕船數百來犯治都沿江堵截賊突逼官廨槍礮齊發許氏中礮死湖廣總督蔡毓榮提督桑額合疏以聞具述治都矢志忠貞奮不顧家狀十八年三月擢湖廣提督四月僞將軍王鳳岐擁賊衆踞巫山上慮江水泛漲時賊乘虛突犯彝陵荊州命治都嚴行堵禦七月疏言彝陵一隅爲楚蜀咽喉今賊踞巫夔上游呼吸可至宜速修五板戰艦一百並招募土著水手操練嫻熟令彝陵鎮臣胡世英統領以備水路防剿臣同襄陽總兵劉成龍前赴歸州興安巴東形勢之地相機進剿事下所司議行詔治都同四川總督楊茂勳統舟師往夔州重慶十九年正月師至巫山楊來嘉王鳳岐與僞總兵王存仁集賊衆萬餘負險自固我師奮勇奪山隘賊衆奔潰復以數騎突犯治都揮刀力戰敗之楊來嘉棄馬越山而遁王鳳岐就擒陣

斬三千餘級復巫山縣城乘勝規取夔州僞將軍劉之衛僞總兵瞿洪陞開關納款遂復夔州府城叛鎮譚宏遣子僞將軍譚天祕率僞總兵譚地晉譚地升繳敕印詣軍門降治都奉詔還守彝陵荊州諸處九月譚宏譚天祕等復叛瀘州敘州俱陷夔州震動治都同鎮安將軍噶爾漢統兵溯江而上分軍三隊擊賊陣擒賊總兵易文奇進抵下關城賊衆望風膽落棄關而遁追斬甚衆餘賊奔入雲陽二十年進征雲陽屢挫賊鋒擒僞總兵向旭暉時譚宏死譚天祕勢窮竄遁萬縣梁山忠州悉平敘功晉階四等二十七年湖廣督標裁兵夏逢龍糾衆倡亂據武昌城治都赴剿至應城縣遇賊衆擊卻之隨駐軍應城賊衆環逼治都分兵內外夾擊賊大潰奔德安逢龍聚賊衆齊赴京口以僞總兵楊兆先潛襲我軍後路治都偵知賊情水陸嚴戒旣而蒲圻兵縛楊兆先赴軍前降餘賊鼓譟來犯復乘北風排巨艦二十順流下水師嚴整不敢近遂泊龍川磯下登岸衝我營壘我軍奮勇迎擊晝夜鏖戰斬殺殆盡逢龍勢窮合賊衆駕船泊鯉魚澗地欲待我軍出敵乘虛犯我綠營治都遣參將鄭興都司楊明錦協力防禦自統戰艦沿江施槍礮焚毀賊船賊旋犯我陸營復戰卻之斬七百餘級溺水死者無算僞總兵胡耀乾及

偽文武等官以城降治都入武昌撫軍民逢龍竄黃州會振武將軍瓦岱統八旗兵至聞武昌賊潰追至黃州偽總兵趙得等至軍前投誠黃岡生員宜畏生擒逢龍以獻磔於市武昌黃州悉平徐治都報捷得旨嘉獎賜戴孔雀翎敕功予雲騎尉世職三十二年三月入覲賜御用冠服三十三年詔嘉其勞績茂著視提督孫思克施琅之例特授爲鎮平將軍仍管提督事三十六年閏三月卒年六十有七贈太子少保賜祭葬如典禮諡襄毅長子永泰先於康熙十九年襲徐大貴二等男次子永平襲雲騎尉世職

瓦岱

瓦岱滿洲鑲黃旗人姓鈕祜祿氏額亦都之孫也父敖德太宗文皇帝天聰八年分額亦都舊轄人戶益以新附瑚爾哈部衆授敖德世管佐領尋兼任參領屢從征有功世祖章皇帝順治二年敍功予騎都尉世職遇恩詔洊晉二等輕車都尉十四年卒長子謨爾琿襲瓦岱敖德第三子也初任侍衛尋授護軍統領聖祖仁皇帝康熙十三年逆藩耿精忠叛應吳三桂由福建掠江西瓦岱署護軍統領隨安親王岳樂往討十四年三月擊賊於撫州鍾家嶺面中創仍率兵擊退賊衆之

乘夜犯營者僞都督易明僞總兵李茂桂分路來犯俱戰卻之又敗賊衆於瑞州府北山招降東鄉縣賊城既復移兵征建昌僞將軍邵連登率賊數百水陸迎戰瓦岱與定南將軍希爾根分兵列陣山下賊踞山以拒瓦岱從山左鳴角仰攻擒斬無算連登中矢殪餘賊潰奔截其歸路獲賊船六千餘復建昌城乘勝圍新城縣率兵樹雲梯先登克之十五年三月隨安親王討吳三桂逆黨夏國相以萬餘衆踞萍鄉縣之來龍山瓦岱偕諸將分道進擊賊敗遁遂復縣城進征湖南屢敗賊衆十八年大軍復長沙衡州寶慶並規復武岡渡紫陽河賊營分踞渡口諸軍直前攻戰瓦岱引兵繞出賊營後夾擊賊潰遁追斬二百餘級擒僞都司一復連敗賊衆於雙井鋪及楓木嶺湖南郡邑相繼底定瓦岱隨安親王還京授護軍統領敕功予雲騎尉世職二十一年授江寧將軍二十三年駕幸江寧賜御用袍並銀千兩二十四年十月授鑲黃旗滿洲都統以博霽代爲將軍上諭之曰前此將軍副都統與地方官各不相能自遣瓦岱爲將軍衆志克諧彼此和協爾當效之瓦岱既至京列議政大臣二十七年二月命爲振武將軍統兵赴湖北剿叛賊夏逢龍等師至黃州僞總兵趙得等出城降黃岡生員宜畏生以逢龍獻磔於軍前



賊平班師三十年十月命爲定北將軍率兵出張家口赴圖拉追剿噶爾丹至克魯倫河偵賊衆遠去乃還三十一年二月上允理藩院請於邊外達勒鄂莫瑚爾鄂莫諸處墾種派內務府各莊屯及八旗諸王莊屯丁壯往耕命瓦岱同都統班達爾沙等管理諭以善爲經營及時廣播油麥大麥糜黍諸種深耕勤耨俾多收穫十月以督耕不勤田禾無收部議降一級遂罷任削去雲騎尉尋卒於家

葉映榴

葉映榴江南上海人順治十八年進士改庶吉士時方嚴紳衿抗糧罪映榴以江南奏報舉人冊內有名呈請議處降二級調用康熙三年補國子監博士九年遷戶部主事十一年充陝西鄉試副考官次年遷本部員外郎十三年遷禮部郎中十五年監督贛關稅務十七年擢陝西按察司僉事提督學政試竣巡撫鄂愷奏舉公明部核以道員先用二十四年授湖廣糧儲道二十七年五月督標裁兵夏逢龍倡亂巡撫柯永昇禦賊被創自縊降調按察使丁煒棄家奔安慶時映榴署布政使賊迫授僞職映榴給以無殺掠百姓三日後當如所言乃令其妻奉母自水溝出避難以司道等印五付其僕葉華林向所過衙門呈繳遂繕遺疏朝服望

闕謝恩訖升公座罵賊拔佩刀自刎疏略曰臣一介豎儒幸中進士叨沐皇上高厚深恩歷擢今職嘗以潔己奉公自矢夙夜但愧才具庸劣未效寸長茲值裁兵夏逢龍倡亂刦奪撫臣敕印並分兵圍臣衙門露刃逼脅臣幼讀詩書粗知節義雖斧鑕在前豈肯喪恥偷生伊時卽欲率同妻女闔門殉節第念臣母年七十有六在臣任所臣長子葉勇遠在原籍其餘二子尙未成童煢煢孤嫠死將安歸因遣妻女奉母潛逃臣如微服匿影或可倖免以圖後效伏念臣守土之官也城存與存城亡與亡義所當然今勉盡一死以報國恩所恨事起倉卒旣不能先事綢繆默消反側復不能臨期捍禦獨守孤城上辜三十載之皇恩下棄七旬餘之老母君親兩負死有餘慚雖么麼小醜指日掃滅不能忍死須臾以觀蕩平也上覽疏畢諭曰凡地方官城存與存城亡與亡人臣之分近有武昌兵亂葉映榴守義不屈詈賊自刎閱其遺奏五內傷悼王大臣等其共聽之因令展讀奏疏聞者莫不感泣遂諭吏禮二部曰葉映榴值裁兵鼓譟抗志不屈捐生殉難忠節可嘉今覽遺疏情詞慘烈朕心深爲惻然不忍披閱應從優賜卹以表忠貞部議贈通政使廕一子入監特贈工部右侍郎賜祭葬如典禮次年二月上南巡葉勇迎駕謝

恩諭扈從諸臣曰當楚省兵譁之際葉映榴盡節捐軀朕心深切憫恤特詔所司優贈亞卿兼予卹廕今巡幸江南見其子葉專迎伏道左彌增軫惻應特予諡以彰異數遂御書忠節二字賜之四十二年湖北巡撫年遐齡請建祠於武昌賜御書丹心炳册額三十三年江南學政胡潤請許映榴後裔自行建祠上海有司春秋致祭從之雍正二年入祀昭忠祠子專官廣州知府

伊桑阿

伊桑阿滿洲正黃旗人先世居瓦爾喀姓伊爾根覺羅氏順治九年進士由禮部六品筆帖式授主事聖祖仁皇帝康熙三年授票本員外郎七年授刑部郎中十二年八月遷內閣侍讀學士十月擢內閣學士明年十二月充經筵講官十四年十一月擢禮部右侍郎尋調戶部右侍郎十五年十月命同工部尙書冀如錫往視淮揚等處河工十六年四月轉戶部左侍郎尋擢工部尙書八月調戶部尙書時逆藩吳三桂踞湖南有詔製烏船沙船由岳州入洞庭橫互湖中以斷賊糧道因敕伊桑阿赴江南督造明年復偕刑部侍郎禪塔海赴茶陵督造戰艦二十一年淮黃潰決敕伊桑阿往勘兼籌海運事宜伊桑阿疏言黃河運道非獨輸輓天

庚卽商賈百貨賴以通達國家在所必治若海運先需造船所費不貲且膠萊諸河淤塞已久開通匪易似屬難行上是其言是年冬俄羅斯犯邊伊桑阿奉命往寧古塔督修戰船明年六月調吏部尙書二十三年四月旱命同大學士王熙等清理刑部繫囚九月扈蹕南巡奉諭閱視海口伊桑阿疏言車路串塲諸河及白駒丁溪草堰諸口宜敕河臣靳輔詳閱地勢挑濬深闊使高郵諸州縣減水壩運河水口引流入海上以靳輔督理黃河隄岸勢難兼顧海口命安徽按察使于成龍分董其事二十四年五月調兵部尙書明年轉禮部尙書二十七年授文華殿大學士兼吏部尙書尋充纂修三朝國史總裁官三十五年三月命兼管兵部尙書事六月以臺站馬匹多斃部臣不預嚴飭又不劾奏部議伊桑阿應革職得旨從寬降三級留任三十六年上親征噶爾丹命伊桑阿往寧夏安設驛站尋同大學士阿蘭泰充平定朔漠方畧總裁官三十七年以年老乞休上諭阿蘭泰曰伊桑阿厚重老成宣力年久爾二人自任閣務以來凡事推誠布公不惟朕知之天下無不知者伊桑阿雖以年老求罷朕不忍令去也四十一年復以疾乞休得旨卿品行端凝才識敏練勤勞歲久倚毗正殷今以老病乞休情詞懇切准以原官

致仕仍著加意調攝以副朕篤念老臣至意四十二年七月卒年六十有六遺疏上得旨伊桑阿歷練老成效力年久簡任機務鎮靜和平實心任職自請告以來尙期優游頤養長享昇平用副眷注忽聞溘逝朕心深爲軫悼下部議卹賜祭葬如典禮諡文端今上乾隆十二年同大學士馬齊入祀賢良祠

阿蘭泰

阿蘭泰滿洲鑲藍旗人姓富察氏初任兵部筆帖式累遷職方司郎中聖祖仁皇帝康熙十九年議政王大臣等疏薦阿蘭泰練習部務自吳三桂叛後專司軍機文檄日夕勤勞詳慎無誤請予議敘得旨以三品卿用二十年三月擢光祿寺卿五月遷內閣學士明年充平定三逆方畧副總裁官兼充明史總裁官教習庶吉士二十二年擢兵部侍郎兼管佐領明年二月上欲釐定戶部鼓鑄章程察除積弊特命阿蘭泰同吏部侍郎陳廷敬刑部侍郎佛倫副都御史馬世濟管理錢法二十五年六月擢左都御史十一月上閱平定三逆方略摘論贊舛錯諭大學士曰平逆始末阿蘭泰知之甚詳爾等可與彼酌改務令記事得實二十六年二月遷工部尙書十月以商人採輸楠木工部監收遲延部臣並應降調上念阿蘭泰

任事未久貸之二十七年二月調兵部尙書五月調吏部二十八年閏三月上以雨澤愆期命阿蘭泰同尙書徐元文覆審刑部獄囚奏減罪可矜疑者四十五人四月充三朝國史總裁官五月擢武英殿大學士三十一年陝西飢阿蘭泰遵諭同河道總督靳輔議運江淮糧石自黃河沂西安以備積貯明年噶爾丹侵擾哈密上命飭兵預備阿蘭泰與領侍衛內大臣索額圖等議增撥京兵一千及陝西督標兵三千付甘肅提督孫思克相機剿禦三十三年復議噶爾丹逼近圖拉請遣右衛駐守大臣費揚古郎坦等往剿尋以逆酋遠遁奏撤塞外新增驛站詔費揚古還軍歸化郎坦兵亦旋罷明年上出古北口巡歷塞外命阿蘭泰留京綜理章奏三十五年二月上親征噶爾丹於克魯倫河阿蘭泰仍留京與尙書馬齊佛倫直宿禁城九月隨駕出歸化城駐蹕黃河西界經理軍務十月以扈從勞賜內廐馬一奉命赴右衛卹賞隨征官兵奏免大同及滿洲蒙古漢軍借支銀兩俱稱旨三十六年六月充平定朔漠方略總裁官八月噶爾丹之台吉丹濟拉來降上駐蹕翰特穆爾嶺御氈幄屏左右召丹濟拉入見阿蘭泰引郎中阿爾法隨入侍上命之出及丹濟拉退召阿蘭泰諭曰爾偕降人人以防不測此意甚善朕令爾

出欲推誠以示不疑耳三十七年阿蘭泰同大學士伊桑阿以年老善忘奏請簡員辦理閣務上曰大學士最爲重任必平坦雍和任事謹慎者方爲稱職至於記事學士可分任之三十八年五月因伊桑阿乞休諭阿蘭泰曰爾與伊桑阿自任閣務以來凡事推誠布公不惟朕知之天下無不知者雖以年老求罷朕不忍令去也九月病劇上欲臨視遣皇子先往而阿蘭泰已卒爲輟朝一日賜銀二千兩命皇子及內大臣往奠茶酒諭廷臣曰阿蘭泰宣力年久懋著勤勞存心端誠持守廉潔應贈少保兼太子太保予祭葬如典禮諡文清四十六年十月上與大學士馬齊評論內閣舊臣稱阿蘭泰能強記且善於辦事云世宗憲皇帝雍正十年入祀賢良祠子富寧安亦仕至大學士別有傳

張英

張英江南桐城人聖祖仁皇帝康熙六年進士改庶吉士旋丁父憂回籍十一年授編修十二年充日講起居注官十五年遷左春坊左諭德十六年二月遷翰林院侍講學士九月同掌院學士喇沙里陳廷敬奉諭曰爾等每日進講啟導朕心甚有裨益嗣後天氣漸寒特賜爾等貂皮各五十張表裏緞各二十四匹十月諭大

學士等曰朕不時觀書寫字欲選擇翰林侍左右講究文義伊等在外城宣召難以卽至著於城內撥給閒房在內侍從尋命英直南書房賜第西安門內十八年轉侍讀學士十九年四月諭吏部曰朕萬幾之暇留心經史雖遜志時敏夙夜孜孜而研究闡發良資講幄之功日講起居注各官俱以學行優長簡備顧問所纂講義典確精詳深裨治理侍讀學士張英供奉內廷日侍左右恪恭匪懈勤慎可嘉爾部從優議敘尋允部議講官葉芳藹沈荃等加銜有差英授翰林院學士兼禮部侍郎銜二十年二月以葬父乞假諭曰爾素性醇樸侍從有年朝夕講筵恪恭盡職茲因爾父未葬具疏請假朕念人子至情忠孝一理准假南旋特賜白金五百兩表緞二十疋旣旌爾勤勞兼資墓田之用爾其欽悉朕惓惓至意又諭禮部如英品級予其父乘轡卹典二十五年三月授翰林院學士兼禮部侍郎銜四月命教習庶吉士閏四月與內閣學士徐乾學並諭稱學問淹通宜留辦文章之事令吏部勿開列巡撫十二月遷兵部右侍郎二十六年正月同內閣學士韓荃奏進纂成孝經衍義得旨頒發六月調禮部右侍郎兼翰林院學士銜九月轉左仍兼翰林院學士銜又兼管詹事府詹事十一月充經筵講官二十七年正月給



事中陳世安疏劾英與禮部尙書張士甄侍郎王颺昌遇孝莊章皇后大喪不親督司員檢閱舊章一切典禮令司員具稿齎送滿堂官起奏不會同詳慎參訂或屢請不至卽至亦默無一言問有朝臣造問恭祭時日跪送儀文齋宿舊例茫然輒謝不知偷安自便闕冗無能請嚴加處分以警凜曠命自行回奏尋奏臣士甄颺昌每日在午門前齊集臣英朝夕在永康門外兼有奉旨與翰林院同辦之事俱未敢偷安凡典禮有應稽舊章者親率司員檢閱有應滿漢堂官公同商酌者未曾推諉並無屢請不至之事至恭祭日期跪送儀文及齋宿之例一經奉旨卽知會所司俱遵行無誤亦未曾有朝臣相問對以未知也惟是臣等素無才能乞賜處分爲不職者戒疏下吏部察議以未與滿堂官同在一處商稿啟奏應各降五級調用得旨從寬留任二十八年十二月擢工部尙書仍兼管詹事府二十九

年六月兼翰林院掌院學士並管詹事府七月調禮部尙書仍兼翰林院掌院學士十月以編修楊瑄撰擬陣亡都統公佟國綱祭文引用悖謬英看閱不詳審改正部議降四級調用得旨革去禮部尙書仍管翰林院詹事府三十年六月教習庶吉士三十一年十月復禮部尙書兼管翰詹如故三十三年三月以編修黃叔

琳庶吉士狄億等十一人試國書生疏諭責教習不嚴下部察議應革職得旨張英從寬降三級留任旋與掌院學士常書同奉命教習庶吉士三十五年上親征噶爾丹至拖諾山凱旋英同常書奏請賜觀御製親征朔漠紀略俾得敬慎編纂垂諸簡冊從之先後充國史一統志淵鑿類函政治典訓平定朔漠方略總裁官三十六年三月同尙書熊賜履爲會試正考官七月以老病乞休得旨慰留十月辭兼管翰林院詹事府允之三十八年十一月授文華殿大學士兼禮部尙書四十年十月乞休得旨卿才品優長宣力已久及任機務恪勤益勸眷倚方殷覽奏以衰病乞休情詞懇切准以原官致仕瀕行賜宴暢春園諭部令沿途驛遞應付毋限常額先是御書篤素堂匾額以賜英名其所著爲篤素堂文集四十四年逢上南巡迎駕淮安疊奉御書謙益堂葆靜匾額並聯幅畫卷銀千兩以賜隨至江寧上將旋蹕以在籍臣庶籲請旨留一日英復奏請得旨念老臣懇求諄切准再留一日啟行四十六年迎駕清江浦仍隨至江寧賜御書對聯世恩堂匾額及書籍人壽亦允英奏請多留一日四十七年九月卒於家年七十有二遺疏至得旨張英久侍講幄簡任機密老成勤慎始終不偷予告後朕念其衰年屢諭旨令勉

加調攝忽聞病逝深切軫悼下部議卹賜祭葬加等諡曰文端世宗憲皇帝御極贈太子太傅雍正八年入祀賢良祠今上御極晉贈太傅子廷玉官至大學士別有傳

吳璵

吳璵字伯美山西沁州人也順治十六年進士選授河南確山縣知縣邑遭明季流寇殘破璵撫循招徠戶口墾田歲益以方略捕獲盜魁戴騰宇杖殺之大軍征雲南邑當孔道輿馬糧餉先事嚴辦而民不煩康熙十三年以卓異入爲吏部主事歷陞郎中十六年陞鴻臚少卿尋轉光祿寺卿通政司右參議二十年特擢爲右通政二十一年任太僕寺卿越三月擢左副都御史請復敕督撫巡方疏曰令甲督撫於命下之日卽不許見客莅任守令不得參謁上官凡有舉劾不過據道府揭報及胥吏訪聞愛憎毀譽真僞相亂督撫無由知革火耗而火耗愈盛禁私派而私派愈增請敕直省督撫親歷各屬體驗採訪或謂督撫巡方勞擾百姓夫督撫賢則必能禁送迎卻供應如其不肖雖端坐會城而暮夜之饋送踵至矣豈獨巡方足以勞民哉又疏曰巡撫及巡守道無一旅之衛而提鎮各建高牙前日

撫臣如馬雄鎮道臣如陳啟泰雖懷忠秉義空拳莫施向使各有兵馬奚至束手  
宜及此時急復舊制使巡撫巡守道仍各管兵馬減提督增總兵分一鎮爲數鎮  
以聽督撫節制則無尾大不掉之患矣二十八年四月調任兵部右侍郎十月命  
巡撫湖北湖北自裁兵之變黠猾率指仇人爲賊黨株連不已璵概不究訊懲其  
妄訐者人心大定涖勵所屬郡縣俾爲良吏怙終則糾繩無少貸陝西飢流民入  
湖北令有司分賑全活數萬人三十一年上念陝西西安雨水不調襄陽地近西  
安命截留湖北漕米十萬石貯荊州備賑旣而命以荊州兵船載運至襄陽璵與  
糧道王道熙議以兵船灣泊大江必下到漢口溯流西上到澤口接替上行方抵  
襄陽計程二千餘里今原運漕船將次撤回莫若乘夏水令原船順道運赴襄陽  
僅七百餘里卽以便宜行具奏疏入上嘉之八月以內憂去任賻贖一無所受曰  
非吾母志也三十三年四月湖廣總督員缺上以吳璵有守有才特用爲湖廣總  
督三十四年奉旨酌裁湖廣額兵璵區畫得宜人情帖然武岡州牧激民爲變立  
捕其爲首者置之法而劾罷州牧故事土司見州縣吏不敢抗禮後大吏稍稍優  
遇之漸以陵夷璵至饋遺不納飭謁見長吏如故事無敢肆者奏增湖廣鄉試解

額上命并增各省解額三十五年六月陞左都御史既視事自戒曰昔賢有言司風紀者當養人廉恥不專以彈劾爲能吾謬掌臺端要在正己率屬其可見事風生以褻憲體乎三十六年充會試總裁是歲五月上北征回鑾顧迎駕諸臣褒左都御史吳璵及河道總督張鵬翮居官之廉翌日又諭諸臣曰吳璵居官無論是其屬官非其屬官及所參革之人皆以爲清官好官百姓亦莫不感服閱數日以璵爲刑部尙書而以鵬翮爲左都御史三十七年七月進保和殿大學士兼刑部尙書璵熟於朝廷故事中外章奏可否見輒洞然其有往事可援據者雖久而不忘奏對皆竭忱悃上每稱善所薦引皆廉能吏三十九年會試璵以右臂偏枯引疾特命爲總裁官六月御書風度端凝額賜之四十一年具疏乞休大學士伊桑阿代爲奏請上曰吳璵爲人誠實豈可聽之去嘗以御臨米芾千字文賜璵題其後曰吳璵爲人寬厚和平持己清廉先任封疆文武軍民受其實惠者至今頌之朝中之事面折廷諍必得其正朕甚重之故書於後以紀其能得大臣之體四十四年卒於任璵居政府室無妾媵口不言清每語任外吏者曰地有遠邇俗有淳澆然愛財惜命民情則一能體此念自爲良吏矣遺疏入上遣重臣奠茶酒予祭

葬如典禮諡文端所司奏大學士缺上以瑛喪未歸縣缺弗補諭曰朕心不忍翰林院奏所撰祭文諭曰大學士吳瑛好處甚多敕改撰其文有曰潔己奉公正身率屬總憲綱而丰裁卓立掌邦禁而讞獄持平慎以居躬清能容物云雍正十年詔入賢良祠崇祀子時謙康熙三十三年進士次時訥時諫時詠

### 吳正治

吳正治湖廣江夏人順治五年進士改庶吉士八年八月授國史館編修十一年八月充順天鄉試副考官十月丁母憂十五年正月起補原官二月遷右庶子五月特簡翰林官十五人外轉正治預焉六月授江西南昌道十六年閏三月遷陝西按察使十七年三月以正治由翰林官外轉練習有年詔內陞五月授工部侍郎八月調刑部康熙五年七月請假省親七年十月補工部左侍郎八年二月丁父憂歸十年五月補兵部督捕左侍郎十一年十一月充經筵講官十二年二月擢都察院左都御史三月疏言緝逃事例首嚴窩隱一有容留雖親如父子但經隔宿卽照例治罪使小民父子視若仇讐一經投止立時拏解若係三次在逃之犯解到必當擬絞是甘心置之死地而不恤也伏思律有親屬互相容隱之條惟

叛逆者不用此律夫逃人乃旗下家人之事情弊與叛逆輕重懸殊在律原無父子不准容隱之語今縱不便從寬亦當稍爲分別請嗣後遇有父子窩逃被旁人舉發者逃犯照常治罪免坐窩隱若容留逾旬父子首報解部者逃犯照自首例減罪則首報者多逃人易獲朝廷之法與天性之恩兩不相悖矣又疏言今歲雨澤愆期皇上恤民念切方事祈禱而甘霖旋應小民正可服勤農業不宜以得已之役致妨民務近者樞臣勒布奉命會同直隸巡撫金世德酌設玉田灤州霸州雄縣駐防旗兵因議蓋造營房伏思鼠竊剽掠有地方文武各官捕治不煩添設旗兵若成羣大盜又非僅添數十旗兵遂可撲滅雖設兵原以安民而愚民無知一旦驟聞添設未免心生疑畏至於蓋造營房縱不至占取民屋而工作方興未免勞民動衆應暫停止俟秋成農隙時酌量舉行疏並下部議從之五月遷工部尙書九月調禮部尙書十三年三月應詔舉廉能疏薦原任給事中周體觀原任知州侯紹岐下部議起用十五年充會試正考官十八年三月正治自陳乞罷諭嘉其端勤誠慎慰留之二十年十月授武英殿大學士時重修太祖高皇帝實錄編輯三朝聖訓大清會典一統志平定三逆方略正治並充總裁官三十五年實

錄告成加太子太傅二十六年正月乞休命以原官致仕三十年閏七月卒於家  
年七十有四賜祭葬如例謚文僖

### 陳廷敬

陳廷敬山西澤州人順治十五年進士改庶吉士初名敬以是科館選有同姓名  
者奏改廷敬十八年充會試同考官尋授祕書院檢討康熙元年告假歸省四年  
補原官八年遷國子監司業洊陟侍講學士十一年充日講起居注官十二年轉  
侍讀學士充武會試副考官十四年遷詹事十五年擢內閣學士充經筵講官十  
六年正月改翰林院掌院學士教習庶吉士九月同掌院學士喇沙里侍講學士  
張英奉諭曰爾等每日進講啟迪朕心甚有裨益嗣後天氣漸寒特賜爾等貂皮  
各五十張表裏緞各二疋十七年正月詔舉博學鴻儒廷敬薦原任主事汪琬召  
試一等授編修七月廷敬偕侍讀學士葉方藹入直南書房十一月丁母憂上遣  
學士二員慰問齋賜奠茶酒諭禮部曰陳廷敬侍從勤勞其母准照學士品級賜  
卹二十年服闋補原官二十一年充會試副考官時副都御史余國柱以滇南平  
定請釐定樂章禮部翰林院會議郊壇宗廟仍循順治元年之舊朝會燕饗宜更



定廷敬撰擬十四章旨下所司肄習二十二年遷禮部右侍郎尋轉左二十三年正月調吏部右侍郎管理戶部錢法八月疏言自古鑄錢時輕時重未有數十年而不改易者今日民所不便莫過於錢價向日每銀一兩易錢一千今則僅得九百其故由燬錢作銅夫銷燬制錢其罪至重然而不能禁者厚利之所在也銀一兩僅買銅七斤而銷錢一千得銅八斤十二兩奸人以為射利之捷徑錢安得不日少而日疵乎順治十年因錢價賤壅滯改舊重一錢者為一錢二分五釐十七年又增重為一錢四分所以杜私鑄也今禁私鑄而私鑄自如應改重為輕則燬錢之弊不禁自絕近來產銅之地收稅過重致開採寥寥並宜停其收稅聽民開採則銅日多而錢價益平矣疏下部議行九月擢左都御史二十四年正月疏言貪廉者治理之大關奢儉者貪廉之根柢欲教以廉先使之儉古者衣冠輿馬服飾器用之具婚喪之禮賤不得踰貴小不得加大今或等威未辨奢儉之風未除機絲所織花草蟲魚時新時異貧者循舊而見嗤富者即新而無厭轉相慕效積以成風由是富者黷貨無已貧者恥其不如冒利觸禁其始由於不儉其繼至於不廉好尚嗜欲之中於人心猶水之失隄防而莫知所止乞敕下廷臣博考舊章

官員士庶冠服衣裘飾用之制婚喪之禮有宜更定者斟酌損益務合於中制度既定罔敢凌越則節儉之風庶可漸致疏下王大臣議謂儀制久頒無庸更定得旨服飾諸項久經定例禁飭近見習俗奢靡應用僭亂者甚多皆因所司視爲具文嗣後須切實奉行務須返樸還淳恪循法制以副朕敦本務實崇尚節儉至意九月疏言水旱凶荒堯湯之世不能盡無惟備及於豫而調當其急故民恃以無恐臣維報免災荒聖意之所垂念者敢獻其末議如山東省去年九月題報濟寧海豐霑化水災情形戶部議覆行令委官踏勘十一月以踏勘成災分數應蠲錢糧冊結具題戶部議覆行令分晰地畝高下今年四月以並無捏報分數具題戶部覆准蠲免德音下逮近省已逾半年遠省將不止一載如此其遲回者所行之例則然耳臣愚謂被災分數卽見地畝高下既有冊結可據卽宜具覆豁免上宣聖主勤民之意下慰小民望澤之心中不使猾吏奸胥緣爲弊竇勿循舊例爲便疏下部議令嗣後巡撫題報情形後速分晰高下具題戶部覆核無舛卽准其蠲免又疏言督撫之職在察吏察吏欲令民安非明於擊斷之爲能盡其職也必先嚴禁令謹科條使民遷善遠罪至於刑清政簡之爲能盡其職也孔子不云乎上

教之不行罪不在民也故欲使民不犯法而刑辟衰止莫先於行上之教欲行上之教繫惟督撫是問督撫曰是將在羣吏夫吏果廉能無敢有加派火耗毋敢贖貨於詞訟毋敢賤削夫富民然後一意行上之教而民不罹於刑今吏或不能誠有罪焉然非盡吏之罪也上官廉則吏自不敢爲貪上官貪則吏雖欲爲廉而不可得凡所爲加派火耗贖貨賤削日以曲事上官之不暇而又何有於行上之教使民不罹於刑雖吏勉強行之而民習見吏之所爲多不法也曰是惡能教我誰其從之是教之不行刑之不止吏爲之也吏之爲之者督撫使之然也方今要務在於督撫得人爲督撫者不以利欲動其心然後能正身以董吏吏不以曲事上官爲心然後能加意於民民可徐得其養養立而後教可行歷代以來有講讀律令之法皆周禮之遺意爲教民之要務我皇上聖諭十六條頒行已久而鄉村山谷之民至今尙有未知者宜通飭督撫凡保薦府州縣官必確察其無加派火耗無贖貨詞訟無賤削富民每月吉集衆講解上諭實心奉行者爲開具事迹所最先如保薦不實加嚴處分俾知功令之重在此顧名思義觸目驚心以導羣吏而皇上之考察督撫則以潔己教吏吏得一心養民教民爲稱職使賢者知勉而否

者知懼洗滌舊染以幾刑清政簡仰副聖主惓惓求治之心疏並下部如所請通飭督撫嗣後保舉開列實迹以無加派火耗等事爲第一條實心奉行上諭每月吉聚衆講解爲第二條如保薦不實督撫降二級調用司道府降三級調用定爲例又疏劾雲南巡撫王繼文當凱旋大兵在滇之時動支庫銀採買米石草束及凱旋後以所存米抵給本省官俸所存草抵給驛站前後銀數贏縮相懸卽非侵沒入己而虧損庫銀幾至百萬溺職不忠何以自解疏下部嚴察以抵給官俸驛站銀數繼文尙未題銷責令改照採買原數具題二十五年閏四月同學士徐乾學奉旨覽卿等奏進鑑古輯覽具見盡心編纂博採考訂勸戒昭然有裨治化朕心深爲嘉悅書留覽時纂輯三朝聖訓政治典訓平定三逆方略皇輿表一統志明史廷敬並充總裁官九月遷工部尙書二十六年二月調戶部九月調吏部二十七年二月法司逮問貪贖劾罷之湖廣巡撫張汧因汧未被劾時曾遣人齎銀赴京詰其行賄何人初以分餽甚衆不能悉數旣而抵出尙書徐乾學少詹事高士奇及廷敬會奉諭此案若嚴審牽連人多就已經審實者卽可完結於是置弗問並詳徐乾學高士奇傳廷敬疏言臣無他才能惟早夜兢兢思自淬勵不徇親

黨不阿友朋上恐辜聖主殊恩下欲全微臣小節乃至積有疑讐飛語中傷如張  
汧一案者汧雖臣戚涇渭自分嫌疑之際尤臣所慎汧既敗潰遂疑及臣積疑成  
恨語涉誣染假使臣稍有私於汧爲之庇護則汧必深德於臣豈肯扳連幸蒙聖  
明洞照一付盈庭公論使臣心迹可白名節得全破腦剗心未足爲報獨念臣備  
伍於朝宜擇所處詎可抱戾猶廁班行自被謗以來神志摧沮事多健忘奏對失  
其常度雖皇上不加譴責而臣心實難自安且臣父年八十有一倚閭懸望伏乞  
聖心憐憫准與回籍得旨覽卿奏情詞懇切准以原官解任其修書總裁等項著  
照舊管理二十九年二月起爲左都御史四月疏言臣再領臺班每告誡科道官  
凡有建白不許豫聞於堂官僚友以滋指使囑託之弊如中外臣僚果有奸貪不  
法因革事宜果有紀綱關係者則當切實指陳否則與其生事以塞責不若省事  
而擇言蓋毛舉細故剔摘成例馴至刻薄煩碎無裨聖朝寬大經久之規誠能持  
重養銳言不輕發而必當使不肖之徒有所警戒顧忌不敢恣意爲非此所謂省  
事而擇言乞天語申飭科道官勿以無補之言瑣瀆臣又念條奏貴乎簡明近見  
冗詞多而論事之言反少我皇上聖學聖治豐功懿德日盛月新史官書之儒臣

紀之而且萬方謳歌海外頌禱亦何待言官於條奏建白之時綴述數端既不足以揚盛美之萬一兼乖辭尙體要之義致煩乙覽必厭薄之特聖度優容不加詰責耳祈敕此後勿踵習前弊多引煩詞如有不遵量加處分庶幾息便僻之風而作謇諤之氣矣疏入報聞又諭曰科道官所奏之事是否可行自有裁定若必大事方令建言致進言者少非所以集衆思廣忠益也七月遷工部尙書三十一年八月丁父憂得旨慰卹如例三十三年十一月授戶部尙書三十八年十一月調吏部尙書四十二年二月充會試正考官四月授文淵閣大學士兼吏部尙書四十四年正月賜以詩題云覽皇清文淵閣大學士陳廷敬作各體詩清雅醇厚非積字累句之初學所能窺也故作五言近體一律以表風度四月上南巡召試舉貢生監於杭州蘇州江寧廷敬與大學士張玉書掌院學士接敕奉命閱卷四十九年十一月以耳疾乞休允之五十年五月大學士張玉書卒李光地疾未愈詔廷敬入直辦事五十一年三月病劇遣太醫院診視四月卒命皇三子允祉率大臣侍衛奠酒給銀一千兩治喪令各部院滿漢大臣各往弔御製輓詩云世傳詩賦重又云國典玉衡平諭內閣及禮部曰陳廷敬夙侍講幄簡任綸扉恪慎清勤

始終一節學問淹洽文采優長予告之後朕眷注尤殷留京修書仍預機務尙期長享遐齡以承寵渥遽爾病逝深爲軫惻其察例議卹賜祭葬如典禮加祭一次諡曰文貞

李天馥

李天馥河南永城人順治十五年進士改庶吉士十八年散館授檢討康熙七年丁父憂十年服闋補原官十一年充順天武鄉試副考官尋遷國子監司業晉翰林院侍講十四年遷侍講學士十五年正月轉侍讀學士十月充日講起居注官十二月遷詹事府少詹事十六年擢內閣學士十八年正月充經筵講官九月充武會試正考官十九年四月雨澤愆期特旨偕大學士明珠等會同三法司詳鞫已結重案減等發落二十年擢戶部左侍郎二十一年充會試副考官二十三年轉吏部二十四年充政治典訓副總裁二十七年擢工部尙書三月上召總河靳輔巡撫于成龍面詢河工事宜輔以高家堰外築重隄截水使出清口不令歸下河淮揚七州縣被災之田可出若開濬下河恐有海水倒注之患成龍以修下河開海口違特旨行今高家堰修築重隄停開海口縱上流水不至而秋霖暴漲天

長六合等處水無所洩海口仍應開二人各堅執一說上命會同九卿詳議天馥尋議下河海口當開高家堰重隄宜停上從之五月調刑部十二月調兵部二十年吏部行取知縣以科道用命大臣各舉所知天馥舉三河縣知縣彭鵬靈壽縣知縣陸隴其居官有聲諭曰陸隴其彭鵬服官廉介朕所素知俱准行取三十年轉吏部三十一年授武英殿大學士三十二年丁母憂回籍三十四年以原官入閣辦事三十六年充平定朔漠方略總裁三十八年七月疾上遣內閣學士特默德及太醫官三員存問賜尙方藥物十月卒遺疏入得旨李天馥簡任機務效力有年勤慎素著忽聞溘逝朕心深爲軫惻著遣散秩大臣一員待衛十員往奠茶酒應得卹典察例具奏尋賜祭葬如例謚文定子孚青康熙十八年進士官編修

### 徐元文

徐元文江南崑山人初冒姓陸後復本姓順治十六年一甲一名進士授修撰聖祖仁皇帝初御極元文以名列江南逋賦籍中降鑾儀衛經歷乞假歸里辯釋其事得旨復修撰康熙八年充陝西鄉試正考官尋遷祕書院侍讀九年擢國子監



祭酒充經筵講官先是世祖章皇帝詔天下選諸生文行兼優者與鄉試副榜貢生咸於國子監肄業康熙元年給事中晏楚南奏停鄉試副榜而優生亦久不復舉至是元文同監臣札祿等疏請敕學政閒歲一舉優生鄉試仍取副榜俾辟雍多經明行修之士又請定八旗官學生與廕監生並用筆帖式之例順天鄉試廣監生中式之額疏皆下部議行十三年擢內閣學士充重修太宗文皇帝實錄副總裁十四年改翰林院掌院學士充日講起居注官上嘗諭元文及諸講官曰經書屢經進講朕心熟曉通鑑一書事關前代得失甚有裨於治道宜次第進講元文請就朱子綱目中擇事之尤要者採取先儒之論參以臆斷演繹發揮按期進講是歲元文奉命教習庶吉士時其兄秉義以一甲三名進士授編修尙未散館元文因疏辭教習上特諭秉義勿預教習弗允辭十五年冬丁母憂歸十八年召爲明史監修總裁官元文既至疏薦明給事中李清耆儒黃宗羲二人宜延致訪問或老疾不能就道令有司錄所著以上又以史館需人薦曾舉博學鴻儒之未赴試者曹溶汪懋麟黃虞稷姜宸英四人及教習貢生萬言共襄編纂上俱允所請尋補內閣學士上以元文舊由內閣學士改掌院學士因諭閣臣曰內閣與翰

林官不妨互爲調用其行坐之處以進衙門先後定次第十九年擢都察院左都御史疏言逆藩吳三桂甘心反叛遺孽旦夕伏誅凡脅從之衆恩許自新若仍留本土既非永久之規而移調他方亦多遷徙之費統以別將則疑猜未化終涉危嫌攝之歸旗則放恣既久猝難檢束請以應補職及入伍者與綠旗將弁一例錄用餘俱分遣爲民則俸饟既減軍需益漸裕矣至耿精忠尙之信孫延齡舊隸將弁尤宜解散勿仍藩旗名目又言閩粵兩逆藩雖已翦除而夙日占奪民利干紀害政之事如鹽埠牙行市舶漁課渡稅諸類恐官司營伍或有一二因襲則閭閻積困終不能一旦豁除乞嚴飭督撫實力禁革吳逆荼毒生民滇南受禍尤酷藩莊藩田責軍民輸租較舊額加十有餘倍廣設礦廠擅銅鉛之利其橫徵苛斂未可悉數今大兵勢若雷霆滇民望救水火宜豫敕將軍督撫入境日卽爲蠲除又疏言安民察吏責在督撫其撫綏無術之處分宜依例劾治一切小事望誤並量與寬貸俾得早作夜思圖其重且大者不致苟且塞責藩臬兩司貪污督撫不糾劾宜以徇庇論又言舊例大計卓異之藩臬兩司赴京許條陳事宜由通政司奏進請嗣後於入覲時自行陳奏皇上親加諮訪可以鑒其才能之高下兼可知督

撫所舉之當否又請飭禁外省丁憂官遲報計期不卽奔喪及士大夫喪中聽樂易衣從吉諸薄俗又請申嚴虛捏田畝加糧徇縱窩販人口條例疏並下部議行先後劾奏福建總督姚啟聖縱恣譎詐杭州副都統高國相縱兵虐民兩淮巡鹽御史堪泰徇庇貪官候補御史蕭鳴鳳蔑禮輕狂等事皆讞鞫得實惟啟聖辯釋二十二年冬九卿會推道員王垓胡悉寧爲湖北按察使上以二人才具平庸詰問覆奏元文倡舉下部議降三級調用二十六年仍授原官充經筵講官疏請申明御史責成無論掌道與否分派各道理事凡法司會勘重案及各省揭帖有無疑實限三日說堂刑部見審重案先移送供詞查覈然後定稿巡城御史與旗人詞訟舊例概弗審理今旗人移居城外者多如係所管之地應一體審理疏下部並議行又劾兩淮巡鹽御史陶式玉穢鄙乖張官箴有玷式玉遂罷任是年十二月元文遷刑部尙書旋調戶部先是御史郭琇劾罷大學士余國柱懸缺未補二十八年五月授元文爲文華殿大學士會翰林院掌院學士李光地調授通政使司吏部開列應升各員以奏諭曰翰林掌院必文學淹通衆所推服者始克勝任凡翰林撰擬之文亦須掌院刪潤成章明代大學士有兼管之例徐元文著兼管

翰林院事時纂修平定三逆方略政治典訓一統志命元文並充總裁官二十八年九月副都御史許三禮劾元文兄乾學既解尙書任不卽歸里與親家高士奇招搖納賄元文入閣辦事後收江蘇按察使李國亮賀禮銀五千兩致有去了余秦檜來了徐巖嵩及五方寶物歸東海萬國金珠貢澹人之謠疏詳乾學傳元文奏辯曰三禮因參臣兄乾學不實知吏部已議降調遂誣列臣兄多款並誣及臣謂曾收李國亮賀儀五千兩臣與國亮雖曾相識初無交涉三禮以不根之詞橫肆污讒卽使孤竹復生何難指爲盜跖聖明在上必能洞察其誣國亮三禮皆可互質也臣初入閣時曾聞有人黏貼謗紙此乃忌嫉臣兄弟者布散流言以圖傾陷耳夫匿名榜帖律禁至重又屢奉嚴諭申飭地方不行察拏有處分定例三禮旣佐理憲綱聞知正宜痛疾乃公然引入奏章指爲證據則三禮必深知造謗之人與匿帖所由來矣總之臣兄弟直道自處不免招尤而不悅臣兄弟者遂欲一網盡之三禮向者考選之後曾請執弟子禮臣以於義不可始終拒之今於數日間忽而誣臣兄又忽而誣臣殊難測億臣荷恩深重一旦爲人排擊致無影之辭溷入聖聽跼蹐惶恐何地自容伏祈皇上立賜罷斥庶臣心稍安疏入報聞二十

九年四月詔修三朝國史以大學士王熙爲監修總裁官大學士伊桑阿阿蘭泰梁清標及元文爲總裁官五月兩江總督傅拉塔疏劾之曰凡爲人臣宜感戴上恩不負養育乃有不遵法度彼此施威朋比背恩以官職爲生理公然受賄擾害地方如巡撫洪之傑原任刑部尙書徐乾學大學士徐元文並伊等子姪穢跡謹臚列陳之一康熙二十八年徐元文升任大學士洪之傑詔媚製金字大扁一方旗桿二根旗上金鐫瑞協金甌泰開玉燭八字委督糧同知姚應鳳齎至徐元文門前樹立復送賀儀一萬兩徐元文之子舉人徐樹本親收一康熙二十八年原任松江府知府趙寧投拜徐元文門下餽銀一千兩徐元文之姪徐樹屏徐樹敏親收一康熙二十八年蘇松常三府採買青藍布解部以少價買多支銷銀一萬四千餘兩洪之傑趙寧徐樹本等分肥一徐元文之子徐樹聲自京到巡撫衙門稱有要緊密信因開門稍遲喝打門吏洪之傑聽聞忙卽大開中門鳴鑼擊鼓作樂迎進衙役路人皆爲恥笑一洪之傑於康熙二十八年因重犯減等案內部議革職蒙皇上寬宥降級留任而元文乾學冒恩以爲己力洪之傑將銀二萬兩令原任松江府知府趙寧送徐樹本收一康熙二十八年閩門外居民欽涑欽鼎丞

彼此爭訟徐樹敏見欽鼎丞家裕囑託巡撫令欽涑欽宸樞控告詐欽鼎丞銀一千兩交與伊家人徐孔昭李孔章兌收一徐樹聲兄弟前往蘇州府承天寺內瞰琅山房惡僧等富厚詐銀一千兩囑巡撫止留琅山房之僧餘房僧盡皆驅逐後被逐之僧及衆百姓爲留惡僧反將好僧逐出公憤怨憾一徐樹本唆王緝植之母告同縣監生李端匏久不葬親詐得李端匏銀四百兩一康熙二十九年葑門外果子行陸雲椿韓雲若二人爲爭行業買賣徐樹本詭令伊親湯機先湯在治生理勒得陸雲椿銀二百四十兩一徐樹屏庇護光棍徐長民將徐長民仇家生員黃中堅聲言必受其害嚇詐黃中堅銀四千兩田抵六百兩又將黃中堅交與光棍徐長民被毆折指一徐樹聲徐樹本等將伊銀米自六月放出於民十月交收起息銀每兩五六錢米每石五六斗重利刻剝貧民不能償還卽差家人打罵貧民難受致將妻子典賣畏其勢力不敢告理一徐乾學徐元文將伊子姪田地均填入別人名下每年拖欠錢糧不管官員議處以勢欺壓終不完納所以崑山縣知縣總爲錢糧革職降級不得升任者多一徐乾學於本年三月內回籍卽於四月內欲沽名譽囑託蘇州府貢監胡三錫周鄰詩等違例建造長生祠堂在於

虎邱山上赴巡撫衙門具控撫中軍遊擊楊鉉收送巡撫洪之傑一徐樹本樹聲樹屏樹敏家人徐孔昭高彬甫吳漢周曹爾玉蘇雲生金正昌等往來蘇城輪番更替馬弔演劇無虛晝夜勒索崑山知縣船夫承攬大小衙門事件蘇州府城東有毛上列西城有黃聖微閭門外有顧思誠處處差遣打聽有業之人控告信息蘇州民人稱爲拉絳擺渡船怨憾切齒無可奈何總之元文等至富至貴尙不知足以皇上之仁恩邀爲己力招搖權勢恐嚇通省官民顛倒是非得受銀錢又縱放如虎如狼子姪家人出入大小衙門擾害地方又復唆使爭訟重利累民收惡徒爲羽翼世世相扶以圖富貴而地方之大臣如巡撫洪之傑又趨附勢力獻媚應付有司皆畏無不逢迎官旣逢迎而累及小民矣若臣畏懼伊等親友門生之衆於其犯法害民至奸至暴不行題參有負聖主養育重恩難免大罪矣疏入得旨所參各款從寬免其審明徐元文著休致回籍三十年七月元文卒於家年五十有八所著有含經堂集

王揆

王揆江南太倉人康熙九年進士改庶吉士散館授編修十四年充山東鄉試正

考官十五年遷左贊善尋因病回籍二十三年補右贊善提督浙江學政二十五年疏參署龍泉令茅國璽違例擅投公文內藏印揭開薦武童周琚請敕部嚴處以肅學政得旨嘉獎國璽論罪如律二十六年任滿遵例以剔除十弊疏聞並奏親發學租以賑貧生勸建義學以興俊秀責重稟結以防代倩慎錄科舉以杜濫收等狀命回京供職尋遷侍講二十八年四月轉侍讀六月遷侍講學士二十九年充順天鄉試正考官三十年二月轉侍讀學士十一月擢內閣學士三十三年六月遷戶部右侍郎九月充武會試正考官三十六年充經筵講官三十七年轉左三十八年五月調吏部十二月奉命偕尙書范承勳王鴻緒等監修高家堰隄工三十九年回京四十三年十月授刑部尙書十二月河工告成議敘加五級四十四年以審擬溫處道黃鍾行賄作弊一案誤將應革職之吏部郎中陳汝弼擬絞降二級留任四十七年調工部四十九年四月調兵部十一月調禮部五十年晉文淵閣大學士五十二年三月恭慶萬壽賜冠服八月充會試正考官五十六年三月充纂修玉牒副總裁官五十七年揆同大學士馬齊等議上孝惠章皇后尊諡書寫脫誤部議降三級調用諭從寬留任先是揆倡議請立皇太子御史



陳嘉猷等因連名人奏諭揆等毋爲名起見六十年羣臣請舉慶典詔弗允御史陶爨等復請健儲上手書諭諸王大臣曰六十年大慶大學士王揆等不悅以朕衰邁謂宜建儲欲放出二阿哥伊等借此邀榮萬一有事其視清朝之安危休戚必且謂與我漢人何涉似此凶頑愚昧一無所知不顧身命宗族干犯叛逆之罪而行者亦不少王揆以伊祖王錫爵在明神宗時力奏建儲之事爲榮常誇耀於人不知羞恥王錫爵極力奏立泰昌在位未及兩月天啟庸懦稚子承統繼緒魏忠賢等擅權至愍帝不能保守明祚遂亡當時全不知孟子所云以天下與人易爲天下得人難之義故立泰昌耳亡國之賊王錫爵不能辭其罪也應剖棺斬首以祭神宗之陵神宗有靈必爲首肯王錫爵行事同時之人亦甚惡之故作詞曲極肆詆訾至我朝其孫又入叛黨受僞劄付稱爲總兵不久被擒朕宥其殄滅九族之罪止戮其身別無株連乃王揆不思圖報妄行陳奏其負恩可知矣二阿哥兩次立爲皇太子教訓數十年不能成就朕爲宗社及朕身計故嚴行禁錮所以不殺者恐如漢武帝之後悔致後人滋其口舌也朕並無可悔之處現今時常遣人存問齎賜佳物其子朕爲撫養凡此皆父子之私情不能自己所謂姑息之愛

人何得因此生疑耶王錫爵已滅明朝王揆又欲搖動本朝如此奸賊朕隱而不發可乎朕並無誅戮大臣之意大臣自取其死朕亦無如之何朕御極六十年慶賀典禮非不可受深知此等事故堅辭不允朕中心憤懣衆人虛誑請行慶典朕豈肯爲此乎於是廷臣奏言王揆身受聖恩至重至厚屢加擢用至大學士乃背負鴻恩結黨營私將國家最大之事應候乾斷者兩次妄行陳奏至使陶彝等紛紛入奏請革職治罪得旨朕所降諭旨爾等可持示王揆再行具奏尋奏臣等傳旨詢問王揆又不據實認罪巧飾虛辭請卽革職鎖拏重治其罪疏入留中越日上發疏出諭大學士等曰王揆等妄行陳奏俱云爲國爲君現今西陲用兵爲人臣者正宜滅此朝食此係目前顯然效力之處八旗文官俱以章京派往伊等雖係漢官有何不可將伊等暫停議罪著於此番軍前照旗員例委署額外章京遣往效力王揆年老著伊子詹事王燮清代往雍正元年以老乞休得旨卿才品優長宣力年久恪勤盡職倚毗正殷今乞休情辭懇切著以原品休致尋疏請歸里詔弗允三月上欲推恩大臣子弟部臣遵旨通列應得廕生之人因及揆諭曰朕卽位王揆卽具奏退避不必賞給三年諭大學士等曰原任大學士王揆先每向

人言曾在聖祖前奏免蘇松浮糧未蒙允行朕於宮中一一查閱並無此奏王揆受恩遇數十年官至台輔而於此事欲自沽美名背恩負義伊子王燮清發往軍前不思效力乃詔附年羹堯懇其奏令回京伊次子王燮鴻原係情願赴軍前效力亦賄囑年羹堯請以道員補用朕均未允王揆何所見聞朕於年羹堯惟言是聽而爲此奸巧之舉甚屬可惡著將王燮鴻發往軍前與王燮清一處效力六年揆卒乾隆元年召其子燮清還京命以原官管少詹事二年燮清爲父籲請賜卹諭曰原任大學士王揆當日不能深知聖祖默定儲位之心冒昧瀆奏固屬不合但伊身居政府爲國本起見尙屬分所應言今朕垂念舊臣加恩宥過可補給應得卹典尋賜祭葬如例

葉方藹

葉方藹江南崑山人順治十六年一甲三名進士授編修康熙十二年充日講起居注官十四年三月遷國子監司業五月授侍講仍充日講起居注官十月充順天武鄉試副考官十一月上以宋儒周敦頤太極圖義理精奧實前賢所未發命方藹撰太極圖論十五年正月遷左庶子五月授侍講學士十六年正月充孝經

衍義總裁四月轉侍讀學士十七年二月充鑑古輯覽皇輿表總裁五月充經筵講官七月入直南書房十二月遷翰林院掌院學士兼禮部侍郎十八年二月充會試副考官五月教習庶吉士並充明史總裁十九年四月尙書講義成方藹奏請頒發得旨尙書紀載帝王道法關切治理講幄諸臣講解明晰深於典學有裨卽刊刻頒行又諭日講起居注各官俱從優議敘五月加方藹禮部尙書銜十月上親講易經噬嗑卦辭方藹與講官庫勒納進所撰乾坤二卦總論上覽畢曰卦爻之義原各不同卽如噬嗑一卦中四爻主用刑者言初上二爻主受刑者言必得總論發揮方舉全卦之義了然諸卦可依此撰進二十年遷刑部右侍郎二十一年四月卒特遣刑部右侍郎庫勒納侍衛常保奠茶酒賜白金二百兩諭曰葉方藹簡侍講幄年久啟沃有益茂著勤勞著從優恩卹尋議加祭一次諡文敏

### 勵杜訥

勵杜訥直隸靜海人初以杜姓爲生員康熙二年纂世祖章皇帝實錄選善書之士杜訥試第一赴館繕錄告成議敘授福建福寧州州同命留南書房行走食六品俸十九年四月優敘內廷講官學士葉方藹等授杜訥編修旋充日講起居注

官二十一年授勳姓二十四年三月上命杜訥日侍點閱綱鑑二十五年三月與學士張英同侍點閱綱目全編十二月以御批通鑑綱目竣疏言皇上點閱載籍無間嚴寒溽暑卽巡幸駐蹕命臣捧簡進閱一如禁廷披覽之際評論古帝王政治得失文武張弛及進退人才邪正消長與夫諸儒舊說聚訟者親加剖決悉歸至當請頒發聖諭宣示史館以發涑水所未詳補紫陽之弗逮得旨勸杜訥朝夕侍從勤勞可嘉所奏著禮部翰林院會同議奏如所請二十七年遷右贊善二十八年轉左二十九年遷侍講改光祿寺少卿三十六年遷通政司參議三十七年七月遷太僕寺卿九月遷宗人府府丞三十九年十一月遷都察院左副都御史十二月疏言督撫大吏朝廷畀以百餘城吏治數千里民生責任至重若託詞鎮靜漸成悠忽所綜理不過期會簿書難保無忝封疆之寄請敕諸督撫年終彙奏若何察吏安民興利除弊以備清覽或開註不實治以欺罔之罪庶諸臣時時警勉不敢優游草率貽誤地方其所轄之藩司專掌錢穀臬司專掌刑名州縣之錢糧有無虧空定案之爰書有無駁審詳實并列則藩臬之優劣亦無遁情下部議從之又疏言提鎮責任匪輕邇來保送引見將弁時有騎射甚劣并年老之員屢

經特旨甄別臣思典戎要務首在考察將弁何至徇庇姑容請敕下該部將各提鎮所屬引見不稱旨之員彙冊進呈伏候聖裁并定處分庶提鎮咸知謹慎而將備亦難尸素苟容詔下部通行嚴飭四十二年四月擢刑部右侍郎十月卒於任年七十有六賜卹如例特給全葬後二年上駐蹕靜海諭曰原任侍郎勵杜訥向在南書房效力二十餘年爲人敬慎勤勞並無過失應予諡御書文恪二字賜其家雍正元年追贈禮部尙書八年入祀賢良祠十三年九月今上御極加贈太子太傅子廷儀官刑部尙書孫宗萬官刑部侍郎

韓莢

韓莢江南長洲人康熙十二年會試殿試皆第一授修撰旋充日講起居注官十月召至起居注館作太極圖說越三日諭以所作時文二首進呈明日復命悉呈平日文稿又召至宏德殿講大學先是世祖章皇帝命纂修孝經衍義未及成至是上詔儒臣蒐輯以莢專任纂修事得凡例目錄一卷經旨總要二卷衍義一百卷十四年典順天鄉試十五年遷右贊善次年三月轉左十月遷侍講十七年十月典順天武鄉試十八年乞假回籍二十三年九月補原官尋轉侍讀二十四年

二月上考試翰林親加詳閱莢列名第二尋遷侍講學士三月擢內閣學士二十六年復以病乞假回籍三十四年七月召至京充一統志總裁越二月擢禮部右侍郎兼翰林院掌院學士三十八年調吏部右侍郎三十九年充經筵講官擢禮部尚書教習庶吉士仍著兼掌院學士如故上嘗諭大臣曰韓莢天下才風度好奏對亦誠實又諭韓莢學問優長文章古雅前代所僅有也又諭韓莢所撰文能道朕意中事六月上以翰林官有極貧者作何施恩且職司文翰更無他事學道缺出應與郎中並差命院臣會同內閣議奏莢等議各省學道缺翰林官自侍讀以下開列職名仰候欽定其貧者月給銀三兩上俞允之四十一年十二月疏言秩宗要任所掌俱大典攸關非精強敏練莫稱臣素無政事才又半在直廬供奉顧此失彼必致曠誤特籲請聖恩解臣部務方今翰林諸臣皇上培養鼓舞濟濟多才臣學殖久荒靦顏爲長亦當引退但受知過深未展報效現今臣掌院事供奉一切文字記注與教習庶吉士外臣所領平定期朔漢政治典訓一統志併律例各館必以分身部務編輯稽遲如蒙聖度包容不以臣不才專待罪翰林臣當一心纂述竭盡微勞以少答知遇得旨卿才品優長簡任秩宗正資料理著照舊供

職不必以衰病求解部務并賜篤志經學潤色鴻業扁額四十二年十二月以病求免得旨韓莢以工於時文屢經擢用至禮部尙書前掌翰林院事時於庶吉士並不勤加教習每日率領飲酒以致庶吉士皆疏於學習至九卿會議之處不爲國事直言惟事瞻徇所行殊不逮其所學今自知其非引病求罷殊屬不合著仍留原任嚴飭行四十三年四月再疏乞解任上仍慰留之八月卒於官年六十有八賜祭葬如例乾隆十七年二月上諭內閣曰故禮部尙書韓莢生平種學績文湛深經術其所撰制義清真雅正實開風氣之先足爲藝林楷則從前未邀易名之典今著加恩追諡用示褒榮賜諡曰文懿

### 王士禎

王士禎山東新城人順治十五年進士十六年授揚州府推官聖祖仁皇帝康熙三年總督郎廷佐巡撫張尙賢疏薦其品端才敏奉職最勤總河朱之錫亦以委盤河庫綜覈精詳協助隄工剔除蠹弊疏薦下部敍錄內陞禮部主事遷本部員外郎八年司權清江關還遷戶部郎中十一年充四川鄉試正考官還丁母憂十五年六月仍補戶部郎中十七年正月召對懋勤殿諭吏部曰王士禎詩文兼優



以翰林用遂授侍講二月轉侍讀十月充順天武鄉試正考官十九年十二月遷國子監祭酒二十二年十月同司業劉芳喆疏言自漢高帝時以太牢祀孔子至唐宋元而隆以王號明化治間尊以八佾十二籩豆其改大祀而爲中祀則嘉靖九年張璁之議謂孔子生未得位不當舞八佾不知以位言之非但不得舞八佾併不得舞六佾乃前代尊崇之有加無已者以道德不以位也且禮祭從生者以天子而祀其師自當用天子禮樂乞敕禮臣與廷臣詳議籩豆樂舞之制又疏言從祀諸賢諸儒名號位次尙宜釐正如十哲之位自明嘉靖間議去封爵之後稱冉子者凡三未有辨別兩廡諸賢諸儒從祀者也至有明一代理學肇自霍州學正曹端其學以誠敬爲主禮部尙書章懋由博返約斂華就實國子監祭酒蔡清所著蒙引尤見窮理之功禮部侍郎呂柟左春芳贊善羅洪先刑部侍郎呂坤操履篤實咸有著書發明聖道此明儒之當從祀者也有絳州貢生辛全生值明末力以正學爲己任著書甚富以時代稍近未敢輕議乞敕進遺書或可仰裨聖學之萬一又疏言國子監所貯十三經注疏二十一史版刊自明初至崇禎十二年修補後迄今四十餘載不免漫漶殘缺宜及時鳩工修補併敕江南督撫察訪前

明南監經史版如未散佚卽行令學臣收貯儒學尊經閣中以嘉惠來學四疏並下部議部臣以籩豆樂舞名號位次應俟頒發會典遵循增祀諸儒及徵進遺書均俟明史告成覈定其經史南北版修補收貯事如所請行二十三年十月遷少詹事十一月奉命祭告南海二十四年請假歸里旋丁父憂二十九年正月補原官三月遷都察院左副都御史尋充經筵講官國史副總裁十月遷兵部督捕侍郎三十年二月充會試副考官三十一年八月調戶部右侍郎三十三年六月轉左充淵鑿類函總裁三十五年正月奉命祭告西嶽西鎮江濱三十七年七月擢左都御史三十八年六月御史郭金城奏裁冗員事下吏部同都察院酌定應留御史員數士禎言御史二十四員必不可減從之十一月遷刑部尙書四十年四月請假遷葬上諭廷臣曰山東人偏執好勝者多惟王士禎則否其作詩甚佳居家除讀書外別無他事可給假五月不必開缺十月仍赴京任事四十三年七月步軍統領託合齊以宛平縣民薛應元控訴捐納通判王五太醫院吏日吳謙送刑部治罪刑部奏王五逼索私債縱僕鬪毆革通判職吳謙不知情免議得旨下三法司嚴審王五係已革工部匠役改名捐納通判屢逞兇斃命應斬吳謙同謀

詐索應絞原審未得實之部臣降革有差士禎降三級調用九月左都御史舒輅等奏據革職刑部司員孫叔貽關福席爾璊赴訴原審王五吳謙先以取定口供續派辦稿有雲南司主事馬世泰囑開脫吳謙是以但擬王五流徙士禎同侍郎陳論謂一流徙一免議輕重太覺懸殊令改稿乃改流徙爲褫革請旨集質復得王府護衛色爾弼以開脫吳謙囑長史穆爾泰轉囑馬世泰狀各論罪如律士禎與陳論辯未受囑坐瞻循革職四十九年十二月詔加恩公事罪誤年臻耄耋在籍諸臣復士禎尚書銜五十年五月卒於家年七十有八所著有帶經堂集皇華紀聞池北偶談香祖筆記居易錄分甘餘話粵行三志秦蜀驛程隴蜀餘聞漁洋詩話國朝證法考諸書兄士祿順治十六年進士官考功司員外郎士祐康熙九年進士並能詩士禎爲編錄成集今上乾隆三十年四月諭閣臣曰原任刑部尙書王士禎積學工詩在本朝諸人中流派較正從前未邀易名之典宜示褒榮以爲稽古者勸其察例議證賜證文簡其名久作士正三十九年十二月諭曰王士正之名原因恭避廟諱而改但所改正字與原名音太相近恐流傳日久後世幾不復知爲何人今改爲士禎庶與其弟兄行派不致混淆凡各館書籍記載俱

一體照改

宋犖

宋犖河南商邱人大學士宋權之子世祖章皇帝順治四年犖年十四應詔以大  
臣子列侍衛逾歲考試注銓通判聖祖仁皇帝康熙三年授湖廣黃州通判八年  
丁母憂十六年補理藩院判十七年遷刑部員外郎出權贛關還遷本部郎中二  
十二年授直隸通水道二十六年二月擢山東按察司十月遷江蘇布政使司庫  
虧銀三十六萬六千餘兩犖揭報督撫察劾前布政使劉鼎章欽文二人分追完  
補二十七年二月犖以錢局銅斤舊係各關採買每斤定價一錢康熙二十三年  
令湖廣江西安徽江蘇動支蘆課購買每斤定價六分五釐江蘇非產銅之地越  
江西湖廣各關購買每斤至一錢六七分較定價昂貴過半牒請巡撫田雯奏停  
採買部議不准得旨再議仍照各關每斤一錢例行四月擢江西巡撫六月行至  
彭澤聞江西撫鎮標兵赴湖廣會勦叛賊夏逢龍次九江以乏餉譁犖檄發湖口  
縣庫銀一千兩委道員齎給行月軍糧衆兵乃前進犖至南昌甫數日有首告舊  
裁督標兵李美玉袁大相散布號紙煽誘三千餘人謀劫倉庫連合夏逢龍者犖

遣遊擊趙永吉擒至鞠實卽斬以徇衆疏言擒獲叛犯李美玉袁大相謀刦倉庫合夥湖廣供吐確鑿卽押赴市曹正法以慰人心以安反側其煽誘多人未經指實應免深究事下所司知之十月疏言江西每年採買竹木紫竹取給於饒州貓竹通派於閩省檀楠木輪解於南康九江名雖官捐其實累民請嗣後動支正帑並嚴禁借端措勒等弊又報寧州宜春等十二州縣夏末徂秋亢陽不雨兼之螟螣爲虐委令各府確勘輕重分數請蠲十分之二三十二月疏言各省在監罪囚俱有支給口糧之例雖起解囚徒向無額設錢糧伏讀康熙二十六年恩詔凡解部及遞解外省各犯按程給與口糧仰見聖慈矜惻無微不至周江右路當孔道解部及遞解各犯絡繹不絕應給何項糧米尙未有部文請照囚糧之例亦在常平倉內交給按日行五十里爲一程每犯一名日給米一升其道里遠者逐程加給二十八年四月疏言近奉諭旨藩庫於年終奏銷時巡撫躬自察盤如有虧空立行糾參法嚴且密誠萬世可遵也惟是糧驛二道各有經收支放既不在藩庫之內爲巡撫察盤所不及而各府庫內亦有收貯錢糧似應一併清查請於每年奏銷及離任之日二道責成藩司察盤知府責成道員察盤可永杜侵挪虧空之弊

三十年三月疏言近來在外漢軍文武官員解任裁缺者並其家口概催歸旗既立限期復令取經過州縣印結逐程遞送點驗家口竟與罪犯相似所當區別定例凡因贓私黜革及侵挪錢糧解部比追者仍逐程遞送取結其丁憂降調裁缺候補等員免其遞送取結止給到京定限咨文自知違限處分不敢後期益感戴皇仁體恤矣諸疏並下部議行三十一年六月調江蘇巡撫三十五年七月疏報蘇松所屬沿海地因六月朔遇颶風驟雨潮水泛溢田舍被淹俱經地方撫綏勸諭補種惟崇明縣田蕩被淹勘確成災九月疏報江寧府屬之六合上元句容松江府屬之上海鎮江府屬之丹徒七月內山水陡發秋禾俱淹請照例蠲免並動支貯穀賑恤飢民又疏報淮揚徐三屬二十州縣及三衛濱河之地值秋雨連綿黃淮交漲田地俱沈水底其被災十分田畝額賦請破格全蠲并移江寧倉米十萬石鎮江截留漕米九萬五千餘石鳳陽倉麥六萬六千餘石散賑事並得旨允行三十八年二月上南巡至蘇州御書懷抱清明仁惠誠民兩扁額賜之四十二年三月南巡回鑾諭嘉其居官安靜四十四年四月駐蹕蘇州賜福壽二大字題云江寧巡撫宋犖年逾古稀步履壯健故特書福壽二字賜之又允犖請御書世

有令儀以額其家祠。華在任三逢巡幸，疊蒙寵錫無數。詳見奏謝疏中。先是請豁吳縣太湖旁坍地一千七十餘畝，額糧一百八十石，銀一百七十兩，有奇。戶部議湖旁坍沒數逾十頃，似有虛捏。駁令詳察。至是復以積年沈水額賦難徵，覆請得旨允豁。除五月疏言蘇松常鎮四府州縣有本任經徵錢糧完及九分以上，因接徵前任舊欠不完，概行降調者，請改爲降留部議。不准。命九卿等再議。准留任一年。催徵如仍不完，乃調用。十一月內陞吏部尙書。四十七年閏三月，以衰老乞罷。上曰：宋華才品優長，前者巡撫江西，敬慎持己，加意愛民。在任十有四年，地方相安無事，簡秉銓衡，正資料理，覽奏以衰老求罷，情詞懇切，著以原官致仕。瀕行賜詩有云：久任封疆，事蘇臺淨點塵。五十二年三月赴京祝聖壽，詔加太子少師。賜詩有：世家耆德自天全之句。九月卒於家。年八十。遺疏至，得旨：宋華宣力年久，敬慎自持，勤勞素著。予告以來，尙期優游，頤養忽聞溘逝，深爲軫惻。下部議卹賜祭葬如例。

湯右曾

湯右曾，浙江仁和人。康熙二十七年進士，改庶吉士，授編修。三十五年充貴州鄉

試正考官三十九年四月揀選編修檢討爲科道右曾與焉遂授刑科給事中十  
二月兩廣總督石琳奏瓊州生黎出犯寶亭營傷害兵丁由文武各員婪索起釁  
上命侍郎凱音布學士邵希穆往勘右曾因疏言臣聞揭帖有瓊州文武官遣人  
往黎崗採取花梨沈香滋擾起釁多款總督石琳巡撫蕭永藻提督殷化行平時  
毫不覺察恣其貪毒且黎人拒鬪事起於上年十二月遲至一載始行題報其扶  
同掩飾希圖欺隱可知若不嚴加處分恐效尤貽誤疏入得旨令石琳蕭永藻殷  
化行回奏各自引罪下部察議降級有差四十年正月右曾疏言臣昔在翰林曾  
充三館纂修官而在政治典訓館爲最久伏見皇上敬天法祖勤政愛民盛德大  
業備具此書內外大小臣工咸有天語丁寧提撕警覺以至國家禮樂兵刑典章  
制度下及民間日用飲食纖悉周詳請敕刊頒行天下又臣昔常分直內廷幸獲  
仰窺御製文集窮千聖之精微彙百家之體製上闡道統下該治法盡善盡美互  
古未有今儒臣校對繕寫將竣祈賜刊發以慰四海想望以垂萬世準則疏下所  
司知之四十一年三月轉戶科掌印給事中九月疏言伏讀上諭制錢鑄小以來  
私鑄仍不止令九卿確議欲使錢法流通便民剔弊也旬日聚議大抵謂應改鑄



大錢其舊鑄小錢二年之後概行銷燬臣以爲改鑄大錢誠宜仰遵聖諭若銷燬小錢民間必致驚擾大戶貯錢多者其苦無論矣小戶或一二千文以爲資本上養父母下畜妻子甚至肩挑負販之人不過四五百文終年衣食其中一旦廢置不用則貧乏失所卽謂暫許行使一二年始行禁斷民間知二年之後此錢不用誰肯行使旣不行使失業必多至謂官照定價收作廢銅則錢價貴而銅價賤貴者忽變而爲賤貧民已恐苦累又況收受之際吏胥指勒奸弊叢生今戶工二部現存制錢八十四萬串有奇若銷燬則工料耗折甚多二年中鑄出新錢不過一百萬串有奇豈能遍及各省新錢無多而舊錢已燬奸民乘間圖利恐私鑄愈繁錢法愈壞是乃萬萬不可者古者患錢重則改輕而仍不廢重爲子權母而行患錢輕則改重而亦不廢輕爲母權子而行今宜仿此遺意令新鑄重錢每串作銀一兩而舊鑄輕錢每串作銀七錢並聽行使積至歲月旣久大錢流通則小錢自不行矣疏下九卿詹事科道會議照康熙二十三年定例每文重一錢四分如右會所請並行弗禁四十二年充會試副考官四十四年提督河南學政四十七年九月河南巡撫汪灝疏述右曾在任三年至公至明杜絕請託無論生童正案從

不染指分毫卽告頂遊學亦未嘗稍存苟且至於敷教則寬嚴相濟取士則盡拔孤寒其清勤自勵之衷真能以皇上之誥誠爲心疏下部知之會吏科以內陞外轉屆期請詔予右曾內陞尋疏言歲科兩試遍歷各郡陝州與葉縣舊爲中學各取進十二名今戶口額賦倍於舊爲大學之信陽州內鄉縣請改爲大學取進十五名疏下部議從之四十八年陞奉天府丞四十九年遷光祿寺卿五十年累轉太常寺卿通政使五十一年四月授翰林院掌院學士充日講起居注官五十二年四月充經筵講官五月擢吏部右侍郎兼翰林院掌院學士先後教習壬辰癸巳乙未戊戌辛丑五科庶吉士六十年六月諭九卿等曰湯右曾在九卿會議處頗多言所薦之人亦過多著解退吏部侍郎其學問尙優可專管翰林院掌院學士事十月疾劇遣太醫診視六十一年正月卒年六十有七所著有懷清堂集



清史列傳 卷十

大臣畫一傳檔正編七

麻勒吉

麻勒吉滿洲正黃旗人姓瓜爾佳氏先世居蘇完有達邦阿者當太祖高皇帝時來歸麻勒吉其曾孫也世祖章皇帝順治八年定滿洲蒙古與漢軍漢人分試之制麻勒吉以繙譯取中舉人明年會試第一名殿試一甲一名授修撰十年五月上諭吏部曰修撰麻勒吉同庶吉士教習有志向學兼通滿漢文義其氣度亦老成遇侍讀學士缺卽行推補於是遂授弘文院侍講學士十一年擢弘文院學士十二年始設日講官以麻勒吉同學士胡兆龍等充之旋同學士禪岱胡兆龍李蔚教習庶吉士時編纂太祖太宗聖訓又詔刪訂歷代通鑑並充副總裁十四年九月充經筵講官時僞秦王孫可望赴經略洪承疇軍納款詔封爲義王麻勒吉充正使偕副使胡兆龍奇徹伯齋敕印至湖南遂攜可望入覲初麻勒吉與直隸總督張元錫同官學士有年及使還遇於順德呵辱之元錫憤懣是夕引佩刀自

勿不殊巡撫董天機取其手書入奏疏有上官過客苛索陵虐語上遣學士哲庫納侍郎霍達等往察其事元錫復疏言正使麻勒吉於候迎時面斥失儀又責以前此南行不一出迎且云在南方時洪經略日有饋遺何等盡禮臣當使臣啟行時方往閱登萊海汛勢難舍未竟之事來而復往其苛求已可概見又副使奇徹伯索臣駝騾臣因賄賂干禁不與其蓄怒自難解釋此臣所以引佩倉皇也疏入得旨張元錫以總督大臣輕生自刎必有逼迫情由朕早鑒及故特行詳察覽奏具悉實情麻勒吉等奉命出使敢於逼迫大臣任意妄行深負委任之意九卿科道會勘從重議處元錫尋以集質至京讞未竟宿於僧寺自縊死九卿等以麻勒吉胡兆龍奇徹伯沿途受饋復借端苛索逼總督自盡均應革職籍沒議奏詔從寬削加級追奪誥敕降二級畱任十六年六月上以雲南新關發帑金三十萬兩分賑貧民命麻勒吉同尙書伊圖左都御史能圖往董其事尋奉命同能圖察奏大軍取永昌後貝勒尙善等縱兵擾民狀爲之辯釋十七年四月又奉命同學士石圖往雲南會商進剿明桂王朱由榔機宜還奏七月安親王岳樂等覆勘貝勒尙善等兵入永昌城掠民婦女事得實麻勒吉與能圖並坐徇隱罷任罰鍰十八

年正月命以原銜入直七月授祕書院學士康熙三年同學士章雲鷺教習庶吉士五年擢刑部侍郎七年十二月授江南江西總督九年疏言淮揚二府屬丈量虧缺田地有坍塌已久者請永行蠲免歲賦有新被水淹者暫予停徵又言五月間淮黃暴漲湖水泛溢田畝廬舍被淹者多請以正項錢糧賑濟災民時蘇州松江二府頻遭水患布政使慕天顏議濬劉河淤道二十九里濬吳淞江使復舊規建閘以時蓄洩麻勒吉與巡撫瑪祐疏請以漕折銀十四萬兩充費並得旨俞允十年四月京口將軍李顯貴鎮江府知府劉元輔爲駐防兵丁訐告侵冒錢糧上遣侍郎勒德洪往勘得實麻勒吉以不先舉發逮問江南百姓赴京籲留給事中姚文然疏述以聞並言麻勒吉情罪輕重尙待確訊宜釋鎖繫得旨俞允部議降二級調用復得旨仍回原任八月疏言州縣繁簡不同人才短長各異或才具有餘諳達吏事而適當簡僻其精神力量無所施展或撫字爲懷廉潔自守而驟膺繁劇拮据不逮終於顛蹶請酌行調繁調簡之法俾人地相宜以盡器使之道疏下部議以州縣改調恐開趨避之端寢其事十二年遇計典部院察議麻勒吉復任總督後未見勤勉應降二級調用尋降補兵部督捕理事官十六年命赴簡親

王喇布軍招撫叛附吳三桂之孫延齡馬雄等十八年奉詔率兵鎮守桂林先是孫延齡爲廣西將軍所轄將士皆舊隸定南王孔有德者及孫延齡爲吳三桂從孫世琮所殺其部將劉彥明徐洪鎮徐上達等率部衆歸順至是詔麻勒吉統轄之麻勒吉奏授彥明洪鎮等都統副都統有差尋以巡撫傅宏烈率兵討賊詔麻勒吉攝巡撫事十九年大兵由廣西進征雲南麻勒吉奉詔籌運軍餉時吳三桂僞將軍黃明來降麻勒吉奏請錄用詔授援剿總兵黃明仍叛遁詔麻勒吉與偏沅巡撫韓世琦會剿麻勒吉尋以黃明爲苗人所殺疏報二十一年撤定南藩屬分隸八旗漢軍麻勒吉率之還京二十三年授提督九門步軍統領二十八年三月卒三十七年黃明爲貴州參將上官斌廣西遊擊田國璽等擒獲於大樂山苗峒伏誅部議麻勒吉前此妄報追革原官

郎廷相

郎廷相漢軍鑲黃旗人父熙載以軍功授三等輕車都尉崇德元年長子廷輔襲次子廷佐仕至江南江西福建總督自有傳廷相其三子也由監生授欽天監筆帖式順治十一年遷宗人府副理事官十二年補佐領十三年閏五月遷刑部理

事官十一月擢河南左布政使康熙二年調四川左布政使八年命爲河南巡撫九年疏言宋儒程顥程頤裔有世襲五經博士二員流寇亂後絕襲查有程顥嫡裔程宗昌程頤嫡裔程延祀應襲從之十一年丁母憂回旗守制十四年服闋授江西巡撫尋定遠大將軍安親王岳樂軍前奏以江西布政使佟國正授巡撫上諭廷相候補是時逆藩耿精忠據福建反廷相兄廷佐奉命總督福建道梗駐浙江金華隨康親王傑書督理軍務十五年六月卒於軍上卽擢用廷相爲福建總督會精忠降餘黨已平而海敵鄭成功山賊朱寅屢犯郡縣十六年八月同提督段應舉副都督瑚圖剿朱寅僞將軍李復貴於同安大破之生擒復貴九月同總兵魏茂等剿敵長泰縣天柱山戮三百餘擒成功僞副將孫恭等其僞總督林鳳等俱竄進剿東埭塔潭等處戮僞將軍吳田敵遠遁十月朱寅勾海敵劫掠勢甚張廷相遣海澄鎮總兵官黃藍等會大兵分三路進剿至灌口楊坑大敗賊衆奪營七陣斬千餘擒寅僞將謝良楊德等六十餘人十七年三月疏言海澄爲漳泉門戶今海敵登岸竊據玉州等寨復分路犯石瑪江東橋諸處臣同副都統瑚圖海澄公黃芳世議發滿漢兵往援但漳屬地廣兵單防禦難周請敕康親王發兵



援剿得旨海敵分路侵犯宜亟發援師大將軍康親王速增遣大兵與郎廷相黃芳世協力固守漳州海澄諸處剿滅海敵閏三月朱寅復擁衆數萬踞天寶山阻我餉道廷相遣兵同芳世進剿連敗敵衆斬僞提督楊寧等三十六人擒敵弁百二十餘陣斬其二千九百餘級奪營二十四四月疏奏海敵勢日熾結山賊互相應援臣標下止二千五百所在告警不敷調用請增兵二千五百設五營統轄以資剿禦從之時羽黨尙衆出沒不常屢復屢陷至是年五月上以廷相庸懦無才不能速殄餘黨有負簡用著解任二十五年命管理船廠事務二十七年卒

趙祥星

趙祥星漢軍正白旗人順治五年由貢生授山西趙城縣知縣再任直隸任縣十三年十一月行取奉旨以御史用十四年補福建道監察御史巡視中城十五年二月命巡察會試外場疏言考試第一場以四書文爲重乞皇上欽定三題密封發內簾其餘諸題仍令考官照舊擬出庶關節難通弊端盡塞部議從之十月巡按湖南十六年八月疏言衡陽等州縣衛自順治十一年至十五年一切透支挪移款項造冊咨部覆核應卽嚴追其現存倉庫銀米責令起解庶官吏知儆軍民

有賴十一月疏言寶慶府之武岡州與靖州之綏寧通道二縣皆山多嶺險地近  
猪苗現在汛防乏人請於中右兩路或寶慶協及沅州鎮標撥兵分防實未雨綢  
繆之急務均下所司議行十七年七月差滿考核計清釐挪移等項銀四萬八千  
餘兩墾荒田三千九十餘頃奉旨趙祥星准回道管事十月掌山東道監察御史  
十八年三月疏言輦轂下綱紀肅清而棍徒招搖生事應責司坊官挨戶稽察並  
設循環簿朔望赴五城御史查驗以杜奸宄得旨京城重大之地惡棍挾詐官長  
肆行擾害殊屬可惡以後實係光棍俱照強盜例治罪餘如所奏康熙元年正月  
疏言江南省上江下江學道二員湖廣湖北湖南學道二員應裁併歸一部議如  
所請是年巡視兩浙鹽政二年八月任滿回京授工科給事中洊遷順天府府丞  
十二年六月遷通政司右通政八月轉左通政尋遷大理寺卿十一月擢山東巡  
撫時軍興需費祥星以暫裁通省存留支給等銀二十餘萬兩充餉先後具奏均  
奉旨嘉獎尋授爲兵部右侍郎祥星又清釐山東隱漏地畝四萬一千餘頃照例  
起科議敘兵部尙書晉正一品銜俱留巡撫任十七年正月署山東提督十八年  
正月疏言去歲雨澤愆期秋成歉薄除現在賑濟外請將常平倉穀贖緩動支接

賑得旨允之三月自陳部議以不謹應革職奉旨趙祥星著革職仍留任七月上諭應行應革事宜著部院科道及各省督撫條奏吏科給事中李宗孔疏參祥星已經議革仍留原任豈能頓改前非請卽予處分奉旨著解任三十二年六月卒

陶岱

陶岱滿洲正藍旗人姓瓜爾佳氏由主事歷遷戶部郎中康熙三十三年二月上以積貯米穀有裨民食命截留山東漕米二萬石從天津海運至三岔口交盛京戶部收貯命陶岱督運諭曰此路易行但不可欲速船戶習知水性風勢必須相風勢而行毋堅執己見其一路水勢地形詳悉識之此路既開日後運米事可無難矣尋遷內閣侍讀學士六月擢內閣學士八月山東巡撫桑額疏請以登州等處米從天津運三岔口諭曰前運米至盛京大有裨益學士陶岱現在天津著將天津現存之五萬石米由海口運至三岔口之處會同地方官議奏陶岱以天津現存米四千石穀三萬六千石以穀易米不敷五萬石之數議將近河州縣現存捐輸米內撥足五萬石運往得旨近河州縣糧米著停止起運俟明春河南山東兩省漕米到後截留五萬石運送三十五年二月奉命以海運至盛京之米給散

科爾沁之貧乏者六月遷戶部右侍郎尋轉左三十六年調吏部右侍郎三十七年二月上以朝鮮告饑籲請於中江開市貿穀命陶岱運米三萬石往朝鮮以萬石賚之二萬石平糶七月疏言臣於四月進中江將賞米萬石分賑其二萬石交戶部侍郎貝和諾監視貿易國王李焯具表謝章下所司御製海運朝鮮詩以紀其事三十八年五月署兩江總督八月奏言聖主南巡省視惟恐民貧艱食截留漕米十萬石照時價減糶之貯十萬石備緩急前因淮揚等處米貴請將留貯米動用四萬石照前減糶荷蒙俞允今淮揚等處小民仍艱粒食且督修河工人等羣聚需米甚多請將所餘米六萬石照前減價發糶疏入格於部議特允所請三十九年正月疏免泗州盱眙地丁等項錢糧尋授倉場侍郎四十年以漕船由外河運至石壩致抵通遲誤陶岱不將經紀勒索旗丁事審奏部議降一級罰俸一年諭曰陶岱向署兩江總督聲名甚劣既受倉場侍郎仍不改前轍非可任用之人著降五級隨帶行走尋卒

### 錢鈺

錢鈺浙江長興人康熙十六年由舉人授陝西涇陽縣知縣二十年行取以御史

用二十二年補廣西道監察御史尋巡視東城二十三年疏言刑具乃民命所關凡笞杖枷杻俱有一定尺寸在外有司當畫一遵守無如日久玩弛隨意濫用致斃多命請凡郡縣衙門以刑具輕重長短廣狹之數刊木榜曉諭如違督撫提參得旨通行內外問刑衙門嚴加申飭故違者治罪二十四年二月疏言秦蜀浙閩滇黔楚粵投誠實繁有徒請敕部詳議凡直省安置地方通查人數願在他鄉入籍者編入保甲開明某府州縣現居某處作何生業願屯田者給以牛種派田開墾願爲兵者補入營伍其有願歸故土者准回籍安置皆令管官造冊報部務使投誠人不致流離失所下部議行五月疏言陋弊相沿莫如山西火耗每徵錢糧有司收耗入己司道府廳又多方需索不得不加派民間每兩加至三四錢不等晉撫穆爾賽糾劾無聞臣採訪至確亟請禁止以甦一方之困得旨九卿嚴確議奏尋議穆爾賽不能察核應降三級并嫁女索屬員禮物藩司那鼎收銀坐扣平頭等款請提京嚴審上允之尋九卿翰訊得實穆爾賽那鼎等俱論如法二十五年特擢左僉都御史二十六年正月遷順天府尹二月授山東巡撫四月疏言德州常豐二倉向有各州縣額解米石以備駐德官兵及支放各營月米並過往官

兵口糧各屬解倉各營赴領道遠費繁應改於就近州縣兌支有不敷者估價折給至臨清營歲支米石無就近兌收之州縣應照時價題明折給自行採買其德州額米仍照徵以備過往官兵之用則民無轉輸之勞兵無馬馱之苦且節席草腳價等費請自本年始定爲例下部議從之二十八年三月奏言瘋病殺人雖有追銀埋葬之例但被殺者無辜可憫應令親屬將患瘋人鎖錮在家無親屬者責成同居並隣佑人如有疏虞治以放縱之罪部議疏縱者照不應重律杖八十從之先是元聖周公累代崇祀未定章程三十年上東巡始命葺廟供祭田至是鈺疏言周公廟祭祀禮樂與廟戶佃戶請照顏子例酌給下九卿議尋議周公廟應設贊禮生二十名廟戶十佃戶十傳旨准行九月御史張星法劾鈺貪黷劣蹟上命鈺明白回奏時御史盛符升先以密書報鈺詞涉郭琇鈺上疏自辯言左都御史郭琇與太常寺少卿趙崙等曾致書於鈺屬薦卽墨令高上達成山衛教授孫熙等未之允挾嫌使星法誣劾命法司鞫訊以星法誣鈺琇等致書囑薦事實均革職擬杖特旨免星法罪降二級留任以琇素縵直降五級調用崙等革職流奉天符升不合寄書降二級調用鈺旣得私書不卽舉首以原官解任三十年四月

革職縣丞譚明命控前任濰縣知縣朱敦厚婪贓事命巡撫佛倫勘鞫佛倫奏敦厚婪贓前撫錢鈺事經審實因授意刑部尙書徐乾學貽書徇情銷案請議處部議革鈺職四十年上以御史等徒爲空言論及鈺曰曩者錢鈺曾爲大言及用至大吏不能自踐其語品亦不端又曾參巡撫穆爾賽貪婪及身任巡撫並無勝於穆爾賽之處大言又何益哉四十二年鈺卒

徐乾學弟秉義

徐乾學江南崑山人康熙九年一甲三名進士授編修十一年充順天鄉試副考官以給事中楊雍建劾奏副榜遺取漢軍卷與正考官修撰蔡啟儔並降一級調用十四年援例捐復原級仍任編修尋遷左春坊左贊善充日講起居注官二十一年充明史總裁官二十二年遷翰林院侍講二十三年遷侍講學士時乾學之弟元文以左都御史降調候補其子樹聲與乾學子樹屏並中順天鄉試聖祖仁皇帝以是科取中南皿卷皆江南浙江而湖廣江西福建無一人下九卿詹事科道磨勘舉出文理悖謬者一名文體不正者樹屏等三名字句疵累者樹聲等八名請與正副考官諭德秦松齡編修王沛恩同考官主事張雄中書王鐔等並褫

革嚴究情弊得旨此次取中各卷顯有情弊姑從寬免究其文理悖謬文體不正四名及徐元文之子並革去舉人餘照例議處是年十二月乾學遷詹事二十四年正月召試翰詹諸臣於保和殿乾學列上等第一諭獎乾學暨侍讀韓菼編修孫岳頒侍講歸允肅編修喬萊等五人學問優長文章古雅優加賞賚乾學旋奉命直南書房擢內閣學士充大清會典一統志副總裁教習庶吉士時海賊初平戶部郎中色楞額往福建稽察鼓鑄疏請禁用明代舊錢戶部尙書科爾坤余國柱等議如所請上以詢內閣諸臣乾學言自古皆新舊兼行以從民便若設例禁恐滋煩擾因考自漢至明故事爲議以獻諭曰舊錢流布不止福建一省他省亦皆有也若驟爲禁止恐不肖之徒借端生事貽害平民色楞額所奏不准行會有詔購采遺書乾學以宋元經解十種李燾續資治通鑑長編及唐開元禮或繕寫或仍古本綜其體要條列奏進得旨所奏進藏書善本足資考訂俱留覽二十五年諭吏部曰學士徐乾學張英學問淹通宜留辦文章之事嗣後勿開列巡撫尋授禮部侍郎充經筵講官二十六年九月擢都御史二十七年二月充會試正考官卽於是月遷刑部尙書乾學初任左都御史卽劾罷江西巡撫安世鼎勸諸御



史風聞言事遇會議會推與尙書科爾坤佛倫等多齟齬其會議河工屯田事也同尙書張玉書言屯田所占民間地畝應歸舊業科爾坤佛倫弗從御史陸祖修因疏劾科爾坤佛倫等偏袒河臣靳輔不顧公議御史郭琇亦劾靳輔與屯累民勅罷靳輔任先是命侍郎色楞額往湖廣鞠上荆南道祖澤深被劾各款并察巡撫張汧有無穢蹟色楞額於劾款悉爲開釋又不察劾張汧御史陳紫芝旋劾張汧貪贖命副都御史開音布往會直隸巡撫于成龍山西巡撫馬齊覆審旣鞠實張汧祖澤深婪索事復得祖澤深交結大學士余國柱爲囑色楞額徇庇及張汧未被劾時遣人赴京行賄狀下法司嚴議核擬時余國柱因御史郭琇劾其與大學士明珠尙書佛倫等營私附和已罷歸法司請檄追質問並鞠詰張汧行賄何人汧以分餽甚衆不能悉數抵塞旣而指出乾學上命免余國柱質問復諭曰此案嚴審牽連人多就已經審實者卽可擬罪勿令滋蔓於是色楞額張汧祖澤深論罪如律事遂寢互詳高士奇傳乾學尋乞罷疏言臣蒙特達之知感激矢報職掌所係務殫區區苞苴餽遺一切禁絕近者前任楚撫張汧橫肆污蔑祇緣臣爲憲長拒其幣問是以銜恨誣扳幸皇上鑒臣悃悃當衆臣傳問汧供語參差駕虛

鑿空良心難掩隨即自吐實情然非聖明在上是非幾至混淆此臣所以感戴高深日夜隕涕者也臣備位卿僚仍爲貪吏誣構皇上覆載之仁不加譴斥臣復何顏出入禁近有玷清班反躬劾責不能自己伏冀聖慈放歸田里疏入得旨覽奏情辭懇切准以原官解任其修書總裁等項著照舊管理二十八年乾學弟元文任大學士子樹穀由中書考選御史時解任修書少詹事高士奇丁憂在籍左都御史王鴻緒爲左都御史郭琇疏劾植黨營私招搖撞騙諸款得旨休致事詳士奇鴻緒傳副都御史許三禮疏劾乾學曰聖主必需賢佐懲貪不外遠奸大小臣工幸逢聖主應爲賢臣乃有原任刑部尙書徐乾學者不顧品行律身不嚴致被罪臣張汧所供皇上寬仁不加譴責卽宜引咎自退乞命歸里又復優柔繫戀潛住長安乘留修史爲名出入禁廷與高士奇相爲表裏物議沸騰卽無官守落得招搖納賄五方寶物歸東海之謠所自來也其子試御史徐樹穀不遵成例朦朧與考明有所恃獨其弟徐秉義文行兼優實係當代偉人原任禮部尙書熊賜履理學醇儒可稱千古人品臣職居言路知而不言卽爲不忠俯採輿論直陳賢奸乞卽召用熊賜履徐秉義以佐盛治徐乾學旣無好事業焉有好文章應逐出史

館以示遠奸徐樹穀尙書之子中堂之姪身爲御史太覺招搖應調部屬以遵成例臣不避嫌怨披瀝直陳得旨所參事情著徐乾學明白回奏熊賜履原係簡任大臣朕所深知已經起用現在丁憂許三禮請卽召用殊屬不諳著飭行乾學回奏曰憲臣謂臣律身不嚴致罪臣張汧所供臣若果受張汧一錢臣甘寸磔祇以臣爲臺長聞張汧狼籍屢向僚屬斥言其非汧知而恨臣遂肆誣蔑業蒙皇上洞鑒臣以性不諧俗遭人嫉忌具疏懇歸田里蒙恩准解部務仍領各館總裁早夜編摩每隔數日入直與高士奇等共訂書史校讐御選古文此外一無干涉臣在任之日尙且嚴絕苞苴豈解任以後反行招搖納賄憲臣忽云潛住忽云招搖皆臣所惶惑不解者臣子樹穀考選經吏部及臣弟元文奏明其時大臣子弟與考者不止臣子一人特恩簡用安得朦朧皆由臣平時好講忠孝大義言論時或激切易以招尤乞賜罷斥歸田并罷臣子官職以安愚分疏並下部察議以所劾招搖納賄皆無實據卽所劾朦朧考選亦不詳確許三禮應降二級調用議甫上三禮復疏劾乾學曰三品以上大臣子弟不得考選科道成例遵行已久無敢紊越今乾學回奏指稱吏部題請閣臣奏明以鉗制言官要知皇上之留乾學者留於

史館辦事豈留潛地招搖物議沸騰閣臣之奏明者不過奏避閱卷之嫌疑豈有題破歷來之定例乾學雕琢字眼粉飾要旨欲坐臣以指參不實而使徐樹穀仍居御史之職明欲肇釁開端紊亂國制專擅之漸不可不防更奇者乾學律身不嚴教子無方穢迹昭著有案可據尙敢肆口狂言好講忠孝大義希圖簧惑聖聰不得不列款糾參懇乞窮究一乾學於丁卯鄉試戊辰會試在外招搖門生親戚有名文士各與關節務期中試有蘇州府貢生何焯往來乾學門下深悉其弊特作會試墨卷序文刊刻發賣寓言譏刺乾學聞知卽向書鋪將序抽燬刻板焚化囑託江蘇巡撫訪拏何焯至今未結一乾學發本銀十萬兩交鹽商項景元於揚州貿易每月三分起利本年七月間令伊孫壻史姓家人李湘押同景元於八月二十四日到京算帳共結本利一十六萬餘兩又布商程天石新領乾學本銀十萬兩現在大蔣家衚衕開張當舖其餘銀號錢店發本放債違禁取利怨聲滿道一乾學以門生李國亮爲江蘇按察使代爲料理國亮差劉管家送銀一萬兩交乾學管家吳子彥吳子章收遇節送銀四百兩小禮銀四十兩生日送銀一千兩吳子彥爲張汧事發逃回吳子彥胞弟子章收伊弟元文入閣辦事國亮差劉管

家送賀禮銀五千兩交吳子章收繳一乾學認光棍徐紫賢徐紫書二人爲姪通同扯繹得贓累萬徐紫賢徐紫書現造爛面衚衕花園房屋書辦之子一朝富貴胡爲乎來乾學之贓半出其手一乾學因弟拜相後與親家高士奇更加招搖以致有去了余秦檜來了徐嚴嵩乾學似龐涓是他大長兄之謠又有五方寶物歸東海萬國金珠貢澹人之對京城三尺童子皆知若乾學果能嚴絕苞苴如此醜語何不加之他人而獨加之乾學耶一乾學遣弟徐宏基遍遊各省抽豐剋剝民膏獨於河南磁州彰德等處久戀一載有餘放賭宿妓良民受害怨聲載道一乾學買憲臣傅感丁在京房屋一所價銀六千餘兩買學士孫在豐在京房屋一所價銀一千五百兩買慕天顏無錫縣田一萬頃京城繩匠衚衕與橫街新造房屋甚多不能枚舉蘇州太倉崑山吳縣長洲常熟吳江等州縣俱係徐府房屋田地一乾學子姪徐樹屏徐樹聲於甲子科賁緣中式弊發黜革行止有虧莫此爲甚以上各款百未盡一乾學身受國恩乃敢植桃李於一門播腹心於九州橫行聚斂不顧枉直順之則生逆之則死勢傾中外權重當時朝綱可紊成例可滅伏乞皇上立賜處分國家幸甚萬民幸甚疏入得旨許三禮身爲言官凡有糾劾當據

實一併指陳乃於交部議處後復列款具奏明係圖免己罪著嚴飭行命免許三禮調用仍留任是年十一月乾學疏言臣年六十精神衰耗祇以受恩深重依戀徘徊憲臣許三禮前因議先賢先儒坐位其言不合經典臣與九卿奏對之時斥言其非本以公事相爭不謂觸其私怒捏造事款逞忿劾臣幸聖主洞燭幽隱臣欣荷再生但臣方寸靡寧不能復事鉛槧且恐因循居此更有無端彈射乞恩終始矜全俾得保其衰病之身歸省先臣邱隴庶身心閒暇願比古人書局自隨之義屏跡編摩少報萬一得旨卿學問淹博總裁各館書史著有勤勞覽奏請歸省慕情辭懇切准假回籍書籍著隨帶編輯明年二月陞辭賜御書光燄萬丈扁額五月兩江總督傅拉塔劾乾學於三月內回籍卽於四月內欲沽名譽囑託蘇州府貢監等具呈巡撫洪之傑建造生祠於虎邱山上平日縱其子樹敏樹屏與元文之子樹聲樹本交結洪之傑借勢招搖競利害民乞敕部嚴擬語詳元文傳聖祖命元文休致劾款免究三十年山東巡撫佛倫翰濰縣知縣朱敦厚加收火耗事劾乾學會致書前任巡撫錢鈺徇庇敦厚部議乾學與鈺均革職先是乾學未罷歸時嘉定知縣聞在上爲縣民告發私派事革任究擬閱二年不結至是按察

使高承爵窮詰聞在上追憶未告發時因徐樹敏聲言私派有干功令曾以贓銀二千兩餽之至告發追還論樹敏嚇詐取財應絞江寧巡撫鄭端因疏劾休致左都御史王鴻緒曾受聞在上餽銀五百兩爲之設計私派亦於告發後追還應與不約束子弟之徐乾學並敕部嚴議部議乾學已革職免議王鴻緒應令總督審供定議尋奉詔嚴戒內外各官私怨交尋牽連報復於是釋鴻緒弗問乾學子樹敏亦贖罪三十三年七月諭大學士於翰林官員內奏舉長於文章學問超卓者大學士王熙張玉書等薦乾學與王鴻緒高士奇得旨徐乾學等著來京修書徐乾學之弟徐秉義學問亦優並著來京乾學未聞命於四月疾卒年六十有四所著有澹園集讀禮通考諸書遺疏進其所纂一統志下所司察收弟秉義康熙十二年一甲三名進士十四年充浙江鄉試正考官二十一年遷右春坊右中允尋乞假歸里乾學既卒後又召補原官累遷侍讀庶子少詹事三十八年遷詹事三十九年擢禮部侍郎旋調吏部皆兼管詹事府是年充武會試正考官明年充經筵講官四十一年以前同刑部侍郎綏色克往訊陝西糧鹽道黃明受賄情事擬罪失當部議革職命仍以翰林官用後補詹事充順天鄉試正考官明年遷內閣

學士四十三年乞休歸四十四年聖祖南巡賜御書恭謹老成扁額五十年四月卒於家年七十有九賜祭葬如例

### 高士奇

高士奇浙江錢塘人初由監生充書寫序班供奉內廷授詹事府錄事遷內閣中書食六品俸賜居西安門內康熙十七年聖祖仁皇帝賜敕曰爾在內辦事有年凡密諭及朕所覽講章詩文等件纂輯書寫甚多特賜表裏十疋銀五百兩以旌爾之勤勞十九年諭吏部曰高士奇學問淹通居職勤慎供奉有年應授爲翰林院從優議敘部議授爲額外翰林院侍講二十年六月奉敕曰爾內直以來勤慎盡誠夙夜匪懈近日聞爾偶得暑病特賜頤養之資爾當安慰自怡輔以醫藥二十二年補侍讀充日講起居注官二十三年遷右春坊右庶子尋擢翰林院侍講學士二十四年轉侍讀學士充大清一統志副總裁官二十六年遷詹事府少詹事二十七年法司逮問貪贖劾罷之巡撫張汧因汧未被劾時曾遣入齎銀赴京詰其行賄何人初以分餽甚衆不能悉數抵塞旣而指出士奇會奉諭此案若嚴審牽連人多就已經審實者即可擬罪勿令滋蔓於是置弗問互詳徐乾學傳士



奇因疏言臣等編摩纂輯惟在直廬宣諭奏對悉經中使非進講外或數月不覲天顏從未於政事有所干涉此不獨臣士奇爲然從前入直諸臣如熊賜履葉方藹張玉書孫在豐王士禎朱彝尊等近今同事諸臣如陳廷敬徐乾學王鴻緒張英勵杜訥等莫不皆然也至於人物之臧否事務之利弊皇上明見萬里洞澈隱微素未蒙皇上詢及臣何敢輕進一言獨是供奉日久嫌疑日滋考之古昔儒臣侍從禁密恆難調於衆口卽今張汧無端疑怨含沙污鱗臣將無以自明幸賴聖明在上誣搆難施張汧旋卽自吐真情臣心始得大白但禁廷清祕職任綦嚴來茲萋斐實幸聖恩豈容仍玷清班伏乞賜歸田里疏入得旨覽所奏情辭懇切准以原官解任其修書副總裁等項著照舊管理二十八年春從上南巡至杭州駕幸士奇之西溪山莊賜御書竹窗扁額九月左都御史郭琇疏劾之曰皇上宵旰焦勞勵精圖治用人行政皆出睿裁未嘗纖毫假手左右乃有植黨營私招搖撞騙如原任少詹事高士奇左都御史王鴻緒等表裏爲奸恣肆於光天化日之下罪有可誅罄竹難悉試約畧陳之高士奇出身微賤其始也徒步來京覓館爲主皇上因其字學頗工不拘資格擢補翰林令入南書房供奉不過使之考訂文章

原未假之與聞政事爲士奇者卽當竭力奉公以報君恩於萬一計不出此而日思結納諂附大臣攬事招權以圖分肥凡內外大小臣工無不知有士奇之名夫辦事南書房者先後豈止一人而他人之聲名總未著聞何士奇一入辦事而聲名赫奕乃至如此是其罪之可誅者一也久之羽翼旣多遂自立門戶結王鴻緒爲死黨科臣何楷爲義兄弟翰林陳元龍爲叔姪鴻緒胞兄王頊齡爲子女媼親俱寄以腹心在外招攬凡督撫藩臬道府廳縣以及在內之大小卿員皆王鴻緒何楷等爲之居停哄騙而夤緣照管者餽至成千累萬卽不屬黨護者亦有常例名之曰平安錢然而人之肯爲賄賂者蓋士奇供奉日久勢燄日張人皆謂之曰門路眞而士奇遂自忘乎其爲撞騙亦居之不疑曰我之門路眞是士奇等之奸貪壞法全無顧忌其罪之可誅者二也光棍俞子易在京肆橫有年惟恐事發潛遁直隸天津山東洛口地方有虎坊橋瓦房六十餘間價值八千金餽送士奇求託照拂此外順城門外斜街並各處房屋總令心腹出名置買何楷代爲收租打磨場士奇之親家陳元師夥計陳季芳開張緞號寄頓各處賄銀資本約至四十餘萬又於本鄉平湖縣置田產千頃大興土木修整花園杭州西溪廣置田宅蘇

松淮揚王鴻緒等與之合夥生理又不下百餘萬竊思以覓館餬口之窮儒而今忽爲數百萬之富翁試問金從何來無非取給於各官然官從何來非侵國帑卽剝民膏夫以國帑民膏而填無厭之谿壑是士奇等眞國之蠹而民之賊也其罪之可誅者三也皇上聖明洞悉其罪止因各館史書編纂未完著解任竣事矜全之恩至矣極矣士奇乃不思改過自新仍怙惡不悛當聖駕南巡時上諭嚴戒餽送定以軍法治罪誰敢不遵惟士奇與王鴻緒愍不畏死卽淮揚等處王鴻緒招攬府廳各官約餽萬金潛遺士奇淮揚如此他處又不知如何索詐矣是士奇等欺君滅法背公行私其罪之可誅者四也更可駭者王鴻緒陳元龍鼎甲出身亦儼然士林之翹楚竟不顧清議爲人作壟斷而不以爲恥且依媚大臣無所不至卽人之所不屑爲者亦甘心爲之而不以爲辱苟圖富貴傷敗名教豈不玷朝班而羞當世之士哉總之高士奇王鴻緒陳元龍何楷王瑱齡等豺狼其性蛇蝎其心鬼蜮其形畏勢者旣觀望而不敢言趨利者復擁戴而不肯言臣若不言有負聖恩臣罪滋大故不避嫌怨仰請皇上立賜罷譴明正典刑人心快甚天下幸甚疏入得旨高士奇王鴻緒何楷陳元龍王瑱齡俱著休致回籍時解任尙書徐乾

學管修書總裁事副都御史許三禮以士奇既奉旨回籍乾學亦不應留京疏劾乾學士奇爲子女姻親其招搖納賄相爲表裏有五方寶物歸東海萬國金珠貢澹人之謠疏下吏部以所劾無據寢議乾學尋以省墓回籍三十三年命大學士於翰林官員內奏舉長於文章學問超卓者大學士王熙張玉書等薦乾學鴻緒及士奇並召來京修書士奇既至仍直南書房三十六年以養母乞歸特授詹事府詹事允其請四十一年授禮部侍郎以母老未赴四十三年聖祖南巡士奇於淮安迎駕扈蹕至杭州及回鑾隨至京優賚以歸是年六月卒於家遺疏至得旨高士奇簡侍內廷勤勞歲久忽聞在籍病逝朕心深爲軫惻下部議卹部臣議士奇未赴侍郎任例予祭一次聖祖命加級全葬子輿時爲庶吉士特旨授編修四十四年諭大學士張玉書等曰原任禮部侍郎高士奇在內廷供奉有年其品級不應予諡朕軫念舊臣原任刑部侍郎勵杜訥已照侍郎沈荃例予諡今士奇亦應予諡以示特恩士奇於是賜諡文恪所著有經進文稿天祿識餘讀書筆記扈從日錄隨輦集城北集苑西集清吟堂集春秋地名考略左傳國語輯註諸書

王鴻緒

王鴻緒江南婁縣人康熙十二年一甲二名進士授編修初名度心因父名廣心奏改今名十四年充順天鄉試副考官十六年充日講起居注官授左春坊左贊善十八年遷翰林侍講十九年聖祖仁皇帝諭獎奉職勤勞諸講官加鴻緒侍讀學士銜時湖廣有朱方旦者自號二眉山人聚徒橫議造中說補謂中道在兩眉之間山根之上又自詡前知與人決休咎初爲湖廣巡撫董國興以左道惑衆劾奏逮至京得旨寬釋及逆藩吳三桂反順承郡王勒爾錦統師駐荊州方旦以占驗出入軍營巡撫張朝珍稱爲奇異神人聖祖密諭勒爾錦軍機大事勿爲蠱惑方旦乃往江南浙江二十年七月鴻緒得方旦所刻中質祕書遂以奏進指摘其與徒問答語有誣罔君上悖逆聖道搖惑民心三大罪言方旦擁妻妾廣田宅爲子納官交結勢要其所造中說補不外坐功鍊氣之術而妖黨互相標榜謂今之眉山古之尼山方旦亦全無畏忌居之不疑刊書流播向在荊州軍前煽惑兵事後復遍遊江浙乘輿張蓋徒黨如雲遠近奔走祈問吉凶常聚至數千人輒以小信小惠勾連入教雖漢之張角元之劉福通亦不過以是術釀亂臣叨恩侍從本無言責因見邪教橫行不勝憤激具疏糾劾得旨朱方旦以市井匪人妄言休咎

詭立邪說招致羽黨誣罔悖逆搖惑民心情罪重大此疏所劾俱實著湖廣巡撫嚴拏究擬在外督撫不先究治在內言官未曾糾劾並嚴行申飭方且尋論斬伏法二十一年鴻緒轉侍讀充明史總裁官二十二年九月遷庶子十二月擢內閣學士充大清會典副總裁二十三年九月擢戶部右侍郎二十四年充會試正考官二十五年月疏請回籍治本生母喪得旨賜祭二十六年三月擢左都御史七月疏劾廣東巡撫李士楨昏憤貪劣於曾從吳逆之潮州府知府林杭學保舉清廉詔士楨回奏士楨以年老昏憤自引咎部議士楨休致杭學革任會靈臺郎董漢臣上疏論時事以諭教元良慎簡宰執爲言御史陶式玉劾漢臣摭拾浮詞欺世盜名請逮治疏下內閣集九卿議議未決奉特旨免議鴻緒疏言欽天監靈臺郎博士等官無知蒙昧者多皆由其始不擇流品星卜屠沽之徒粗識數字便得濫竽授官之後又不專心學習勉盡職掌惟行險僥倖希圖遷擢請敕下考試分別去留疏下禮部議行董漢臣及博士賈文燃等十五人並以詞理舛誤黜革時尙書湯斌爲太子講官先是九卿集議董漢臣罪斌有慚對董漢臣語至是鴻緒同左都御史璩丹副都御史徐元珙鄭重等劾斌務名鮮實並追論其於江寧

巡撫去任巧飾文告以博虛譽聖祖素重斌操守清廉置弗問九月鴻緒丁父憂歸里二十八年九月鴻緒將服滿尙未赴補左都御史郭琇疏劾之曰皇上宵旰勤勞勵精圖治用人行政皆出睿裁未嘗纖毫假手左右乃有植黨營私招搖撞騙如原任少詹事高士奇左都御史王鴻緒等表裏爲奸恣肆於光天化日之下罪有可誅罄竹難悉試約略陳之高士奇出身微賤其始也徒步來京覓館爲生皇上因其字學頗工不拘資格擢補翰林令入南書房供奉不過使之考訂文章原未假之與聞政事爲士奇者卽當竭力奉公以報君恩於萬一計不出此而日思結納諂附大臣攬事招權以圖分肥凡內外大小臣工無不知有士奇之名夫辦事南書房者先後豈止一人而他人之聲名皆未著聞何士奇一入辦事而聲名赫奕乃至如此是其罪之可誅者一也久之羽翼旣多遂自立門戶結王鴻緒爲死黨科臣何楷爲義兄弟翰林陳元龍爲叔姪鴻緒胞兄王瑱齡爲子女姻親俱寄以腹心在外招攬凡督撫藩臬道府廳縣以及在內之大小卿員皆王鴻緒何楷等爲之居停哄騙而資緣照管者餽至成千累萬卽不屬黨護者亦有常例名之曰平安錢然而人之肯爲賄賂者蓋士奇供奉日久勢焰日張人皆謂之曰

門路真而士奇遂自忘乎其爲撞騙亦居之不疑曰我之門路真是士奇等之奸貪壞法全無顧忌其罪之可誅者二也光棍俞子易在京肆橫有年惟恐事發潛遁直隸天津山東洛口地方有虎坊橋瓦房六十餘間價值八千金餽送士奇求託照拂此外順城門外斜街並各處房屋總令心腹出名置買何楷代爲收租打磨場士奇之親家陳元師夥計陳季芳開張緞號寄頓各處賄銀資本約計四十餘萬又於本鄉平湖縣置田產千頃大興土木修整花園杭州西溪廣置田宅蘇松淮揚王鴻緒等與之合夥生理又不下百餘萬竊思以覓館餬口之窮儒而今忽爲數百萬之富翁試問金從何來無非取給於各官然官從何來非侵國帑卽剝民膏夫以國帑民膏而填無厭之谿壑是士奇等眞國之蠹而民之賊也其罪之可誅者三也皇上聖明洞悉其罪止因各館史書編纂未完著解任竣事矜全之恩至矣極矣士奇乃不思改過自新仍怙惡不悛當聖駕南巡時上諭嚴戒餽送定以軍法治罪誰敢不遵惟士奇與王鴻緒愍不畏死卽淮揚等處王鴻緒招攬府廳各官約餽萬金潛遺士奇淮揚如此他處又不知如何詐索矣是士奇等欺君滅法背公行私其罪之可誅者四也更可駭者王鴻緒陳元龍鼎甲出身亦



儼然士林之翹楚竟不顧清議爲人作壘斷而不以爲恥且依媚大臣無所不至  
卽人之所不屑爲者亦甘心爲之而不以爲辱苟圖富貴傷敗名教豈不玷朝班  
而羞當世之士哉總之高士奇王鴻緒陳元龍何楷王頊齡等豺狼其性蛇蝎其  
心鬼蜮其形畏勢者旣觀望而不敢言趨利者復擁戴而不肯言臣若不言有負  
聖恩臣罪滋大故不避嫌怨仰請皇上立賜罷譴明正典刑人心快甚天下幸甚  
疏入得旨高士奇王鴻緒何楷陳元龍王頊齡俱著休致回籍時解任尙書徐乾  
學管修書總裁事旋爲副都御史許三禮所劾乞歸復以山東巡撫佛倫劾其曾  
囑前任巡撫錢鈺徇庇濰縣知縣朱敦厚革職事詳乾學傳三十年江寧巡撫鄭  
端翰嘉定知縣聞在上爲縣民告發私派事先由按察使高承爵等訊結聞在上  
曾以贓銀二千兩分給聲言私派有干功令之舉人徐樹敏至告發乃退還論樹  
敏恐嚇取財應絞及鄭端覆訊衆證復得聞在上以贓銀五百兩餽送松江王總  
憲亦於告發後退還狀乃疏劾之曰舉人徐樹敏卽原任刑部尙書徐乾學之子  
也松江王總憲卽原任左都御史王鴻緒也一爲司寇一爲總憲富貴已極雖被  
論閒住當一飯不忘君恩潔身自好約束子弟使鄉里仰其德行後進奉爲典型

乃不思自反專以招攬納賄爲事蠶食鄉井爲心而且忌刻陰毒狡猾反覆士民則倣風俗薄惡其未曾敗露者不敢以風影入告今聞在上一案乾學繼子行詐鴻緒竟染贓銀修身教家之道已虧有玷大臣名節而司擬止及乾學之子不敢發鴻緒之奸殊非法紀之平乞敕部將乾學鴻緒嚴加議處以儆官邪臣非不知乾學鴻緒各立門戶交結勢要內外聲氣無不通透言出禍隨但臣旣受國恩惟知有皇上不知其他倘奸邪得除而士風民俗同歸於厚彼雖巧於中傷聖明在上臣亦不敢他顧矣疏下部察議以乾學已革職免議鴻緒應令總督審供定議鄭端復疏劾鴻緒曰聞在上私派一案據糧里口供聞在上係鴻緒投拜門生私派之時聞在上先到鴻緒處商量鴻緒爲之設計恃其奸謀勢力屢審漏網臣題參後部覆奉旨交督臣審供定議爲鴻緒者自應靜聽質審乃敢串通原供犯官聞在上等欲圖改供從中暗行調度若不嚴懲將來紳棍效尤必至毫無忌憚仰請敕革王鴻緒職銜與一千人犯交與督臣親審定擬勿發下司致令如前徇情畏勢中其奸謀所關於風俗人心非淺鮮矣疏下部嚴察議奏尋諭曰朕崇尚德教蠲滌煩苛凡大小諸臣素經拔擢者咸思恩禮下逮曲全始終卽或因事放歸

罹咎罷斥仍令各安田里樂業遂生乃近見各官內外間有彼此傾軋伐異黨同私怨交尋牽連報復或已所銜恨而反囑人代糾陰爲主使或意所欲言而不直指其事巧陷術中雖業已解職投閒仍復吹求不已株連逮於子弟顛覆及於身家甚且市井奸民亦得借端陵侮蔑紀傷化不可勝言朕總攬幾務已三十年此等情態知之最悉夫讒譖媚嫉之害歷代皆有而明末爲甚公家之事置若罔聞而分樹黨援飛誣排陷迄無虛日朕於此等背公誤國之人深切痛恨自今已往內外大小諸臣應仰體朕懷各端心術盡蠲私忿共矢公忠倘仍執迷不悟復踵前非朕將窮極根株悉坐以交結朋黨之罪時鴻緒就質詔至得釋三十三年命大學士於翰林官員內舉奏長於文章學問超卓者大學士王熙張玉書等薦鴻緒與徐乾學高士奇並召來京修書三十八年授工部尙書三十九年奉命同尙書范承勳監修高家堰隄工尋以與河督張鵬翮持議不協撤回四十二年充經筵講官四十三年以開濬京城河道浮銷經費坐失察部議革職得旨留任尋以濬河工竣予開復四十七年調戶部尙書四十八年以附和內大臣阿靈阿侍郎揆敘等議奏改立皇太子事奉諭切責以原品休致五十二年遇萬壽覃恩疏請

封典廕生下部議以非現任不准得旨凡原品解任之員停其廕生俱給與封典五十三年疏言臣舊居館職奉命爲明史總裁官與湯斌徐乾學葉方藹互相參訂僅成數卷及臣回籍多年恩召重領史局而前此纂輯諸臣罕有存者惟大學士張玉書爲監修尙書陳廷敬爲總裁各專一類玉書任志廷敬任本紀臣任列傳因臣原銜食俸比二臣得有餘暇刪繁就簡正謬訂譌如是數年彙分成帙而大學士熊賜履續奉監修之命檄臣列傳諸稿備錄奏進玉書廷敬暨臣皆未參閱臣恐傳稿尙多舛誤自蒙恩歸田欲圖報稱因重理舊編搜殘補闕薈萃其全復經五載成列傳二百八卷其間是非邪正悉據已成公論不敢稍逞私臆但年代久遠傳聞異辭臣未敢自信爲是謹繕寫全稿齎呈御鑒宣付史館以備參考得旨下明史館察收五十四年復召來京修書五十七年大學士王揆監修省方盛典奏薦鴻緒學問素優堪任編輯命爲承修總裁官六十年尙書田從典侍郎張伯行副都御史李紱爲會試考官旣發榜有下第舉人喧譁李紱之門御史舒庫入告以紱不自奏聞部議革職發永定河工效力鴻緒奉命同大學士王頊齡學士阿克敦等磨勘取中卷得文理疵謬者十二人三年後再令會試雍正元年

八月卒於京禮部循例議卹世宗憲皇帝命勿予諡今上乾隆四十年三月諭曰國史館進呈所纂王鴻緒列傳於左都御史郭琇劾鴻緒與高士奇招納賄賂等案僅敘大略而郭琇原疏未經載入恐傳於後世其不知鴻緒輩之罪狀者妄疑一劾卽去或有屈抑其知者又疑秉史筆之人意存袒護不肯顯暴其短豈朕特命另修史傳之意乎夫王鴻緒高士奇與明珠徐乾學諸人當時互爲黨援交通營納衆所共知如郭琇所劾諸事並不爲枉而我皇祖不加窮究僅予罷退蓋於明珠念其有襄辦討平吳逆之功而王鴻緒高士奇諸人則因文學尙優宜力史館是以屢下明詔剴切曉諭曲予矜全實由我皇祖聖德然卽以諸人事跡而論雖有交結納賄之私亦止於暗爲關照不至勢燄薰灼生殺擅專如前明嚴嵩輩之肆奸蠹國陷害正人此亦人所共知也卽如郭琇參劾明珠王鴻緒諸人後旋經皇祖特加任用未聞有能稍事排擠者卽其後郭琇於總督任內因他事罷官亦由其自取並非諸人之所能媒孽又實由我皇祖聖明是郭琇原疏於諸人被劾款跡皆當據事直書不必稍爲刪減卽使天下後世曉然於王鴻緒輩之罪狀如此郭琇之鯁直如此其後之自取罪戾如此並敬悉我皇祖之仁智並用措置

得中又如此既可令海內傳爲美談且足令朝臣共知鑑戒其於世道人心甚爲有益何必曲存隱諱乎其明珠本傳前已降旨改修外著交該館總裁將王鴻緒徐乾學高士奇等列傳復加核訂所有郭琇等原劾諸疏悉載入傳內另繕呈覽其餘有類此者並著一體詳載以示大公而詔傳信焉

王頊齡弟九齡

王頊齡江南華亭人由康熙十五年進士授太常寺博士十八年詔舉博學鴻儒吏部尙書郝惟訥薦頊齡詩詞風雅品誼端醇召試一等授編修纂修明史二十年充日講起居注官順天武鄉試副考官二十一年正月上元節上御乾清宮賜大學士等宴做柏梁體賦詩頊齡與焉二十二年二月充平定三逆方略纂修官十月遷右贊善二十三年四月遷侍講充福建鄉試正考官十一月提督四川學政二十五年三月丁母憂服闋補原官二十八年四月轉侍讀六月遷侍講學士九月左都御史郭琇劾少詹事高士奇與頊齡弟左都御史鴻緒植黨營私頊齡結士奇爲婚姻不顧清議爲之納賄請託上命頊齡偕士奇鴻緒並休致十月詔頊齡留原任三十年八月轉侍讀學士尋丁父憂三十六年起補原官復充日講

起居注官十一月遷少詹事三十九年遷宗人府府丞四十二年五月擢禮部右侍郎四十三年二月轉左是年聖駕南巡幸項齡第秀甲園賜御書蒸霞扁額四十六年上南巡閱河復幸秀甲園五十一年五月調吏部左侍郎十月充經筵講官五十二年五月擢工部尙書八月充恩科會試正考官五十四年二月充會試正考官尋充書經傳說彙纂總裁五十五年四月因祈雨不到降三級留任革恩詔所得廕生五十七年九月授武英殿大學士雍正元年癸卯詔開鄉會恩科項齡以康熙癸卯舉人得重與鹿鳴宴五月上垂念耆舊大臣加項齡太子太傅九月以老乞休得旨卿品行端凝學問淵博典章政事經歷最多聖祖簡任機務以來鎮靜和平實心任職勤勞歲久卿係先帝舊臣正欲藉資贊襄以臻上治著照舊供職二年六月再疏乞休上復慰留並諭內閣曰皇考簡用之人如因衰老休致朕心不忍王項齡年邁之人閒時行走可也三年七月患病命御醫診視賜參餌令加意調攝八月卒年八十有四諭曰王項齡係聖祖仁皇帝擢用大臣宣力多年和平安靜簡任機務慎恪自持朕卽位以來特加恩眷伊去歲以年老乞休朕念皇考時大臣無幾每見伊等心甚愴然不忍遽允所請降旨慰留待三年後

始行予告繼聞伊告病卽遣醫診視賜藥調理望其漸次得痊不意竟至溘逝豈朕體恤舊臣之意有未誠耶朕心甚爲傷悼特贈太傅恩予賜卹加祭二次並輟朝一日官員有係伊門生者令其素服持喪各部院漢官俱令前往祭送以副朕惓惓老成加恩耆舊至意賜祭葬諡文恭弟九齡康熙二十一年進士由庶吉士改授編修二十四年充政治典訓纂修官二十五年以病乞假回籍二十七年入京供職三十年遷左參議尋丁父憂三十三年服闋補右參議旋遷侍講學士三十四年充日講起居注官三十六年充武會試副考官十月遷少詹事三十八年遷僉都御史三十九年充會試副考官七月擢內閣學士四十三年二月擢禮部右侍郎時頊齡轉禮部左侍郎疏請迴避調兵部右侍郎十月轉左尋調吏部右侍郎四十五年四月轉左四十六年十二月授都察院左都御史四十八年十二月卒於官賜祭葬如例鴻緒自有傳

### 高爾位

高爾位漢軍正黃旗人父勳明錦州衛副將從總兵祖大壽投誠爾位順治四年舉人初任直隸南和知縣九年四月行取授監察御史十月巡按陝西十一年四



月奏言邇來奸徒營謀委署州縣佐貳昔之衙蠹地棍今之典史職雖卑而有父母之呼兼有巡捕之責無職而官非該管道府受賄因何濫委如任縣典史楊顯耀等概係積蠹快皂惡棍鑽營代任小民莫敢誰何請敕部行督撫確查充委官一併重處再州縣乏員本府廳官夤緣委署在府官待爲同堂曲徇優容新任籍口結舌一惟唯唯至如州縣積蠹事露鑽之府廳府廳衙蠹不法鑽之司道恃衙門爲藏奸之藪視小民爲網中之魚統祈天語申飭今後州縣乏員萬不能候新舊交代者須擇才品俱優之隔府官暫署如貪污不法道府立參徇縱連坐各省大小衙門及在京五城積蠹概行革去並得旨允行六月巡視中城奏言官餽驛馬州縣中十無一二民應者十八九鄉愚不能自應倩之驛棍勒索遂意然後代應遇軍機傳報使客郵符竟無一馬驛棍逃避仍拘民應更可異者府廳司道總兵私遣員役皆騎驛馬雖屢奉嚴綸而官役私牌日行州縣不敢不應又不敢冊報甚至私牌內有擅批上司免報者請今後一應紙票及過往參謁各官統禁騎驛馬非兵部火牌勘合不許濫應違者驛傳道揭部請旨重懲各省州縣驛馬里馬照賦役額設協濟銀兩或鄰封協銀於每季終出毫不累民甘結報部科查照

有仍前者許科道糾參不發覺者連坐更有請者直隸正順廣大等八府屬解運  
芝麻棉花二項腳費數倍大爲民害伏乞敕部照陝省彙解藥材例責成本府不  
經民手部議從之十二年六月巡按山西十三年六月條奏晉省夙弊一司道府  
廳衙蠹犯贓本官失察應議處一州縣到任十日內查前任起存錢糧毋得逾定  
限道府徇隱者連坐一見貨抽稅不得以無貨而包稅無鋪而納課致商賈裹足  
年有豐歉以有餘補不足並下部議行十四年十月奏請布按監司內陞未任事  
之先皇上親試觀其年貌詢其政事才識兼優者令任事年力衰邁平常者別用  
下部知之十五年七月遵旨條奏興利除害事宜一齎奏馳驛馬上不許擅用大  
小皮包以恤驛困一陞遷大小官員不許預調夫馬衙役不許出境迎接一學臣  
考試進黜之數不可太懸每考必確訪學霸數名按律究擬並下部議行十月巡  
視兩淮鹽政十六年六月海寇鄭成功犯瓜州爾位出揚州城護解鹽課銀爲總  
督亢得時所劾上諭高爾位身爲御史聞警卽當率屬護守乃賊尙未至先借端  
出城致令百姓驚逃深爲可惡令解任該督撫嚴察具奏十七年五月總漕蔡士  
英奏爾位於十六年六月十六日起解課銀十四萬兩次日賊陷瓜洲卽出城送

至高郵於二十日回揚賊鋒甚熾恐致不虞於二十二日罄發庫項十一萬兩遣運判郭顯功押解進京舊例原無鹽院親送之條緣乏兵護解親送至淮安至七月二十四日回揚下吏部會同都察院議尋以爾位雖無城守責但聞警當協守城池乃以送鹽課爲詞兩次出城應議處事在赦前免議得旨俞允康熙三年三月內遷順天府府丞四年兼理崇文門稅務十七年遷通政使十九年正月授左僉都御史十二月遷奉天府府尹二十二年擢刑部右侍郎二十三年轉左二十五年丁母憂二十八年服闋補刑部左侍郎兼管右侍郎事二十九年三月授佐領三十年正月以疾乞休諭照舊供職六月擢工部尙書十月以疏濬京城河道浮估降補通政司參議命以所降之級休致四十年十二月卒年七十有七

張玉書

張玉書江南丹徒人父九徵順治九年進士官至河南提學僉事玉書以順治十八年進士改庶吉士康熙三年授翰林院編修十五年擢國子監司業旋轉侍講歷左右庶子充日講起居注官十九年五月以進講稱旨敕部議敘加詹事府詹事銜加一級六月陞侍講學士二十年擢內閣學士充經筵講官二十一年十月

教習庶吉士二十二年十二月遷禮部侍郎兼翰林院掌院學士二十三年丁父憂特遣內閣學士王鴻緒至邸寓奠茶酒二十六年服闋特陞刑部尙書二十七年五月開音布監督高郵州石工奏請閉塞支河口爲中河蓄水聖祖仁皇帝命玉書偕圖納前往勘視並遍閱毛城鋪高家堰以及海口諸處情形詳加審度具奏瀕行上謂玉書曰此行是非可否當秉公陳奏不可效熊一瀟託故推諉也玉書叩頭領訓先是開音布奏參高郵州河員擅開減水三壩請議處比玉書至卽馳奏河員開壩乃循舊例應開無罪開音布不加詳核遽行瀆奏請議處八月閱河工訖還京疏言奉命勘閱河形黃河西岸出水頗高年來大水未曾溢岸則河身淤塞之說非也海口岸寬二三里河流飛迅入海絕無阻滯諸減水壩應如舊閉塞其現在挑濬各工勞而無益應請停止惟是中河一道利濟舟楫得此免涉黃河百八十里之險殊關緊要但形勢逼近黃河旣不可挑寬而太狹又不能容納運河及駱馬湖之水臣勘蕭家渡楊家莊新莊口有衝決舊河之處請飭河臣增建減水壩相時宣洩則中河舟楫可以長通惟於中河淺窄之處酌量挑濬支河口應如開音布所奏永行閉塞奏入上均如所議是年十二月特旨差玉書往

浙江按理事件是月調禮部尙書二十八年二月上南巡駐蹕蘇州府玉書自浙江還復命杭州將軍郭丕奏民人杜光遇控於撫臣金鉉陳兵丁擾民十款有百姓生則倒懸死無安土之語金鉉行藩司李之粹查訊之粹遽咨臣請出示禁理合據實陳奏玉書奉敕確查至是復奏云遍查並無杜光遇其人實由撫臣金鉉捏造虛款暨藩司李之粹迎合附會情罪非輕應按律問罪二十九年授文華殿大學士兼戶部尙書三十年冬命閱河工與圖納偕行三十一年正月還繪圖以進時河臣靳輔請於高家堰增築小隄上問玉書高家堰水勢如何另築小隄果有益否玉書奏云曩者黃漲時淮流被逼故洪澤湖水視昔爲高今擬築小隄之處去高家堰不遠河湖水漲卽高家堰之大隄且不可保豈小隄之可衛築之無益不如其已上問宿遷一帶民生若何玉書奏小民沐聖主憂勤甚爲得所上欣慰玉書又疏高家堰一帶河工惟史家刮至周橋最爲衝要不急於此處重設隄防雖多築隄數重無益也臣度史家刮至周橋約一萬四百餘丈宜煩聖慮飭河臣迅速加築至三官廟諸口俟其篋纜垂朽改用石以期永久卽現在石工亦須加土擁護此今日河工急務也目今高家堰擬築小隄之處惟令河臣每屆歲修

親勘情形題報可耳上深以爲然二十五年聖祖仁皇帝親征厄魯特噶爾丹駕臨克魯倫河噶爾丹聞風奔竄敕大將軍伯費揚古扼要路邀戰斬殺幾盡噶爾丹僅以身免時玉書從征沙漠預參帷幄之議上曰朕愛養元元以率土乂安爲念茲噶爾丹擾亂邊疆不容不行剿滅朕親率大軍出塞賊聞風遠遁大將軍伯費揚古等又復奮勇殺賊擒斬無算從此邊境寧謐永享昇平之福玉書奉王公以下文武百僚賀表以進行慶賀禮三十六年六月充平定朔漠方略正總裁官三十七年七月丁母艱賜奠御書松蔭堂額賜之爲其母劉氏身後光也三十八年聖祖仁皇帝南巡玉書跪迎道左賞賜有加時上親酌明太祖陵大書治隆唐宋四字卽命玉書從兩郡王奉安陵廟三十九年服未闋奉詔來京入閣辦事時河臣張鵬翮奏河工事宜上問玉書奏對甚悉乃降旨諭張鵬翮昨問大學士張玉書據稱河水尙大高家堰俱爲湖水所侵如是則泗州盱眙安得不被水災河身之淺深以洪澤湖水之高下爲驗今聞洪澤湖之水比甲子年尙高數尺可見河身未曾刷深恐高家堰之隄過此以往未可知也四十年三月扈從聖駕南巡賜銀千兩並皇輿表等物四月駐蹕蘇州府命偕學士揆敘考試諸郡舉貢生員

閱卷呈覽得汪泰來等五十三人尋駐蹕江寧府又偕揆敘等閱卷呈覽得錢榮世等五人及御舟次高資港玉書奏曰前去京江不遠臣之敝廬在焉若城中無駐翠華之地輿情雖切未敢恭迎御輦入城懇請行幸江天寺多留數日與親臨鐵甕城無異也得旨張玉書懇求諄切姑再留一日後日起行閏四月初一日於寶塔灣行在賜宸翰一幅四十六年河臣張鵬翮請開溜淮套河恭懇聖駕親臨相度二月聖祖仁皇帝自京起蹕及御舟泊清河口上親往武家墩周視良久見所樹竿之處多屬民冢非掘冢不能開濬上惻然乃召見河臣張鵬翮極斥其請開溜淮套之非張鵬翮語塞叩頭請罪玉書奏曰向者老人白英曾有引汶水分南北流之議策之善也不若別作壩引汶水通漕其下流專以淮水敵黃黃水趨海此萬世之利也上善其言諭鵬翮曰明代黃水強而淮水弱今則淮強而黃弱矣與其開溜淮套無益之河曷若將洪澤湖出水之處力行挑濬令其寬深使清水愈加暢流至蔣家壩天然壩一帶舊有河形宜更加挑濬使通小河不難運料商民可以通行漕船輓運利亦不淺也四十九年玉書以疾乞休有旨慰留五十年五月從上幸熱河甫至疾作數遣御醫調治不能起未及繕遺本而卒卒之日

賜帑金千兩經紀喪事又遣內務府監製棺槨帳幔沿途撥夫役護送至京奉上諭張玉書耆舊老臣久任機務直亮清勤倚任方殷今忽病逝深加軫念應得卹典著察例具奏御賜輓章親書頒發加贈太子太保證文貞五十二年二月奉旨太學士張玉書久任機務小心恪慎懋著勤勞朕追念難忘伊惟有一子張逸少著從優陞翰林院侍讀學士以示朕眷篤舊臣之意玉書二十歲登仕籍蒙聖祖仁皇帝知遇之隆凡五十年歿年七十

### 李光地

李光地福建安溪人康熙九年進士改庶吉士授編修十二年充會試同考官尋以省親乞假歸十三年逆藩耿精忠叛海敵鄭錦乘虛入泉州脅耿精忠修好觀久踞其地光地奉親避匿山谷間錦與精忠並遣人誘之降光地以死固拒十四年五月密疏陳破敵機宜言臣自彼等搆亂以來遯逃山谷中彼遣人延致再三臣以死固拒幸未污清節以辱朝廷然踪跡孱危尙未知草莽孤臣能再瞻天日與否蟲蟻微命不敢自惜惟事機緩急安危所繫未嘗不魂飛情切謹冒險求徹天聽伏惟八閩疆宇褊小糧稅稀薄自彼等割據誅求鞭撲民間之膏髓無復存



者糧盡兵疲而彼等勢已窮矣南來大兵誠宜以急攻爲主不可假以歲月恐生他變然所謂攻之急者不可不審也耿逆方悉力於仙霞杉關鄭敵亦并命於漳潮之界惟汀州小路與贛州接壤彼所置守禦不過千百疲卒竊聞大兵分道南來皆於敵兵多處盡力鏖戰而不知出奇以搗其虛此計之失也臣度仙霞連浙江杉關連江西漳潮連廣東此三方者本地守土之兵自足以控制之其汀州一路宜因彼防之疏選精兵萬人或五六千人詐爲入廣之兵道經贛州遂轉而向汀州爲程七八日耳彼等聞急趨救非月餘不至則大軍入閩久矣此所謂避實擊虛迅雷不及掩耳也若輩悉兵外拒內地府州縣盡致空虛大軍果從汀州小路橫貫其腹則三路之敵不戰自潰且漳州守臣黃芳度嬰城固守以待大軍此不可以不急救而汀漳相近接應尤極便易伏乞密飭領兵官偵謀虛實隨機取效仍恐小路崎嶇更須使鄉兵在大軍之前步兵又在馬兵之前庶幾萬全惟皇上裁決施行時道路梗阻置疏蠟丸中遣家僮夏澤問道出杉關赴京因同里內閣學士富鴻基奏入聖祖仁皇帝諭大學士等曰編修李光地不肯從逆避入山中具疏遣人前來密陳地方機宜具見矢志忠貞深爲可嘉下兵部錄其疏令領

兵大臣等知之時廣東叛亂大兵在江西者阻守贛州南安未能入閩惟在浙江者屢敗賊兵由衢州進克仙霞關遂復建寧延安耿精忠乞降康親王傑書駐師福州令都統拉哈達賚塔等進擊海敵並訪問光地十六年正月拉哈達復泉州知光地離安溪縣七十里結寨而居遣人以所奉上諭宣示之光地往見拉哈達於漳州軍營拉哈達白之康親王王以光地蹇遭賊亂顛沛不渝矢志爲國始終不肯從逆以全名義應予表揚疏聞下部從優議敘部議於額外陞爲侍講學士來京任事遇額缺扣抵得旨李光地著於額外陞爲侍讀學士九月光地行至福州丁父憂歸十七年閏三月同安賊蔡寅詭擁明裔以白布纏頭爲號結衆萬餘掠安溪光地募鄉勇百餘人扼險防禦戒諸鄉人毋資賊糧賊飢困解去六月鄭錦之僞總統劉國軒等陷海澄漳平同安惠安等縣復犯泉州斷萬安江東二橋南北援絕泉州幾不守光地使善泐者從水關入勉慰以堅守無恐援兵卽至分遣兄弟親戚迎寧海將軍拉哈達巡撫吳興祚兩路兵時拉哈達駐師漳州值江水泛漲長泰大路阻隔導之由漳平安溪小路光地之叔李日烜率鄉勇百餘芟闢荆棘以木接護衝圯窄岸其溜深馬難涉者築浮橋以待光地自出迎十里外

具牛羊雞豚等物饋勞大軍又倡率里人輸送米糧大軍進行無阻直達泉州敵驚駭竄入海拉哈達具疏詳述光地志切滅賊接濟軍需狀得旨李光地當閩省交亂之初殫竭忠貞今又遣人迎接大兵指引道路修平險隘搭造浮橋饋送食物率領民兵備辦糧米供給兵丁口糧矢志滅賊實心爲國深爲可嘉著從優議敘尋允部議授爲學士服滿赴京遇缺卽補十二月光地疏言前者蒙皇上念孤臣三載蒙難之艱及萬里獻書之悃閩疆甫定遞錄微臣臣行至途中而聞訃銜哀守制更遭賊亂臣自知與賊義不俱生鼓勵宗親毀家紓難幸而封疆元戎赴援之速臣親叔日烜率鄉兵百餘人度石珠嶺迎將軍拉哈達之兵於漳平親弟光垵光垠等以鄉兵千人度白鷓嶺迎巡撫吳興祚之兵於永春乃將帥仰奉威靈拯百萬垂危之命延及臣家微臣其何功之有哉伏讀旨意據將軍拉哈達題敘之疏授臣學士俯伏之餘震懼隕越以將軍拉哈達率滿漢萬餘之兵行朝天石珠嶺鳥道之險馬瘡僕痡千里赴難推美於臣而臣儼然遂蒙優敘典雖至渥心則何安又念臣資質蠢愚了無才藻獨從少爲六經性理章句之學粗有倫緒自壬子癸丑間以翰林編修簪筆侍從爾時固已仰承聖訓每自念此生得以章

句末學執經敷義少佐高深此臣之願也至於館閣學士之職主於贊畫樞機分  
裁文獻自非老成知軍國大體及有文章聲望者不能稱也臣年纔三十餘筮仕  
日淺典故未諳文采不贍豈宜冒昧而服大僚近年以來未有具疏辭官之例然  
離職家居而再次超擢亦當代僅行之曠典臣豈敢拘於成格受爵不讓況臣在  
制未終身猶凶人不敢服其命服以拜朝命伏乞俯允所請先錄戰守文武紳士  
之勲使微臣終制赴闕仍以講讀之官仰侍清光披衍經義庶微臣無不度德之  
譏朝廷有不僭賞之美疏入奉諭已有成命著卽祇遵不必辭十九年八月至京  
諭不必候缺卽任內閣學士光地奏鄭錦已死子克塽幼部下爭權宜急取之且  
言素習海上情形之內大臣施琅可任上從其言詳見施琅傳光地又疏言耿精  
忠罪狀顯著諸王大臣等正在會議渠魁當治脅從當寬皇上自有睿裁無俟微  
臣置喙惟是臣舊同官原任編修陳夢雷者當耿逆之變家居省會有七旬父母  
不能脫逃及賊以令箭白刃逼脅伊父夢雷遂爲所折勒授編修固辭觸怒改降  
戶曹員外託病支吾律以抗節捐軀之義其罪固不能辭矣獨其不忘君父之苦  
心經臣兩次遣人到省密約真知確見有不敢不言者當耿逆初變臣遯迹深山

欲得賊中虛實密報消息臣叔日烜潛到其家探聽夢雷涕泣言隱忍偷生罪當萬死然一息尙存當布散流言離其將帥散其人心庶幾報國家萬一臣叔回述此語臣知其心之未喪也至十四年正月耿鄭二人連和臣聞國家方行招撫之令因遣人往約其或勸諭耿逆歸誠或播流言離間二人之好使大兵得乘機進取夢雷言敵勢空虛屢欲差人抵江浙軍前迎請大兵奈關口盤詰難往因詳語各路虛實令歸報臣此臣密約兩次知其心實有可原者也比臣入京始聞因變亂阻隔訛傳不一有逆黨希圖卸擔信口誣捏者甚有因藩下僞學士陳昉姓名誤指爲陳夢雷者今皇上削平叛亂明正是非使陳夢雷果爲僞學士甘心從逆是狗彘之流臣雖手刃之市朝尙有餘恨今大兵凱旋在卽陳夢雷託病被降情節親王將軍一一可問至兩次受臣密約皆在患難之中冒死往來之迹非容旁人質證臣若緘密不言其誰能知之臣斷不敢爲朋友而欺君父伏惟睿鑒疏下吏部以陳夢雷歸正後不卽赴京業經革職寢議尋法司議磔耿精忠擬陳夢雷從逆應斬得旨從寬免死二十一年五月光地乞假送母回里二十五年七月赴京仍命不必候缺卽任原官十月授翰林院掌院學士充日講起居注官兼充經

筵講官二十六年正月教習庶吉士三月以母病乞歸省命懸缺以待二十七年四月至京禮部劾奏光地在途遷延以三品卿員弗及叩謁孝莊文皇后梓宮請交吏部議處吏部議降五級調用得旨寬免初光地陛辭奏對謂侍讀學士德格勒學博文優踰月德格勒同尙書陳廷敬湯斌侍郎徐乾學等召試乾清宮上閱卷畢諭曰評論古人易評論時人難如德格勒每評論時人學問朕心不以爲然故召爾等面試妍媸優劣今已判然人之學問原有一定分量真僞易明若徒肆議論則不自量矣未幾德格勒爲掌院學士庫喀訥以私抹記注事劾罷論罪至是命廷臣詰問光地光地自咎愚迷妄奏乞賜處分上曰李光地前奏德格勒所學甚博文章甚優善占易卦德格勒又稱李光地若以總督提督任用令同伊母赴任則來若於別處任用必不肯來因伊等互相奏陳欲辨其真僞優劣特加考試迨將德格勒治罪又有稱德格勒被朕左右之人誣陷冤枉坐罪者今李光地至朕欲明白此事故令詢問據稱德格勒所作之文全無文氣甚屬陋劣應治李光地妄奏之罪但李光地前爲學士時凡議事不委曲從人臺灣之役衆人皆言不可取獨李光地以爲必可取此其所長除妄奏德格勒外別無妄奏之處姑從

寬免罪令仍爲學士嗣後勿再妄冀外任並希圖回籍宜痛加省改勉力盡職九月充武會試正考官二十八年五月改通政使十二月擢兵部右侍郎三十年二月充會試副考官九月同侍郎博霽徐廷璽奉命與原任河道總督靳輔往視黃河應修險工三十一年正月繪圖還奏詳見靳輔傳三十三年正月提督順天學政四月聞母喪得旨提督順天學政關係緊要李光地特行簡用著在任守制光地疏言苦塊餘生重荷聖恩之厚聖知之深敢不以殘喘自效顧蟲蟻微情乞給假治喪往返九月於本年十二月抵任并日夜之力歲科兩試可以看閱周詳報竣無誤御史沈愷曾楊敬儒交章論劾一言光地誠以君命爲重當於三年考畢之後回籍終制乃聞其請假九月即使星夜奔馳將來歲科兩試勢必潦草塞責況九月以後親喪未遠遂忍絳帳錦衣談笑論文乎一言皇上作人念殷故暫爲行權計然在皇上不妨行權在大臣必當守經爲光地者哀籲再三聖意未有不俯允者乃竟以治喪九月爲請方今王道蕩平屬在武臣尙許回籍守制況敦詩說禮之大臣豈可覲顏充位是日命光地仍遵前旨行翼日給事中彭鵬劾之曰光地閔罹母喪宜哀痛瀝情得請乃已然後聖主擇人取士之心以光地固辭而

彌見光地爲子奔喪之孝得聖主俞允而益彰忽以三年之通喪請爲九月之給假於禮則悖於情則乖於詞則不順聖德含容不忍明斥其罪臣以爲宜留者一不可留者十光地由翰林驟躋學士侍郎原因蠟丸封表上達宸聽完節常經獨蒙異數正當借此教育士類使真才輩出仰答主恩而有母訃至奉旨留任蓋報稱之心切而哀痛之情微其宜留者此耳臣以爲不可留者何伏讀上諭十六章首曰敦孝弟以重人倫督學風化之表也不乞守制而請給假非所以體上諭教孝意也此光地之不可留者一也臣前任三河知縣恭逢太皇太后梓宮經臨伏見校尉換班聖躬護視天顏哀瘠至今追慕真誠亙古仁孝臣民皆當則倣此光地之不可留者二也光地與臣同鄉臣踴躍涼涼歲一二至獨聞其母訃卽刻趨弔聽其號泣慘若嬰兒想彼肝腸寸寸斷矣勉強衡文必多恍惚此光地之不可留者三也先遭閩變頗矢忠貞未聞不孝而能忠者也請假九月之疏出天下皆議其後並歎其先此光地之不可留者四也弗請守制清議沸騰有絕不赴弔者以談理講道如光地爲珪爲璋倏忽瓦裂此光地之不可留者五也光地疏稱荷聖知之深殘喘自效請假九個月不誤學差僉謂九月大功服談言微刺此光地



之不可留者六也定例生童匿喪應試褫革嚴處萬一犯者起而詰曰侍郎衰經何至此光地何辭以對此光地之不可留者七也學校所以教天下之爲臣思忠爲子思孝故登其堂曰明倫光地以不祥之身儼然而登奈橋門環視何此光地之不可留者八也本年正月皇上面議諸臣於禮義廉恥難進易退三申意焉試問光地今日禮乎義乎進退難易之謂何悖聖訓而失本心此光地之不可留者九也度光地之心必曰君命也誼何敢辭臣聞宋臣富弼母喪五起之固辭且曰起復金革之變禮不可施於平世仁宗許之綱目大書以垂訓後世又宋孝宗起復劉珙六疏固辭發明曰綱目書固辭予之也我皇上堯舜比隆教孝教忠必無有辭之而弗允者矣此光地之不可留者十也數日之內長安道上無不指光地爲貪位而忘親司文而喪行大損其生平是在皇上神其用重其罰加之意而已疏入傳旨詢問鵬又疏言皇上令光地在任守制或以此試光地耳光地深文厚貌道仁道義言忠言孝一式諸此而生平心術品行若犀燃鏡照而無遁形皇上所以留之之意臣鵬愚戇不能知使光地而亦不知貪戀苟且而姑爲此給假九月之請外以欺人則爲喪心若光地而早已自知詭隨狡詐而姑爲此給假九月

之請內以欺已則爲挾術夫爲人子而甘於喪心爲人臣而敢於挾術兩者均罪光地必居一焉以此赴任不可以此回籍尤不可蓋回籍則母死有知恨其不誠當必陰阨而赴任則士生至性憤其銜恤誰甘面從嗟乎光地當聞命而絕不一辭則忍於留矣皇上卽罰其忍使之在京守制以動其市朝若撻之羞光地忘通喪而假易以暫則安於久矣皇上卽罰其安使之離任終喪以爲道學敗露之恥臣與光地家居各郡然皆閩產也今若此人人切齒桑梓汗顏伏乞皇上察光地患得患失之情破光地若去若就之局不許赴任不許回籍春秋誅心如臣所請萬一光地依然督學則光地得售其術故哀其辭曰九月且弗獲命況三年乎而蚩蚩者亦曰是欲終之而不可得也下售其術上受其名臣鵬實拊膺疾首前疏光地十不可留如稍有涉私是責光地以不孝而先自蹈於不忠所以跪聽傳旨一一瀝鳴以頭搶地嗚咽而不能自己也疏入與前疏並下九卿議令光地解任不准回籍在京守制三十五年服闋仍命任順天學政三十六年授工部左侍郎留任學政三十七年十二月授直隸巡撫三十八年二月奉諭曰漳河與滹沱河故道原各自入海今兩水合流所以其勢汎濫可否開通漳河故道引入運河於

運河之東別挑一河使之赴海著李光地閱視再奏四月光地疏言閱視漳河現分爲三支自廣平縣經魏縣元城縣至山東館陶縣入衛水歸運一支俗名老漳河自山東邱縣東北經南宮等縣與完固口合流至鮑家嘴而歸運一支俗名小漳河自邱縣西北經廣宗鉅鹿二縣合於滏河又經東鹿縣冀州合於滹沱河由衡水至獻縣完固口復分爲兩支小支與老漳河合流至鮑家嘴大支復經河間大城靜海三縣入子牙河而歸淀皆分流入運其入衛之河與老漳河各有散漫淺平之處應酌量挑濬其完固口小支河應築雞嘴壩及攔河壩逼水入河至靜海縣田地淹沒因向年開廣福樓及閘留二莊之故若竟堵諸口又有礙西隄應俟水退後暫堵來春水涸於閘留二莊水出處挑河築隄束水歸淀則靜海縣田地不致淹沒而大城等州縣隄岸均無妨礙矣詔如所請行光地尋疏報大名廣平真定河間四府屬州縣凡滹沱河漳河經流之處開濬疏通由館陶入老漳河與單家橋支流合以分子牙河之勢至鮑家嘴歸運又言霸州永清宛平良鄉固安高陽獻縣因疏濬新河挑挖堆土共占去民地一百三十九頃有奇請開除此後錢糧下部議覆從其言六月疏言通州附近六州縣額設紅剝船六百隻每

船給地十頃以爲運下贍養之費倘遇水旱收入既寡豈能常令其修船雇夫與民地同一被災而未得蠲免請嗣後視民地一體沾恩蠲免下部議不准得旨此紅剝船地畝若遇災傷著與民地一例蠲免三十九年二月疏言積弊因循未有甚於虧空者不可不立法清釐凡雜項不入奏銷案內錢糧責成盤查上司與正項一例盤查向例以年終爲限嗣後應自十一月起至次年奏銷以前止果無虧缺逐項出具保結否卽立行結報如挪移銀至五千兩以上或糧米至六千石以上者擬流不准折贖及援赦減免庶知畏威法而倉庫加謹疏下部議行七月上以大臣子弟遇科場考試取中者多詔另編字號不致妨孤寒進身之路時給事中滿晉御史鄭維孜各條陳科場積弊總督郭琇條陳學校弊端並下九卿等詳議既定議命錄示光地及總督張鵬翮郭琇巡撫彭鵬諭曰四臣皆持行清廉李光地爲學院時官聲最好今閱九卿等所議果否得當如何方能除去弊端永遠可守各抒己見具奏光地疏言皇上垂念大臣官員子弟夤緣倖進恐妨貧寒之路特諭另編字號均數額收仰見天地無私不遺側陋洵足永遠遵守至點名授卷後卽入號房不許出號行走及踰牆混亂俱應如所議以塞弊端者也臣又推

廣三條一勢要勒收關節許考官據實出首卽與優陞則不惟無所懼而且有所勸可懾營競者之心一貢院牆垣卑矮巡綽及瞭望守門軍役無一非受賂傳遞之人若漫無防檢勢必收受之卷半屬假僞乞敕外簾監試嗣後務精密嚴肅盡絕弊竇一數科以來鄉會試場中用儒士八人以充分卷扣數填名書榜之役某卷入某房既可暗行其奸而考官聲氣不接者亦皆此輩往來聯絡之近經言官論列裁去部覆未准臣深知此輩積慣作弊宜永行革逐臨期行文各衙門保送繕寫書手應用此三者科場之事臣管見所及也至於學校弊端九卿議如督臣郭琇所奏嚴定處分矣臣亦推廣四條一學臣職司文教遇點差之時宜經御試擇其議論有本者差遣一教官未選之前宜令督撫會同學臣考驗若歲貢之年老目昏及捐納人員之文理不順者均給銜休致年未壯者令至三十歲以外再行考驗其現任人員亦按此會同澄汰一生員雖有干己之事止許子弟家人代告自賄賣者多專以爲護身之具不讀書無行義保官告官抗糧包糧興滅詞狀武斷鄉曲甚至窩盜藏奸故賄賣生員之弊不但孤寒爲之不伸而風俗因以潛壞也今學臣納賄處分已定嚴例而生員惡習亦宜懲禁乞敕禮部推廣舊時臥

碑詳明剴切作爲誠條令學校師生恪謹遵守一邇來學臣率多苟且從事致士子荒經蔑古雖四書本經不能記憶成誦僅讀時文百十篇剿襲雷同僥倖終身殊非國家作養成就之道前歲旨下學臣使童子入學兼用小學論一篇其時幼穉見聞一新胸中頓明古義此以正學誘人之明驗也然書不熟記終非己得宜令學臣於考校之日有能熟誦經書小學講解四書者文理粗成便與錄取如更能成誦三經以至五經者更與補廩以示鼓勵庶幾人崇經學稍助聖世文明之化又童生既令熟習小學以端幼志生員及科場論題專出孝經每重複雷同似當兼命性理綱目以勵宏通者也疏入仍下九卿等與張鵬翮郭琇彭鵬三疏參合定議鄉試另編官字號以民卷九官卷一爲額論題以太極圖說通書西銘正蒙一併命題餘詳張鵬翮郭琇彭鵬傳四十二年四月諭大學士等曰李光地自任直隸巡撫以來每年雨水調順五穀豐登官吏兵民無不心服今吏部尙書缺出卽令補授仍管直隸巡撫事四十三年三月給事中黃鼎楫湯右曾許志進宋駿業王原等合疏劾之曰去歲直隸報災州縣二十餘處據巡撫李光地疏內或稱開倉賑濟或稱減價平糶務使民沾實惠臣等竊計直屬百姓自必安撫有方

不致流移失所乃近見河間飢民散入京畿者甚多我皇上曲軫民依特令八旗王貝勒滿漢大臣設廠數十處分行賑濟光地身爲撫臣漫無經理疏內所稱民沾實惠俱屬空言尤可異者寧津縣被災更重流亡更多荷蒙皇上至聖至明無微不至特敕撫臣前往察勘而光地去歲竟不報災僅於題參知縣陳大經內疏稱寧津頗有水災匿重爲輕並不將被災人民逃散情形據實陳奏聖恩高厚不加譴責復諭光地選賢能官員將河間飢民領還原籍仍給籽糧不致化離失所而光地目擊流亡不聞出一籌畫碌碌素餐虛文巧飾若非皇上宵旰憂勤多方拯救止恃光地之撫綏則流散之民不將盡填溝壑乎光地身膺重任上荷聖主之殊恩不能報稱下視生民之疾苦罔知拊循臣等合詞糾參請嚴加處分以爲大吏膜視民生之戒疏下光地回奏光地奏去歲河間等府屬被水勘明成災州縣三十餘處陸續照例題請蠲免錢糧分別災傷輕重將倉糧散賑出借又設立粥廠二十餘處自去歲十一月起至今未停無論遠近飢民貧民皆許就食其流散者飭地方官分道招令還鄉臣安敢稍涉懈怠以負皇上委任然安集無術猶有貧民如許散入京城此臣及地方官之罪無可辯者也至寧津地方先經知縣

陳大經以去年大半豐收僅有低窪一面鄉村被淹不照例申詳被水輕重乃以合縣田禾通算謂不及成災竟不通報及十月中臣扈駕西巡由真定回署路遇天津縣民人詢知情形卽劾罷陳大經疏中聲明寧津頗有水災而老病廢職申報不時撫恤無實是臣劾陳大經原因其報災不時撫恤無實非專劾其老病所云頗有水災者亦是臣詢訪所得情形非敢匿重爲輕也其時卽飭知府及署知縣煮粥賑濟加意招徠然人民旣不能悉歸本業致有流移臣與地方官之罪又無可辭者也臣上荷殊恩不能報稱誠如科臣所云乞嚴賜處分以儆庸碌以重畿疆臣不勝悚惶待罪疏入得旨不必引咎光地又奏臣謬膺直撫重任五年之內恭荷皇上指誨幸免過愆並無功績去年四月仰荷特恩補授吏部尙書仍管直撫事臣自知非分夙夜戰兢果然福極禍生遂逢災眚去秋所屬河間等處遭罹水淹實臣政無善狀躬蹈非幾之所致臣雖極力拯救而安插無術以致貧民流移入京上厯聖懷不卽治臣之罪諭令委官召回原籍無廢農務臣跪讀之下恭繹聖言寬大和平而微臣循省思咎終宵達旦愧恨不復欲生臣本庸才遭逢恩盼錫賚迥出尋常一有罪戾亦宜從重處分以爲叨蒙尸位者戒況六官首職



難以久虛九列崇班從無兼領臣今若懼罪隱忍不言則厚顏覲面不獨外無以示吏民且內無以對妻子伏乞天恩另簡賢能補授吏部尙書使臣落職待罪效力郊圻窮思畢精以贖愆過庶心稍安而分可盡疏入得旨如前尋諭大學士等曰李光地居官有何可議惟常爲門生所誑或其人口講道學彼卽信之夫道學豈易言哉若徒託之空言而無實事則何益之有八月御史呂履恆劾奏光地於秋審之事任意斷決上以光地依律審擬非任意斷決命發還呂履恆奏時給事中王原又劾奏文選司郎中陳汝弼因光地舉薦由刑部調吏部初猶矯飾顧名近則專擅恣縱有婪贓情弊下都察院察議革汝弼職交刑部鞫訊刑部定讞計贓論絞上曰人有薦陳汝弼之賢能者故朕簡於衆郎中內特授選司郎中如受賄是實卽置之於法以爲衆戒若未經受賄則應寬之令再審尋覆奏受賄有據應立絞上察知供證非實下議政大臣九卿等確核得刑訊選人逼供行賄狀命免陳汝弼罪原審諸臣革降有差王原以有囑託私書爲汝弼舉首革職四十四年六月光地疏劾革職雲南布政司張霖假稱奉旨販賣私鹽得銀百六十餘萬兩得旨卽令光地審擬霖論斬家產入官十一月諭吏部曰李光地居官甚好才

品俱優授尙書年久著陞爲文淵閣大學士調河南巡撫趙宏燮爲直隸巡撫四十七年十一月上以廢皇太子允礽狂疾漸愈欲復立之命諸大臣集議保奏尙書王鴻緒附和內大臣阿靈阿等保奏皇八子允禩上切責之諭詢李光地曰前召爾入內曾有陳奏今日何無一言光地奏前者皇上問臣廢皇太子病如何醫治方可全好臣曾奏言徐徐調治天下之福臣未嘗告諸臣也四十八年充會試正考官四十九年九月太原總兵馬見伯請御選武經七書頒行上曰武經七書朕俱閱過其書甚難所言火攻水戰皆是虛文若依其言之斷無勝理且有符咒占驗風雲等說適足啟小人邪心今日若欲另纂一書而此時又非修武書之時光地奏云令習武者讀左傳卽佳上曰左傳浮誇昔人曾議之不若於武經七書內分別出題並以論語孟子一并出題也五十二年三月賜千叟宴於暢春園光地得優賚五十四年六月疏言臣前以瘡毒發體乞休奉諭以內閣老臣彫零令臣勉加調攝藥餌食物賜賚頻仍枯株敗枿復得更生萬壽節後臣復申前請又因垂念理學緒微經書說雜特加刪輯以惠萬世御纂朱子全書繼以羣經性理諸編皆煩聖心裁定臣所承修係易經性理猥以淺劣末學二三年間荷皇上

殷勤指誨字酌句議縷析毫分每一經校正能使愚蒙頓開臣上幸先聖前賢之復光下喜暮年餘生之有覺是以阻勉從事忘疾病之在身知其有重於區區之軀命者而不敢自愛也今稟承筆削二書將次告成俯念臣年七十有四古人懸車於數已過而且痼疾纏綿每奏對多失儀節聖主哀矜往往令人扶掖而臣何敢自安乎又臣父歿於閩亂之時窆封淺土臣母之歿因臣在京守制久未合祔十餘年來臣長子臣妻臣媳相繼淪喪臣孫幼小未能襄事臣以草霜風燭之齡前期不能自料誠恐臣身已極於寵耀而泉下未逮乎哀榮烏曠私情難免悽惻故敢瀆懇允臣休致庶微臣得遵止足之戒而稍盡骨肉之恩伏念人生所難值者太平之世所難逢者堯舜之君臣身受特達之知心迹無間日聆至精之論道法親承則千百年來未有如臣之幸者臣聞父老扶杖以觀化葵藿傾葉以向陽臣之遭時如此受恩如此其樂觀熙皞而傾心聖明曾是野人園花之不如乎抱誠結戀雖夢寐不敢忘君實不獲已而引年求退伏乞聖主哀而諒之疏入得旨卿才品優長文學素裕寬宏休容得大臣之體自簡任機務以來恪共清慎益著勤勞今雖以老病乞休朕眷注方殷何忍允其所請正資倚毗共樂昇平奈泉壤

骨肉之分亦係一生之要事暫給假二年事完卽來京辦事以副朕篤念老臣至意又賜以詩有協恭惟得老成儒味道經書翊廟謨之句五十四年四月至京奉命勘閱大學士王揆等所纂春秋傳說及檢討張照等所輯篆字經文五十七年正月內閣議上孝惠章皇后尊諡疏中未書章皇后部議降三級調用得旨寬免五月卒於官年七十有七是時上駐蹕熱河諭閣臣曰李光地屢經求退其奏摺已呈覽數次因大學士王揆患病告假故暫止其奏俟王揆到閣時令其具本奏請並非李光地貪戀官職而借以爲名也前摺衷心畢露甚是詳明今覽遺本因陡染重疾辭不達意深可憫悼遣恆親王允祺率內大臣侍衛往奠茶酒給銀一千兩令工部尙書徐元夢護其喪諭部臣曰李光地久任講幄簡任綸扉謹慎清勤始終如一且學問淵博研究經籍講求象數虛心請益知之最真無有如朕者知朕亦無有過於李光地者倚任方殷忽聞患病溘逝朕心深爲軫惻所有應得卹典該部察例具奏賜祭葬如典禮諡曰文貞世宗憲皇帝雍正元年追卹聖祖朝宣力效忠大臣贈光地太子太傅十年入祀賢良祠

薩布素

薩布素滿洲鑲黃旗人姓富察氏其四世祖充順巴本太祖高皇帝時由岳克通鄂城率丁壯屯吉林遂家焉薩布素初由領催授驍騎校遷協領皆在吉林康熙十六年四月聖祖仁皇帝以長白山爲本朝肇迹發祥宜崇秩祀敕遣內大臣覺羅武默訥侍衛費耀色塞獲禮索爾等前往瞻視六月至吉林欲選曾往者導引弗可得寧古塔將軍巴海令協領薩布素率兵二百攜三月糧以隨循溫德亨河陸行七日至卓薩鄂河復乘舟由幹努呼河逆流二日至佛多和河順流一日抵訥殷陸路爲林木所阻翌日薩布素率兵伐木開路行三十餘里陟山巔升樹而望又行數里登高峯望之遣人還告武默訥望見片片白光卽長白山計相距止百里餘矣武默訥等後一日至復開路行一日詰朝又行雲霧塞徑恍惚聞鶴鳴六七聲尋聲疾走因得鹿蹊密林叢翳進至山麓跪誦敕旨畢雲霧忽開有路半山石砌若平臺五峯環拱南一峯稍下如門山水左流爲松花江右流爲大小訥殷河中潭不流者周三十餘里由潭邊陟山五十餘丈香樹紛郁黃花燦爛徧地積雪卽向所望見片片白光也薩布素曰此地人跡罕到不宜久留遂叩拜而返至山麓有羣鹿自山奔墜時竚立視者七人鹿適介其七薩布素謂武默訥曰此

山靈所贈也令從者挈之以行不數十步回首瞻望已雲霧彌山矣仍由訥殷行十五日乃還吉林八月武默訥等入奏敕禮臣詳議尊封長白山之神秩祀如嶽鎮自是春秋望祭於吉林城西南九里溫德亨山永著爲典十七年八月擢薩布素寧古塔副都統二十一年八月上遣副都統郎坦朋春率兵赴黑龍江時俄羅斯人來邊境者咸稱爲羅刹郎坦朋春奉諭曰羅刹犯我黑龍江邊境昔曾發兵進討未獲翦除近又侵入精奇哩江諸處恃雅克薩城爲巢穴蔓延益甚爾等往偕寧古塔副都統薩布素率兵至達呼爾索倫遣人赴尼布楚諭以捕鹿之故因詳視陸路進達沿黑龍江行圍徑薄雅克薩城下勘其居址形勢度羅刹斷不敢出戰若以食物來餽可受而量答之其自黑龍江至額蘇哩舟行水路及額蘇哩通寧古塔之路擇隨行之參領侍衛同薩布素往視十二月郎坦朋春還奏雅克薩城易取狀上命建木城於黑龍江呼瑪爾二處調寧古塔兵一千五百往駐造船艦運礮具以薩布素同將軍巴海統之二十二年四月薩布素與巴海奏言黑龍江呼瑪爾距雅克薩城尙遠若駐兵兩處則勢分道阻且過雅克薩有尼布楚等城羅刹尙水陸運糧增兵救援更難爲計宜乘其積貯未便速行征剿一俟造

船畢度七月初旬能抵雅克薩卽統兵直薄城下疏下議政王大臣議如所請上以所議七月進攻未協機宜令再議因諭曰寧古塔兵未諳行軍紀律將軍與副都統分管又不能齊心巴海可留守吉林薩布素同寧古塔副都統瓦禮祜領兵前往俟抵彼相度形勢奏請酌行尋允王大臣議額蘇哩在黑龍江呼瑪爾之間可以藏船且有田隴舊跡宜建立木城令薩布素瓦禮祜統兵駐守七月索倫總管博克等招降羅刹三十一人詔賞其頭目二人衣帽赴薩布素軍前效力九月命前鋒統領耶坦會商駐兵事宜尋奏言額蘇哩今年七月卽經霜雪若於來秋移寧古塔兵往駐恐地寒霜早諸穀不穫難以糊口應就近移達呼爾兵五百人先於來春赴額蘇哩耕種量其秋收再以寧古塔三千餘兵分爲三部更番駐防上曰兵丁頻事更番必致困苦非長久計宜在黑龍江建城永戍豫備礮具船艦設斥堠計程置驛有警則乘蒙古馬馳擊常時按程以行由水路陸續運糧積貯黑龍江仍設將軍副都統領之十月調薩布素爲黑龍江將軍十一月疏言羅刹來歸之宜番鄂噶番席圖頒三人效力勤勞宜與新投誠之吉禮過哩鄂佛那西等酌給官職以示鼓勵得旨授宜番曉騎校餘授七品官其新投誠之鄂佛那西

等賜裘帽令駐驛赴薩布素軍前酌遣招撫二十三年五月疏報營總鄂羅順抵羅剌界遣宜番等招撫二十一人以歸七月疏請今年暫停攻剿俟來年四月進兵上曰前遣侍衛關保傳諭薩布素率水陸兵丁刈羅剌所種田禾則雅克薩城自困薩布素亦言羅剌田禾應行踏毀今乃奏請暫停是坐失機宜矣薩布素尋以坐失誤軍機上疏請罪上以薩布素現在領兵進剿諭部俟事竣察議命都統瓦山侍郎果丕與薩布素會議師期二十四年正月奏言我兵四月杪水陸並進攻雅克薩城倘萬難攻取則刈其田禾上諭王大臣曰薩布素所奏四月進兵不過刈取田禾事必無成此皆商遣黑龍江狂悖之人從中阻議不欲事成而薩布素出身微賤高視若輩不敢有違用兵所關甚鉅宜周詳籌畫期於必克倘謀事草率羅剌將益肆猖狂矣乃命都統朋春鑿儀使林興珠臺灣投誠左都督何佑分率八旗綠旗兵丁及籐牌兵赴黑龍江會剿五月抵雅克薩遣人以書諭之不從薩布素同朋春等軍其城南集戰船於城東南列紅衣礮於城北將夾攻之先積柴城下爲焚城狀城中大驚其頭目額里克舍窮蹙乞降先是薩布素屢奉諭行軍不可多行殺戮至是朋春宣上恩德額里克舍垂涕稽顙謝引六百餘人徙



去我軍毀雅克薩城捷聞諭議政王大臣曰大兵迅速征行破四十年盤踞之羅刹於數日之間獲雅克薩城克奏厥績薩布素向來逗遛不進兵之罪概從寬免至雅克薩城雖已克取防禦決不可疎應於何地駐兵彈壓其速議具奏尋允所議以副都統溫岱納泰駐守黑龍江薩布素移駐墨爾根建城防禦二十五年正月薩布素奏遣人往偵羅刹復至雅克薩築城盤踞請於冰消時督修戰艦相機進剿諭曰羅刹復築雅克薩城若不速行撲剿勢必積糧堅守圖之不易其令薩布素暫停墨爾根處兵遷移家口速修船艦統寧古塔等處兵赴黑龍江城酌留盛京兵守之所部二千人攻取雅克薩城尋命副都統郎坦班達爾沙領兵會剿八月奏言臣等遵旨圍雅克薩城已三面掘壕築壘壕外置木椿鹿角分汛防禦城西對江另設一軍於未流漸時泊船東西兩岸令堵尼布楚援兵至流漸時卽藏船上流之港內以資守禦軍中馬匹有疲羸者請半發黑龍江半發墨爾根駐防兵飼秣得旨如所請行九月俄羅斯察罕汗遣使上疏納款乞撤雅克薩之圍上諭以別遣使來議地界命薩布素撤圍城兵列艦結營尋以俄羅斯使臣費耀多囉等已抵喀爾喀土謝圖汗境詔薩布素還駐墨爾根又以噶爾丹侵掠喀爾

喀傳諭費耀多囉等按期定議二十八年四月費耀多囉等至尼布楚詔調黑龍江兵一千五百隨內大臣索額圖等赴尼布楚定議令俄羅斯自毀雅克薩城徙其人去以格爾必齊河北岸爲彼界立碑垂示久遠二十九年薩布素奏以前此索倫總管安珠瑚等所種官田二千餘畝分給墨爾根兵丁屯種三十一年同寧古塔將軍佟寶奏建齊齊哈爾城及伯都納木城以科爾沁獻進之錫伯卦爾察哈呼爾壯丁萬四千有奇分駐二城編佐領隸上三旗並設防守防禦等官三十四年遵旨陳奏進剿噶爾丹豫備事宜言興安嶺北形勝之地索約爾濟山爲最已遣熟識路徑官兵自盛京吉林墨爾根三路度至山遠近分置程站其無水處掘井以待若山之東北呼倫貝爾諸處有警則與臣駐軍之地近卽率墨爾根兵先進吉林盛京兵繼之若山之西烏勒輝諸處有警則盛京兵先進臣率部下兵及吉林兵繼之皆會於索約爾濟山以待上可其奏又諭曰聞噶爾丹順克魯倫河而至薩布素速卽遠行偵探倘賊犯車臣汗地聽酌量禦剿卽踵其尾以進三十五年二月上親征噶爾丹由獨石口出中路大將軍費揚古由歸化城出西路命薩布素扼其東路諭領侍衛內大臣等曰近聞噶爾丹將欲東行故令薩布素

整兵設偵防其竄逸所派盛京寧古塔兵及科爾沁兵以薩布素總轄凡口外所報軍務悉使知之薩布素尋奏言各路調集之兵於四月初由索約爾濟山刻期進克魯倫河四月上親臨克魯倫河噶爾丹西竄爲費揚古所敗薩布素奉詔就喀爾喀河附近擇好水草處秣馬六月命率兵一千移駐科圖餘皆遣還七月詔分所部兵五百隸費揚古軍三十六年正月召還京尋令仍回原任九月疏報沿河被水之十八莊請以舊貯糧米按丁散給上曰薩布素前曾奏稱收貯糧米三萬餘石年久漸朽與其積之腐爛何若散之爲有益且出陳可濟軍糧易新易於收貯其如所請行初邊境有墨爾哲勒氏屯長累世輸貢康熙十年其屯長扎努喀布克託請率衆內移寧古塔將軍巴海安輯之墨爾根編四十佐領號爲新滿洲三十四年薩布素奏於墨爾根兩翼各立一學設助教官選新滿洲及錫伯索倫達呼爾每佐領下幼童一名教習書藝是爲黑龍江建學之始上嘗問薩布素免死罪犯聚集黑龍江慮生事否薩布素奏言兇徒俱分給新滿洲爲奴勢孤力散惡不能逞至是上憶其言以諭大學士等曰人命所關重大朕數年以來凡盜案止誅首惡其從犯俱免死發遣黑龍江每慮聚集或至生事曾問及薩布素據

所云則不惟全活甚衆且新滿洲亦資益良多矣三十七年四月奏錫伯達呼爾佐領阿穆瑚朗巴琳等曠誤防哨諭曰薩布素任黑龍江將軍年久諳練地方事務亦得軍民之心錫伯達呼爾編入佐領已數年矣理合遵行禁令今曠誤防哨不可不嚴加處分佐領阿穆瑚朗巴琳俱革職交薩布素懲治嗣後若有此等不遵法紀者令薩布素酌量治罪以聞九月上巡幸吉林諭大學士等曰薩布素授任以來爲國效力訓練士卒平定羅刹勤勞可嘉其予一等輕車都尉世職並以朕御袍及纓緯於衆前宣諭賜之三十八年黑龍江副都統關保爲其所劾罷之協領都爾岱訐告濫用驛站車馬諸款薩布素以訐告在劾罷後陳奏上以關保未任副都統時久爲侍衛諭大學士等曰薩布素辦事明敏然器局卑瑣朕巡幸吉林每見其逢迎近侍朕聽政多年何事未歷僉壬端良夫豈不辨彼近侍何能爲關係各款俱實料薩布素不能袒護可卽令其察審尋覆奏察審關係疲勞驛站擬革職枷責命從寬降五級調用三十九年五月薩布素奏黑龍江屯堡因災荒積欠米石請俱俟豐年陸續交倉得旨前因羅刹侵擾內地是以駐兵黑龍江設立官堡遣員屯糧原欲多積米石厚備軍儲仍令革任總督蔡毓榮經理十二

堡薩布素曾奏其皆有成效後因其十二堡荒棄無收復請停止屯種將壯丁改歸驛站其餘官堡逋課日多並從前貯存倉米支散無餘致駐防兵餉匱乏薩布素難辭其咎令明白回奏八月奏言官屯耕種雖未失時而地氣早寒秋霜損稼又累經水旱不能交納官糧兵丁餬口無資因以舊存倉米按丁支放由臣庸劣不能遠謀所致至前奏蔡毓榮所管十二屯堡停止耕種罪實難辭今請以齊齊哈爾墨爾根駐防兵每年輪派五百人遣往錫伯等處耕種官田督令未及霜降悉行收穫夏秋間以船貯穀運至齊齊哈爾倉收存其所買耕牛田器籽種先於備存俸餉內支用俟次年收穫日扣還歸款則糧儲裕而兵餉可充疏下戶部察議尋議錫伯諸處屯種事宜應如所請行其以蔡毓榮荒廢之屯地妄報成效實屬瞻徇又以貯存穀石混行給散不能嚴飭兵丁屯種應糧應令賠償逋穀一千二百三十餘石歸倉並請旨嚴加治罪上命侍郎滿丕等前往察訊四十年正月滿丕等奏薩布素徇私捏報屯種浮支倉穀應斬得旨免死革任并革去一等輕車都尉世職在佐領上行走尋授散秩大臣未幾卒

耶坦

耶坦滿洲正白旗人姓瓜爾佳氏內大臣武拜之子也年十四任三等侍衛世祖章皇帝順治六年遷二等侍衛隨端重親王博洛征叛鎮姜瓖師次渾源州城圍之賊渡濠來犯耶坦射其酋貫心而殪遂敗賊衆師還擢一等侍衛八年以武拜附和內大臣洛什等造言搆讐獲罪並革耶坦任九年恩授三等侍衛尋復一等侍衛聖祖仁皇帝康熙二年代父管佐領遷護軍參領隨定西將軍圖海征流賊李來亨等於湖廣茅麓山同護軍參領葉楚赫深入賊巢擒僞官十一人四年襲父一等子爵仍任一等待衛十二年京城有邪教陳三道等設壇惑衆耶坦率諸侍衛逮繫之十三年奉命行邊捕獲逃盜張飛骸等於板城十九年擢正白旗蒙古副都統明年調本旗滿洲副都統二十一年八月上以俄羅斯屢擾黑龍江邊境久踞雅克薩地命耶坦同副都統朋春率兵沿黑龍江行獵覘雅克薩情形相度水陸往來遠近十二月疏言俄羅斯久踞雅克薩恃有木城若發兵三千攜紅衣礮二十具即可攻取陸行自興安嶺以往雖無險山而林木叢雜途徑仄隘冬雪之時沙結冰堅夏日遇雨泥深淤阻惟輕裝可行水程自雅克薩還至愛濬城於黑龍江順流行船僅需半月觀兩岸悉可繚輓若逆流行船約須三月視從陸

倍期於運糧餉軍器輜重爲便現有大船四十小船二十六宜增造小船五十餘  
奏入詔寧古塔將軍巴海等造船備礮擇要地駐守暫緩進兵二十二年二月擢  
耶坦前鋒統領九月命往會黑龍江將軍薩卜素酌議駐兵額素哩事宜還奏額  
素哩今年七月卽經霜雪來年宜乘春和時以寧古塔諸處兵分爲三班更番往  
駐上以更番戍守非久長策不允行二十三年甄別八旗管兵官員之弗勝任者  
罷耶坦前鋒統領以子爵隨旗行走二十四年正月都統朋春同臺灣投誠左都  
督何祐率兵征雅克薩副都統班達爾沙護軍統領佟寶爲參政耶坦以副都統  
銜隨征師旣行上遣侍衛往諭朋春日朕以仁治天下素不嗜殺爾其嚴諭將士  
毋違朕旨以我兵馬精強器械堅利俄羅斯勢不能敵必獻地歸誠爾時勿殺一  
人俾還故土宣朕柔遠至意五月師薄雅克薩城朋春班達爾沙等軍其城南何  
祐等集戰船於城東南潛進紅衣礮於城北與副都統溫岱等將夾攻之先集柴  
城下爲焚城狀其城長額里克舍乞降耶坦宣恩諭宥其罪額里克舍稽顙謝引  
六百餘人徙去其願來內附者巴什里等四十五人挈妻子及前此被掠之索倫  
達呼爾戶口百餘俱隨大軍還奉詔安插內地毀其木城耶坦與議政王大臣等

會議鎮守事宜議於墨爾根築城駐兵是年冬俄羅斯復踞雅克薩築城明年二月命同班達爾沙攜礮率藤牌兵百往會黑龍江將軍薩布素進征旋奉詔以耶坦諳悉地形卽令參贊軍務六月師薄其城鑿壕築壘四面列圍賊出拒阻擊敗之斬額里克舍尋以俄羅斯察罕汗遣使詣闕謝罪請釋雅克薩圍上命以別遣使來議地界詔釋圍退駐查克丹待之尋還駐寧古塔明年擢耶坦正白旗蒙古都統二十八年俄羅斯議界使人費耀多囉等至尼布楚上遣領侍衛內大臣索額圖等同耶坦往議以格爾必齊河及額爾固訥河爲界毀雅克薩城令其人徙去是年調正白旗滿洲都統二十九年古北口外突聚羣盜劫掠屯莊耶坦奉命偕侍衛赫濟爾亨等督石匣城古北口官兵捕剿出喜峯口追及之龍鬚門盜以烏槍抗禦逃踞山頂擲石拒阻傷害綠旗兵三人從役一人赫濟爾亨率兵發矢殪十餘盜復分兵山坡繞後截擊斬四十餘盜無一脫者耶坦還奏羣盜逞兇傷害兵丁侍衛及衆官兵奮勇擊斬狀下部議卹賞紀錄有差三十年正月上以噶爾丹肆掠喀爾喀逼我邊境授耶坦安北將軍駐防大同二月疏請出邊駐喀喇穆倫以偵賊情申嚴邊備詔暫駐歸化城七月命同副都統碩鼐參領素丹等勸



閱寧夏延綏西寧沿邊進兵道路以聞三十一年擢領侍衛內大臣兼火器營總管列議政大臣三十二年授昭武將軍率兵駐甘州八月擒獲哈密回人之輸稅厄魯特者訊知噶爾丹所在請於來春率兵進剿疏下王大臣等議以噶爾丹已遣使乞宥罪止之三十三年三月上以寧夏近賀蘭山爲邊隘要地諭郎坦率兵移駐與甘肅提督孫思克分偵噶爾丹及其姪策妄阿喇布坦搆釁事遇有邊警會商禦剿七月上聞噶爾丹將逼圖拉諭郎坦熟練邊情移兵圖拉禦剿尋以圖拉無警還京仍任領侍衛內大臣預議政三十四年五月命往盛京察視邊隘至殺虎口疾劇遣太醫往視六月卒年六十有二櫬至通州遣侍衛四人奠茶酒賜祭葬如例子拉忻襲爵

佟國綱

佟國綱滿洲鑲黃旗人姓佟佳氏都統佟圖賴長子初隸漢軍管佐領任一等待衛聖祖仁皇帝康熙元年襲父三等子尋任內大臣十四年察哈爾布爾尼作亂上命撫遠大將軍信郡王鄂扎統師討之授國綱安北將軍往鎮宣府賊平乃還十六年因佟圖賴爲孝康章皇后之父追贈一等公以國綱襲二十年授鑲黃旗

漢軍都統二十二年充教習烏槍兵丁總管二十七年疏言臣先世因在撫順倡率明人來歸故隸漢軍其初實係滿洲曾蒙太祖高皇帝諭令與佟佳氏之巴都哩蒙阿圖諸大臣考訂支派敘明族譜今請仍歸滿洲事下部議以佟姓官職衆多應仍留漢軍現任國綱本支准改入滿洲是年俄羅斯遣使費耀多囉等至尼布楚請定邊界上命國綱同內大臣索額圖等往議既抵色稜額固噶爾丹侵掠喀爾喀召還令遣人曉諭費耀多囉等緩期得其復書奏聞明年四月同索額圖等往尼布楚定議以額爾固納河及格爾必齊河爲界立碑垂示久遠二十九年七月命撫遠大將軍裕親王福全征噶爾丹以國綱參贊軍務八月朔師次烏蘭布通噶爾丹於隔岸林中臥駝於前而兵伏其後國綱率兵奮勇進擊賊突發烏槍國綱中創遂歿於陣櫬至京命皇子及內大臣侍衛迎奠茶酒及將葬諭領侍衛內大臣曰佟國綱爲國效力忽爾陣亡每一思之痛不能已必須一視其喪朕心庶幾少慰國綱弟國維及諸臣叩阻再三乃命諸皇子及上三旗大臣侍衛部院大臣皆往送賜祭葬如典禮諡忠勇以長子鄂倫岱襲一等公其陣亡所得之騎都尉又一雲騎尉世職以第三子夸岱襲世宗憲皇帝時贈國綱太傅入祀昭

忠祠並敕立家廟

薩穆哈

薩穆哈滿洲正黃旗人姓吳雅氏順治十二年進士授戶部主事十五年遷本部員外郎康熙十二年九月聖祖仁皇帝允吳三桂撤藩命薩穆哈偕郎中黨務禮席蘭泰主事辛珠筆帖式薩爾圖等赴貴州豫備大船芻粟諭曰向來驛地困苦今則更甚矣爾往慎勿騷擾亦無故遲誤也既至黔吳三桂陰與藩下都統吳應麒等謀反十二月雲貴總督甘文焜得從賊提督李本深招降貴州巡撫曹申吉逆書遂告知薩穆哈及黨務禮等趣令赴京入奏并請湖廣援兵薩穆哈馳抵鎮遠鎮遠官吏已得吳三桂偽檄不給驛馬薩穆哈語黨務禮曰偕行人衆而馬不給欲勿遲勢有不能恐誤事吾二人可馳往前途易馬遂與黨務禮先至沅州乘驛疾馳十有一晝夜至京備陳吳三桂叛逆雲南巡撫朱國治遇害及甘文焜請兵赴援狀上命前鋒統領碩岱率兵馳守荊州敕遣王貝勒大臣統師進討先是席蘭泰乏馬自鎮遠乘小舟至常德乃得乘驛較薩穆哈黨務禮遲七日至京辛珠薩爾圖在貴陽不及行並死於賊甘文焜因貴陽難守率十餘騎至鎮遠叛將

江義以兵阻之自刎死事詳甘文焜傳十三年二月薩穆哈遷刑部郎中十四年六月命吏部優敘告變功薩穆哈黨務禮席蘭泰並應陞光祿太僕等卿十五年二月授薩穆哈太僕寺卿十六年二月遷內閣學士六月擢戶部右侍郎尋轉左十八年正月奉命察賑山東奏言東省歲饑青州濟南兗州所屬爲最苦支給德州臨清二倉米石運價不貲且恐不能速至臣與撫臣趙祥星議就近截留濟寧州漕糧五萬四千餘石卽行散賑其距水稍遠州縣先酌給銀兩均不至乏食疏入報聞明年五月疏言臣屢奉簡命所過直省州縣間有藉稱送差科派民財深滋擾累請嗣後除事關重大仍特遣部院官員外其餘概停差遣部員交各督撫辦理得旨薩穆哈奏州縣藉稱送差科斂百姓所見最眞部院大臣奉差出外本非得已其藉端科斂之州縣應嚴行禁止下九卿詹事科道會議尋奏州縣科斂俱照貪官例議罪其失察上司並交部議處七月調吏部左侍郎二十年五月擢左都御史十二月遷工部尙書二十一年五月奉命察視石景山至盧溝橋石隄奏言石景山隄內本係官地自康熙元年招民開墾荒田十頃以致侵損隄根請敕戶部豁免所徵糧銀仍飭盧溝橋都司巡察毋令再行耕種踐踏如遇雨水衝

圻并令隨時詳請報部修理從之明年十一月山西地震命薩穆哈察視十二月  
奏崞縣忻州定襄五臺代州及振武衛被災尤重請發帑賑濟得旨山西新經地  
震雖遣官察賑其崞縣等處地丁錢糧仍分別蠲免以示軫恤二十三年正月上  
甄別部院大臣以薩穆哈阻勉供職部務漸覺整理諭獎之復所降級二十四年  
十一月河道總督靳輔請於高郵寶應諸州縣下河築隄束水以注海按察使司  
于成龍請開濬海口故道大學士九卿議從靳輔上詢問日講官之籍隸江南者  
侍讀喬萊是成龍議力言靳輔奏不可行上曰講官之議如此未知百姓如何濬  
河原以救民其令尙書薩穆哈及學士穆成額速往淮陽會同漕運總督徐旭齡  
巡撫湯斌詳問地方父老有利無害方可舉行二十五年二月薩穆哈還奏詳問  
居民僉言從于成龍議則積水難施工力從靳輔議則水中亦難取土請並暫停  
上諭曰海口不濬則泛溢之水無歸濬之使水有所洩淹浸田畝可以涸出令薩  
穆哈與于成龍同九卿再議尋以成龍言欲開海口必修治串場河費至百餘萬  
兩九卿奏停之是年湯斌入爲禮部尙書奏言開濬海口原以水大暫停若竟中  
輟萬一再遇水災下流諸城付之巨浸矣向曾與薩穆哈言之上召問薩穆哈奏

曰臣等會勘海口七州縣人民各陳地方情形語言不一擇其通達事體者每州縣十人詢以利害皆以開濬爲不便故暫從輿論上曰爾意此河可以開濬否奏曰大隄恐不能築若將下河高阜陸續疏通使積水入海似亦可行仍下大學士九卿議如于成龍前奏行特命內閣學士孫在豐督濬之諭曰下河衆議應開薩穆哈何獨以爲不可下部議以回奏失實革職得旨在佐領行走尋授步軍翼尉三十二年仍擢工部尙書三十九年三月召工部堂官諭曰淮揚百姓久罹水患亟宜拯救此係爾等專責近日河工徒費帑銀毫無裨益推原弊端皆在爾部凡河臣啟奏恐干部駁隨卽遣人營求爾部鮮不受其請託者若此弊不除黃運河何由奏績薩穆哈奏曰臣等卽當遵旨嚴禁上曰豈止嚴禁他人卽爾等亦宜改悔九月工部上本年雜項報銷冊復以估計浮多具題檔案不開細數及委員多瞻徇請託之弊傳旨申飭並諭薩穆哈曰爾部叢弊甚多每給發工銀司員多侵蝕入己爾在部年久豈得諉爲不知爾當自爲身計是月薩穆哈以老病乞休得旨薩穆哈在職四十餘年部務何以不知弊端何以不悉乃歷年碌碌帑金皆致虛糜及奉嚴旨遂欲借端離任虛僞巧詐已極著革職仍令稽察工部弊端一一

舉出倘仍前執謬朕不能寬貸也四十三年正月諭內務府大臣曰去歲京城內外河道支領帑銀甚多修築甚少朕早已聞知爾等攜工部冊檔往工所察勘核估具奏尋奏外河監督色克圖領修二十六處止修十處蝕銀一萬五千餘兩內河監督鄂爾吉納領修六處止修二處侵蝕銀三千餘兩工部堂司官未經詳察輒將帑銀給發並請議罪事下都察院刑部審擬色克圖鄂爾吉納並論斬工部堂司官分別擬罪有差薩穆哈收受色克圖馬匹又從家人索匠役銀三百兩事發後始給還擬絞候五月法司復奏前任監督噶楚哈圖木岱彭騰翊等侵帑罪狀噶楚哈等揭各堂官皆受賄薩穆哈歷收銀二千三百餘兩請旨嚴鞫薩穆哈以年老衰頹負恩虧帑願將家財還項籲請是月以病卒於獄應追銀兩令其子完繳

郭琇

郭琇山東卽墨人康熙九年進士十八年授吳江縣知縣二十五年江蘇巡撫湯斌疏薦琇居心恬淡莅事精銳堪膺遷擢部臣以琇催徵銀糧未完議駁聖祖仁皇帝特諭部臣如斌所請遂行取考選授江南道御史時河道總督靳輔請停下

河挑濬工程別築高家堰重隄以爲屯田謂可增歲收數萬直隸巡撫于成龍於安徽按察使任內曾督修河工至是承旨詢問因奏下河宜挑不宜停重隄宜罷不宜築尙書佛倫等奉命往勘議從斬輔奏二十七年正月琇劾斬輔治河無功偏聽幕客陳潢阻撓下河開濬詔九卿察議未上斬輔入覲上令輔與大學士九卿科道會議河工事宜琇復奏輔派累擾民實爲民害上曰屯田害民斬輔縱百喙亦難辭矣尋如九卿議罷斬輔任革陳潢職銜予杖流二月擢琇任僉都御史先是琇具疏劾大學士明珠余國柱結黨行私背公納賄兼及尙書佛倫侍郎傅拉塔等會議會推附和要素復及斬輔與明珠余國柱等交通聲氣糜帑分肥狀請加嚴譴於是明珠等罷任降用有差事詳明珠傳三月遷太常寺卿十月擢內閣學士二十八年三月充經筵講官授吏部左侍郎五月擢左都御史九月疏劾少詹事高士奇與原任左都御史王鴻緒表裏爲奸植黨招搖給事中何楷翰林陳元龍王頊齡依附壞法狀得旨高士奇王鴻緒何楷陳元龍王頊齡俱著休致回籍十月御史張星法劾山東巡撫錢鈺貪黷劣跡鈺奏辨所劾悉誣由琇曾致書於鈺屬薦卽墨令高上達等未允琇挾嫌使星法誣劾事下法司鞫訊未定讞



琇奏左都御史馬齊於會訊時多方鍛鍊必欲坐以指使誣劾之罪上責琇疑揣法司尋法司以星法誣鉅擬革職琇致書屬薦事實應革職擬杖折贖奏上星法降二級留任上念琇平時鯁直敢言從寬免革職治罪降五級調用二十九年四月吏部推補琇通政司參議上命改推琇以所降之級休致八月江寧巡撫洪之傑以吳江縣虧空漕項事涉前任琇應赴質牒山東巡撫佛倫佛倫因劾琇休致違例逗留希圖復用請革職逮治又劾琇伯父郭爾印係明季御史黃宗昌家奴琇父郭景昌原名爾標曾入賊黨伏法琇私改父名濫請封典應予追奪部議應如佛倫所請並革琇頂帶逮赴江寧勘治於是琇坐侵收運船飯米二千三百餘石事發彌補罪部議充軍得旨寬免三十八年三月聖祖南巡琇迎駕於德州上回鑾諭大學士阿蘭泰等曰原任左都御史郭琇前爲吳江令居官甚善百姓至今感頌其人有膽量無朋比可授爲湖廣總督令馳驛赴任琇旣至以黃州武昌二府屬兵米二萬七千石有奇運給荊州鄖陽諸汛地隔千餘里歲費輓輸不貲疏請改爲折色江夏等十三縣有故明藩產田瘠賦重數倍民糧請復照民糧一例起徵江夏嘉魚漢陽三縣瀕江地畝積歲水囿土墜有賦無田並請豁免地租

三百餘頃悉得旨允行二十九年正月入覲具疏訟冤曰臣本生父郭景昌係卽墨縣庠生伯父郭爾印無嗣臣例得繼爲後臣於康熙十五年丁艱有冊可據邑匪郭爾標之事合邑皆知伊無妻室安得有子不知佛倫前日何所聞而捏爲無稽誣讎臣父陷臣欺飾部臣不俟行查輒令追繳封軸乞敕廷臣詳察時佛倫已任大學士上詰問佛倫以誤疑郭爾印爲郭爾標昆弟舉報舛錯對命仍予琇誥軸二月琇陞辭奏清丈地畝以武昌道莊摺衡永郴道董承恩長沙府知府王益曾三員才堪委任但湖南地廣民稀是以民多逃避不能完課恐清查後錢糧較前差減上曰約減幾何琇以大約減十分之三對上曰果於民有益所減雖倍於此亦所不惜若不清丈以荒田派徵錢糧有累窮黎斷不可也此事綦重爾具疏來照所請行三月琇復條陳三事一修築隄塍嚴定處分一無用糧船宜停修造一苗地官員通融調補又疏禁楚地陋弊八條錢糧攤費包收之弊宜除陋規雜派之多宜去徵糧之滾單宜行訟棍宜治濫刑宜革捕役誣盜宜飭屍親抄掠宜禁強族阻葬宜懲上以所奏情事前任未及陳奏琇莅任實心除弊特旨褒嘉並從所請五月請肅清學政禁棚規嚴賄賂七月疏奏湖南積穀一百萬四千八百

石有奇請五分積穀五分碾米貯倉以平米價十一月與總督河道張鵬翮等遵旨議奏科場事宜琇請定官卷中額各省在監應試者責成祭酒力行考課之法部議並從之時紅苗梗化參將朱紱剿撫事竣琇陳善後之策分設汛守建立哨臺禁民私販火藥與苗民爲婚每月三日聽苗民互市限時集散敕旨勒石永爲遵守又請以沅州總兵移駐鎮筸上悉報可會河南巡撫徐潮陛辭諭以如郭琇張鵬翮等所行則不獨爲當今之名臣卽後世亦可取重四十年二月琇以病乞休溫旨慰留之尋諭曰郭琇病甚欲思一人代之不可得果能如郭琇者有幾人耶先是給事中馬士芳劾湖廣布政使任風厚臥病已久巡撫年遐齡徇庇不舉劾遐齡以與督臣郭琇矢公矢慎察釐有司任風厚實非病廢回奏至是風厚陛見年尙未衰諭曰郭琇居官清潔而辦事公正如任風厚果不堪任使郭琇豈肯徇庇耶四月奏撥常平倉米給荊州兵餉六月請以極邊遊擊守備聽提督選補又請增湖廣鄉試中額十三名照江南例下部議並從之八月琇以病不能支再疏求罷復溫旨慰留之九月以委員摘督催不力之參革黃梅縣令李錦印縣民閉城拒官保留舊任御史左必蕃劾琇旣失察於前復不能彈壓於後難勝總督

之任部議應罷職得旨郭琇丈量地畝事尙未竣俟事竣之日再行具奏四十一年九月鎮筵生員李定等叩閭奏紅苗任意殺掠總督巡撫諱匿不報又給事中宋駿業劾琇向鶩虛聲近益衰廢持祿養癰應請懲治詔侍郎傅繼祖甘國樞浙江巡撫趙申喬馳驛前往湖南察審值琇報清丈事竣附陳病廢不能視事乞賜罷斥奏至得旨郭琇原係有罪革職之人特旨起用授爲總督初陛見時朕詢問地方情形輒奏稱楚地易治於丈量地畝復言刻期可以告竣今丈量一事時日甚久始行題覆紅苗屢肆搶掠殺傷兵民匿不奏聞亦漫無籌畫又所屬知府許錫齡揭報知縣李錦虧空錢糧郭琇不加詳察輕率題參委官署印以致百姓妄行聚衆擅閉城門臨時又不能禁戢此皆大負職掌所行俱與所言不符著明白回奏琇以老病昏庸失於覺察回奏自請治罪初紅苗出犯鎮筵村擄掠戶口遊擊沈長祿率兵往剿回至大梅山紅苗衝出守備許邦垣千總孫清及兵丁十餘名俱陷苗寨長祿贖歸諱敗不報又副將朱紱報稱苗子就撫投誠琇據詞入奏其事屬虛至是繼祖等奉命往勘得實琇與提督林本植並坐徇隱四十二年四月上從部議革琇及本植職五十四年三月琇卒於家年七十有八五十五年入

祀鄉賢乾隆四年祀吳江縣名宦

彭鵬

彭鵬福建莆田人順治十七年舉人逆藩耿精忠據福建反逼鵬就僞職鵬堅拒不從康熙二十三年授三河縣知縣二十七年十月聖祖仁皇帝巡幸畿甸召問鵬不從耿逆及在籍在官狀命侍衛賚銀三百兩諭曰爾居官清正不受民錢特賚銀三百兩以養爾廉勝視民間數萬兩多矣二十八年四月順天府尹許三禮劾鵬於縣民控告命案不行詳報上命直隸巡撫于成龍察核成龍以鵬訊無證據尙在緝兇覆奏部議鵬革職得旨從寬改爲降二級留任嗣復以緝盜不獲積至降十三級調用皆得旨從寬留任二十九年正月命九卿列薦賢能鵬爲尙書李天馥奏薦與嘉定知縣陸隴其等並行取得旨以科員用假歸逾年授工科給事中三十二年二月同日上三疏言秦晉豫三省有司不恤民先是陝西西安鳳翔及山西平陽等處歲歉上發帑賑濟又命河南運米十萬石給陝西至是以鵬疏下所司確議令鵬指實再奏鵬復指涇陽知縣劉桂扣剋籽粒聞喜夏縣匿災未報猗氏知縣李澍敲斃災黎磁州署知州陳成郊濫派運價夏邑知縣尙崇震

派銀包運南陽知府朱璘曖昧分肥等事命各巡撫察審不皆實議處如例鵬得旨寬免三十三年四月劾順天學政李光地聞命在任守制不哀痛力請終喪僅乞假九月悖理乖情應罰令離任留京終制疏下九卿議從之詳李光地傳初鵬疏劾癸酉科順天鄉試第一名舉人李仙湄闈墨刊本考官刪改過多一百八名楊文鐸文理荒謬磨勘之給事中馬士芳有通賄情弊伏乞親訊如臣言欺罔請斧劈臣頭半懸國門半懸順天府學疏下九卿詹事科道察議以李仙湄闈墨刊本係坊肆刊賣非考官徐倬彭殿元刪改楊文鐸卷磨勘有疵罰停一科別無情弊鵬奏涉虛且狂妄不敬應革職上命鵬明白回奏鵬奏會議諸臣聽徐倬彭殿元欺飾支吾曲爲之辭反以臣疏中斧劈臣頭語爲狂妄請親訊爲不敬臣身犯衆惡乞賜罷黜上命免鵬處分徐倬彭殿元休致至是鵬猶以論楊文鐸文與廷臣忿爭閏五月奉旨解任以原品頂帶効力江南河工三十六年五月召補刑科給事中三十七年二月授貴州按察使三十八年四月擢廣西巡撫既抵任劾罷加派科斂之賀縣知縣喻兆紳貪酷之荔浦知縣葉之莘三十九年七月湖廣總督郭琇請除學政積弊給事中慕琛滿晉御史鄭惟孜等條奏順天鄉試事宜九

卿未盡議行諭直隸巡撫李光地河道總督張鵬翮與郭琇及鵬並行已清廉命錄示原奏原議各抒所見勿瞻徇情面鵬疏言學政積弊督臣郭琇激切臚陳請嚴督撫處分廷臣議依定例行夫學政貪贓革職提問督撫需索陋規比照貪贓定例已久特未嘗行之耳敢請皇上赦既往過將來敕頒榜文縷晰條分犯某律者毋赦干某條者不宥學臣入境恭捧宣讀自督撫以下文武官跪聽臨之以天威悚之以刑罰庶可挽回積弊至臺臣請令各省監生回籍鄉試九卿等以成均空虛爲慮夫成均首在興行重在作人非爲僥倖科名而設監生遇鄉試之期始至或有甫至息肩仍馳而南臺臣亦痛切言之成均豈以斯爲有無輕重應責成祭酒司業就坐監讀書者講習以序經義治事考課有程又於八旗官學外如漢唐皇親貴戚添設太學培樹植幹各省學臣亦擇有行有文之廩增附生送入成均何慮空虛至若典試主司以及會闈同考進士舉人同一科甲應請盡數開列恭候欽點人多而甲乙未定可杜預揣營謀諸弊科臣言察封坐號以防換卷臣竊以換卷多在入門暗約出號交卷時嚴稽於此自應消沮矣科臣又言各官子弟照朝考漢軍例皇上親試親信內大臣監試夫內大臣旣稱親信可以監試豈

不可以主試所當另立考場嚴絕代筆期仍三朝夜以繼日文章付諸公閱去取  
恭聽睿裁如或混珠贖貨是自求禍也必明罰之疏入仍下九卿詹事科道彙核  
定議互詳李光地郭琇張鵬翮傳時河南巡撫徐潮之任上諭之曰爾能如張鵬  
翮李光地郭琇彭鵬所行則不但爲當今名臣卽後世亦可取重矣十二月調廣  
東巡撫四十年二月鵬候代疏言本朝武科鄉會並試如懸鵠而較射中者固踴  
躍奮興不中者亦甘心奔走其間消磨歲月而不自覺此國家賓興大典實寓駕  
馭微權惟粵西向以人數無多停試今各學武生有一千數百所當開以功名之  
門使之不自暴棄請自壬午年始舉行武科又疏言舊例買生銅熟鐵解京康熙  
三十九年以粵西不產銅鐵奉旨免解熟鐵五萬斤歡聲載道其生銅二萬斤應  
請一例恩免並從之又疏言粵西州縣借端私派巧立名色曰均平臣到任以來  
已將賀縣荔浦懷集武緣各貪令劾罷示儆前此州縣大者派銀三千兩中下一  
二千兩不肖官吏先徵均平而後徵正課甚有均平徵收入已遇有公事另行科  
派其不派均平者又取盈於火耗有明加暗加偏針脫圈等弊且均平一項費於  
公事者十之一二費於餽送者十之六七如臣未入境之先購備撫署器物皆出



之此臣同司道當堂發還使自悔艾今欲別釐夙弊實甦民困必於州縣稍養其廉乞敕於徵糧之內明收加一火耗一切陋規概行禁止疏下部議加派嚴行禁止明收火耗不准行時蕭永藻赴廣西巡撫任上諭以彭鵬在廣西居官頗好爾可以效彼所行又諭大學士等曰彭鵬人材亦甚壯健前任三河縣時但聞有賊卽帶刀乘馬親往擒拏毫無畏懼朕深知之八月御史王度昭疏劾鵬前撫廣西受藩司教化新欺蒙不卽糾劾虧帑待離任時始奏而又掩護其半廣東糧道張天覺改徵兵米比照時價浮銷九十餘萬兩經戶部駁追皇上令鵬察奏正當直躬到底乃鵬偏聽曾經訐奏貪庸之道員何漢英等議以張天覺署理藩司此兵糧一案必由藩司查明轉詳以天覺署藩司是直以天覺察天覺又據鵬劾藩司魯超虧空魯超未任之先署印者天覺今魯超病故而復署之有彼此庇護擔承之弊上命鵬明白回奏鵬疏言臣劾教化新虧空庫銀五萬九千餘兩及臣去任按察使盧崇義護巡撫續劾教化新虧空四萬四千餘兩王度昭謂臣欺蒙謂臣掩護巧舌如簧不思盧崇義疏內所開正雜各項與臣疏內所開總數無異臣先同盧崇義盤查除虧空五萬九千餘兩外實存五十二萬七千餘兩教化新敢於

盤查後再爲侵挪盧崇義知之熟矣故作朦朧王度昭耳食眼聽遂以參半掩半誣臣誰實主之孰令昏之耳目之官忍爲此乎粵西奏銷例應於四十年五月臣先於三十九年十一月盤查必嚴必謹王度昭何得糾臣離任始奏臣撫粵東以布政使魯超稱病詳請展限司庫難以猝盤情辭概見指參魯超病故按察司張仲信稱臬務繁冗兩顧必誤堅辭再三與副使道李華之孫明忠僉事道何漢英鹽運使陸曾公議會詳保薦糧道張天覺堪以委署臣敘詳具題旋據張天覺親赴司庫盤查虧空銀十一萬二千三百八十二兩具疏題參臣於魯超生前死後不必假借王度昭何得糾臣委糧道庇護擔承留未了之案至廣東改徵兵米一項由康熙三十年起臣通飭各屬窮源究委而各屬謬執前事依樣粉本甚如雷瓊兩府隻字不報臣已據張天覺揭報題參一面申飭各屬速檢成案以憑察奏王度昭奚爲糾臣以不卽直躬到底臣委張天覺署藩司出於司道公議王度昭獨云偏信何漢英不及按察使張仲信蓋王度昭曾任雲南浪穹縣張仲信向爲上官又薦主也不及肇高道李華之蓋與家居同邑又戚屬也且稱何漢英貪庸曾經訐奏又不據事指名藏頭露尾恫疑虛喝豈待揭其肺腑而後見哉王度昭

職司耳目先自失其本心奈何反以不知何心劾臣事關言路涉私所望皇上憐臣孤特鑒臣樸拙將廣東廣西各疏敕下九卿察議則黑白分而涇渭立見矣疏入得旨朕於科道許其風聞入告專爲廣開言路使督撫以下等官知所警戒糾劾不實例有處分至於被劾之人具疏回奏止應辨晰是非不應支離牽引彭鵬爲言官時亦曾劾人今爲王度昭所劾理應止以切己之事剖晰奏明今乃訐奏王度昭謂其曲庇親戚而其間所有夙怨又未指出實據彭鵬雖操守清廉居官亦善此回奏反覆瀆陳辭氣不勝忿激粗戾已極著嚴飭行十二月疏言前任撫臣蕭永藻請以粵東改徵兵米之半照賦役全書原則徵銀奉旨令臣查奏又督臣石琳因康熙二十七年以後改徵兵米較估報時價浮多屢經部駁催飭扣追具疏請免部議俟臣奏明再核臣惟粵東向因兵食浩繁改額賦之徵銀爲徵米謹就本年秋冬米價計之二十二萬六千九百餘兩之額銀改徵二十一萬六千三百七十餘石之兵米少銀七萬三千餘兩應令本年經管各官如數追扣存庫嗣後各州縣額賦仍照原則全行徵銀其兵米採買撥給四十一年十一月疏言戶部以二十七年至三十九年改徵兵米計價較多行令追完臣檢核原委此十

三載豐歉不同米價底昂無定民皆遵由單輸納一旦重追民之轉徙靡常官之去故非一必不能完從前督撫諸臣恐採買遲誤又恐米石止許報銷銀七錢故未議復徵銀徵米臣於十四年適逢歲熟奏明追扣存庫嗣後徵銀採買每年節省七萬三千兩此臣不敢苟且因循之實心亦不忍按年重追之流毒乞恩概與免追疏並得旨俞允四十二年二月疏言粵東向因錢價日賤以所存錢搭放官俸役食十之三鋪兵一役每名每日止得銀一分一釐零不敷餬口請自今支給全銀留錢搭放別項官俸役食扣銀候撥於錢糧毫無虧損而苦役資生有賴益廣皇仁事下部議行四十三年正月卒於官年六十有八遺疏至得旨彭鵬自爲縣令以至巡撫居官皆善伊所屬大小官員從未有因親友分別看視誠爲實心供職克盡勤勞忽聞溘逝朕心深爲軫惻應得卹典察例具奏賜祭葬如例後祀廣東名宦



清史列傳 卷十一

大臣畫一傳檔正編八

費揚古

費揚古滿洲正白旗人姓棟鄂氏內大臣鄂碩之子也世祖章皇帝順治十五年襲父三等伯爵聖祖仁皇帝康熙十三年隨安親王岳樂率兵赴江西討逆藩吳三桂委署營總時賊將黃乃忠糾賊萬餘自長沙犯袁州費揚古與副都統沃赫總兵趙應奎等擊敗之擒僞官童聖功復萬載縣城十五年擊走賊將夏國相於萍鄉毀寨十二進圍長沙屢戰皆捷十八年敗賊將吳國貴於武岡凱旋紀功擢領侍衛內大臣兼火器營總管列議政大臣二十八年命頒賚喀爾喀左翼土謝圖汗二十九年上以噶爾丹劫掠喀爾喀又數擾我邊境授裕親王福全撫遠大將軍費揚古往科爾沁調兵隨征參贊軍事是年八月擊敗噶爾丹於烏蘭布通三十二年命費揚古爲安北將軍駐歸化城三十三年五月噶爾丹使人至歸化城言欲入貢費揚古偵其踵至者男婦幾二千人遣兵迎問且止之馳疏請旨上

知噶爾丹陽爲修好潛蓄窺探意命侍郎滿丕諭責其使遣之還七月聞噶爾丹將逼圖拉詔費揚古同右衛將軍希福率兵往禦希福請益兵上責希福遇事疑沮令勿偕往諭大學士等曰費揚古勲舊大臣今駐防歸化城軍民皆心服於此事無不能辦也尋以圖拉無警慮噶爾丹將趨歸化城詔費揚古旋師三十四年七月噶爾丹至哈密費揚古率兵往禦噶爾丹由圖拉河西竄去十月授右衛將軍仍兼管歸化城將軍事十一月疏言聞噶爾丹踞巴顏烏蘭距歸化城約二千里宜集兵運糧於來年二月往剿詔授爲撫遠大將軍召入覲授方略三十五年二月以黑龍江將軍薩卜素率兵出東路命費揚古集兵歸化城出西路振武將軍孫思克率甘肅兵西安將軍博齊率陝西兵會期並進上親統大軍出中路四月費揚古至察罕和碩噶爾丹驅賊衆趨克魯倫河東路兵未至科圖而上已由科圖進次什巴爾台近壓賊境五月三日費揚古師至圖拉疏言西路有草之地爲賊所焚我軍每迂道秣馬又遇雨糧運遲滯師行七十餘日人困馬疲乞上緩軍以待會噶爾丹望見御營於克魯倫河大驚奔竄上密諭費揚古邀擊親督大軍躡追至拖諾山駐蹕費揚古聞噶爾丹遁歸特呼勒濟遂遣前鋒統領碩岱副

都統阿南達阿迪等率兵先往挑戰且戰且卻誘至昭莫多復分兵三隊東則滿洲漢軍及察哈爾兵倚山列陣西則右衛大同及喀爾喀兵沿河列陣而使將軍孫思克率綠旗兵居中並遵上方略令官兵皆步戰俟賊勢披靡乃上馬衝擊時噶爾丹率衆幾萬人我軍分隊迎戰自未至酉斬級二千餘賊皆潰奔乘夜追逐三十餘里生擒數百人獲馬駝牛羊廬帳器械無算噶爾丹引數騎遠竄費揚古令阿南達賚奏馳報御營召詢其詳阿南達奏曰噶爾丹聞上親征心膽俱裂且不虞我兵絕其去路突然交戰擒斬過半傷斃山谷者相枕藉噶爾丹之妻亦受戮其部衆來降者又二千餘人費揚古恐語涉矜張故疏內約略言之上乃班師留費揚古駐守科圖七月奉詔由科圖移駐喀爾喀郡王善巴游牧地甫至噶爾丹潛使台吉丹濟拉率千五百人來掠喀爾喀牲畜糗糧費揚古遣副都統祖良璧禦卻之追擊至翁錦賊敗遁費揚古尋以馬疲移軍喀喇穆倫會噶爾丹使其宰桑格類固英等來請納款上再幸塞外駐蹕棟斯拉命費揚古馳赴黃河西界行在入對諭及昭莫多之戰勢如破竹實爲可嘉費揚古奏曰軍中機務皆遵上密諭以翼成功西路官兵聞聖駕先臨克魯倫河無不踴躍奮勉噶爾丹之敗衄



皆睿謨神武震以軍威追之窮蹙所致臣不能生擒以獻罪也上曰觀來降台吉等及格類固英之言噶爾丹窮蹙是實朕意不忍悉加屠戮欲招降其衆撫而治之費揚古奏曰聖意實非臣等愚昧所能測真天地好生之仁也翌日賜御佩褭弓矢遣還軍營三十六年正月阿南達自肅州奏報哈密回人擒獻噶爾丹之子塞卜騰巴爾珠爾等上以其疏錄示費揚古賜胙肉鹿尾關東魚等物諭曰時當上元令節衆蒙古及投誠厄魯特齊集暢春園適阿南達疏至衆皆喜悅爾獨居邊塞不得在朕左右殊深軫念故以阿南達疏示知並賜物問爾無恙卽如與爾相見也二月上幸寧夏詔費揚古密籌進剿噶爾丹費揚古疏請罷大將軍任隨領兵將軍出征上不允所請令便宜調遣兵馬以行上由黃河西岸駐蹕達拉布隆頒賜上駟院馬五十駱駝十費揚古進次薩奇爾巴勒哈遜時厄魯特部衆降者相繼丹濟拉亦遣人納款言噶爾丹已死欲攜骸骨及其子女並率三百戶來歸費揚古以聞上回鑾留費揚古駐師察罕諾爾以待丹濟拉六月丹濟拉至哈密費揚古有疾詔昭武將軍馬思喀代統其兵費揚古還京仍任領侍衛內大臣晉封一等公費揚古以噶爾丹雖死非係生擒疏辭封爵得旨宜遵成命毋固

辭諭大學士等曰塞外情形不可臆度必身歷其境乃有確見昔朕欲親征噶爾丹衆皆不欲惟費揚古密抒謀略與朕意合遂悉以西路官兵令其統領進兵道路遼遠兼乏水草乃全無顧慮直抵昭莫多奮揚軍威俾奸狡積寇挫衄大敗累年以來統兵諸將未有能過之者又諭曰朕屢出征知爲將甚難固不可急亦不可緩費揚古惟相機調遣緩急合宜是以濟事四十年六月上幸索約勒濟費揚古扈從中途疾作上停蹕一日親往視疾賜御帳蟒緞鞍馬等物銀五千兩遣內大臣侍衛等護送還家尋卒賜祭葬如典禮諡襄壯以其子辰泰襲一等侯兼一雲騎尉世宗憲皇帝雍正十年入祀賢良祠

### 孫思克

孫思克漢軍正白旗人三等男孫成功次子初任王府護衛世祖章皇帝順治八年二月管佐領六月授刑部理事官十一年六月遷參領十三年考滿廕一子入監尋隨大軍由湖南進征貴州雲南屢立戰功聖祖仁皇帝康熙二年正月擢甘肅總兵官五年三月同提督張勇疏言厄魯特蒙古僻處海隅雖通西藏亦荒徼絕塞非有肥饒地土資生朝廷曲示招徠准開市口貿易且以境內數十萬之番

族令每年輸納駝馬牛羊與彼爲厄魯特蒙古者理應感戴皇上鈐東部落各安邊境乃墨爾根台吉等狼心不改鷹眼未化蟻聚蜂屯於祁連山上縱牧內地之大草灘去冬不遵撫慰抗拒於定羌廟爲官兵擊退稍挫其鋒猶不悛改狂肆愈甚聲言糾合部落一股直入河州臨洮鞏昌一股進逼西寧一股分犯涼州狡謀叵測宜迅速創懲方可議修築而嚴固守得旨下廷臣密議以兵端不可輕動令嚴防邊境仍撫恤番人以和其心於是思克偕張勇修築邊牆自扁都口西水關起至嘉峪關止六年八月內地往牧黃城兒大草灘各處之厄魯特蒙古盡數徙去思克至南山各隘相度衝險撥兵固禦總督盧崇峻疏聞下部知之十三年六月諭獎效力邊疆有年下部議加銜右都督是冬平涼提督王輔臣叛應吳三桂臨鞏諸郡相繼從逆蘭州危急思克遣遊擊劉衍等移兵協防自統兵進攻苦水洋值蘭州已失守乃駐河西尋回涼州十四年五月疏言前因督臣哈占定議南北兩路兵同時進剿將軍張勇總兵王進寶等從金城關渡河規復蘭州思克自涼州領標兵由阿壩紅水蘆塘索橋人跡不到之草地結筏渡河規復靖遠一路幸賴天威遐播靖遠周圍三百里城堡皆已納款正擬趨固原會大兵於平涼不

料西海蒙古墨爾根台吉等已從山口入內地與官兵拒敵副將陳達傷亡臣留  
參將劉選勝等守靖遠由草地渡河回涼州以保河西根本重地墨爾根台吉引  
衆出口而甘州所屬之高臺與紅崖梨園等堡有黃番頭目入口搶掠合數千餘  
騎攻圍暖泉順德諸堡臣卽自涼赴甘番族乃遠竄因將軍張勇約期會剿王輔  
臣復渡河而東因草地往來兵丁勞苦十倍他鎮乞恩加犒賞得旨往來防剿具  
見忠蓋兵丁各加犒賞閏五月同張勇等圍鞏昌時定西大將軍貝勒洞鄂圍秦  
州城中賊屢出犯其逆黨自四川至者結寨秦州南山上日益猖獗洞鄂檄思克  
率兵二千駐秦州西賊勢乃窮僞總兵陳萬策僞道馬肇升赴思克營乞降僞總  
兵巴三綱遁遂復秦州南山賊潰竄思克同振武將軍佛尼勒等追擊於閻關敗  
之乘勝克禮縣復敗賊於西和奪門入斬僞官三十清水伏羌等縣皆復乃赴鞏  
昌會剿遣降將陳萬策等入城曉諭僞道陳台孫總兵陳可等以鞏昌十七州縣  
降河東悉定八月會剿平涼思克由靜寧隆德進擊走賊將李國樑陣斬賊兵五  
百餘生擒僞守備一千總二復靖寧州進次華亭僞副將高鼎率將弁二十八兵  
一千餘迎降遂抵平涼與大軍合十五年三月貝勒洞鄂奏言大軍圍平涼半載

賊屢出犯思克標兵徒步當先敗賊於南山者四敗僞總兵蔡元於城北者四又九處設伏敗賊於南門僞總兵文姓引賊二千掩襲掘壕阻思克軍揮兵急擊賊遂退復逼者三俱敗之剿涇州白起寨僞副將李茂思克先至寨下遣領旗李錦先登擒李茂斬賊數十又敗賊於南山甲子峪及馬營子麻布嶺諸處宜酌示鼓勵紀功敍錄五月隨撫遠大將軍圖海破賊於虎山墩王輔臣窮蹙乞降思克還涼州八月諭部臣曰自逆賊變亂以來奸徒附和侵擾地方大兵未集人心不無動搖張勇王進寶孫思克一聞蘭州之變卽率兵剿殺賊衆收復城邑其功甚大及大兵攻取平涼復同心協力展布謀猷兼以訓練士卒忠義素孚故能身先行陣所向克捷朕甚嘉之於軍功議敍之外應從優加恩孫思克陞爲涼州提督並授一等輕車都尉世職十月疏言全秦底定仰仗天威臣何功可錄蒙皇上溢格優陞復授世職臣卽粉身碎骨萬不敢辭五月虎山墩之戰隨大將軍圖海相度地形併偵通固原路徑賊伏兵萬餘猝起來犯臣率領隊兵奮戰追擊十餘里雖敗賊衆而賊刀砍臣右臂傷筋及骨迄今閱五月已成殘疾乞假解任回旗得旨卿久鎮巖疆剿除賊寇奮勇克敵屢建戰功新簡提督正資料理不必求罷十六

年四月彙敘前此軍功晉三等男時噶爾丹侵西北諸蒙古其濟農等爲所敗突入沿邊寨內擾居民思克同張勇以兵驅逐乃徙去十八年七月上敕圖海調思克與提督趙良棟等勦賊漢中興安圖海奏九月初旬四路進發思克與將軍畢力克圖由略陽進會有詔因京師地震令內外大臣各抒所見思克疏言漢中興安皆崇山疊嶺勢險路紆逆賊盤踞有年又創斷各路要口我兵未能長驅直入賊兵爬山越嶺如履平地稔知小路曲徑潛躡我後以絕餉道爲害滋甚大將軍圖海定議四路進兵雖分賊勢終憂兵單綠旗兵每人止有一馬常需馱載甲冑器械馬料不足羸瘦甚多步兵背負棉甲乾糧不皆強壯惟滿洲勁旅堪恃第爲數亦無多若各路調取又恐秦省三邊地逼番夷秋高馬肥乘機思逞不若今秋暫緩進兵揀選各營強壯餉秣馬匹俟來春二三月間塞外草尙未生水泉尙涸番夷不敢內犯之時多調邊兵以資戰守秦地大半皆山土瘠民貧不產杭稻所種惟麥豆之屬向有捐納一項稍裕軍需今已停止專事採買用民負載馱運雇賃之價數倍於應輸之賦各路需餉甚多山徑狹隘輓運維艱或照向年捐例轉輸協濟亦宜緩期熟計俾士馬得以飽騰況出征官兵聞京師地震傾壞房屋壓

斃人口各有內顧之憂俟來春人心稍定兵糧俱足再議進兵未爲晚也疏入上命學士拉隆禮至涼州宣諭詰問曰陝西綠旗兵較之各省曷推精銳賊能跋涉山嶺我兵何獨不能漢中興安久爲內地滿漢大兵經行熟悉孫思克何得視同絕域荒誕其辭凡將帥用兵前爲衝鋒後顧餉道自有一定機宜倘以賊間道潛來斷絕餉道爲憂怯懦不前則永無破賊之日矣各省綠旗兵皆祇給一馬越境征剿粵東粵西閩楚諸處今又進定滇黔較之平定境內漢興勞逸何如耶凡將軍提鎮募兵時必選精壯毋得濫收充數定例嚴明如果兵非強壯難以應用則孫思克平日所司何事滿洲兵在陝西者亦不少且有將軍圖海籌畫周詳何得妄稱單弱正值秋成涼爽各處賊寇大敗震驚之餘不速行平蕩反欲於來春青黃不接之時進取設或二三月間進取之後四五月間番夷馬肥思逞又將若之何粵東粵西山嶺亦多何曾預備糧餉官兵豈有止食稻米不食他粟之理陝西數年以來未曾勞民轉運漢興雖多險阻非隔省可比今恐輓運累民來春又誰爲輓運耶當逆賊敗遁之時急令進兵者正爲早定地方以安百姓耳今以輓運維艱請開事例爲詞其規避進兵明甚八旗官兵世受渥恩不特房屋傾圮無

足重輕卽赴湯蹈火誼亦難辭何得妄言人情憂慮孫思克封疆大臣前者陝西境內淪陷卽應議處念同大軍進剿宥過計功加不次之擢給世襲之官當捐軀報國自請破賊安疆乃身任提督統轄全師不思奮力前進反煽惑人心飾詞妄奏深負朕恩速行詰取供詞思克乃自引罪拉隆禮還奏得旨俟事平日再議十一月思克與畢力克圖敗賊衆於階州文縣成縣進駐沔縣詔思克還涼州尋以總督哈占請移駐莊浪防守河東河西二十年三月慶陽賊渠耿飛倡亂糾叛番達爾嘉濟農等犯河州思克與張勇剿平之二十二年四月追論前奏緩進兵罪革三等男爵及提督仍留總兵任二十三年六月遷甘肅提督二十八年三月北套生番犯內地掠錫喇偉古爾番族思克督兵截阻斬獲甚衆二十九年十月出使西域學士達瑚郎中桑格歸至嘉峪關外爲西海阿奇羅卜藏所劫思克聞報卽遣遊擊朱應祥計賺其宰桑質於關內始反我使臣別遣副將潘育龍遊擊韓成等搗其巢穴斬馘四百餘阿奇羅卜藏遁復遣人赴西海詰問各台吉責償所掠物各台吉懼罄阿奇羅卜藏所有以償思克奏請免其窮治諭嘉盡心籌畫區處合宜如所請行三十年二月疏言肅州一協去甘州五百里涼州一千里極邊



之地外逼西海北套哈密諸部內則番族插帳與民雜處噶爾丹巢穴離邊月餘程其姪策妄阿喇布坦現在西套駐牧雖叔姪爲讐恐將來復合有侵奪西海之舉嘉峪關外係其必由之路所設副將威望不尊兵馬不滿一千不足以資控禦調兵接應緩不濟急不可不作先事未然之防請設總兵一員兵三千以固邊圉庶可漸消窺伺又甘肅地瘠民貧一切布種收穫與腹地迥別一年一收縱遇豐年輸將國賦之外僅贍八口並無蓋藏本地兵馬糧料不敷供支節年折價已苦無處糴買萬一征調雲屯何以接濟宜於河西要地屯積糧草以備戰守但本地無糧可買輓運又恐勞民惟捐輸是賴而本地富庶之家有限請無論本省別省官民一例捐納加級紀錄職監俟邊儲稍充卽行停止九卿議從之三十二年三月詔嘉久著勞績加太子少保予騎都尉世職五月疏報遣總兵潘育龍等追來降復叛之番衆於庫列圖嶺斬級四十餘擒百二十人請將叛首齊奇克正法宥其從人妻子解京上免齊奇克死令安插內地十一月自陳乞休優旨慰留加振武將軍銜三十二年二月命內大臣耶岱領京營兵至寧夏同思克駐防卽以思克爲參贊探噶爾丹聲息三十三年正月疏報巴圖爾額爾克濟農之弟博濟於

三十年間叛逃復帶部落窺邊經臣遣兵同總兵柯彩出邊擊敗今聞其兄蒙恩安插賀蘭山并以博濟逃後被獲人口發往收養自悔前罪率所屬男婦百餘來投詔與二圖爾額爾克濟農同駐牧三十五年二月上親征噶爾丹由中路命撫遠大將軍費揚古由西路進思克率陝西兵出寧夏至翁金地與費揚古會五月上駐蹕克魯倫河噶爾丹聞駕親臨倉皇遁去費揚古邀擊之於昭莫多思克率綠旗兵居中與東西二軍併力迎戰自未至酉斬級俘獲無算追逐三十餘里噶爾丹引數騎遠竄捷奏至奉諭褒獎召赴京命侍衛迎勞賜袍褂帽靴等物並御製詩箋有鷹揚資遠略宿望在西陲之句入覲暢春園賜御書綏懷堂額及端罩四團龍補服孔雀翎朝帽朝衣朝珠鞍馬並給隨帶官兵糧料命赴肅州駐兵探噶爾丹往哈密聲息三十七年敕昭莫多戰功加一雲騎尉三十九年二月以病乞休遣御醫及兵部官往視仍命留任調養是月卒詔從優議卹贈太子太保賜祭葬如例諡襄武七月櫬還命皇長子前往奠醊賜鞍馬銀二千兩諭廷臣曰聞孫思克喪回時自甘州至潼關沿途軍民無不號泣相送若平昔居官不善何以得此誠可謂將軍矣復諭兵部曰孫思克謀勇素裕居官甚優久鎮巖疆允稱良

將給還前所革世職部議併爲一等男加一雲騎尉以其子承運襲世宗憲皇帝雍正十年入祀賢良祠今上乾隆三十二年以思克當吳三桂反叛及噶爾丹犯邊時懋著勞績其一等男爵詔予世襲罔替

珠滿

珠滿滿洲正白旗人姓瓜爾佳氏先世居烏拉祖多和倫國初來歸從征錦州廣寧有功授雲騎尉次子額赫瑪瑚以三等侍衛隨安南將軍宗室洛託征海賊鄭成功進攻廈門力戰陣亡聖祖仁皇帝康熙二年正月卹贈雲騎尉無子珠滿其兄子也襲其職十三年署參領隨大軍征江西時逆藩耿精忠叛應吳三桂遣賊黨犯南康珠滿隨征南將軍尼雅翰等擊敗之又敗僞總兵莊姓朱姓於沔津十五年隨大軍規復吉安破賊衆於惶恐灘十六年三月隨鎮南將軍莽依圖往廣東入韶州吳逆遣僞將軍馬寶等渡河來犯大軍分隊拒之珠滿由右翼奮戰連破賊營馬寶等突圍宵遁十八年六月隨莽依圖進剿廣西由橫州至南寧擊賊將吳世琮於新村西山大破之遂解南寧之圍十九年六月隨莽依圖討叛賊馬承蔭於柳州路經陶登敗其黨范齊韓魯仰等援兵是冬隨征南大將軍賴塔征

雲南二十年正月擊賊將何繼祖王宏勳等於石門坎奪其隘口賊退據黃草壩  
二月克之遂進征雲南城陣斬僞將軍胡國柄等七月復隨都統希福等追擊賊  
將馬寶巴養元於烏木山賊潰遁乞降是年雲南平凱旋二十五年七月敘功晉  
騎都尉兼一雲騎尉二十七年六月授三等侍衛二十九年三月授護軍參領三十  
十年正月兼管火器營事六月調前鋒參領三十六年六月擢荊州副都統三十  
九年十二月奉命同副都統阿濟禮率荊州兵二千會剿四川逆蠻比至都統滿  
丕提督唐希順等已復打箭鑪遂駐師鴉隴江防守四十一年六月撤兵還荊州  
九月鎮筵紅苗作亂上命尙書錫勒達副都統圖師海徐九如統師剿撫諭以珠  
滿久於用兵凡事與商酌而行十一月撫降三百一寨惟天星一寨仍負固錫勒  
達與提督俞益謨等分四路追剿珠滿領兵協應攻克燕蘆寨斬戮無算餘寨悉  
平敘功一級四十五年二月擢江寧將軍四十六年三月上南巡至江寧賜紫貂  
冠服及良馬是年卒於官賜祭葬如例明年吏部請以其子撒木貝襲騎都尉兼  
一雲騎尉得旨珠滿人才壯健行閒勞績茂著人所共知自簡用將軍倚畀正切  
委任未久忽聞奄逝深可憫惻所有世職著再加一雲騎尉授爲三等輕車都尉

予伊子撒木貝承襲

碩岱

碩岱滿洲正白旗人姓喜塔喇氏先世居尼雅滿山有昂郭都哩巴顏者當太祖高皇帝時來歸碩岱其五世孫也世祖高皇帝順治六年以二等侍衛兼參領隨睿親王多爾袞討大同叛鎮姜瓖復渾源州九月上幸南苑碩岱與一等伯巴什泰及蒙古侍衛素尼並從素尼猝拔刀殺巴什泰碩岱卽舉所執長槍擊素尼立仆擒之置諸法上嘉其勇敢予騎都尉兼一雲騎尉世職十三年授護軍參領十五年隨征南將軍卓卜特由廣西征貴州時明桂王朱由榔之將李定國李成蛟等分踞黔西要隘碩岱率兵渡盤江擊敗成蛟於涼水井復擊敗定國於雙河口十六年大軍攻雲南追剿定國至騰越碩岱遇伏於磨盤山力戰克捷十八年山東土賊于七踞棲霞縣之岵嶠山作亂碩岱隨靖東將軍濟什哈往剿斬獲賊黨無算于七竄入海聖祖仁皇帝康熙六年擢前鋒統領十三年冬逆藩吳三桂反上以荊州地當衝要命碩岱領前鋒兵先諸軍進發固守荊州俟諸軍繼至再進據常德以遏賊勢十三年正月碩岱至荊州二月賊陷常德及澧州犯宜昌

時順承郡王勒爾錦統大軍至碩岱奉詔參贊軍務同護軍統領額斯泰等援宜昌擊卻賊將劉之復陶繼智等十四年十二月諭責順承郡王駐荊州久未能恢復湖南郡邑罷碩岱參贊十六年安親王岳樂自江西進圍長沙碩岱隨征南將軍穆占都統宜里布等移兵助攻取道岳州韶岡河遇賊艘四十餘連糧至擊取之進圍長沙數月賊負固不下詔穆占移師規取衡州碩岱隨穆占征茶陵賊棄城遁攸縣碩岱同宜里布率兵追剿賊據河岸拒戰我兵奮擊賊潰奔遂復攸縣十七年隨穆占恢復郴州永興桂陽興寧還駐郴州賊將馬寶胡國柱等犯永興碩岱率兵往援戰失利都統宜里布護軍統領哈克三歿於陣副都統託岱宜思恭等還郴州碩岱棄營入永興城穆占奏劾之詔免逮繫令立功贖罪時賊勢猖獗屢逼犯永興碩岱同前鋒統領薩克察等嬰城固守逾三月吳三桂死賊乃遁去十八年大軍復寶慶武岡撤八旗兵三之一還京碩岱同內大臣阿密達等率以行既至京追議永興戰敗罷任革世職二十九年起爲正白旗滿洲副都統三十年隨定北將軍瓦岱征噶爾丹至克魯倫河偵賊衆遠去旋師三十四年十月同都統噶爾瑪率兵駐大同三十五年正月上親征噶爾丹統師出中路以撫遠

大將軍費揚古出西路費揚古請選大同所駐護軍二百八十人爲前鋒詔以碩岱署前鋒統領率之往四月上統師擊噶爾丹於克魯倫河噶爾丹聞風驚遁時碩岱與費揚古並在圖拉上度賊必遁往西路先傳諭費揚古邀賊費揚古偵賊至特埒爾濟口令碩岱率前鋒挑戰且戰且卻誘至昭莫多合圍奮擊斬獲無算噶爾丹引數騎遠竄師旋擢碩岱內大臣敍功予雲騎尉世職上念其勞績素著命復前所革世職晉爲三等輕車都尉五十一年卒年八十有四賜祭葬如例以其第三子納丹珠襲職第四子海綬於雍正七年以護軍校隨大將軍傅爾丹征準噶爾九年擊賊於和通呼爾哈諾爾力戰陣亡議卹予雲騎尉世職子沙通阿襲

馬際伯弟見伯 覲伯

馬際伯甘肅寧夏人父玉官游擊際伯由行伍於康熙十八年隨寧夏提督趙良棟征逆藩吳三桂叛黨復略陽賊遁陽平關追敗之以功加一等授千總十九年進征四川奪小關山復建昌二十年雲南平下部議敍授參將銜三十五年隨振武將軍孫思克征噶爾丹大敗之於昭莫多敍功授副將銜三十六年授寧夏鎮

標前營游擊隨寧夏總兵殷化行追擊噶爾丹至洪敦羅阿濟爾罕撤兵回汎三十八年遷靈州營參將尋遷督標中軍副將四十一年川陝總督覺羅華顯薦舉卓異擢四川建昌總兵四十三年六月丁母憂四川巡撫能泰以建昌鎮屬士民弁兵呈稱際伯嚴飭汎防俾番賊斂迹地方安堵倡同府衛捐資月課禁兵丁霸奪行市廉潔自持日用物俱給見價軍民愛戴籲請以際伯留建昌總兵任命在任守制四十六年陞見調西寧鎮總兵賜孔雀翎及鞍馬四十九年以失察階州西固堡境外番族殺傷寨民並戕官兵部議降二級戴罪圖功五十年授四川提督五十一年卒四川總督能泰以聞諭曰馬際伯簡任提督正資料理忽聞溘逝朕甚憫惻應得卹典察例具奏尋議贈右都督賜祭葬如例諡襄毅弟三人見伯顯伯觀伯見伯康熙三十年武進士三十六年隨殷化行剿噶爾丹至洪敦羅阿濟爾罕敘功以守備補用三十七年授直隸正定協標右營守備三十八年遷直隸撫標中軍游擊三十九年遷雲南督標中軍副將四十二年擢山西太原總兵上西巡賜御書三軍挾纊額並貂褂蟒袍等物四十三年丁母憂命在任守制四十七年疏言鳥槍久奉禁例今商民尙有私用者請令民間鳥槍繳官如有必需



處止許長一尺五寸刊某地某人姓名違者治罪硝磺乃火器所用應嚴禁私賣均如所請四十八年上幸五臺見伯迎駕賜孔雀翎四十九年九月以弁兵內通曉文義者奉特旨入鄉會武闈應試見伯疏陳三事一武經七書註解互異請敕儒臣選定一部頒行一文廟祭祀文臣自驛丞以上皆得陪祭武臣惟副將以上方准陪祭請一體行禮一武生於中式後能講明論語書旨再准出仕疏入部臣議駁上諭大學士等曰馬見伯此奏亦是武經七書朕俱閱過其文義駁雜不能皆合正道孟子云仁者無敵又云天時不如地利地利不如人和與其用權謀行私曷若以王道行仁義之爲愈也朕曾躬歷行閒深知用兵之道如七書所言安可盡用耶今於七書中作何分別出題及增用論語孟子出題之處另議至條奏祭祀文廟令同城武弁與文臣一體行禮於理甚合著照所請行嗣經九卿議覆武生武童試論二篇第一篇於論語孟子中命題二篇於孫子吳子司馬法中命題武會試試論二篇策一篇五十四年正月調直隸天津總兵五月大軍剿策妄阿喇布坦見伯請領兵赴西路協剿得旨俞允五十八年擢陝西固原提督五十九年正月上授貝子延信爲平逆將軍率兵進藏以見伯參贊軍務三月連敗策

零敦多卜於齊諾郭勒綽馬喇等處十月凱旋師次打箭鑪見伯病卒遺疏入諭  
曰馬見伯簡任提督率領各營官兵參贊軍務實心效力勞績懋著忽聞病逝深  
爲軫惻應得卹典察例具奏尋賜祭葬如例顯伯初名英由把總歷官雲南永泰  
協副將覲伯康熙四十二年武進士選三等侍衛四十七年授巡捕南營參將五  
十一年遷山西殺虎口副將五十四年策妄阿喇布坦擾哈密覲伯率兵赴推河  
偵禦六十一年七月擢大同鎮總兵仍留軍前雍正元年六月回任九月陛見賜  
孔雀翎十月奉旨赴甘州駐防山丹衛二年四月撤兵還汛三年正月疏奏改隸  
營制事宜一殺虎口副將原轄之北樓東路二營參將歸大同總兵轄一山陰路  
原轄之井埤城守備歸平魯路朔州城守備歸寧武營乃堡把總歸老官營俱歸  
殺虎口副將轄一平魯路參將歸殺虎口副將轄其平魯路屬之破虎堡弁兵分  
隸助馬路轄一利民路參將移駐寧武爲寧武營參將其利民路參將中軍守備  
改爲利民營守備寧武營守備改爲參將中軍守備並增撥利民路把總一隸之  
均如所請行二月諭曰爾於前陛見時朕曾面諭諸事聽巡撫諾敏教導近聞爾  
等俱聽年羹堯指示殊爲不是此舉干係爾等功名嗣後諸事當與署巡撫伊都

立商酌而行五月追議前在軍營因細事與將軍等爭競奉旨革職發往鄂爾坤圖拉管轄屯田兵效力五年十月奏獻瑞麥一莖十五穗諭曰今歲各省俱產嘉禾頃馬觀伯復獻瑞麥朕觀自古帝王本不以祥瑞爲尙因今歲爲遵行藉田典禮之初卽獲感召天和是以特爲表著但恐地方有司未必深悉朕心或借端粉飾致有隱匿旱潦不以上聞者著將雍正五年以後各省所產嘉禾停其進獻乾隆元年觀伯卒於軍營

### 赫壽

赫壽滿洲正黃旗人姓舒穆祿氏初由筆帖式授內閣中書遷內閣侍讀康熙二十四年遷工科給事中尋轉刑科兼管廣善庫四十三年遷內閣侍讀學士旋授內閣學士四十五年四月兼管太僕寺十二月授禮部右侍郎仍兼內閣行走明年充經筵講官四十七年遷戶部左侍郎尋調吏部左侍郎四十八年正月命往西藏協同內閣學士拉都琿辦事四十九年十二月擢漕運總督五十年八月疏言江西湖廣兩省漕糧給軍副米經御史王謙吉條奏應如河南浙江兩省例部議令臣會同各督撫定議按舊制江西湖廣浙江正兌漕米每石加耗米四斗改

兌漕米每石加耗米自四斗遞減至二斗二升不等以爲運丁盤淺起剝蒸折曬  
颺之費皆因程途有遠近所以徵給有多寡因地制宜軍民相安已久未可輕事  
更張從之十月疏言江浙漕船抵通積年掛欠甚多皆由水次出兌時以銀折米  
運丁沿途既乏副米輒侵用正米致抵通交倉虧缺宜於兌米水次令監兌官坐  
守糧道親履稽察務須正耗行月并搭運冬米概行兌足上船如有折銀情弊州  
縣官照私自改折漕糧例革職仍追米歸款失察之監兌官及糧道分別議處又  
江南省糧船三千五百餘浙江省糧船一千三百餘前後開行相去千有餘里每  
省派通判一員首尾不能兼管請嗣後江南派七員浙江派三員押船抵通以無  
掛欠分別加級降級積至三次實陞實降其兌次開行時卽令監兌官督押抵淮  
如在淮盤驗短少懲責旗丁留其子弟一人令於產米處購買足數僱船趕交押  
運官如仍短少將監兌官提參其押運千總定例每幫二員輪押實止一員領運  
或有事故勢必以一員領兩幫恐難兼顧請揀發在部候選千總三四十員遇缺  
派署向來千總押運全完例止加銜偶有掛欠卽行革職人心未免隳阻嗣後有  
押運積年掛欠之幫而二運全完押運其次掛欠之幫而三運全完押運舊無掛

欠之幫而五運全完者請予卽陞其駕運旗丁向來每船開報一名或掛欠留通進比則回空無正丁請嗣後每船於本丁兄弟子姪內增報副丁令十船正副丁連環保結能舉首盜乾盜賣等弊者酌量給賞如隱匿不舉一丁治罪九丁責懲其旗丁向由衛守備報充嗣後應令千總先具保給加以府廳等官察驗方准充當其糧船過淮本定限三月以內而從前並無按限過淮者或遲至六月致回空守凍一年阻滯年年遲延請嗣後違限一二月者仍照例處分二月以上者計日不計月分別議處疏下戶部會同九卿詹事科道議皆如所請行五十一年巡撫張伯行疏劾總督噶禮會審科場作弊一案有通同賄賣隱情弗嚴究確供尙書張鵬翮因其子爲噶禮屬員瞻顧掣肘噶禮亦疏劾張伯行翻駁命盜案件不能清理各款並得旨解任質訊諭九卿等曰此案察審實難若令滿大臣審則以爲徇庇滿洲若令漢大臣審則以爲徇庇漢人張伯行劾噶禮連及張鵬翮意欲使之迴避今可令張鵬翮會同赫壽從公審理尋會奏張伯行誣劾噶禮賄賣舉人應革職贖徒噶禮劾張伯行不能清理案件是實餘以會銜題咨舊事苛劾應降一級留任上切責張鵬翮赫壽掩飾和解瞻徇率結遣尙書穆和倫張廷樞前往

再讞詳見噶禮張伯行傳下九卿核議以噶禮張伯行不和衷任事互相訐參玷大臣職均應褫革詔張伯行仍留原任噶禮依議革職九月以赫壽代噶禮爲江南江西總督五十三年張伯行劾奏布政使牟欽元以交通海賊之上海縣人張令壽爲幕友得旨革牟欽元職下赫壽察審赫壽以搜捕弗獲且海中無賊入奏詔張鵬翮同副都御史阿錫鼐往勘五十四年五月覆奏張伯行虛捏誣陷請革職質訊詔從之以赫壽暫署江寧巡撫十月丁母憂上以江寧安徽兩巡撫俱新授未蒞事命赫壽在任守制五十六年四月內遷理藩院尙書七月靖逆將軍富寧安奏孛獲策妄阿喇布坦哨卒二人問之云策妄阿喇布坦與俄羅斯哈薩克布魯特皆爲仇敵拉藏汗之子娶策妄阿喇布坦之女三年已經生子達賴喇嘛班禪及拉藏之使俱在策妄阿喇布坦處聞布木之子策凌敦多卜託卜齊都噶爾三都克等率兵六千去年往阿里克處助拉藏汗征布魯克巴至今未回上命赫壽以富寧安所奏宣諭拉藏汗赫壽遵上旨致書拉藏汗言策妄阿喇布坦狡詐多端甚不可信我蒙皇上恩授理藩院尙書念昔時曾到爾處汗甚愛敬我故作書相告拉藏汗得書尋奏策妄阿喇布坦遣兵踞喀木衛藏地請敕發大兵卽

爲策應詔西安將軍額倫特等集兵救援詳見額倫特傳五十八年九月赫壽卒賜祭葬如例

佟國維

佟國維滿洲鑲黃旗人都統佟圖賴次子順治十七年任一等待衛聖祖仁皇帝康熙九年授內大臣十二年冬逆藩吳三桂反其子吳應熊居京師明年春逆黨謀爲不軌以紅帽爲號國維發其事奉命率侍衛三十人至大佛寺擒縛十數人械送刑部鞠實伏法二十一年授領侍衛內大臣尋列議政大臣二十八年因國維爲孝懿仁皇后之父封一等公二十九年七月大軍征爾噶丹命國維參贊軍務八月次烏蘭布通國維與兄都統佟國綱並率左翼兵進擊國綱循河岸戰歿國維由山腰遶賊後擊之潰遁師還以噶爾丹旣敗不率兵追剿部議革職得旨罷議政降四級留任三十五年上親征噶爾丹國維從甫出獨石口以駝載遲滯疎於管攝自請處分上貫之三十六年復從上征噶爾丹至寧夏聞噶爾丹竄死上回鑾敍前隨征功復所降四級四十三年詔賑山東流民之就食京師者以國維同內大臣明珠等監賑尋以年老解任四十八年正月召國維與諸大臣並集

傳旨詰問曰前因有人爲皇太子條奏朕降硃筆諭旨示諭大臣爾曾奏稱皇上辦事精明天下人無不知曉斷無錯誤之處此事於聖躬關係甚大若日後易於措處祈速賜睿斷或日後難於措處亦祈賜睿斷總之將原定主意熟慮施行爲善爾係解任之人此事與爾無涉乃身先衆人啟奏是何心哉國維奏曰臣雖以庸愚解任蒙皇上優厚因聖體違和冀望速愈故奏請速定其事今奉明旨詢問實無詞以對奏入奉諭曰將來誠如爾言朕有難於措處自不必言衆人亦將謂爾所奏果是矣若朕無難措處到彼時自知之耳人其可懷私仇而妄言乎明日復諭曰爾年老之人屢向朕所遣人云每日祝天求佛願皇上萬歲朕思自五帝以至今日尙未及萬載朕何敢侈望及此此皆以荒誕不經之談欺朕朕不信也爾既有祈望朕躬易於措處之言嗣後惟篤念朕躬不於諸皇子中結爲黨羽謂皆係吾君之子一體看視不有所依附而陷害其餘卽俾朕躬易於措處之要務也二月又諭曰爾前此易於措處難於措處等語竟似捨命陳奏爾乃國家大臣榮貴極矣年已老邁子孫甚多若欲捨命則見朕之病勢漸增卽當親身入內奏云醫生等既可入內我又何不可入親身領醫生診看晝夜侍奉湯藥使朕病得



痊方可稱爲實心乃漠不相關並未嘗念及朕躬朕仍賴皇太子及諸皇子晝夜侍奉率領醫人診看進藥調理仰蒙上天護佑今已痊愈由是觀之爾並非實心乃置身兩可意謂皇上若獲痊愈我仍沾祿食苟且度日倘有不測則皇太子將何所往必合我言矣此非爾之本意乎皇太子允礽前染瘋疾朕爲國家而拘禁之後詳察被人鎮斃之處將鎮斃物俱令掘去其事乃明今調理痊愈始行釋放朕將此情由俱曾硃筆書出詳悉諭諸大臣今譬有人因染瘋狂持刀斫人安可不行拘執若已痊愈亦安可不行釋放而必欲殺之乎朕拘執皇太子時並無他意殊不知爾之肆出大言激烈陳奏者係何心也諸大臣之情狀朕已知之不過碌碌素餐全無知識一聞爾所奏之言衆皆恐懼欲立允禩爲皇太子而列名保奏矣朕臨御既久安享太平並無難處之事臣庶託賴朕躬亦各安逸得所今因爾所奏之言及羣下小人就中捏造言詞所以大臣侍衛官員等俱終日憂慮若無生路者此事關係甚重亂臣賊子自古有之今觀衆人情狀果中爾所奏日後難於措處之言矣爾聞外邊匪類妄言理應禁止爾乃倡造大言驚駭衆心有是理乎爾既捨命陳奏必有確見其何以令朕躬及皇太子諸皇子志意安舒不致

殷憂亦可明白陳奏朕特降此旨非欲誅爾也因衆皆憂慮須事明後衆心乃可定爾當體念朕心若懷藏私意別有作爲天必誅之國維奏曰臣前所奏之言俱載在檔案今並不推諉衆人因臣大言妄奏皆畏懼列名致貽聖體及皇太子諸皇子之憂臣罪莫大皇上雖憐憫不誅臣何顏生斯世祈速賜誅戮以示衆奏入復奉諭曰朕今特爲安撫羣下降旨申明非欲有所誅戮也爾前啟奏時外間匪類不知其故因甚贊爾云如此方謂之國家大臣不懼死亡敢行陳奏今爾之情形畢露人將謂爾爲何如人耶洵可恥之極矣朕若誅爾似類沽名朕今斷不誅爾其坦懷勿懼但不可卸責於朕躬觀爾迷妄之言其亦被人鎮斃歟五十八年正月卒賜祭葬如例世宗憲皇帝雍正元年贈太傅諡端純子隆科多襲一等公別有傳

### 溫達

溫達滿洲鑲黃旗人姓費莫氏由筆帖式授都察院都事遷戶部員外郎康熙十九年授陝西道御史二十五年遷吏科給事中三十三年兼管佐領三十四年授兵部督捕理事官三十五年二月聖祖仁皇帝親征噶爾丹溫達奉命隨皇七子

允祜都統都爾瑪等管理鑲黃旗大營明年冬擢內閣學士三十八年授戶部侍郎四十年三月命往山陝察驗驛站馬匹還奏由大同府至德州花馬池及肅州涼州西寧莊浪蘭州等處視臚肥善馳之馬悉加烙印疲瘦者通飭換補并牒巡撫嚴劾官屬之餽飼失宜及侵蝕滋弊者得旨報聞十月列議政大臣十一月雲貴總督巴錫疏劾遊擊高鑑審理訟案捏飾并劾提督李芳述牒咨徇隱李芳述亦劾巴錫置咨弗覆未會稿遽題有違成例部議令巡撫察審上曰李芳述在西寧時甚有聲名此事似曲在總督巡撫未必從公著遣侍郎溫達前往審察明年二月調吏部侍郎尋還奏高鑑罪應徒巴錫應降級李芳述應罰俸九月擢左都御史四十二年復奉命往貴州鞠盛寧總兵孟大志剋減兵餉事得實論罪如律四十三年遷工部尙書四十五年三月充經筵講官十月調吏部尙書諭曰朕因吏部事務緊要特簡任爾凡銓選已有定例當遵例而行其介在兩可者時或滋弊宜加意體察四十六年十二月授文華殿大學士時纂修本朝國史政治典訓平定朔漠方略大清一統志明史並充總裁官五十年十月命八旗及部院大臣舉篤行孝義之人因諭曰孝者百行之首爾等不可謂無灼知如大學士溫達尙

書穆和倫富寧阿之孝不但衆人俱知卽朕亦深知之也五十二年御製七言律詩以賜有自少存心敦孝友之句五十三年正月乞休得旨卿耆舊老臣才品素著自簡任機務以來恪慎和平實心盡職勤勞歲久倚毗正殷覽奏以衰老乞休情詞懇切准以原官致仕十二月諭曰溫達雖年老告退尙自康健著仍任大學士五十四年四月疾遣太醫院診視賜藥餌五月卒遺疏上得旨溫達久任機務寬厚簡靜懋著勤勞予告之後朕眷注尤殷仍起辦事正期長享遐齡以承寵渥遽爾病逝深切軫悼下部議卹命皇子及大臣二員侍衛二十員奠茶酒賜祭葬如典禮諡文簡

張鵬翮

張鵬翮四川遂寧人康熙九年進士選庶吉士改刑部主事遷員外郎尋遷禮部郎中十四年八月充順天鄉試同考官十五年二月充會試同考官十九年授蘇州府知府旋丁母憂二十二年服闋補充州府知府二十四年授河東鹽運司二十五年十月內遷通政司右參議十一月轉兵部督捕右理事官二十七年俄羅斯察罕擾邊我兵困之於雅克薩城悔罪乞恩鵬翮奉使同內大臣索額圖都統

修國綱給事中陳世安等往定界事竣還擢大理寺少卿二十八年二月擢浙江巡撫二十九年疏言定海自建縣設官民人漸集捍衛必賴城垣教化必資學校倉儲監獄亦須建立庶足壯觀瞻而副規制詔允所請三十二年疏言浙省夏杪始雨田雖補種穫米未能堅實難供漕糧請將明年輪蠲之糧於今歲免征又言紹興府屬之餘姚上虞嵊縣台州府屬之臨海太平旱後復遇颶風霖雨漂沒田廬並請賑濟從之三十二年疏言出洋貿易船必需地方官印烙給票方准攜帶軍器恐日久弊生內地商民在外国造船攜帶軍器難以稽察請嚴禁部議從之初鵬翮奏浙省紳民願每畝捐穀四合力不能者聽之至是又奏杭嘉等府上年秋收歉薄請勸輸之穀暫免一年上諭昨歲浙省被災州縣方照例蠲豁並移免漕糧豈有仍強令捐輸之理張鵬翮於原題力不能輸聽從其便之語自相矛盾下部嚴加議處尋部議革職特旨寬免降五級留任尋擢兵部右侍郎命提督江南學政三十六年五月遷右都御史疏言淮揚上年被水及今春夏之交百姓棲止隄上以魚蝦野菜爲食茲見江蘇巡撫宋犖揭稱鹽城山陽高郵泰州興化寶應六州縣積水未消加以霪雨連綿麥禾未種現委道員查勘臣思此六州縣被

災既重本地倉穀去年支賑無餘今秋成絕望該撫並未聲明作何拯救伏祈皇  
上敕該督撫或撥隣郡倉穀或捐官役俸工買米賑濟下部議行三十七年七月  
遷刑部尙書十一月授江南江西總督三十八年春上南巡閱視河工畢命鵬翮  
扈從入京賜朝服鞍馬弓矢先是鵬翮同刑部尙書傅拉塔察審陝西侵蝕貧民  
籽粒銀兩一案經戶部題覆上諭大學士曰傅拉塔畏人懷怨草率具覆張鵬翮  
於此事亦稍罷輒六月命復同傅拉塔赴陝西詳審並原任陝西巡撫布喀控川  
陝總督吳赫侵蝕及吳赫與原任寧夏道吳秉謙互參等案鵬翮等審得醴泉知  
縣張鳴遠涇縣知縣劉桂等因公挪用同州知州蘭佳選蒲城知縣關秀韓城知  
縣王宗旦皆侵蝕入己布喀控吳赫侵蝕籽粒銀及秉謙控吳赫浮開草料價值  
事均虛吳赫參吳秉謙收受屬員餽送屬實餘係捏款誣參均擬罪如律三十九  
年正月回京上問鵬翮曰署總督事席爾達居官如何奏曰居官頗優上又問巡  
撫貝和諾較巴錫何如奏曰巴錫爲人鄭重貝和諾臨事精詳上謂大學士等曰  
張鵬翮前往陝西朕留心察訪果一介不取天下廉吏無出其右者三月調河道  
總督諭曰清黃相會之處所關最要黃水高故清水不得通洩以致泛溢今使清

水何以得出河身何以得深爾宜努力鵬翮疏陳一撤協理河務徐廷璽以專總河之任一撤河工隨帶人員以免糜帑一工部與河臣事關一體請敕部臣毋以不應查駁事從中阻撓下部議行四月疏言臣過雲梯關閱攔黃壩巍然如山中間一線之細如注下流不暢無怪上流之潰決也於攔黃壩上流計黃河水面寬八十三丈餘則攔黃壩亦應照丈尺拆挑一律寬深方足宣洩亟堵馬家港使水勢不至旁洩俟黃水大漲開新挑之河資其暢流衝刷淤墊則黃水入海自能暢達又言清口爲淮黃交匯處日今糧艘北上河身淤墊竟成平陸獨有黃河入運河臣相度形勢黃河北裴家場引河身高爛泥淺引河地多活沙卽開濬深通黃水大長清水不能相敵應於張福口開引河一千五十丈深丈餘寬十丈引清水於黃河口相近處入運使之暢達庶可敵黃並建閘以時啟閉又言人字河自金灣閘至孔家渡爲河之腰絡至芒稻山分爲二派又名芒稻河兩岸旣狹又有土嶺二處今湖水方盛應多集夫掘使暢流水口下有芒稻閘年久塌壞磯心頗高宜另建以防江潮又鳳皇橋引河從橋口至胡家樓河水絕流宜加濬引水從王家樓入運鹽河匯入芒稻河又雙橋灣頭二河現今同入芒稻河底亦淺應於冬

月濬使深通其灣河閘雁翅塌卸宜及時修砌此三處之水俱相繼入芒稻河流十八里入江現在委員分修剋期竣工諸疏俱下部議行五月初九日工竣水勢海口將攔黃壩拆去河身開濬深通四月二十一起至五月初九日工竣水勢暢流入海且自動工來潮恬風靜得以施工工甫畢卽長水二尺以資開放此皆我皇上軫念民生至誠上孚海神效靈所致請將攔黃壩之稱賜名大通口並建海神廟以答神庥得旨俞允尋上諭大學士曰前張鵬翮赴任時朕卽指示以爲必毀攔黃壩挑濬芒稻河人字河今毀去攔黃壩而清水遂出濬通海口而河勢亦稍減觀此則河工大可望也觀張鵬翮奏章詞簡而意明其辦事精詳可知矣朕昔與彼閒論時彼曾云在浙八年每歲錢糧並無缺欠今蒙朝廷擢用之恩無可仰報惟勉令江南錢糧每歲必期完結朕尙止之云爾勿輕出此言迄今思之彼固有成見也是月上命員外郎拖抗拖和中書張古禮馳驛往令鵬翮將河工修理情形入奏鵬翮疏陳十九款一修工葦柴多產海濱舊有運料河自清江浦起至海口止年久淤塞應加濬深便轉運一清水會黃入海關鍵全在六壩而六壩最要者尤在夏家橋一壩以全湖水勢趨此故也今夏水方盛若急於堵塞則



高家堰危險可虞且湖水洶湧恐旋塞旋衝虛費帑金應俟水落堵塞庶爲萬全一高家堰容納七十二處山河之水古人設壩原以洩異漲之水非以洩平槽之水也今冬六壩閉後來年挑濬黃淮並漲宜洩湖水非壩不可前河臣于成龍改六壩爲四滾水壩臣相度地勢相去不遠宜併爲三就原有之草字河塘漕河爲引河並築順水隄則田廬無淹沒之虞一武家墩至小黃莊一帶臨河舊有石隄僅出水面二三尺必須加高一古溝至六壩以下俱係土隄宜改石以省歲修一清河縣運口至高郵州界首裏河頻年黃水入運以致河身日高水漲往往潰決宜加濬一高郵寶應江都西岸土石隄工多爲湖水齧侵俟冬時興工一高郵城南石壩五改爲四滾水壩下開引河使水有去路一歸仁隄臨河石工罅漏現飭補砌一運口至濱海兩岸隄工必須加倍高寬以資捍禦一王家營引河飭革職道馮佑作速挑濬深通准其贖罪一新改中河隄岸單薄水漲可虞應勒限修築完固一王家營減水大壩應酌開十丈餘洩黃河漫水由鹽河出一桃源縣黃河南岸隄工近長湖一帶土隄四千二百餘丈應加培高厚一駱馬湖口正對有竹絡壩節宣黃湖大漲今黃河身高去歲漫缺二次黃河灌駱馬湖口匯入中河亟

宜堵築以禦黃水一王家營缺口月隄單薄應培修高厚以作正隄一徐城對岸沙嘴挺入河心二里應挑掘以殺大溜之勢郭家嘴舊有石工至北門迤西臣率河員相度自北至段家莊加砌石工可保城池且免歲修費蘇家山石嘴挺出河心致韓家山潰逼徐城應自楊家樓至段家莊築月隄以作重門之障一黃運隄岸有領帑興修者有捐工興修者勒限完築一徐邳睢寧宿遷桃源清河山陽安東等州縣黃河險工應支歲修錢糧進掃防護飭河官當伏秋二汛晝夜防守疏入詔下部速議行六月又條奏河工九款一隄工宜堅築加幫之隄應將原隄夯杵再加新工創築之隄先將平地夯深務期堅固一運河中河因頂衝處湍急恐傷土隄是以排椿鑲壓用整木柴今用整料截開粉飾外觀嗣後務與原估尺寸相符一湖河隄岸有馬牙梅花等椿面裏釘頭等石鐵釘鐵局米汁柴灰等料必依法修砌方能永久一歲搶各工不無虛冒牽混之弊嗣後呈報險工估計申詳如係假捏卽以謊報題參一挑河工程務將挑出之土堆於原估隄工夯作成隄以資捍禦不許將散土堆集滋假冒之弊一平常工料俱用龍尾掃遇風浪立見塌卸虛糜帑金應行停止一河水頂衝處對岸必有沙嘴挺出此由河曲之故從

曲處挑引河以殺水勢誠有如聖訓指示者而河員不卽遵行則以挑引河後必引大溜始能成河若水緩沙淤例應賠修因之人心畏縮臣思河工不如式者理應賠修若實心任事偶致淤墊者應請聖恩豁免一實心任事之員工成日優敘卽用否則嚴加治罪一挑河築隄用夫動至數千寒暑風雨極其勞苦工成日應給印票免其雜徭以上各條仰請天語申飭勒石河干永遠遵行得旨覽奏河工弊端詳悉切要極其周備下九卿議尋議如所奏上曰張鵬翮遇事精勤從此久任河務必能有益九月疏言前任河臣于成龍於四堡挑濬引河由胡家溝出黃河臣勘閱胡家溝迤東地勢頗高若在涵洞口至老隄頭迤東出黃河地勢低窪自涵洞口至九龍廟現有舊河至黃河邊止可挑引河於黃河縷隄出水之地建造石閘臨河處修築草壩以防黃水倒灌再於歸仁隄五堡建磯心石閘於引河兩岸築束水隄洩歸仁隄之水出黃河可以衝刷河身保護田廬得旨張鵬翮所奏歸仁隄修築事宜甚爲合理應及今年黃河水小興工十月疏言武家整至小黃莊加砌工舊椿多壞必須拆修堅固今於舊殘石工上疊柴壓土以爲越壩費省而工速此工除撥銀四十萬兩外尙有不足銀十八萬六千二百四十八兩有

奇請敕部撥給得旨著照該督所請張鵬翮每事實能宣力朕不之信將誰信耶  
又疏言新中河必全身挑濬兩岸子隄必全行培築需費頗多而河頭灣曲糧艘  
經行不順舊中河自三義壩下至仲莊閘十五里河身甚深南岸河身散漫難築  
子隄且距黃河最近今議於三義壩將舊中河築隄一道改入新中河則舊中河  
之上段與新中河之下段合爲一河糧艘通行無滯得旨張鵬翮所議中河事宜  
甚當著照所奏行十二月疏言臣遵聖授方略次第舉行先疏海口水有歸路黃  
水不出岸矣旣挑芒稻河引湖水入江高郵寶應等處水由地中行矣再闢清口  
開張福口裴家場引河淮水有出路矣加修高家堰堵塞六壩逼清水復歸故道  
今清水大半入黃少半入運一水兩分若有神助請加河神封號下所司知之又  
疏言黃水下流最溢處無如安東便益門及韓家莊兩岸僅距六十餘丈兼以時  
家馬頭至伊家莊河身過曲沙洲逼溜南北互有衝激應於兩處沙洲中開引河  
二使黃流直下以固城池又言下河水勢漸消惟興化積水一時不能全退臣相  
度形勢高郵寶應山陽鹽城之水宜疏蝦鬚二溝引入朦朧河以達於海鮑家莊  
至白駒口地高水壅宜挑濬深通引河由白駒場入海再挑撈魚港引河入海挑

老河口引水入湖挑稻子河引水由苦水洋入海如此則有去路積水可消矣並從之是年遵旨詳議給事中幕琛條奏科場事宜鵬翮奏江浙等省既編南卷山陝等省既編北卷又將雲南貴州四川廣西四省各編字號卷數甚少分晰太明不肖者易通關節應將四省編入南卷至監生回籍鄉試一段臣思監生作弊自有防之之法平時責令祭酒力行考課考課不缺者准其入場臨時入監者不准則弊無從出矣四十年正月疏言臣按河南志清口至淮安建有五閘遞相啟閉以防河淤又慮水發湍急難於啟閉則築壩以遏之每歲糧艘過盡卽於閘外築壩以遏橫流則是伏秋黃水倒灌自古已然今運河初濬海水出黃轉盼伏秋二汛繼至卽宣洩之道不可不急籌也今於張福口裴家場中間開大引河一道并力敵黃若黃水大發則閉裴家場口門使清水由文華寺入運河倘運河水大山陽一帶由涇澗二河洩水寶應一帶由子嬰溝洩水俱歸射陽湖入海高郵一帶仍由城南柏家墩二大壩洩水江都一帶由人字河鳳凰橋等河洩水入江若遇黃淮並漲清水由翟家壩天然壩洩水黃水由王家營減水壩入鹽河至平旺河入海若糧船過完黃水大發則閉攔黃壩使不得倒灌黃水不漲則堵塞運河頭

壩今清水全入黃河官民船照例盤壩卽古人設天妃閘之意也疏入上嘉其得治河祕要時江西巡撫馬如龍以年老乞休諭大學士曰馬如龍雖年老居官尙好督撫之任如張鵬翮李光地居官更有何議張鵬翮自到河工在署之日甚少每日乘馬巡視隄岸不憚勞苦朕深知之三月鵬翮以河工情形遣郎中王進楫入奏上諭進楫曰爾往諭張鵬翮高家堰須加意防守必歷夏秋至冬清水照常流通斯爲有濟於事鵬翮增築高堰月隄及時家馬頭董家營陳家莊龍潭口歪枝套辛家蕩邢家河馬家港等處隄壩尋洪澤湖溢泗洲盱眙被災上以修治善策詢之鵬翮並飭會同江南江西總督阿山詳勘尋鵬翮奏泗洲盱眙水災自古已然卽六壩全開亦不能免且自閉六壩高郵寶應興化泰州山陽鹽城等處田地涸出民得耕種皆河伯效靈所致上曰堵塞六壩乃前河臣于成龍題請不是張鵬翮始頃因泗洲盱眙被水令同阿山設法修治作何賑濟蠲租並非欲開六壩救泗洲盱眙之民而令淮揚百姓罹於水患也張鵬翮奏章昏曠已甚可將朕諭旨並張鵬翮奏章刻示於淮安揚州泗洲盱眙等處令衆人觀看四十一年正月奏清河縣陶莊閘南岸有挑水壩溜入引河直走北岸逼近黃河縷隄請築創

隄並將臨河縷隄及護城隄皆加高厚又於黃河南岸挑水壩西添築創隄並改建運口爲石閘以省煩費又因天妃閘塘基低窪改築運口草壩北建大石閘東西各築縷隄於舊隄衝破處建草壩以固隄東水清河縣黃河南岸卞家莊之險工當黃淮二水交衝之處內臨積水深潭中僅一線土隄請改建石工下部議行六月桃源城西煙墩黃水大漲積水未退隄根甚危鵬翮加築近城越隄捍衛城垣八月疏言煙墩對岸沙灘挺出河心逼溜南行恐被衝刷請於邵家莊開引河建草壩分水勢又顏家莊水勢逼射北岸亦請開引河一道則水順流而險工不受衝矣上諭大學士等曰此本若飭部議必致遲延著卽照所題行尋鵬翮題秋水情形上曰覽奏挑水壩築成逼黃河大溜直趣陶莊引河循北岸而行黃水從大通口暢出海口極其深通淮水從清口暢流敵黃絕無黃流倒灌之患高家堰隄工完固加謹防守經伏秋大汛俱獲無虞運河之水由涇澗芒稻河人字河分洩各處工程亦皆保固觀此則河工大有望矣四十二年春上南巡周視河工賜御製河臣箴淮黃告成詩並賜鵬翮父張煥貽背神清頤養松齡匾額二月上以山東泰安沂州等州新泰蒙陰郟城等縣民飢命漕運總督桑額以漕米二萬石

交鵬翮選賢能官運至濟寧州兗州府等處減價平糶有應賑處卽行賑濟鵬翮委河臣程兆麟等動用倉穀二十八萬餘石散賑疏稱將山東各官俸工補還上命鵬翮與河員及山東巡撫以下各官分派於四十三年四十四年內賠完嗣上復面責之曰爾常以經義奏對經義以本心爲要爾河工人員動用常平倉穀賑濟邀取名譽及令抵償則委之山東官員於心忍乎鵬翮叩首謝罪十月諭吏工二部曰張鵬翮在河數載殫心宣力不辭艱瘁又清潔自持朕心深爲嘉悅爾部議敘具奏尋加太子太保四十四年二月疏請修理徐州城外石隄及山安黃河北岸三套隄工建築越隄並從之先是康熙三十六年六月時家馬頭河決至三十九年五月堵築未就鵬翮疏參山安同知佟世祿冒帑誤工應革職追賠詔鵬翮嚴訊嗣世祿叩閭訴鵬翮枉縱交江南江西總督阿山河南巡撫徐潮會審阿山等以時家馬頭承修銀兩應於佟世祿追賠馬家港東壩被衝張鵬翮雖經題報未將承修官賠補處聲明應令鵬翮與疏防等官均賠未幾世祿復叩閭控訴上遣戶部尙書徐潮等覆審係誣參世祿復職鵬翮巧飾供詞失人臣禮應革職淮安道王謙附會山安同知裘陳佩欺隱應罰賠各擬杖徒又工部侍郎趙世芳



議鵬翮奏銷錢糧浮冒十三萬餘兩應交刑部治罪九卿等以如所議奏上曰此案依前議張鵬翮量甚窄斷不認錯河工錢糧原不限數一年水大則所需者多水小則所需者少謂張鵬翮小有所取亦未可知謂以十三萬兩入己必無之事也河工恃乎用人張鵬翮所用之人皆不勝事故至如此耳趙世芳奏事不公本發還三月上南巡諭鵬翮曰朕至清口見黃水倒灌因以問爾爾赧然不能答反稱不曾倒灌此卽爾毫不認錯也爾居官固好卻爲王謙張弼所欺頃令河工應追錢糧著佟世祿王謙張弼均賠部議甚明爾又奏請欲免其追賠開捐納以補原項此特因王謙亦在數中希圖爲之脫免耳鵬翮不能對又諭曰王謙爲人刻薄人人怨恨爾卻偏信任其恣意妄行以致人心不服朕非不知爾在河工能任勞苦但聽信屬員流於刻薄從來大儒持身當如光風霽月何況大臣受朝廷委任必須爲國爲民事事皆有實濟若徒飲食菲薄自表廉潔於國事何益耶閏四月御舟渡黃河閱九里崗嘉鵬翮修理得法賜御製詩扇七月淮黃並漲古溝塘埂清水溝韓家莊四溢鵬翮疏入得諭今春朕諭張鵬翮大水時發難以逆料須晝夜防護今古溝等處隄岸衝決河工將有復壞之勢此事著九卿科道速議具

奏尋議鵬翮不預籌開壩之期力盡防險之法應革職帶罪督修諭令革職留任於是鵬翮督率河員盡力堵塞於九月次第竣工四十五年十一月疏言黃河萬里來源匯聚百川至清口與淮交會總因衆水歸併一河來源多而去路少一時宣洩不及所以兩年水漲隄工危險臣率河員往來勘議僉云去路一暢則來可容受惟有遵旨預開鮑家營引河俾黃河異漲藉此減洩黃河一帶工程可以保固洪澤湖異漲藉此暢流高家堰工程得平穩矣再於中河橫堤建草壩二於鮑家營開引河處建草壩一相機啟閉中河亦不虞淤塞矣下部議從之初鵬翮同江南江西總督阿山漕運總督桑額奏開溜淮套河屢請上親臨指示四十六年二月上閱視溜淮套問鵬翮曰爾何所見奏開溜淮套鵬翮奏曰先因降通判徐光啟呈開溜淮套圖樣臣與阿山桑額會同具奏恭請聖駕躬閱定奪上曰今日沿途閱視見所列標竿錯雜問爾全然不知河工係爾專責不留心可乎鵬翮不能對免冠叩首上因顧諸臣曰阿山等奏稱於溜淮套另開一河出張福口分淮水免洪澤湖之異漲保高家堰之危險繪圖進呈今朕從清口至曹家廟見地勢甚高不能直達清口與圖樣迥別且所立標竿多在墳墓之上依此開河不惟

壞民田廬甚至毀民墳塚張鵬翮以讀書人而爲此殘忍之事讀書何爲又諭鵬翮曰奏溜淮套開河非地方官希圖射利卽河工官員妄冀陞遷至河工效力人員無一方正者何故置留河工鵬翮奏曰臣誤聽小人罪實難辭逾數日上又嚴飭之下九卿科道議罪尋議鵬翮革職阿山革任桑額同安徽巡撫劉光美江蘇巡撫于準降五級調用上諭大學士曰聞驗視溜淮套之時張鵬翮桑額皆謂不可開阿山強謂可開公同奏請著將阿山革任張鵬翮去所加宮保桑額降五級劉光美于準各降三級俱從寬留任四十七年九月疏奏黃運湖河修防平穩得旨張鵬翮自任總河以來朕指示修築工程殫心盡力動用錢糧絕無糜費比年兩河安定隄岸無虞深爲可嘉所帶革職著與開復應追銀兩俱著豁免十月內遷刑部尙書四十八年二月調戶部尙書四十九年正月奉命往江南審布政司宜思恭兌收錢糧勒索火耗並收受屬員餽送得實擬絞巡撫于準並不糾劾擬革職從之五十年三月鵬翮以父逾八十請假省親得旨卿簡任司農清勤恪慎積弊削除部務關係緊要聞卿父精力尙健不必急請歸省五十一年十一月復命赴江南審賄中舉人程光奎吳泌時江蘇巡撫張伯行疏參總督噶禮通同舞

弊於科場索銀五十萬兩噶禮亦砌款劾伯行命鵬翮同總漕赫壽察審尋奏副  
考官趙晉與吳泌程光奎賄通關節屬實擬罪如律噶禮劾伯行不能清理案件  
是實餘屬苛劾應降一級留任伯行劾噶禮索銀全虛應革職贖徒上切責鵬翮  
等掩飾和解命尙書穆和倫張廷樞再往嚴審事詳伯行傳五十二年二月充順  
天鄉試正考官十月調吏部尙書先是張伯行疏劾布政使牟欽元匿通洋匪徒  
張令濤上革欽元職下總督赫壽察審赫壽奏令濤與海賊合夥無證據欽元署  
中亦無令濤五十二年十月上命鵬翮及副都御史阿錫鼐至江南審理鵬翮等  
以伯行誣參具奏上責鵬翮等不能盡心審明原委令再詳審五十四年五月鵬  
翮等參伯行巧飾奸欺得旨張伯行著革職看守審理七月奏伯行自認誣參應  
復欽元職從之又奏伯行誣陷良民妄生異議應斬上命伯行免罪來京詳伯行  
傳十一月丁父憂時尙書富寧安剿策妄阿喇布坦諭鵬翮暫留辦部務俟富寧  
安回京再回籍守制五十七年充會試正考官六十年復充會試正考官會汶水  
旱涸運道梗塞奉旨往勘疏言臣會同河道總督趙世顯巡撫李樹德查勘戴村  
壩遏汶水出南旺南北分流濟運舊設玲瓏亂石滾水三壩年久汕刷應補葺以

資捍禦再山東運道全賴汶泗二水上流泉源接濟今天旱泉微蜀山馬蹋南旺諸水無多臣等遵旨將坎河雞爪等泉疏濬并嚴禁民間偷截灌田補築諸湖子隄禁侵種蓄湖水毋致乾涸至南旺分水口係南北分流水爲濟運道要區臣等遵旨妥辦淺於南則閉北閘使分北之水歸於南淺於北則閉南閘使分南之水歸於北留主事富明德御史梅琮駐分水龍王廟以時啟閉再於彭水南岸建挑水壩一北岸截去沙嘴挑盡淤沙使水挾沙暢流直入微山湖則蓄淺有資運道自無阻滯再查邳州邱家樓一帶低窪之水並無積滯太行隄縣延數百里其曹單豐沛等縣埽場處交河道總督及直隸河南巡撫修築下部知之九月直隸總督趙宏燮奏河南武陟縣黃沁衝決隄岸水溢至長垣等處山東巡撫李樹德奏河水泛溢自直隸開州流入山東張秋等處由鹽河入海致運河隄決漕船阻滯命鵬翮同總漕施世綸查勘十二月鵬翮等疏言臣等由山東張秋循流而上查黃河決口在武陟縣之釘船幫支河口衝入詹家店之魏家莊及馬營口今副都御史牛鈕河南巡撫楊宗義於支河口築攔水壩魏家莊已經堵塞馬營口水已消落指日成功其引沁入運之處臣相度地勢西北高而東南下若引水直下恐

牽動全沁灌入隄內而黃河直躡其後反覺無益山東運道在張秋則有沙河等水分水龍王廟則有南旺等湖濟寧則有馬場等湖又有諸山泉本可濟運祇因湖隄殘缺民間竊種湖旁之地未得瀦水而諸泉壅塞又未疏通以致漕船時患淺澀臣等已交李樹德築隄蓄水疏濬泉流運道自可通利得旨回奏甚屬明晰卽令照依所奏不得稍有更改六十一年十二月加太子太傅雍正元年二月授武英殿大學士賜御書嘉謨偉量匾額六月河南黃沁漫溢決馬營口奉命查築三年二月進明臣鄧鐘所著籌海重編未幾卒遺疏入得旨張鵬翮秉性孤介持躬廉潔前任總河懋著勤勞入領銓曹恪謹供職因效力有年簡任機務近值請假養疾遣醫診視必整肅衣冠極其恭敬忽聞溘逝朕心深爲軫悼著加少保於卹典定例外再加祭一次諭致祭日命大小漢堂官給事中御史齊集賜全葬諡文端八年詔祀賢良祠

### 蔣廷錫

蔣廷錫江南常熟人初由舉人供奉內廷康熙四十二年三月詔以舉人汪灝何焯與廷錫皆學問優長會試下第令一體殿試賜進士改庶吉士明年未散館卽

授編修歷左右春坊贊善遷侍講侍讀庶子少詹事五十六年五月擢內閣學士六十年十二月充經筵講官雍正元年三月遷禮部右侍郎仍兼學士賜詩有在公勤夙夜懋績有賢聲之句十二月疏言國家振興文教廣饗序以居業設廩膳以給養沿習既久視爲具文生員經年未嘗一至學宮平居無親師博習之教則放蕩習成匪僻行作請敕學臣通飭府州縣衛教官凡所管生員務立程課令其時至學宮面加考校相與講究經史以檢束身心勉修學行學臣於歲科考時卽以一學文章優劣定此學教職賢否則教者勉爲嚴師學者亦奮興矣又會典載順治九年定鄉設社學之制以冒濫停止請敕督撫令所屬州縣凡大鄉堡立社學擇生員學優行端者充社師量給廩餼鄉民子弟年十二以上二十以下有志學爲文者聽入則黨庠術序之法大備事下部議從之二年五月奏請續纂大清會典卽命爲副總裁六月調戶部右侍郎三年三月轉左命與內務府總管來保察閱京倉覆奏開溝墊土添橋架木各事宜詔以鋪灰避溼恐米不可食墊於磚下爲宜餘悉如議七月疏言漕運全資水利宜通源節流以濟運道一日濬泉源山東漕河資汶濟洸泗之水而四水源皆微細全賴泉源助成巨流計一省之泉

百有八千其派有五分水天井魯橋新河沂水是也其委同出一道謂之泉河河口舊設管泉分司今雖裁汰仍設泉夫請飭有泉州縣督率疏濬盜遏者禁又濟兗二府爲濟水伏流之地若廣爲濬導則散漚砂礫間者隨地湧見應立法勸泉夫濬出新泉優賚銀米歲終冊報卽爲州縣課最一日開湖地山東諸泉所匯爲湖十五各建長礎設斗門爲減水閘以時啟閉漕溢則減漕以入湖湖涸則啟湖以濟漕故諸湖名曰水櫃其後居民壅水占種斗門閘壩遂漸坍塌塞低窪多生芟草積沙處高與漕河隄等蓄洩無所請察勘未耕之地就低處悉行挑深以復水櫃之法卽挑出之土築隄以束水櫃每湖開支河以承諸泉之入益漕水之流復建閘以時減放庶幾蓄洩得宜一日嚴築壩開壩日期按漕政考山東運河每歲十月初築壩通流分洩諸湖候來春二月冰泮開壩受水法至善也但法久玩生築壩每在十一月中未免過遲正月初旬開壩未免太早請飭所司築必十月望前庶河水未合便於施工開必二月朔後庶河水充盈漕運商船皆利一日修築坎河灘壩山東運河惟賴汶水一派分流南北濟運明宣德時築戴村壩於汶水南以遏汶水入泲建坎河石壩於汶水北以節汶水歸海嘉靖時總河侍郎萬恭



復堆積石灘水溢則縱之歸海水平則留之入湖嗣雖歲有修築但恐時久頽廢萬一汶水北注挾湖泉盡歸大清河則四百餘里之運道所關非小請敕總河及巡撫相度形勢修復舊石灘改建滾水石壩以爲蓄洩上命內閣學士何國宗等攜儀器輿圖同總河齊蘇勒巡撫陳世倌履勘應如廷錫奏下九卿議行四年二月遷戶部尙書八月充順天鄉試正考官既入闈諭廷臣曰數年來蔣廷錫協同怡親王允祥辦理戶部事務秉公執正釐剔諸弊甚屬盡心而胥吏宵小徇私作弊之人未必無嫉妬懷怨者今蔣廷錫入闈典試或乘此造作浮言妄加謗議亦未可定場屋關係大典若闈中閱卷果有不公許應試舉子赴都察院控告奏聞若有不軌之徒假捏污蔑之詞以洩私忿而撓公事則國法斷難寬宥著步軍統領及順天府尹五城御史察訪查拏參奏從重治罪十月命兼管兵部尙書十二月丁母憂諭內閣曰蔣廷錫在內廷侍從二十餘年恪慎勤勞朕御極以來凡交與部院事務皆實心辦理明晰妥協簡任農曹尤爲稱職且素性篤於孝道其母身享高年蔣廷錫朝夕承歡奉養惟謹朕優眷大臣推恩及於其母時加存問賜賚載頒今聞其母奄逝深爲軫惻特遣大臣前往賜奠茶酒加恩諭祭一次照生

前例給予一品太夫人封誥並賜銀一千兩爲殯殮之資以示教孝勸忠至意命廷錫在任守制給假數月奉母櫬回籍喪葬事畢來京六年三月授文華殿大學士仍兼理戶部六月充纂修聖祖仁皇帝實錄總裁七年七月賜第及鈞衡碩輔額十月加太子太傅八年二月充會試正考官八月命同果親王允禮總理三庫事務十月諭嘉廷錫與大學士馬爾賽張廷玉等贊襄忠勤賜一等輕車都尉世職十年閏五月卒於官年六十有四遺疏入諭部曰大學士蔣廷錫受聖祖仁皇帝知遇之恩直內廷二十餘載自朕卽位由學士陞授侍郎旋擢尙書簡命爲大學士才識優長經猷明練其總領度支則謹慎出納釐剔弊端於國計民生均有裨益其參贊機務則恪謹小心周詳縝密綸扉重地倚賴方殷上年忽患痰症特遣良醫調理漸次獲痊今夏舊恙復發每日兩次以疾狀奏聞方期夙疾有瘳豈料溘焉長逝朕心傷悼輟朝一日其所用棺殮之屬俱領自內府已命內大臣率領侍衛賜奠茶酒其應得卹典察例具奏賜祭葬加祭一壇諡曰文肅乾隆元年十二月入祀鄉賢子溥官至大學士自有傳

顧八代

顧八代滿洲鑲黃旗人姓伊爾根覺羅氏父顧納禪太宗文皇帝天聰九年由閒散隨征明大同攻小石城先登賜號巴圖魯予騎都尉世職尋任參領世祖章皇帝遣師入山海關及平定陝西湖南江南浙江顧納禪皆在事有功晉職三等輕車都尉世襲罔替卒子顧蘇襲遇恩詔晉二等輕車都尉尋卒子佛岳襲顧八代爲顧納禪次子順治十六年以廕生充護軍隨征雲南得功牌二凱旋授戶部筆帖式尋因佛岳卒無子襲二等輕車都尉世職擢任吏部文選司郎中康熙十四年聖祖仁皇帝御試旗員列第一改翰林院侍讀學士會逆藩吳三桂踞湖南遣賊將掠廣東廣西鎮南將軍莽依圖由江西進定廣東駐韶州十六年六月上命顧八代傳諭莽依圖規復廣西並授方略卽留營隨征顧八代既至莽依圖進駐梧州屢擊敗賊將吳世琮等十八年京察掌院學士拉薩哩葉方藹以顧八代隨征以來能稱厥職以政勤才長注考大學士索額圖改注浮躁傳旨下部察議吏部言浮躁例應降調顧八代有世職令隨旗行走尋莽依圖疏言顧八代襄辦軍務竭誠奮勉三載以來運籌決勝動合機宜請留軍前委署副都統參贊軍務得旨仍以原銜隨征十九年廣西定莽依圖卒於軍顧八代隨平南大將軍賚塔進

征二十年師至雲南顧八代同參贊大臣穆占等與勇略將軍趙良棟定攻取策  
賚塔從之遂殄滅逆孽吳世璠平雲南凱旋補侍講學士二十三年八月直尙書  
房二十四年擢內閣學士充平定三逆方略副總裁官二十五年充經筵講官明  
年授禮部侍郎二十八年擢本部尙書三十二年九月奉旨顧八代因在內廷供  
奉有年屢加擢用洊至尙書今觀其人不宜部院著革任以世職隨旗行走仍直  
內廷三十七年因病乞休四十七年十二月卒世宗憲皇帝雍正四年諭曰原任  
禮部尙書顧八代品行端方學術醇正昔蒙皇考簡用服官有年當征剿吳逆時  
以學士協贊軍務從將軍莽依圖賚塔等克復粵西滇南勞績茂著備承恩眷且  
深知品學優長足爲模範特命爲朕兄弟之師朕自幼與共朝夕講論忠孝大義  
研究經書至理肫誠周至獲益良多嗣以公事註誤罷職仍在內廷課讀數載抱  
疾閒居戊子冬物故朕親臨其喪並遣人爲之經理殯葬本欲陳情於皇考之前  
求加恩賜卹值聖體違和不敢瀆奏迄今回憶當年誦讀情景宛然如昨老成舊  
學時眷於懷應優加贈卹以展朕篤念師資酬獎前勞之意尋允部議復禮部尙  
書銜加贈太傅予祭葬如典禮諡文端立碑墓道上復念其子孫甚貧恩賞銀一

萬兩八年七月命建賢良祠於京師特諭應入祀者滿洲大臣五人大學士圖海都統賚塔次卽顧八代及尙書瑪爾漢總河齊蘇勒先是顧八代乞休後子顧儼襲因銷恩詔所加之職改三等輕車都尉雍正三年由參領擢任鑲黃旗漢軍副都統顧儼之子顧琮別有傳

徐潮

徐潮浙江錢塘人聖祖仁皇帝康熙十二年進士由庶吉士授檢討二十三年遷贊善充江南鄉試正考官洊陟諭德庶子少詹事通政使三十一年二月授左副都御史十月擢工部右侍郎三十三年充會試副考官三十四年五月丁母憂三十七年三月起授刑部右侍郎三十八年五月轉左三十九年九月授河南巡撫上諭之曰聞河南火耗甚重州縣虧空亦多爾當嚴行禁止並加意籌畫潮奏臣亦聞豫省有幾州縣火耗最重此外且有私派臣當嚴行禁革至州縣虧空臣惟潔己率屬寬養其力使之逐漸自補再不改悔定行劾治四十年春上巡幸畿甸諭巡撫李光地曰直隸與河南山東鄰省有文件往來之事其巡撫賢否爾必能知之光地以徐潮居官甚優奏翌日諭廷臣曰近日督撫李光地張鵬翮彭鵬郭

琇最優徐潮在河南聲名亦好四十一年四月刑部議偏沅巡撫金璽審訊寧遠縣盜犯關翰芳等四十餘名應如原擬定罪上曰此案人命衆多前有令他省巡撫鞠審之例寧遠縣與河南相去不遠徐潮馳驛赴彼詳審六月奏盜首關四係廣東人與老鴉山等處瑤人情熟藉齎盜糧糾夥行劫至二百餘人不無迫脅入夥現今審明關翰芳馬隆二犯下手勒死寧遠縣民李如珍應照原擬立斬梟示其餘應並監候俟緝獲盜首關四質認明確後處決既而偏沅巡撫趙申喬奏關四遁入八排瑤徧緝無踪現在監候之三十五犯請照原議處決得旨俱免死發遣黑龍江先是五經博士程延祀請給二程子祭田部議未准行上諭潮曰程子宋之大儒祀典不可有缺但恐其子孫不肖祭田或變鬻應如何給與銀兩俾程氏子孫永遠奉祀潮奏程顥程頤共祀一祠每年於春秋文廟附祭外應別給其後嗣銀四十兩俾展時祀以仰副皇上隆禮先儒之至意從之是年勘奏歸德府屬之永城虞城夏邑三縣被災地畝一萬七千六百五十三頃有奇得旨蠲賑有差又疏言三縣外有地勢略低雖不成災而收成歉薄者至東作將興青黃不接之時民生未免拮据請以常平義社等倉現儲穀石暫減時價平糶其無力糶買

者亦照舊例借給俾得餬口並資牛種之需又言豫省於五六月間雨水過多秋禾傷損米價騰貴請改應運漕糧二十五萬石有奇爲折色庶民間米價不至日長均得旨俞允四十二年二月上南巡潮迎駕泰安賜御書懷矢清風匾額督撫箴一幅及冠服三月疏言考城柘城温登封四縣向因兵燹之餘應試寥寥定爲小學考取童生八名今戶口額賦已倍於前人才漸盛請改爲中學考取童生十二名事下部議行十二月上西巡回鑿潮迎駕衛輝御書嵩高鎮司屏翰河洛波沛德音對聯過孟津詩條幅以賜四十三年正月上以汾河渭河皆與黃河相通欲於河南貯積米穀遇山陝歲歉運往賑濟恐經三門砥柱之險水溜船不能上命潮同川陝山西督撫勘議潮旣與總督博霽等會勘三門砥柱合疏以奏又疏言豫省汴河通淮故道有二一由中牟縣東經祥符等縣歷宿遷而達於淮久已淤塞一由中牟縣東南經尉氏等縣歷太和而達於淮亦因昔時淤墊經元臣賈魯修濬今名賈魯河現在通流但不深廣應於窄淺之處量加挑濬在賈魯河外尙有支河與黃河止隔一隄地名花園在鄭州之北曾經運送柳束暫掘護隄放船入黃今支河久涸舊跡尙存若設法開濬建閘設壩以時啟閉而通舟楫誠商

賈人民之大便得旨如所請行是年御史李發甲奏山東荒歉飢民有就食湖廣河南直隸等省者請諭各督撫令地方官安置得所上允所請令各省遵辦潮奏豫省之開封河南汝寧等府所屬二十八州縣有山左災民男婦老幼一千五百八十餘人令各州縣給糧贍養又恐地方官力有不繼倡捐穀石在省會四門按日給散以資饘粥秋成時並令按住址給與路費關送原籍疏入報聞四十三年十月內陞戶部尙書先是上擢直隸巡撫李光地爲吏部尙書時諭廷臣曰徐潮李光地原係內任歷年亦久早應擢用因地方起見暫留外任伊等居官誠優得大臣體至是諭曰徐潮爲巡撫甚好平易得體民無不稱頌之者尋充經筵講官四十四年上南巡潮扈從命同兩江總督阿山審淮安革職同知佟世祿控訴總河張鵬翮誣坐告冒帑誤工罰賠銀七萬九千餘兩並令淮揚道王謙枉斷擬杖事潮覆奏佟世祿未曾冒帑誤工不應賠補應復原職張鵬翮偏執苛刻刪供枉斷應革職留任王謙附會欺隱應革職杖徒從之四十五年四月兼翰林院掌院學士五月教習庶吉士是年奉命兼理高家堰滾水壩高郵車邏中壩及文華寺澗河等工分派各官挑河十萬四千九百八十餘丈築隄長四萬一千五百四十



餘丈四十六年命賚帑監修武家壩天然壩蔣家壩及挑河建閘築隄諸工先後報竣四十七年四月調吏部尙書仍兼翰林院掌院學士四十九年二月乞休命以原官致仕五十二年三月赴京得旨徐潮以慶祝遠來京師照伊原品與現任官一體給與廕生五十四年正月在籍病卒年六十有九遺疏至得旨徐潮服官年久懋著勤勞忽聞溘逝朕心深爲軫惻賜祭葬如例世宗憲皇帝雍正十年入祀賢良祠今上乾隆九年賜諡文敬子本官至大學士別有傳

郭世隆

郭世隆漢軍鑲紅旗人父洪臣原籍汾州世祖章皇帝順治二年英親王阿濟格統師至九江收降明故將左良玉之子夢庚及部衆來京入旗洪臣預焉分轄降衆爲佐領聖祖仁皇帝康熙四年世隆襲管佐領八年授禮部員外郎二十五年擢監察御史二十七年命赴盛京察審福陵守兵赴訴其兄冤死事得誣良刑逼自縊狀原審侍郎阿禮瑚及司員俱坐失實褫革世隆還京疏言盛京刑部凡已經告發事件執法結斷者甚少夤緣和息者居多以故曲直莫分刁誣愈熾近者旗人宜爾根控訴命案先經私和後復涉訟仍不審結乞敕嚴察此案私和之兩

造及聽許之部員究實情而肅法紀又疏言盛京鳳凰城及山海關各設有迎送朝鮮之貢使五品官數員每逢貢使至以一員送迎此外別無職守且既有通事官從鳳凰城隨行至京沿途撥兵護送料理食物夫役車輛迎送官實屬贅設應行裁汰又疏言設官久任以其能熟習民風土俗而去弊興利也若不肖之徒往往以久任滋弊如盜採人濫律有重典惟不肖官弁與奸民熟習互相容隱故弊竇彌多每年報部採濫之數不及千斤而京師及各省貨賣者不啻百倍皆由開原邊口縱奸民盜採山海關又縱其私販宜分別故縱失察嚴定處分其守口官員與山海關城官尉應每年更換以清弊源疏並下部議行又詔山海關官兵停止盛京將軍管轄降調現任城守尉照張家口例兵部選員更換十月擢內閣學士是月上謁孝陵過通州有山西禮縣民訴知縣萬世緯知府紀元婪取狀命世隆往會督撫察審鞫實萬世緯貪婪科派杖斃縣民論斬紀元受賄舉薦卓異論絞二十九年四月充國史副總裁七月直隸巡撫于成龍內陞左都御史以世隆代之先是戶部奏鑲紅旗罷任安溪知縣孫鏞首福建巡撫張仲舉布政使張永茂催徵恩免錢糧侵隱入己上遣郎中吳爾泰等往會總督興永朝勘訊既而上

聞吳爾泰甫至卽拘訊知府六人牽連州縣官數十人乃命世隆往世隆至則研訊司府州縣胥役數人得張仲舉與布政使張汧索取州縣賦冊竄改撤銷賚解批迴重造司冊侵隱已徵地丁額銀作民欠蠲免狀又張汧陞湖廣巡撫虧帑三十餘萬因仲舉前任湖廣布政使亦虧帑相約互抵仲舉抑勒道府捏具借帑印領結按察使田慶曾令出結署事及張永茂受代仲舉聞張汧在湖廣贓私敗露聞帑尙未補完復截留府州縣額支官俸役食令慶曾給永茂又令永茂加取各屬賚解銀火耗代爲彌補諸左證悉合遂先釋前此吳爾泰拘訊牽連之府州縣官回任窮詰仲舉永茂慶曾各語塞並孫鏞控列雜贓亦輸實仲舉侵挪二十六萬三千餘兩擬斬永茂科斂一萬七千餘兩擬絞慶曾受賄二千二百兩擬徒各追贓入官被勒之屬員及改造冊檔書吏概免罪疏入上切責吳爾泰謬妄革去郎中發黑龍江效力世隆疏下法司如擬行九月世隆將至巡撫任諭曰凡接任好官者難于成龍居官甚好繼之不易爾係有才之人當勤謹任事三十年二月疏言直隸守巡二道分管通省錢糧刑名與各省布按二司無異應改部選爲請旨簡授上是其言下部從之是年順天保定真定永平諸府屬夏旱秋歉詔世隆

履勘撫綏世隆察奏七十四州縣本年及來年額賦分別蠲緩其受災較重之霸州文安大城永清真定井陘獲鹿元氏贊皇高邑臨城行唐靈壽寧晉十四州縣發賑四月又遵諭詳籌積貯之務疏言荒歉之歲以每州縣饑民萬口爲率大口四合小口二合按名賑給有五六千石之糧可供半年之食今直隸捐納穀米一百三十萬石有奇應均撥收貯州縣大者存五千石中者存四千石小者存三千石庶可隨時變通賑濟荒歉常平倉米今歲平糶六十三萬二千石有奇例應歲內買補恐米價因之益昂應展限來歲五月其原糶之州縣官雖有陞遷事故亦令本員買還以撥應貯之州縣收倉庶杜推諉疏下部議從之三十一年二月疏言奉天所屬州縣連年大有米穀贏餘請敕山海關但禁大車裝載暫聽旗人民人肩挑駝負進關轉糶則永平等處米價可以漸平疏下部議自三月至八月如所請行十一月疏言宣府向設鎮道及十衛六廳與各營分理錢糧驛務廳員限於佐領營衛皆屬武弁政多扞格宜裁六廳十衛改設一府八縣上是其言下九卿詳議九卿議令世隆分晰定擬尋奏改宣武衛爲宣化府附郭前衛爲宣化縣萬全右衛爲萬全縣懷安衛爲懷安縣蔚州衛爲蔚縣龍門衛爲龍門縣懷來衛

爲懷來縣赤城堡爲赤城縣順聖川西城爲西寧縣三十二年四月以真定路當孔道地方遼闊自裁去總兵後分防弁兵甚少奏移紫荆關副將駐真定酌調各營馬步兵二千添設守備千總把總等官分撥汛防以龍泉關參將移駐紫荆關以真定營遊擊移駐龍泉關三十三年四月以霸州等處因子牙河隄決田畝被淹已遵旨賑濟平糶其大城縣趙扶村之南隄青縣之楊村隄至東子牙隄雄縣蒲淀五百淀之東隄請卽修築又黑龍港河及王家口久經淤塞請開濬深通疏入得旨俞允三十四年二月擢閩浙總督三十五年五月疏言閩省兵餉歲需銀一百三十萬兩有奇本省額徵僅一百萬兩有奇向皆撥用雜稅及浙江協餉今兩澤愆期民間荒歉難以催徵請撥鄰省帑銀三十萬兩以爲協餉俟民力少舒徵補存貯以備不時之需三十六年七月疏言部臣以浙海關監督李燮請移寧波城外之關於鎮海縣增設紅毛館使洋船貿易令臣會議竊謂鎮海縣距寧波府城僅六十餘里洋船旣至鎮海卽可直抵府城移關設館於商民無所利益仍舊爲便三十七年四月疏言泉州府向徵落地鹽稅銀一千五百九十兩有奇所屬七縣派引行鹽徵課五千五百八十兩有奇若依巡鹽御史鍾甲保奏改落地

稅爲派引徵課又加引七縣行鹽恐將來新引壅滯鹽價日昂有累民戶請仍循定例疏並下部議從之四十一年十月調兩廣總督四十二年七月疏言粵東至南澳起經碣石鎮至虎門協海面二十餘里守汛遼闊請增設兵船於遙對南澳之澄海協以資巡防海門一所最爲緊要應移達濠營遊擊守備千總把總駐劄改爲海門營以海門所守備移爲達濠營守備甲子一所乃險要海口從前止設千總一員應以鎮左營移駐與碣石鎮聯絡防守吳川營隔海百餘里有碣洲一島宜以龍門協所屬之乾體營兵令白鵠寨守備千總把總統之駐劄碣洲改爲碣洲營白鵠寨卽以千總管領至平海大鵬二所逼近巨海應專設二營其順德一鎮外有香山鹿門二協內有省會駐防兵可裁去總兵官止留遊擊爲順德營改鎮標左營爲平海營右營爲大鵬營下部議如所請四十三年四月疏言前奏添造戰船俱經報竣設立船兵自南澳至龍門令守備千總把總逐日帶領巡哨副將參將遊擊每月會巡一次水師總兵春秋二季駕船二十分巡外洋至瓊州上年十一月至今年二月先後擊敗賊衆於沱寧外洋沈賊船六斗頭角海面沈賊船一瓊南萬崖二處海面沉賊船二四十五年五月疏報海洋巨盜蔡玉也等

聚衆劫掠商船今已擒獲分別定擬斬流得旨遣刑部侍郎常綬往勘覆奏蔡玉也等五人應立斬部議世隆平時禁賊不嚴及事發又朦朧掩飾應革職於是罷任四十六年六月起授湖廣總督四十七年十二月條奏防守紅苗三款一沿邊安設塘汛已經周密惟盛華哨起至鎮溪所一帶山高箐密難於瞭望應酌撥鎮筭兵八百名另設四營分駐每日派官一員帶兵五十名遊巡一舊日苗來內地民往苗叢每滋事端今以塘汛爲界址苗除納糧買賣外不得擅入塘汛之內民亦不得擅出塘汛之外違者治罪一內地奸民與苗人結親至勾通爲惡不可究詰嗣後如有前弊應斷離異下部議從之四十九年六月疏劾祭告南嶽之翰林院侍讀學士陳壯履繞道嘉魚滋擾驛站得旨降陳壯履爲編修十月世隆內遷刑部尙書五十年十月以山西太原流匪陳四等六十餘人攜婦女數十乘馬騾由湖北往湖南貴州詭稱赴雲南開墾索取州縣口糧劫掠商賈財物世隆前任總督不卽察究縱容滋蔓革職罷任五十二年三月遇萬壽慶典復原品五十五年九月卒年七十有二後祀直隸福建浙江廣東廣西湖廣等省名宦

貝和諾子馬喇

貝和諾滿洲正黃旗人姓富察氏尙書濟席哈之孫也聖祖仁皇帝康熙二十七年由工部筆帖式授戶部主事洊遷兵部員外郎戶部郎中兼佐領二十四年十一月遷兵部督捕右理事官尋遷大理寺卿三十五年二月奉命往山東經理開河五月總漕桑額奏漕船盡過濟寧較上年早月餘皆仰賴睿慮周詳豫遣卿臣貝和諾封閘蓄水啟閉以時六月貝和諾還奏漕船陸續抵通上曰遣官有益漕運自後可仿行之七月遷都察院左副都御史三十六年正月擢戶部侍郎十一月禮部奏朝鮮國王李焯以旱潦頻仍廩庾空乏八路流離請開市義州中江貿易得旨覽奏朝鮮乞糴朕心深爲憫惻可賞給米一萬石令侍郎陶岱督運前往再運二萬石令侍郎貝和諾往中江監視貿易三十七年五月事竣李焯表謝八路生靈賴得全活二月貝和諾授陝西巡撫三十八年六月疏言陝省兵民被恩撫卹無微不至准開事例原期積貯充實緩急足恃臣抵任後計原報捐納米麥撥支兵糧等項應存一百七十七萬八千九百一十九石今省倉及各州縣實存十七萬一千二百石有奇虧缺一百六十萬七千六百八十六石不敢不據實陳明上命尙書傅拉塔張鵬翮往同貝和諾察核三十九年正月覆奏原捐米麥分



貯長安永壽華陰等縣因防霉爛出糶三十八萬二千八百九十餘石現今糶補足數此外俱係報捐之官生掛欠今亦陸續完納尙少一百九萬九千八百餘石應開造報捐官生姓名及掛欠實數達部俟完納後方准陞遷考試仍勒限嚴催倘逾限不完並議處經手各官事下部議從之三月疏言漢興道所轄界連楚蜀幅員遼闊最爲緊要請以議裁之神木道李杰就近調補疏入諭部臣曰神木地方朕前統領大兵經過見田畝瘠薄人民稀少最爲寒苦逼近蒙古實屬要地前員和諾奏裁神木道今又以現任道員李杰題補漢興道是爲李杰規避寒苦希調善地其嚴加議處部議降三級調用得旨從寬留任五月調四川巡撫十一月命督理進剿鑪蠻糧餉四十一年四月疏言打箭鑪駐劄官兵需用糧餉宜豫爲接濟請撥隣省銀十萬兩來省應期給發扣捐本省知縣以上各官俸銀補項下部議如所請上曰四川極邊之地官員度日維艱免其扣捐俸銀補項六月疏言打箭鑪木鴉等處番民一萬九千餘戶歸順應添設安撫使五員副使五員土百戶四十五員以專管轄又疏言邊末借茶資生向來邊民造辦賞番茶包之外聽其將所餘運鑪貿易恐有營官阻撓請給天全土司官引四千道副土司官引

一千六百道定額徵課閏六月疏言各省重犯招冊久經達部其秋審時令造全招又摘造略節事屬煩複請嗣後秋審以原供及督撫看語敘入冊內停止煩複造送十一月疏言化林松潘均屬邊地素不產米向來化林設兵尙少故照建昌各營例折給今兵衆餉多米價騰貴請照松潘之例增價給發四十二年正月疏言各省教職每學二員獨川省有五十七學各設一員請於威茂等州敘州府會川等衛添設訓導一溫江等縣添設教諭一九姓司學添設教授一三月疏言前撫臣于養志題明松潘小河疊溪三處收捐米穀分貯備用自三十八年迄今松潘捐一千七百餘石其小河疊溪以道路險峻輸運維艱罕赴捐納請停止收貯例四十三年正月疏言川省行鹽潼川中江山路崎嶇艱於陸運額引壅滯難消惟冰江小溪水運可通請增給水引商民交便諸疏並下部議行二月內遷兵部侍郎四十四年五月擢雲貴總督四十五年六月疏言新陞廣東布政使之雲南按察使劉蔭樞老成練達清廉愛民今現署雲南布政使請卽以留補得旨如所請九月擒獲逆匪李天極王枝葉等於富民縣之響哨山李天極者昆明人冒入廣通縣學與臨安府生員朱六非造爲符讖以誦宗州生員之子魏枝葉流蕩不

歸誘之詭託明桂王之孫陽以王姓相呼遇開化府賣藥人楊春榮蒙自縣談相人張平山富民縣演伎人楊起鳳同謀不軌僞稱文興三年以鉛摹桂王之寶及諸僞印散播總制大將軍副總兵都督僉事等僞劄願入黨者改裝蓬頭僧或長髮道士潛期先掠廣南次掠開化由蒙自刼省城爲督標弁兵首報先後擒獲李天極王枝葉楊春榮楊起鳳張平山朱六非請旨立斬餘黨流徙數人首報者獎賞如例四十六年十月疏陳金銀銅錫等礦廠歲徵實數戶部以未較舊額加增議駁上曰雲南礦稅一年徵銀八萬兩零用撥兵餉數亦不少若又令加增有不致累民乎著照原題議給四十九年九月內遷禮部尙書五十年十月以山西太原流匪陳四等六十餘人詭稱赴雲南開墾攜婦女乘馬騾由陝西湖廣至貴陽貝和諾前任總督得布政使張建績牒報不卽察究僅令咨回原籍降一級調用詔依議十一月授盛京工部侍郎五十七年十月復禮部尙書五十九年正月以年老乞休得旨慰留六十年二月卒於官年七十有五子馬喇初襲管佐領兼護軍參領世宗憲皇帝雍正元年三月擢鑲藍旗蒙古副都統十一月調本旗滿洲副都統二年二月授刑部侍郎仍署副都統十月以審事濫施刑訊不得實情與

尙書阿爾松阿侍郎馬爾齊哈並解任三年正月授正紅旗滿洲副都統五年正月奉使西藏副都統宗室鄂齊奏西藏阿爾布巴隆布鼐扎爾鼐互相濟惡達賴喇嘛尙幼恐爲唆使與貝子康濟鼐不睦致生競端上賜馬喇與內閣學士僧格各銀千兩往駐西藏旣而阿爾布巴戕害康濟鼐後藏額羅鼐爲報讐馬喇同僧格守護達賴喇嘛於布達拉六年五月頗羅鼐率後藏兵九千至前藏告知馬喇僧格令各廟寺喇嘛執阿爾布巴隆布鼐扎爾鼐拘禁待奉使西藏之尙書查郎阿等至承制傳集衆喇嘛及番人詰訊阿爾布巴等罪狀磔阿爾布巴隆布鼐斬扎爾鼐及阿爾布巴三子隆布鼐一子發遣扎爾鼐二子及妻女給兵丁爲奴頗羅鼐還後藏詔頗羅鼐總管前後藏移達賴喇嘛至裏塘七年二月調馬喇鑲藍旗滿洲副都統留駐裏塘照看達賴喇嘛六月詔賞銀二千兩往西藏總理事務八年十一月擢護軍統領九年二月以在藏年久詔賞銀一千兩酌帶防衛兵丁回京十二月擢工部尙書十年二月署正紅旗滿洲都統七月以不諳部務罷任十一年正月諭廷臣曰馬喇前曾在藏辦事熟諳彼處情形著以副都統銜前往西藏協同都統青保等辦事十三年八月卒於藏年六十有三

博霽

博霽滿洲鑲白旗人姓巴雅拉氏康熙十九年由護衛授鑾儀使二十二年擢鑲白旗漢軍都統二十三年八月遷鑲白旗蒙古都統九月調鑲白旗滿洲都統二十四年授江寧將軍三十一年調西安將軍二十五年二月撫遠大將軍費揚古奉命由西路剿噶爾丹上命博霽統滿洲兵自寧夏往會費揚古軍五月大敗噶爾丹於昭莫多敍功授雲騎尉世職准襲一次十一月上以噶爾丹窘迫必走哈密命博霽擇西安兵未出征人材強壯者與將軍孫思克同偵禦三十九年七月上諭大學士等曰聞博霽自江寧赴西安時軍民哭送直至浦口彼若不善何能如此誠可謂將軍矣四十二年聖駕西巡閱西安官兵上以博霽訓練有方賜御用褭韉及弓矢諭曰朕巡幸江南浙江盛京烏喇等處未有能及爾西安兵丁者爾處官兵俱嫻禮節重和睦尙廉恥且人材壯健騎射精練深可嘉尙慎勿令其變染惡習四十三年正月授四川陝西總督先是上西巡時以河南府居各省之中水路四達應截留豫省漕糧儲其地間遇山陝歉收即可由黃河輓運恐經三門砥柱舟不能逆上至是命博霽偕陝西巡撫鄂海河南巡撫徐潮山西巡撫噶

禮會勘三門砥柱四月合疏言臣等會勘三門中流爲神門水勢甚溜南爲鬼門更洶湧北爲人門勢稍緩三門之下爲砥柱再下二里臥虎灘臣等用船載糧三十石從臥龍灘輓上人門溜急灘多行舟艱難不如陸運便豫省漕糧截留於河南備貯陸運至陝州西門外西太陽渡上船計三百餘里費較河路減下九卿議如所請四十五年疏言去歲秋時奉諭旨念民間所用升斗大小不同令部臣較鑄平準頒行臣已照式鑄造轉發各屬但陝甘收糧舊用永豐倉斗駐防兵糧亦以此支放相沿已久今以部頒新斗較量一石計短少三斗如以新斗收受卽以新斗放給則十分之中已減三分兵馬糧料不無艱窘況陝甘兵馬較他省最多倘有行走全賴土飽馬騰查收受民糧時尙有多收耗糧一項未革請將此項耗糧永行禁革百姓交糧令照舊斗之數以新斗交收支給兵糧亦照舊斗之數以新斗量給則耗糧革絕民已樂輸恐後而陝甘滿漢十餘萬兵丁俱仰沐格外之恩矣下部議如所請其永豐倉斗永行停止四十七年閏三月卒遺疏入諭曰博霽久任將軍簡授總督效力有年巖疆重寄正資料理忽聞溘逝朕心深爲軫惻應得卹典察例具奏尋賜祭葬如例嗣子寶山襲雲騎尉世職寶山卒停襲

范承勳

范承勳漢軍鑲黃旗人大學士文程第三子福建總督承謨弟由廕生入國子監讀書康熙三年授工部員外郎七年遷刑部郎中十二月充大清會典纂修官十六年授江南道監察御史巡視西城疏請勒監生生員南籍冒北者歸籍從之十八年協理河南道事疏言定例降調官果清廉許督撫題留懲勸兼用革職與降調同一註誤而去留不同請嗣後革職官果清廉愛民者許一例題留督撫濫舉嚴定處分又言八法以貪爲首貪吏僅罹薄譴何憚不爲請嚴飭承審官執法訊追按律究擬毋循庇塞責俱下部議行十九年閏八月奉旨甄別滿洲漢軍科道不稱職者對品調用承勳議留特旨著去任改補吏部郎中九月川東賊譚洪叛據巫山上命承勳同戶部郎中額爾赫圖馳赴夔陵趣將軍噶爾漢進兵十一月督湖廣進蜀糧餉二十年三月洪死其子天祕遁提督徐治都進剿以轉餉艱自萬縣還駐夔州諭承勳乘川峽未漲速運糧濟軍四月大軍進定雲南復命趣噶爾漢軍仍兼理糧務二十二年回任監崇文門稅務二十三年五月九卿詹事科道遵旨舉清廉官承勳與焉八月擢內閣學士二十四年二月授廣東巡撫陞辭

上曰爾父兄皆曾宣力於國爾今爲巡撫錢糧刑名雖係職任其最要者在潔己愛民若聽信幕客沽名妄作強不知以爲知欺人欺己大爲不可爾宜戒之八月奏免廣西容縣鬱林州追賠陷賊後無徵銀米十一月疏言廣西舊存倉米二十餘萬石前慮朽蠹議令全省暫折徵收恐餘糧銷盡遇歉兵食不足請桂林平樂二府徵半折半柳州府之賓州山險艱運永行折徵餘仍徵本色部議從之二十五年四月擢雲貴總督十二月疏言雲南舊有援剿兩協左駐尋甸右駐省城用供迤東策應請以右協移駐羅平州而以原駐羅平州之廣羅協移駐廣西府與廣南營犄角旣聯黔滇兼扼粵隘其左協分駐之曲尋鎮兵酌撥川黔要地防守部議如所請二十六年六月疏裁貴州十五衛十所以偏橋衛併入施秉縣興隆衛併入黃平州移州治於衛治新添衛併入貴定縣移縣治於衛治安南所併入普定縣普安衛併入普安州安籠所併入安籠廳烏撒衛併入威寧府以貴州貴前二衛改設貴筑縣鎮西威清二衛赫聲威武二所改設清鎮縣平壩衛柔遠所改設安平縣安南衛改設安南縣敷勇衛修文濯靈息烽於襄四所改設修文縣永寧衛普市所改設永寧縣畢節赤水二衛改設畢節縣俱照所請行十月劾提



督萬正色婪賄侵餉上命侍郎多奇傅拉塔往鞠得實論絞奉旨萬正色從寬免死革提督任二十七年七月湖廣裁兵譁變訛言四起承勳嚴禁密緝已而尋甸協兵於是月十六夜脅衆譟變與營將格鬪潰走承勳擒叛首任二等八名而省城營兵復謀於二十一日倡亂承勳先期密擒叛首唐金等十三名置之法事聞得旨嘉獎八月疏言雲南產銅鉛先後設鑪四十八鑄錢供軍餉向給全銀後因錢積以銀七錢三搭放每千文抵銀一兩鼓鑄日增錢價日減千錢值銀不過三四錢又苦山險赴領艱運費請仍康熙二十一年間例給全銀並停鼓鑄議准給銀減鑪座之半二十八年正月番夷阿所殺土目魯姐及其母弟妹九人欲踞其地有僕曰者克以魯姐妻瞿氏幼子魯聚走免諸夷人扶爲日阿所投匿東川結土婦安氏孫祿世豪掠鐵匠村苦竹壩夷民牲畜犯姜州堡事聞上命兵部郎中溫葆會同承勳等往東川檄安氏獻阿所至則諸夷與安氏擒阿所以獻斬之初雲南陷吳逆後屯賦錢糧自康熙二十一年至二十七年壓欠未完十二月承勳疏請分年帶徵奉旨全行蠲免二十九年三月疏言雲南額徵米麥經前撫臣石琳題定夏稅米石仍徵本色康熙二十七年秋糧半本半折二十八九年全

折三十年以後半本半折查各府州縣駐劄與分防兵多寡有無不同而存貯與額編之米亦長短廣隘多異今若以二十九三十兩年一概夏稅徵本秋糧全折半折將有餘之倉因本年夏稅本色來年秋糧半本而米愈盈不足之倉因本年秋糧全折來年秋糧半折而米愈絀計莫若分別徵收使不需糧處變米爲銀免滋朽蠹需糧處卽取給本地不致病民病兵議從之先是提督馬三奇以貴州三路峻險撥運兵米腳價浮於正項奏請折給部議以有米兵少之處米價必賤有兵米少之處米價必貴殊難定例令承勦會撫提察議至是承勦奏言每歲折徵米二萬石若照有米處折給則價賤不敷兵丁轉買其苦在兵照米少處折給則價貴而徵輸必倍其苦又在民惟斟酌損益於秋成令各府照時價估算本折均搭給兵自買從之三十一年三月奏雲南永北協爲永北鎮裁副將設總兵並設中左右三營遊擊各一其原設守備千把總等官改隸中營再設左右兩營守備各一千把總各六四月奏添大理府城守遊擊一守備一千總二把總四均特旨俞允七年奏請裁洱海營經制兵千名並抽撥鶴麗鎮尋甯營兵各二百名歸永北鎮並裁洱海營參將守備等官議如所請三十二年十一月上謁孝陵承勦迎

二分今已徵完一分卽改照未完一分例議處原參欠一分今已徵完七八釐卽改照未完不及一分例議處又言江寧駐防滿漢官兵歲需糧十六萬四千餘石於南屯米內撥解不敷照時價折給但各屬徵解南米在秋收後而月糧自正月起支急之則民苦預輸緩之則兵虞乏食至改折之銀亦須二月開徵俟解到採買已在四五月間而正二月糧無措請將安徽所屬捐積倉米提解十六萬充江寧現年兵餉其秋徵南米留作下年之用自此得先徵後給遞年相因庶無應接不敷之患更請將捐積倉米提十萬石存貯省倉值米貴時減價平糶又言江蘇額徵銀米歲三百餘萬今各年未完多者二十餘萬少者十萬有奇按額計算每歲所完已在九分以上逋欠多係貧瘠下戶再漕項錢糧自康熙十八年後積欠甚多新舊同徵民力難應請將蘇州屬縣及安屬六安壽州合肥靈璧虹縣積欠地漕糧分年帶徵以紓民力諸疏均下部議行三十五年六月疏言官兵遇閏添支之糧江寧駐防於上下兩江協解京口八旗二營並水師三營於鎮屬漕糧截留不敷再照例折給查江安蘇松兩道漕項現有減存米足敷支給可免採買截留之煩部議從之七月請以省倉米十萬石賑淮揚徐災民復請借京口留漕鳳

倉存麥接賑得旨俱允行三十八年十一月授兵部尙書三十九年三月命同工部尙書王鴻緒監修高家堰隄工尋以與河道總督張鵬翮議不協撤回四十二年四月以老乞休允之十二月河工告成加太子太保晉五級五十三年二月卒遺疏入上曰范承勳效力年久敬慎自持勤勞素著予告以來尙期優游頤養以副眷懷忽聞病逝朕心深爲軫惻予祭葬如例子時繹累官至工部尙書

陳瓊

陳瓊廣東海康人康熙三十三年進士三十九年授福建古田知縣四十一年調臺灣四十二年行取四十四年授刑部主事四十五年遷本部員外郎四十六年遷兵部郎中四十八年充會試同考官卽出任四川提學道四十九年三月聖祖仁皇帝誡飭四川官員加派恣肆諭及瓊任學道操守清廉十二月福建巡撫張伯行以臺灣廈門道乏員調補疏述瓊舊任古田臺灣二縣廉能著稱輿情悅服至今不忘上遂授瓊臺灣廈門道五十二年十二月超擢偏沅巡撫五十四年九月以橫役累民劾罷湘潭知縣王爰溱徇庇不揭之長沙知府薛琳聲削三級十月疏言臣蒙恩超擢重任數月以來諮詢利病採聽輿言敢敷陳愚慮一禁加耗

以甦民困有司徵收錢糧敢於正額外加取分毫者卽計贓依律治罪一禁酷刑以重民命夾棍重刑也非命盜重情不得濫用有司敢於戶婚田土細故夾訊者卽以酷刑論一糶積穀以濟民食湖南倉穀有存七糶三例不若於青黃不接時盡數發糶至秋收後買補還倉一置社倉以從民便社倉與常平倉不同常平倉設於城內出納俱官吏典守止便於在城及離城一二十里之民社倉分設村莊民間舉報殷實有德行老民掌管出納但止聽民自捐必寥寥無幾若按畝斂穀又恐擾民應令通省大小各官倡捐分貯出示勸諭紳衿及好義富民各量力捐入有捐至五十石一二百石者分別給匾獎勵免其差徭歲終以貯粟數目報明縣官其斂其散聽民自便縣官無預則視常平倉爲利更溥一崇節儉以惜民財今人一入仕宦於飲食衣服器用及交際往來皆備極華侈多所費必多所取方面取之有司有司取之小民腴削無已應申嚴奢侈之禁凡爲民牧宜安儉樸庶幾寡求易足留不盡於民間且有以端移風易俗之本一禁餽送以肅官箴每見下屬餽送上司至贓罪發覺開款抵銷應申禁自府道以下不許收受州縣官餽送使州縣官有所顧忌不敢橫徵科歛一先起運以清錢糧州縣額徵錢糧有起

運存留兩項定限四月完半九月全完先起運而後存留概以來歲五月奏銷前註明完欠分數爲考成應通飭各州縣凡起運項下錢糧務於本年歲內起運全完庶於解部及月支兵糧無誤而已徵在官錢糧不致久貯州縣庫內得任侵挪一隆書院以興文教湖南岳麓書院創自宋時爲天下四大書院之一現今柱朽瓦裂應卽修整容臣率同城各官量力捐費宣布皇仁雅化俾士子感激奮勵一飭武備以實營伍海內承平之日久武備最易懈弛應通行申飭汰老弱補虛額整甲械嚴汛防勤操演許臣於所屬地方出其不意察閱點驗如有虛冒卽會同提督鎮劾奏一停開採以防民患湖南郴州有開採一案抽稅無幾破冒工本招集遊手有廢農業應請永停俾小民專力於農工商賈之業以謀生無致匪徒嘯聚一隅亦爲未雨綢繆防微杜漸以上十條皆臣職分內應行事宜敷陳請旨俾得凜遵天語少道愆尤疏入上以條奏各款皆職分內事宜諭令躬行實踐勿騫虛名先是瓚奏請入覲允之十二月調瓚福建巡撫諭廷臣曰朕昨召陳瓚入見細察其舉動言語實係清官以海濱務農之人非世家大族又無門生故舊而天下之人莫不知情非有實行豈能如此而其才尙能辦事國家得此等人實爲祥

瑞允宜從優表異以鼓勵清操五十五年四月疏言臣赴任時至建陽縣有考亭書院爲先賢朱子晚年卜居故址城外朱子祠曾奉御賜匾額對聯懸掛前堂而祠宇湫隘用木板爲牆壁宜易以磚石與書院並改造軒爽謹同督臣滿保捐費委員鳩工又疏言朱子生於尤溪縣郭外南溪之地向亦建有專祠請賜匾額疏並報可賜文山毓哲匾額於南溪祠七月疏言防海賊之法與防山賊不同山賊之嘯聚有所而海賊之出沒靡常也臺灣廈門之防海賊又與沿海各邊不同沿海邊賊之患在突犯內境而臺灣海賊之患在剽掠海中也夫嘯聚有所則在我或攻之以出其不意或困之以待其自斃或招之以誘其出降而山賊可平其在海中不必連艘結隊攻之無可攻以劫掠爲生三五遊行遇見孤艇一口鯨吞又有數日之糧困之不能困非二三十年前海賊有頭目有旗幟有巢穴可比招之無可招自廈門出港自臺灣鹿耳門出港同爲商船迨至洋中而某商船忽被劫矣劫商船者卽其同出港之商船某船有某客有某貨物並若干銀錢港內探聽旣真本船引線有人一至洋中直如取諸其懷之易故於臺廈防海賊必定會哨之期申護送之令取連環之保今提標水師有五營澎湖水師有二營臺協水師

有三營各設有經制哨船莫若三處各立本船旗幟大書某營哨船字樣於其上每月會哨一次彼此交旗爲驗如由西路而去者提標水哨至澎湖交旗澎湖水哨至臺協交旗俱送臺灣鎮驗准由東路而來者臺協水哨至澎湖交旗澎湖水哨至廈門交旗俱送提督驗准某月若無哨旗交驗卽察取派定某營官職名某月海洋報有失事卽察取巡哨官職名則會哨之法行矣由廈門至澎湖有七更水程由澎湖至臺灣有四更水程載在輿志以五十里爲一更不過五百里之程餘故風信順利卽二三日可到今商船不宜零星放行無論自廈去者自臺來者候風信順利齊放二三十船出港臺廈兩汛各撥哨船三四護送至澎湖交代各取某日護送某商船自某汛出港至某汛出無疏虞甘結帶回原汛按月彙送督撫衙門如無印信甘結卽以官船職名申報則護送之法行矣商船二三十同出港時把口官逐一點明各船貨物搭客及器械填單取各船連環保結若洋中遇賊必首尾相救如不救卽以通同行劫究論則連環保之法行矣臣因商船被劫幾無虛日不勝慙惶俯竭愚慮疏下部議以防海已有定例瓊所奏繁瑣難行議覆上是瓊所奏下九卿再議俱如所請行是年冬總督滿保入覲瓊暫兼攝閩浙



總督奏請以閩省收捐穀石應交巡撫公費銀一萬五千兩撥充公餉部議如所請上曰前督撫等奏以公費銀兩充撥兵餉朕皆未允間有諭令買穀預備散賑者因係伊等應用之銀非正項錢糧若准其充餉恐日後竟同正項不肖之人又於此外侵蝕索取矣下大學士會同九卿再議令瓊遇本省應用之處撥給尋瓊又以巡撫任一年支取司庫餘平項下銀六千五百餘兩爲賞兵給役公用列奏諭以前旨甚明非動用正項錢糧例應奏銷者毋瑣屑具題五十六年二月疏薦惠安知縣田廣運永春知縣陳璘漳浦知縣汪紳文南平知縣李丕煜清流知縣林甲泰寧知縣范廷諤南靖知縣靳樹畹平和知縣郭廷彩長汀知縣張文煒大田知縣曹建標福安知縣嚴德泳武平知縣壽運焜等十二員催科能寓撫字不用重戢不加火耗無挪移虧空起解錢糧歲內全完懇恩破格獎勵上曰此奏甚善徵收錢糧惟少加火耗百姓易於輸納錢糧斷不至欠缺也田廣運等俱下部議敕五十七年正月疏言前臣以廣東雷州府東洋塘隄岸每爲海潮泛溢侵損民田奏請修築部行兩廣總督楊琳勘估需費五千三百餘兩竊思東洋塘界連海康遂溪二縣隄岸遼闊工程浩大非五千三百餘金可修築堅完臣生長斯地

深知海潮之患仰請聖恩允以現貯司庫之臣衙門公費銀一萬五千餘兩內動支五千兩解交粵省督臣轉發添買木料磚石則費多工固隄岸可得久遠臣與桑梓小民均沐聖恩浩蕩於無既矣得旨如所請八月以病劇乞回籍調理上慰留之十月卒於官年六十有三遺疏言閩省捐穀項下應交臣衙門公費及餘平銀二項除支用外現存司庫銀一萬三千四百餘兩應令接印撫臣委員解京充西師之費以盡臣未盡之心得旨陳瓊將伊應得銀一萬三千餘兩奏請充爲兵費內一萬兩可存藩庫以充兵餉其餘三千零卽賞給陳瓊之子又諭大學士等曰陳瓊居官甚優操守極清朕亦見有清官然如伊者朕實未見卽從古清臣亦未必有如伊者前在臺灣道任內所應得銀三萬兩俱於修理礮臺等公事動用署總督印務應得銀兩亦未分毫入己來京陛見時曾奏稱貪取一錢卽與百千萬金無異人所以貪取者皆因艱於用度臣初任知縣便不至窮苦卽一錢不取衣食亦能充足等語今觀其居官實能踐所奏之言誠清廉中之卓絕者似此不加表揚賜卹何以示勸著追授禮部尙書凡祭葬立碑與諡皆照尙書例并廕一子入監讀書以示朕優禮清廉大臣之意尋賜諡清端廣東巡撫楊宗仁以瓊長

子居隆次子居誠並舉人候選請廕孫陳子溫部議從之世宗憲皇帝雍正八年入祀賢良祠今上乾隆六年十月恩賜其孫陳子良舉人十三年七月以原廕之陳子溫未仕而故允部議補廕瓊之孫陳子恭授刑部員外郎尋遷郎中出任知府

### 施世綸

施世綸漢軍鑲黃旗人靖海侯琅仲子康熙二十四年以廕生授江南泰州知州二十八年正月以承修京口沙船遲誤部議降調督臣傅拉塔以世綸清廉公直題留得旨施世綸居官好准留任三月擢揚州知府三十年八月海潮驟漲泰州范公隄衝塌千九百餘丈民田竈地多沒世綸牒請捐修三十二年調江寧知府三十五年丁父憂督臣范承勳以世綸輿情愛戴請在任守制御史胡德邁特疏應行離任遂歸連丁母憂歲餘特旨授蘇州知府仍以終制辭不赴三十八年服闋授江南淮徐道四十年十月湖南按察使員缺大學士伊桑阿等以九卿保舉世綸入奏諭曰施世綸朕深知之其操守果廉但遇事偏執百姓與生員訟彼必護庇百姓生員與縉紳訟彼必護庇生員夫處事惟求得中豈可偏私如施世綸

者委以錢穀之事則相宜耳十二月遷湖南布政使先是議遷五開衛署於平屯俾黎平府專城而治四十一年世綸牒稱五開衛界黔粵控蠻夷實爲辰沅靖州之藩籬明宣德年間黔省黎平府數有苗患爰就衛城建府署國朝因之自康熙二十七年府衛官弁不和始有遷衛之議平屯僻處一隅不惟建造無資孤立堪虞若官軍兩遷一旦棄田園壞廬舍必致流離失所若僅遷衛署貢賦出納遙轄最難矧自明迄今府衛同城軍兵相安無事請仍舊便議久不決嗣總督喻成龍巡撫趙申喬會疏以聞特旨俞允四十二年以衡州府之安仁嘉禾臨武永州府之江華寶慶府之城步及郴州之桂陽靖州之通道天柱向止訓導一員請添設教諭又永定銅鼓二衛止設教授綏寧會同二邑止設教諭俱請添設訓導敕部議行四十三年調安徽布政使四十四年遷太僕寺卿四十五年二月因湖南任內失察兵掠當舖事罷職三月特旨授順天府尹疏陳四款一禁五城司坊擅理詞訟一禁奸徒包攬捐納一禁牙行霸占貨物一禁逐流娼歌宴敕部議定爲令四十八年授左副都御史兼管府尹事四十九年遷戶部右侍郎督理錢法尋調總督倉場五十四年奉命巡撫雲南會漕運總督缺員卽以世綸補授先是漕運

俱由瓜州開行其關下花園港乃漕艘停泊處至是江溜北趨花園港衝塌百餘丈世綸移咨河臣恐糧艘遲滯權將繞城河開壩行五十九年七月上諭總漕施世綸居官素優歷年漕船俱催趲全完並無遲誤本年漕船已經過淮更無他事漕運印務暫交與河道總督趙世顯署理施世綸速赴豫省將河南府至西安黃河輓運路徑勘明具奏陝西現存穀石數目亦著查奏今陝西正值軍興之際施世綸暫居陝西協同總督鄂海辦理世綸乃溯上流尋求古蹟九月疏言河南府孟津縣至陝西太陽渡大小數十餘灘繹路高低不等或在河南或在河北惟圮把窩魚林漆等處繹路年久間有坍塌其澗池以下水道下水船可載糧三百餘石上水載及其半澗池以上河高迅急僅可輓數十石由砥柱至三門神門本無繹路若小舟乘東南風猶或可上鬼門水勢洶湧土人從未行舟惟人門稍緩石崖鑿有繹路路旁鑿有方眼又有石鼻臣愚以爲石鼻可穿鐵索方眼可裝木限援手助力觀此則從前輓運其蹟猶存自陝州至西安府河水平穩俱有輓運路徑臣謹繪圖呈覽又奏河南府至陝州三門現在無船請自河南府至陝州太陽渡三百餘里用車運計五日可到每車可裝穀八石計穀二十萬石需車價銀四

萬三千七百五十兩自太陽渡至西安府黨家馬頭河水平穩水運爲便需運費銀二萬六千兩自黨家馬頭至西安府倉二十里又需車價銀四千兩其貯穀口袋二十萬餘需價銀三萬兩共計銀十萬三千七百五十兩總於豫省支銷不令陝西接運但運穀二十萬石止得米十萬石請令豫省以二穀易一米起運則運價可省半若慮米難久貯請照例出陳易新奏入嘉其詳悉從之十月上諭陝西地方現有軍務又年歲歉收總漕施世綸協同總督鄂海動支倉穀散賑但地方官員大半悉在軍前辦事之人殊少發帑金五十萬並陝西常平倉貯穀百三十餘萬石酌量動用派部院司官往賑交施世綸總管六十年四月疏言陝西四月無雨秋成可慮豫省先運米十萬石督臣已借支駐防兵餉所存無幾請飭豫省將後運米石運到平糶再撥河南湖廣米各十萬石運至陝西存貯備用下部議如所請六月命歸淮南理漕事六十一年四月以病乞休溫旨慰留令其子廷祥馳驛省視五月卒遺疏入請隨父環墓附葬閩省上允之諭曰施世綸簡任總漕清慎自持勤勞素著歷年催趨無誤前因病請改任方冀調理痊愈以副眷懷忽聞溘逝深爲軫惻應得卹典察例具奏尋賜祭葬如例

## 藍理

藍理福建漳浦人康熙十三年耿精忠反康親王傑書爲奉命將軍統師征之理於浙江迎降爲鄉導破僞都統曾養性於温州十五年隨師入閩授建寧遊擊十七年都統賚塔等敗海敵於蜈蚣山復長泰縣理在事有功十八年遷灌口營參將十九年敵將何祐領象屯烏嶼理隨昭武將軍提督楊捷分三路夾擊大敗之總督姚啟聖令理分兵守高浦辭不赴又以虛兵冒餉事爲啟聖所劾奉旨革職下部議罪擬杖徒理自請剿海敵贖罪上允之發臺灣效力二十一年提督施琅奏署右營遊擊委管舟師部議以前經獲罪不准所請特旨允行時琅統師進剿敵將劉國軒分衆拒守澎湖理偕遊擊曾成等首先衝擊燬沈其舟爲飛礮所傷裹創力戰自辰至午殺敵殆盡遂克澎湖臺灣平功加左都督以參將先用尋丁憂二十六年服闋引見上諭兵部藍理效力行間著有勞績陞授副將補神木營副將旋擢宣化鎮總兵掛鎮朔將軍印二十九年調浙江定海鎮三十二年以保奏閩省功加人員蔡明等不合部議降二級以功二次抵銷四十二年調天津鎮賜孔雀翎及冠服並御書所向無敵額四十三年以舊傷疾作請解任上曰藍理

勇於軍旅勤勞懋著自簡任總兵整飭營伍和輯兵民覽奏雖舊疾屢作醫治即可痊愈著照舊供職不必求罷並賜御醫診視四十五年三月偕直隸巡撫趙宏燮請於直隸所屬荒窪田地開墾水田上命理先於天津試墾冬後奏聞嗣內務府總管黑碩子等奉旨往勘以理所開墾稻田計百五十頃入奏報聞六月擢福建陸路提督御書畫錦萱榮額賜其母蘇氏四十六年上南巡理迎駕於揚州賜御書勇壯簡易額並衣一襲四十七年丁母憂奉旨在任守制五十年二月盜首陳五顯等糾眾二千擾泉州永春德化等縣界六月理始以五顯潛匿山谷附近賊巢村落安集如故入奏奉旨督撫提鎮平時不能卹民訓兵及事出又不能相機勦撫縱容盜賊騷擾地方又不卽行奏聞轉稱百姓照常安集凡盜夥至三四十人百姓尙且畏避況數千人爲盜豈得謂百姓安居舊業乎此係掩飾已過巧行誑奏甚明著該部嚴察議奏尋議革職治罪得旨藍理前曾奏稱福建地方有臣與水師提督吳英料理可保寧謐尙猶有盜賊臣無面目再覲天顏今盜賊竊發不能卽行剿撫迄今尙未盡獲且藍理居官不端殊爲溺職著革職從寬免交刑部先是福建總督梁鼎面奏理貪劣剋扣兵丁錢糧貽害地方上念其人材壯



健未治罪至是福建巡撫覺羅滿保會同浙閩總督范時崇劾理貪婪酷虐流毒士民狀上命兵部侍郎覺羅和託等往審尋奏理霸市抽稅婪贓累萬流毒已極應斬立決得旨藍理應依議處斬但在臺灣澎湖對敵時奮勇向前曾著勞績著從寬免死調取來京入旗五十四年大軍分三路剿策妄阿喇布坦理籲請赴軍前效力上以其驍勇熟練軍機賜總兵銜隨都統穆爾賽協理北路軍務五十七年以病回京五十八年卒上追念理功特旨免所追銀遣其妻子回原籍

### 王新命

王新命四川三臺人順治四年靖遠大將軍肅親王豪格剿滅流賊張獻忠新命隨官兵來歸隸鑲藍旗漢軍十七年由翰林院筆帖式遷內閣中書尋授兵部主事遷員外郎康熙十五年遷刑部郎中十七年擢江西布政使自逆藩吳三桂耿精忠相繼叛分擾江西民散地蕪新命設法勸諭於南昌等府州縣衛招撫丁口二十萬二千有奇勸墾田畝八萬六千餘頃巡撫佟國正據所報入奏上嘉其實心任事十八年署江西巡撫疏言江西逃丁荒地雖已招撫開墾現在荒缺者過半暫請開除額賦部議如所請十九年擢湖廣巡撫時逆賊譚洪犯夔州諭新命

防守巫山巴東夷陵等處要害保護糧餉二十年奏言楚省鄉試中額前因逆藩吳三桂擾亂湖南曾改照中省取中今湖南平定應復額從之二十二年奏言楚省漕糧向因留充兵餉民納盤運腳米亦令折銀以濟軍需今大兵盡撤漕米起運請復給民盤運腳米下部議行二十三年正月調江寧巡撫五月擢江南江西總督二十六年三月調浙閩總督奏言閩省各營兵弁調防臺灣澎湖所遺員缺請於本省現任官弁中酌量調補部議從之二十七年調江南河道總督二十八年正月聖駕巡視河工親率扈從諸臣及新命閱中河至支河口諭曰朕觀此河狹隘逼近黃河之岸且自徐州北鎮口牐所出黃水及微山湖荆山口並駱馬湖之水皆入中河若遇霖潦水漲萬一黃隄潰缺中河黃河必將混而爲一此中河開濬後商民稱便者蓋由免行黃河一百八十里之險耳目前小利安知長久有利否也新命奏言支河口止修一牐而鎮口牐微山湖等處水甚大倘遇霖潦必壞若下草掃隨時啟閉於駱馬湖口以竹絡石作減水壩爲捍禦令漲水歸黃酌存足用之水再修築禹王臺以禦入駱馬湖之水令歸沱河則中河無虞矣先是尙書張玉書等於二十七年奉命勘河工覆奏後諭令新命詳勘議奏至是新命

奏言運河駱馬湖水俱入中河河狹難容應將駱馬湖減水三壩俱留遙隄之外  
令由舊河入海於蕭家渡量留缺口用竹絡石酌水勢高下堵塞宣洩以免衝漫  
又支河口滙微山湖荆山口彭河沂河沭河白馬河並鎮口牯水流入黃河之口  
應仍聽其流通如水勢淺阻則建草壩閉塞令全入中河以濟運道又駱馬湖入  
黃河之口臣親勘隄外湖口水深二丈餘難建壩應用竹絡石出水二三尺成造  
堵塞又沭河本東流由沭陽入海邳城東迎沭水之口有禹王臺相傳禹治水引  
沭穿山而西恐爲邳害故築臺以遏水勢及臺毀於明世沭水西流會白馬河沂  
河入駱馬湖不惟沂邳宿嶧各州縣歲受淹沒而駱馬湖黃河以愈泛濫應於  
禹王臺舊基亦用竹絡石堵塞內築土隄斷流令由故道入海奏入諭扈從諸臣  
會議尋議駱馬湖減水三壩應如張玉書等所奏將二壩之水入中河其一壩水  
令從遙隄外入海餘俱如新命所請行四月疏言下河七邑民田久淹臣詳勘下  
河形同側釜丁溪草堰白駒等海口誠洩水要道自應速濬惟是時屆孟夏伏水  
將至白駒草堰二工去海不遠應俟冬春間水退潮消刻期興作丁溪口去海稍  
遠自沈家壩至撈魚港及丁溪牯下次第先挑串場河爲西來諸水滙歸丁溪草

堰白駒等河入海之要道所有應濬三十七里已卽時加濬下所司知之三十一  
年山東巡撫佛倫疏言原任運河同知陳良謨首告王新命勒取庫銀六萬餘兩  
新命亦劾良謨欠庫項五萬餘兩請將新命調質上遣戶部尙書庫勒納禮部尙  
書熊賜履往會審尋訊新命及良謨並挪移庫銀屬實照例治罪得旨王新命等  
從寬免罪著革職三十七年二月命往查保定府南河三月命同直隸巡撫于成  
龍詳勘清河漳河渾河三十八年命管理永定河工卽扈蹕巡視河隄指授緊要  
應修工程新命尋同直隸巡撫李光地奏請於南面遙隄內修治若向外興修恐  
礙民居得旨隄內俱屬沙地倘更壅淤則低窪村莊盡在沙中矣南隄之南地勢  
窪下隨勢濬治卽以掘出之土築隄修治最易且北隄三層於河更隘爾等將河  
口修窄漸次展寬旁築高隄則水勢迅疾沙自不至停滯若民居相近之處宜委  
曲遠移或砌以石令於莊村無礙工竣後朕親視開放河水三十九年十月上閱  
隄工查驗樁木不<sub>不</sub>如式令侍衛海青傳諭新命及工部侍郎白碩色等曰自委爾  
等河工以來並未陳奏一事卽樁木亦未如式深下爾等實心修築自正月至今  
親身監修卽每日里許亦應告竣矣京師相去止一日之程其能欺朕耶若再無

成朕必不輕恕十月河工員外郎赫碩滋題參新命及白碩色河工草率諭傳新命等至內閣與赫碩滋對質新命以天寒土凍歲內斷難興工明春雨水前必當修竣陳奏諭曰赫碩滋向在南河意以北河比照黃河興工不知南方地暖尙可修築北河豈可與比然伊等皆同事之人明歲告竣則已否則朕自有處分十二月李光地參新命等諸事俱不實心效力惟徇情面無益河工並劾其修河錢糧多無著落上命內閣學士法良侍郎徐秉義同往查核四十年二月法良等議覆新命蒙混虧空得旨王新命著交部嚴加議處部議枷責諭曰議者輕矣此事並非科道糾參及諸臣察奏俱朕親行目睹者王新命係革職之人朕復起用所行尙且如此聲名職分俱爲有玷若不置之重典嗣後何所勸懲耶著發回再議尋議新命監修誤工浮冒銀萬餘兩擬斬監候遇赦免四十七年卒乾隆七年奉旨清查八旗漢軍有願改歸原籍及移居外省者准其出旗爲民於是新命之孫武舉王機改歸四川原籍



清史列傳 卷十二

大臣畫一傳檔正編九

舒蘭

舒蘭滿洲正紅旗人姓納喇氏父敦多哩官至刑部侍郎兼佐領康熙二十六年六月以審理盜案失實革侍郎任復以審理革職總督蔡毓榮罪案附和尙書希福從輕擬罪由佐領降二級發黑龍江效力舒蘭初任理藩院筆帖式三十四年遷主事三十八年隨侍郎滿丕及都統烏達禪等招降巴爾瑚三千餘人安駐察哈爾游牧地編隸佐領九月巴爾瑚佐領額克圖叛害察哈爾副總管阿必達驍騎校班第掠馬駝以遁聖祖仁皇帝命喀爾喀公錫卜推哈坦等領蒙古兵追剿舒蘭率諸察哈爾路徑者四人持檄傳示蒙古諸貝勒台吉并派撥察哈爾厄魯特兵隨烏達禪會諸蒙古兵剿獲賊渠三十九年遷內閣侍讀四十三年三月命同侍衛拉錫往窮黃河源諭曰河源雖名古爾班索里瑪勒其實發源之處人跡罕到爾等務直窮其源察視河流從何處入雪山邊內凡經流諸處宜詳閱之九

月還奏臣等於四月初四日就道五月十三日抵青海十四日至庫庫布拉克有貝勒色卜騰扎勒行六月七日至鄂稜諾爾周二百餘里明日西行至扎稜諾爾周三百餘里二諾爾相去可三十里許明日至星宿海蒙古名鄂敦塔拉星宿海之源小泉萬億歷歷如星衆山環之南有山曰古爾班圖勒哈西南有山曰布瑚珠勒赫西有山曰巴爾布哈北有山曰阿克塔齊勒東北有山曰烏蘭都什蒙古總名曰庫爾坤卽崑崙也山東出自古爾班圖勒哈者西番名爲噶爾瑪塘出自巴爾布哈者名噶爾瑪楚木朗出自阿克塔齊勒者名噶爾瑪沁尼三山之泉溢爲三支河卽古爾班索里瑪勒也三河東流入扎稜諾爾扎稜一支入鄂稜諾爾黃河自鄂稜出其他山泉與平地水泉淵淪縈繞不可勝數悉歸黃河東下臣等於六月十一日自星宿海回程舍故道尋河流東南行二日登哈爾吉山見黃河折而東至庫庫陀羅海山又南繞薩楚克山復北流經巴爾陀羅海山之南明日達阿木尼瑪勒占穆遜山其山最高霧雲蔽之不可端倪蒙古人言長三百餘里有九高峯積冰終古不消常雨雪一月得晴僅三四日臣等自此回行又二日至錫喇庫特勒又南過僧庫爾高嶺更百餘里至黃河岸見黃河自巴爾陀羅海山



東北流經歸德堡之北達喀山之南兩山峽中流入蘭州自京至星宿海計七千六百餘里寧夏之西由松山至星宿海天氣漸低地勢漸高人氣閉塞故多喘息謹繪圖復命疏入報聞是年擢內閣侍讀學士尋諭大學士九卿等曰朕於古今山川名號雖在邊徼遐荒必詳考圖籍廣詢方言務得其正故遣使至崑崙諸處目擊詳求載入輿圖卽如黃河之源出西塞外庫爾坤山之東衆泉渙散不可勝數望之濛濛如列星蒙古謂之鄂敦塔拉西番謂之索里瑪勒中華謂之星宿海是爲河源匯爲扎稜鄂稜二澤東南行折北復東行由歸德堡積石關入蘭州其原委可得而縷析也四十四年擢舒蘭內閣學士明年命往西藏封拉藏爲翊法恭順汗回京得風疾賜醫診視并賜藥飲兩閱月始痊四十七年閏三月疾復發乞休命解任調理五十二年正月病痊補原官三月遇萬壽慶典復其父敦多哩侍郎原品十一月命舒蘭兼管光祿寺卿十二月遷工部侍郎明年諭責舒蘭人甚糊塗事多差錯降三級調用五十九年卒年六十有八

### 祖良璧

祖良璧漢軍鑲黃旗人父澤洪官吏部侍郎以軍功授三等子遞加至一等子爵

自有傳康熙九年良璧繼其兄良棟襲世職十九年授參領兼佐領二十九年從裕親王福全征噶爾丹謀賊伏烏蘭布通阻河據林阜結蛇陣自障良璧隨左翼由山腰奮擊大敗賊衆獲其巢三十年擢西安副都統三十五年二月撫遠大將軍費揚古由西路剿噶爾丹良璧請從軍上以西路軍糧屯翁吉命偕副都統席爾哈達留兵督運六月由巴罕厄里根赴納喇特遇風雨牲畜道斃不能前以狀聞時噶爾丹已爲費揚古所敗攜其從子丹濟拉由昭莫多西遁上慮其刦翁吉糧詔良璧速歸翁吉以所運米支給運丁餘悉焚之良璧得旨馳還九月將護糧赴寧夏丹濟拉果率賊數千伏翁吉山谷中偵我軍半度突出良璧麾殿後兵力戰前軍還擊賊大敗逐北二十餘里上方聞丹濟拉驟至慮良璧勢孤及奏捷優詔嘉獎四十二年十一月上西巡閱西安兵諭大學士馬齊曰滿洲兵丁整肅俱係將軍副都統訓練所致著各加一級十二月調正藍旗漢軍副都統四十四年上追念良璧翁吉破賊功且人材亦優擢福州將軍賜孔雀翎及蟒服鞍馬四十六年上南巡良璧至清江浦迎駕御書兵民協輯額及四時常喜戈船靜千里須教壁壘新聯賜之並衣一襲四十九年三月疏言康熙二十二年撥耿精忠藩下

兵一千歸上三旗因閩省無正黃旗駐防將應歸正黃旗人改撥正藍鑲白二旗查駐防驍騎校等缺出各旗藩下人皆得揀補惟此項因係改撥從未咨放其中不無弓馬可觀之人登進無階情殊可憫請嗣後正藍鑲白旗缺出將改撥兵丁一體拔補部議從之八月以泉州漳州等處旱歉奏命侍郎塔進泰李旭升會同江浙兩省督撫截留本年鎮江漕米十萬石運至狼山松江湖州漕米各十萬石運至乍浦令福建督撫等以戰船轉運賑災會總督梁鼎丁憂特旨以良璧署理五十二年至京恭慶萬壽賜冠服尋遣還任五十七年卒改世職爲一等男兼一雲騎尉子應樞襲

### 李麟

李麟陝西咸陽人康熙十八年由行伍隨勇略將軍趙良棟自四川進征逆孽吳世璠克關山象嶺三市衛得勝橋等處得雲南省城下部議敘二十七年良棟遵旨覈平雲南功應加獎勵人員以麟材技堪用膽勇可取保奏部議以都司僉書錄用三十五年五月隨振武將軍孫思克擊噶爾丹於昭莫多大敗之敘功授副將職銜十一月授直隸張家口右營遊擊三十八年遷四川化林營參將川省打

箭爐舊屬內地上以西藏番部嗜茶許藏內營官在爐管理土伯特貿易事三十年九月營官喋吧昌側集烈據爐地並侵河東烏泥若泥嵐州喜慶擦道等處戕明正長河西土官蛇喀渣吧川陝總督錫勒達奏請檄麟領化林營官兵駐爐彈壓查拏嗣喋吧昌側集烈抗不令凶犯到官復阻移爐官兵屢犯內地麟移兵渡爐招安咱威子牛烹壩魁梧四處上命副都統滿丕統荊州滿兵進剿並命四川提督唐希順相機行事十二月希順偵知哪吒頂與大岡兩處有蠻兵四千餘其咱威一路係入爐大道喋吧昌側集烈領蠻兵五千餘在磨西面及磨岡二道水等處議分兵三路進攻一由子牛攻哪吒頂一由烹壩攻大岡希順自領官兵攻磨岡令麟順爐水至哦可磨繞西面後來攻磨岡麟軍夜迷失道比明反出磨西面前遂爭先攻蠻營奪磨西面連戰五日各路俱克捷斬喋吧昌側集烈喇嘛番民悉投順遂復打箭爐四十年正月希順以捷聞下部議敘嗣希順追劾麟移兵赴爐時避險就易駐咱威至失烹壩又進征時令麟領兵由哦可繞磨西面麟不由哦可貽誤軍機諭曰李麟人材壯健馬步射俱優係朕簡用之員打箭爐未復之前李麟曾呈報錫勒達應分三路進取錫勒達據以具奏載在打箭爐捷書

甚明今唐希順劾李麟規避誤機著交錫勒達察議具奏嗣經錫勒達審訊失守烹壩係守備陳大樹懦弱無謀應嚴加處分麟雖不由哦可進而從大路爭先攻克蠻營功過自可相抵應給咨赴部另補疏入上命滿不會同提督岳昇龍巡撫貝和諾再議具奏尋滿丕等會鞫麟失察防守烹壩之守備陳大樹應革職治罪但烹壩旋即收復又奪取磨西而請免治罪詔如所請四十一年遷江西九江副將四十四年調湖廣黃州副將四十五年調江南江西中軍副將四十九年兩江總督噶禮劾麟訓練怠忽弓馬生疏命解任五十年上行圍塞外麟以謝恩來京扈駕隨圍五十二年特授山東膠州副將五十五年擢登州總兵五十七年策妄阿喇布坦擾西藏命麟於所屬內選精兵百由寧夏赴軍前五十九年五月命都統延信爲平逆將軍率兵進藏以麟參贊軍務四月護送第六世達賴喇嘛進藏八月至沙克河賊夜襲我營擊敗之連敗賊於齊諾郭勒綽瑪喇等處西藏平麟率兵由拉里凱旋六十年三月授陝西固原提督六月疏言臣前進藏時所領山東兵丁曾借司庫銀兩今中煙瘴死者百餘故兵之父母妻子無依可憫卽生回山東者俱效力疆場亦屬勞苦請照恩賞川兵例免其扣追特旨允行雍正元年

遷鑾儀使二年追敘安藏功加右都督授騎都尉三年以老致仕六年卒孫彩現襲世職

趙申喬

趙申喬江南武進人康熙九年進士二十年授商邱縣知縣二十五年八月聖祖仁皇帝命行取直省賢能官申喬預焉奉旨以主事用二十七年四月授刑部主事三十年三月遷本部員外郎以病假歸四十年正月以直隸巡撫李光地薦特旨召見諭大學士等曰趙申喬人甚敬慎委以錢糧斷無苟且遂授浙江布政使及陛辭諭曰浙省財賦之區自張鵬翮陞任後錢糧漸多蒙混惟秉公察核不虧帑不累民方不負朕委任至意布政爲一省表率爾清廉則屬吏自皆守法明年正月上曰趙申喬居官甚清所有家人僅十三人並無幕客事皆躬親火耗分釐不取昔伊陞辭奏云到任不做好官請置重典今觀其居官若此能踐其言矣卽擢浙江巡撫尋奏築錢塘江口隄修葺禹陵及增浙江舉人中額並從之九月湖南鎮守士民叩閭言紅苗肆行擄殺地方官不究不報給事中宋駿業因劾總督郭琇衰廢巡撫金璽庸懦提督林本植昏耄上命申喬往湖南會同侍郎傅繼祖

甘國樞察勘尋復奏紅苗搶掠狀郭琇金璽林本植並坐諱匿黜罷十二月調申  
喬偏沅巡撫四十二年八月同提督俞益謨疏請發兵征剿紅苗又奏言臣與督  
臣喻成龍令衡水道張士可賚檄赴鎮筵苗洞爲先撫後剿之計其歸順苗民已  
得二十餘寨上命尙書席爾達等率荊州駐防兵檄粵黔楚三省提督會同湖廣  
督撫進剿十二月自龍椒洞至天星寨分路搜剿斬馘千餘降其寨三百餘紅苗  
悉平移辰沅道駐鎮其地尋諭曰近征紅苗貴州提督李芳述親冒礮銃鼓衆力  
戰連斫數寨聞趙申喬亦甚強毅也先是上南巡申喬朝蘇州府行在上以湖南  
道遠而官吏私徵加耗倍於他省特頒諭旨申飭申喬還建上諭碑亭勒石通衢  
疏劾巴陵知縣李可昌等勒派苛斂革職治罪四十五年疏言清浪平溪二衛僻  
處山隅請改徵本色爲條銀以免運費明年又言漕運旗丁舊有耗增及行月銀  
米於起運前預行給發經給事中戴嵩條奏俟歸次後始發以防虧缺部議通行  
臣按湖南運道遠於江浙而無耗增獨恃行月銀米以資飛輓今既扣存窮丁不  
能涉遠必致誤漕且抵通後卽無虧缺而事後補給恐滋胥吏侵蝕諸弊請仍照  
例給發上是之著爲令又言全楚延袤數千里介以洞庭之險教職以寒士銓除

赴任率多踰限請就湖南北分省選授下部議行四十七年九月奉命赴湖北察審荊州府同知王侃等侵蝕木稅輸實治罪疏請裁港口渡私稅其荆關稅務仍歸部差管理又請以靖州屬鷓鴣關稅併入辰關徵解以杜侵漁又言營兵給餉每於正月支領時地丁尙未開徵州縣挪移於一時不得不預徵於平日官民交累請以隔歲餘存米石撥給兵餉並下部議行是月內閣學士宋大業祭告南岳歸劾申喬輕褻御書下申喬回奏尋奏言大業前曾奉使至衡索餽無厭此次入楚以南岳廟工餘銀扎諭藩司董昭祚不必報部而臣以解部充餉以此捏詞誣劾疏入大業坐革職明年八月疏劾提督俞益謨抽取衡協兵丁食糧至三十五石之多以致營伍空缺上命益謨回奏四十九年正月益謨亦疏劾申喬苛刻請並解任質訊命尙書蕭永藻赴楚察審諭大學士曰自趙申喬參俞益謨武弁始知敬畏今天下兵額缺而空名食糧者多所關非細故也七月永藻以劾疏皆實回奏上命俞益謨休致而申喬得還職十二月內陞左都御史尋諭曰趙申喬任偏沉時甚清廉但有性氣人皆畏其口直與俞益謨互相訐參彼時亦有以趙申喬爲非者朕細加察訪卽彼所轄文武及陝西人良心不昧俱言俞益謨之非無



有言趙申喬爲不是者清官固所當惜其言之不可行者朕亦不行雖所言未當而並無私見凡事皆實心辦事朕是以護惜之五十年五月奏請刊部行則例八月充順天鄉試正考官十月疏劾編修戴名世所著南山集子遺錄有大逆語下刑部鞫實正法十二月疏言直省寺廟衆多易藏奸匪請勒禁增建從之五十一年二月充會試正考官十一月疏請禁營兵頂名食糧以清虛伍又言奉旨普勉各省地丁錢糧惟潼關衛大同府徵收本色不列蠲例請援奉天臺灣例一體蠲免並允所請行五十二年四月奉命赴廣東平糶因奏改電白縣解運瓊州等府兵米仍徵折色免涉海洋之險及回京奏潮州知府張應詔清廉上擢應詔爲兩淮運使十月申喬遷戶部尙書五十三年七月王莊莊頭李必達具呈指圈滄州民地直隸巡撫趙宏燮請於旗退地內另撥部議不准申喬上言滄州民地經奉旨停圈請如撫臣議十二月商人馬維屏呈請納銀萬兩交部領大錢易小錢送局改鑄下內務府戶部會議將許之申喬亦上言收換小錢有司責也商人圖利恐致藉端擾民請勿許皆特旨允之五十四年十月山西巡撫蘇克濟疏劾太原知府趙鳳詔受贓三十餘萬兩請革職究擬申喬以不能教子致鳳詔居官不肖

求賜罷斥得旨朕禮遇大臣甚優自始至終無不期其保全凡官員才守靡不詳察朕曩巡狩至龍泉關駐蹕之日曾面詢趙鳳詔噶禮居官何如趙鳳詔奏稱噶禮爲山西第一清廉官朕以趙鳳詔乃趙申喬之子斷不欺朕因擢噶禮爲江南總督趙鳳詔又以居官受賄比之婦女失節朕諭爾言雖鄙俚能如此存心甚佳迨噶禮事敗朕以趙鳳詔居官詢尙書張鵬翮而張鵬翮言其貪婪近晉撫蘇克濟參奏趙鳳詔受賄甚多今閱趙申喬所奏詞意忿激殊非大臣之體著飭行仍令在任供職鳳詔尋以婪贓情實斬決五十六年戶部奏銷鼓鑄錯誤申喬革職留任明年復充會試副考官五十九年三月以衰疾乞休上覽奏諭大學士曰趙申喬操守清廉始終一轍性雖躁急而爲人樸直年經八旬病勢料難卽愈念係革職留任之員可復還原職仍令在任調理其應賠之項從寬免追爾等速傳此旨使其早知庶服藥可效也十一月卒於官年七十有七賜祭葬如典禮諡曰恭毅雍正元年正月世宗憲皇帝以趙申喬與故大學士阿蘭泰等並宣力效忠恩賜追卹贈太子太保六年三月湖廣總督邁柱疏趙申喬應分賠屬員虧帑得旨爲督撫者或操守不謹勒索屬員或沽譽邀名徇情寬縱有此二者屬員虧空當

令分賠如趙申喬當日居官操守清廉實心任事毫不瞻徇情面實大臣中之罕見者若照例令其賠補是清正任事之大臣與貪鄙庸碌者同一處分而子孫皆不免拖累殊非激濁揚清之道此項銀兩不必追賠倘趙申喬名下再有似此應賠之項俱照此例寬免八年詔入祀賢良祠尋祀湖南浙江名宦

### 陳詵

陳詵浙江海寧人聖祖仁皇帝康熙二十五年七月由舉人授中書科中書舍人二十八年五月考選科道六月授吏科給事中二十九年三月疏言國子監額設禮生十名所司不過唱贊起拜三年期滿例得加等錄用其考職州同輒選授知縣夫知縣膺百里民社之寄與州同職任輕重懸殊禮生既無課業亦非勞勩踰躐濫叨實爲幸竇請令國子監嗣後以肄業貢監生輪直贊禮裁汰原設缺額以杜僥倖下部議停止加等錄用仍留缺額改照考定職銜選授十二月請終養歸三十六年十二月補原官三十七年七月疏劾貴州省請襲都勻正長官司遲至五年始題似有措勒需索情弊請敕部令巡撫察究分別議處從之八月轉刑科掌印給事中十二月疏言近見戶部糾察運米挂欠一疏有官員生監數百餘俱

應黜革孳解如果皆係本身侵沒按律正典夫復何辭然臣聞捐納初開卽有棍徒包攬驟擁高貲窮奢極慾包多納少包貴納賤包有納無包真納假誣人資本傾人家業私爲子弟戚友充納美官而本人姓名反空懸無著更有假捏名姓購買微員雜職印結向戶部騙取紅票卽於倉中領出米石私行糶賣本人全然不知經戶部題明勒限完納其官員生監愛惜身名者隱忍賠累鬻產揭債重複捐納或有被人騙負不能再捐或有竟不預聞馬牛無涉忽遭提解老少驚惶路途餐宿費出不貲而惡棍反袖手旁觀哆然得計似此神奸豈容漏網應通飭各省官員生監託人代捐如騙累有據者許其告理并請飭法司凡有告理毋少寬縱務使魑魅之徒不得潛蹤聖世則國計民生均有裨益疏下部議申嚴禁令三十九年十二月疏淮黃自古不兩行助黃刷沙之清水亦不可分洩黃水塞清水不過一時之異漲稍平卽流清水旁分流弱黃水灌入淤沙愈積愈高邇者修歸仁隄開胡家溝以出睢湖之水閉六壩幫築高家堰以出洪澤湖之水此直借淮敵黃一定不易之經然淮水分入運河者多則敵黃仍弱舊設天妃閘離淮黃交會之處二百餘丈南至清江浦共有五閘重運到時更迭啟閉重運一過卽下板鎖

斷官民船隻俱用車盤是以准之全力俱注於黃其引入運河者不過暫時資其濟運耳自改建草壩之後無復閘板啟閉淮黃盡趨運河清江浦民居可危宜復天妃閘舊制使淮水易以蔽黃亦補苴罅漏之有裨大工者也事下總河張鵬翮酌行四十年十二月疏言臣辦事刑垣見山東巡撫王國昌題結蒲臺縣役拘拏監生王觀成不小心防範擬革役杖責揭帖知縣俞宏聲先據民人控詞通詳於康熙三十九年正月十一日差役至濟南擒拏王觀成拘留飯店七日以致服毒自盡觀成職止監生不可謂之勢宦被控二三十年前田產細故非係大慝何必於未開印之前票差拘促似有借題嚇詐誣噬威逼情弊且律例載出賣田產文約逾五年者告爭不准又凡有以赦前事告訐者以其罪罪之二十年來疊頒恩赦東省官民寧不聞知民間以此告訐縣令以此通詳問官徇隱扶同上司不行糾劾僅以杖責解役草率完結民命奚堪吏治何在謹據揭駁參得旨遣侍郎吳涵同詵往審四十一年三月還奏知縣俞宏聲以赦前田土細事遽行通詳差役六人拘拏令三人禁押致王觀成畏威服毒殞命應革職永不敘用追埋葬銀兩給王觀成之子不審出真情各官應交吏部分別議處從之九月授鴻臚寺卿四

十三年六月遷大理寺少卿十月遷左副都御史四十四年十一月授貴州巡撫四十六年五月疏言黔省田地俱在層岡峻嶺間土性寒涼收成瘠薄人工牛種艱於他省前撫臣王夔因合屬田地荒蕪十之四五奏定減輕舊則招徠開墾成熟六年後起科臣任事後多方勸導據各屬舉報上年開墾成熟一千餘畝應依減輕新則六年後起科有續報者亦如之疏下部如所請行四十七年十二月調湖北巡撫四十八年五月疏劾布政使王毓賢虧帑七萬七千餘兩詔王毓賢解任訖尋以盤驗已完奏免其罪四十九年十月疏言武昌漢陽所屬十五州縣衛夏秋歉收請分別緩徵蠲免賑濟得旨允行五十年四月內陞工部尙書五十二年四月調禮部尙書先是任巡撫時失察流匪入境降五級留任及任禮部以祈雨後不報曾否霑足及題奏稽遲各案部議再降五級又兩議革職並命留任五十八年十一月乞休得旨卿才品優長服官年久兩授巡撫潔己愛民恪勤素著茲簡任秩宗正資料理覽奏以老疾乞休情詞懇切著復還所革之職致仕六十年十一月卒於京年八十有一世宗憲皇帝諭賜祭葬諡曰清恪子世倌官至大學士別有傳

張伯行

張伯行河南儀封人康熙二十四年進士考取內閣中書改中書科中書丁父憂歸服滿未赴補儀封城北舊有隄三十八年六月因雨潰決伯行倡募居民囊土塞之隄遂完固三十九年八月總河張鵬翮疏薦堪理河務以原銜赴河工督修黃河南岸隄二百餘里及馬家港東壩高家堰石工四十二年正月授山東濟寧道四十五年正月遷江蘇按察使四十六年三月聖祖仁皇帝南巡至蘇州諭從臣曰朕訪知張伯行居官甚清最不易得又諭曰張伯行爲人篤實卽置之行間亦非退縮者遂擢福建巡撫十二月疏請蠲免臺灣鳳山諸羅三縣旱荒田地額賦又以閩省米價日昂請發帑銀五萬兩委官往湖廣江西廣東買米平糶四十七年五月疏言福建人才衆多前奉恩詔乙酉科鄉試於舊額七十四名外增十名今戊子科鄉試在邇士子咸冀長荷皇仁以暫增者爲定額疏並下部議從之四十八年十二月請調四川學道陳瓚爲臺灣道得旨如所請是月伯行調任江蘇巡撫四十九年二月疏言去歲淮安揚徐三府屬十四州縣衛夏秋連遇水淹蒙恩發帑賑濟延至今春仍多乏食窮民請加賑至麥熟得旨俞允時布政司宜

思恭爲總督噶禮劾罷陳鵬年以蘇州知府署布政使請循前任督撫司道公議分扣闔屬官俸役食抵補司庫虧空三十四萬餘兩伯行以聞越十日又疏言前因署布政使陳鵬年察出帑項虛懸爲數甚多而俸工抵補又非臣所敢自專節次商之督臣噶禮總期庫帑有著即可不煩聖心因以會稿送督臣畫題守候七日傳諭令役先回會稿隨後來臣以爲已無別議不敢遲緩翌日拜發前疏茲督臣委官賚回前稿未曾畫題謂尙須斟酌則臣前疏已發疏入上令原審宜思恭之尙書張鵬翮等察審諭廷臣曰覽張伯行此疏與噶禮不和可知爲人臣者當以國事爲重協心辦理因不和而致公事兩相矛盾可乎朕綜理幾務垂五十年凡事無不經歷未嘗令一人得逞其私此疏但批知道了置之尋伯行以衰病乞罷得旨張伯行操守清潔立志不移朕所深悉江蘇重地正資料理不得以衰病辭十月張鵬翮還奏虧空銀兩前任巡撫于準與宜思恭應賠十六萬其餘以俸工抵補上諭廷臣曰江南虧空錢糧兩次命張鵬翮察審朕意地方雖有不肖之官未必侵蝕至數十萬兩前朕南巡時凡沿途所用悉出內帑未嘗絲毫取諸官民督撫等不遵朕志肆意挪用以致虧空朕若不言內外諸臣誰敢言者彼時任



事之人今離任者已多若責之新任官賠補朕心實有不忍又諭曰朕之巡幸原以爲民卽用帑百萬亦所當然著將朕諭旨全行鈔錄令督撫察明南巡時所用數目大略具奏五十年五月諭戶部曰張伯行奏江蘇等府州縣無著錢糧十萬八千兩有奇此項錢糧朕知之甚悉係地方官因公動用未敢申明之項若著落後任官賠補必致科派擾害百姓其原議俸工扣抵之數著全行豁免十月疏言江南辛卯鄉闈榜發後議論紛紛九月二十四日有數百人擡擁財神入學宮謂因科場不公臣未敢隱匿時正考官左必蕃亦疏言出闈後輿論喧傳吳泌程光奎二名平日不通文理上命張鵬翮會同督撫察審五十一年正月伯行請罷會審疏言鄉試前風聞總督通同監臨提調攬賣舉人迨後取中不公正考官左必蕃疏中有或發督臣嚴審語又風聞總督欲索銀五十萬兩保全無事及揚州會審旣得副考官趙晉與程光奎交通關節實情旋得安徽布政使馬逸姿書役家人爲吳泌行賄供證督臣震怒輒令夾脛箝口尙書張鵬翮因其子張懋誠現任安徽懷寧知縣恐遭陷害亦瞻顧掣肘總緣督臣權勢赫奕莫敢撻其鋒臣不敢顧念身家雖言出禍隨亦所不惜况逢聖明在上督臣雖甚殘險未必能加害無

辜亦何憚而不言仰祈敕令解任一併發審俾舞弊之人失所憑藉承審之官亦無瞻顧庶真情得出矣伯行既上疏遂移牒噶禮暫停會審噶禮亦疏劾伯行前冬泊船上海阻臣出洋恨臣不從遷怒船埠張元隆陷以通賊牽連監斃罪一上海知縣許士貞誣良爲盜伯行因與同窗好友始終袒護淹禁無辜久不省釋罪二臣嚴飭所屬力行保甲稽察匪類伯行與陳鵬年揚言臣查富戶竟寢不行罪三蘇松道臧大受所屬被盜七案皆捏稱大受因公出境徇私作弊罪四蘇松糧船遲誤奉旨明白回奏伯行飾詞欺誑罪五刑部行提戴名世案內作南山集序之進士方苞係伯行好友竟不差一官一役提拏且南山集版方苞收藏蘇州書肆印行三千餘部伯行並不追問罪六命盜案件蘇松最繁伯行專以賣書著書爲事性多猜忌心更糊塗混行翻駁不能清理濫收詞狀拖累株連罪七上命俱解任下張鵬翮及總漕赫壽察審尋奏趙晉與吳泌程光奎賄通關節擬罪如律噶禮劾伯行不能清理案件是實餘皆督撫會銜題咨舊事方苞由伯行遣員料理南山集刻版係在江寧起出噶禮苛刻應降一級留任伯行劾噶禮攬賣舉人索銀五十萬兩事全虛應革職贖徒上切責張鵬翮赫壽掩飾和解命尙書穆和

倫張廷樞再往嚴審九月覆奏噶禮無罪伯行畏縮不出洋反誣陷船埠張元隆通盜又誣奏督臣應革職九卿等議如所擬上曰張伯行居官清正天下之人無不盡知但才不如守噶禮雖才具有餘而性喜生事未聞有清正之名朕於滿漢諸臣毫無異視一以公正處之噶禮屢次具摺參張伯行朕以張伯行操守爲天下清官第一斷不可參手批不准此所議是非顛倒著九卿詹事科道會同矢公據實再議翌日召九卿等入諭曰張伯行居官清廉其家亦殷實人所共知噶禮操守朕不能信若無張伯行則江南地方必受其腴削一半矣此互參一案初次遣官往審爲噶禮所制不能審出及再遣往審與前無異爾等能體朕保全清官之意使爲正人者無所疑懼則海宇長享昇平之福矣遂命革噶禮職伯行復原任十二月疏言東南漕運定例冬兌冬開正月以內過淮實藉回空船依期到次受兌方可督押開幫自前任總漕桑額題請展限二月以內過淮雖冬兌冬開之例原未更易而淮限一寬官民率皆緩視因循自誤且民間糧米冬月收穫已畢催輸便易稍有遲延米多糶賣輸納無措不得受敲撲又運河之水沿塘田畝賴以灌溉必俟重運過完方敢開放今各省糧船有遲至五六月始過淮者抵通

不克如期回空勢不能早請自五十二年爲始江南重運仍照原限勒令正月內過淮并請敕倉場督臣於所給回空限單內列入定限時日令沿河州縣註明入境出境之期至淮申繳漕臣察驗到淮之後漕臣另給抵次限單亦令沿河州縣註明入境出境日期各船抵次不得出十一月申繳臣衙門察驗若回空如期到次而不能督催兌開及在淮以南遲延者議處巡撫及縣衛各官其在淮以北至通州重運及回空遲延違限者責成總漕倉場効處沿途各官凡運丁違例多帶貨物者依定例懲治自不致遲誤矣疏下部議以事關漕運應令總漕及兩江總督會同定議上特准照伯行所請行五十二年正月疏薦福建布政使李發甲臺灣道陳瓚前任國子監祭酒余正健堪任江蘇布政使疏至已有旨擢用湖北按察使牟欽元下部知之五十三年三月疏言洋面商船漁船與盜船同行難於識別請令商漁各船各刻某省某州縣第幾號船戶各給腰牌刻年月姓名籍貫巡哨軍船亦如之庶便稽察疏下部議行五月疏劾布政使牟欽元藏匿通洋匪棍張令濤請旨革職著追張令濤者噶禮所奏伯行拖斃之船埠張元隆卽其弟也時部檄搜緝海賊鄭盡心餘黨崇明鎮弁窮詰一船人照不符得張元隆爲之關

通領照狀以報伯行又上海縣民顧協一赴訴張令濤占踞房屋謂其舊爲噶禮幕客今匿牟欽元署中有水寨數處窩藏海賊伯行捕治張令濤因奏劾牟欽元得旨革牟欽元職下總督赫壽察審赫壽奏顧協一所控張令濤與海賊合夥無證據牟欽元署中亦無張令濤上復命張鵬翮及副都御史阿錫鼎至河南審理鵬翮等奏張元隆張令濤皆良民伯行捏造無影之事誑稱海中有賊請革職審理上責鵬翮等不能盡心審明原委令再詳審並命伯行明白回奏五十四年四月伯行疏言臣爲綏靖海洋起見急欲杜漸防微張元隆雖報身故而金多黨衆造船出洋人人可以冒名處處皆能領照久經審供題明在案至張令濤一犯原據顧協一首告若通洋不實顧協一律應坐誣乃牟欽元庇匿張令濤致懸案莫結且張令濤之在藩幕係其子張二所供縱非通洋亦係豪惡臣爲地方大吏焉能置之不究今惟靜候審訊五月鵬翮等請旨革職解任審理從之七月奏顧協一張令濤已就控爭屋產事定讞牟欽元應復職伯行因前在上海坐漏船懷恨船埠誣陷良民誑奏海賊甚多挾詐欺公安生異議應斬法司議如所擬上命免罪來京十一月命南書房行走十二月署倉場侍郎五十五年閏三月同倉場侍

郎荆山副都御史阿錫鼐等奉詔監視順天永平二府屬賑濟五十六年八月充順天鄉試正考官五十九年十二月授戶部右侍郎管錢法仍兼管倉場六十年二月充會試副考官十月乞假省母十二月來京命陳奏武陟縣決口情形堵築事宜下所司知之世宗憲皇帝雍正元年九月擢禮部尙書賜禮樂名臣匾額二年四月命赴闕里祭崇聖祠復乞假省母越一月還京先是由戶部遷禮部命仍管捐納軍需事至是詔陝西運糧至巴里坤悉作正項報銷停止戶部與陝西捐例諭嘉伯行與尙書田從典兩年以來辦理清正下部議敘各加二級三年二月卒於官年七十有五遺疏入得旨張伯行效力年久持躬孤介簡任秩宗恪勤供職忽聞病逝朕心深爲軫惻著加太子太保於卹典外加祭一次以示優卹舊臣至意遣大臣侍衛奠茶酒又命部寺漢堂官科道等官於諭祭日齊集出殯日往送賜諡曰清恪子師載以雍正元年伯行任戶部侍郎恩旨視一品例廕員外郎官至河道總督

趙宏燦 弟宏燮子之桓

趙宏燦甘肅寧夏人勇略將軍雲貴總督良棟長子也康熙十九年四月由廕生

擢寧夏總兵命率鎮兵隨良棟征賊時良棟已入蜀克成都逆孽吳世璠賊黨胡國柱王緒尤廷玉犯敘瀘永寧等處二十年三月宏燦剿賊於馬湖賊退走中都追至鳳凰村賊潰奔又追至觀音崖賊據險守官兵由懸崖襲其後斬首三百級擒八十餘人遂會總兵李芳述段登仕於清水河合追至新鎮黃茅岡賊三路來拒宏燦分攻自旦至晚大敗賊陣斬賊將沈明張文祥殺賊卒及墜崖死者二十人獲馬騾八十五奪回瀘永失陷兵民千八百餘人國柱等遁走五月兵至營經縣與良棟會良棟分隊前進宏燦繼之連奪關山象嶺抵大渡河會大軍平雲南事見良棟傳敘功授宏燦左都督二十二年調川北總兵二十四年三月宏燦以川北水土蒸溼瘡痢兼至請效力邊方得旨趙良棟父子效力行間勤勞素著准趙宏燦所請調補直隸正定總兵二十七年調黃巖鎮三十七年調南贛鎮明年遷浙江提督四十二年調廣東提督四十五年擢兩廣總督廣東和梢山爲翁源曲江英德三縣要區宏燦請添設千把總各一員領兵百名駐防又翁源縣龍眼岡亦應設防於提標撥給千把總及兵從之五十二年六月廣東米價騰貴宏燦與巡撫滿丕不據實陳奏部議並革職得旨降五級留任五十五年正月陞見御

製七言律詩賜之有久任封疆多歷年滇黔百粵凱歸韜之句上命宏燦回任及  
陛辭宏燦以久處炎海年力就衰奏請就近效力時宏燦弟宏燮爲直隸巡撫過  
保定相見十月授兵部尙書五十六年三月回京行至武昌病卒賜祭葬諡敏恪  
宏燮良棟次子初任直隸完縣知縣遷南路捕盜同知康熙三十四年授天津道  
踰年良棟卒襲一等子爵三十八年補直隸巡道丁母憂四十年再補天津道洊  
歷山東按察使布政使四十二年二月宏燮揭報前任布政使劉暉虧空庫項上  
命侍郎舒輅等往勘得實劉暉論罪如律十月宏燮擢河南巡撫四十四年四月  
疏言回回寨與韓羅灣一帶逼近黃河舊隄單薄難資捍禦亟宜加築下部議行  
尋調直隸巡撫四十八年三月疏言河間順德廣平大名等府屬州縣去歲秋收  
歉薄請暫動倉糧賑糶並緩徵丁銀特旨俞允五十四年諭嘉宏燮撫直十年勤  
勞供職實心任事旗民輯睦盜案希少著加總督銜時詔立義學宏燮請增入學  
額數報可六十一年六月卒賜祭葬諡肅敏子之璧襲爵宏燮在任時虧空庫項  
命宏燦子郎中之桓署直隸巡撫料理伊叔未完事件雍正元年上以之桓居官  
庸劣解巡撫任仍令完補虧項嗣直撫李維鈞奏發回原籍令川陝督臣清查宏



燮家產五年甘撫石文焯參奏宏燮子之璧不能依限交納請革職嚴追上念良棟舊勲寬免追銀仍襲世職乾隆二十七年授兩淮鹽運使三十三年革職尋卒四十七年上諭趙良棟著晉封一等伯仍准世襲罔替以之璧孫曰似襲

### 范時崇

范時崇漢軍鑲黃旗人大學士文程孫福建總督承謨子也承謨殉耿逆之難時崇以廕入監讀書康熙二十三年授遼陽州知州二十八年遷廣西梧州府同知二十九年調南寧府同知三十一年遷直隸順德府知府三十三年調宣化府知府三十六年遷天津道四十年擢貴州按察使尋調福建按察使四十三年遷山東布政使四十四年擢廣東巡撫四十五年七月疏言高州府吳川縣屬碣洲一島原有田糧戶口載在版籍自康熙元年遷界戶遷田廢丁糧豁免無徵二十三年展界又因孤懸海外仍未給民耕種近奉旨酌改沿海營制碣洲島已設專汛遷民來歸故土已有譚福臻等九十餘家呈請復業應察明原額錢糧戶口聽開墾陞科下部議行十月上以兩廣額定原稅外各處餘費多於額稅以致歲欠正項錢糧命時崇會同巡鹽御史圖爾泰兼理鹽政上發函章諭以兩廣鹽政積弊

甚多朕以察得陋弊數條著交該撫查辦十二月時崇遵所發章內情節疏奏鹽政七條一鹽政衙門歲有羨餘十萬兩向歸鹽政有一種蠹胥名曰發收鹽政初任時任其播弄迨少知事理而一年差期將屆急公之心不勝營私之念徵羨餘而置正課於不問應將此項盡充公用其發收一役應革一鹽政到任卽遣內司承差坐守場口名爲緝私止知勒索致私鹽充斥查緝私責在文武官員無藉內司承差應革一卹商裕課無過於裁冗員運司職掌兩省餉課應與庫官仍留任任事其知事大使及潮州廣濟橋運同廣惠分司均屬冗員應裁查驗之任責之州府課銀徑解運司一運司向得羨餘六萬兩內應解河工銀萬兩銅斤水腳銀萬兩今鹽政羨餘充公其鹽政名下銅斤水腳萬兩應在運司羨餘項下支解餘三萬兩充公一行鹽地方文武員皆有規例名曰茶果應行禁革再犯以枉法贓治罪一兩廣場商無力養竈丁竈丁不得不售私鹽埠商不得向場買運民間又不得不食私鹽商人惟買鹽政大票以爲行鹽護符私鹽盛則官鹽愈滯請將運使庫銀借給三萬兩每府委佐貳賢員將竈丁所曬鹽盡行收買鹽價收放責成知府隨賣隨收官鹽得行課餉自裕一兩廣鹽埠惟連樂與廣濟橋最大利徒捏

商人名色賄鹽政承充總商倚勢恣私必應禁革令各州縣自募殷實土著具結保充疏入部議如所請鹽政運司所得羨餘解交內務府得旨廣東兵餉不敷此項銀兩卽存留彼處充餉餘如所議行四十七年三月疏言粵東濱海各州縣倉穀久貯易於霉爛省城八旗官兵需糧甚多請將近省州縣存穀酌量多寡折米六萬石運省支用其該年派撥額米秋成徵補間遇歲歉亦可動用賑濟下部議行十二月疏言前耿逆之變隨臣父范承謨殉難者五十三人內生員嵇永仁王龍光儒士沈天成及臣族叔范承譜俱偕臣父幽囚三載殉難死節前撫臣楊熙題請贈銜部以生員無追贈例議寢臣仰祈皇上特沛恩綸予以一命陪祀臣父祠堂以慰忠魂下部議生員嵇永仁王龍光應追贈國子監助教沈天成范承譜雖庶民無追贈例但係死節應追贈國子監學正並入祠陪祀從之四十八年五月疏言廣東連州總鹽額引行銷本州及湖廣之桂陽臨武藍山嘉禾四州縣樂昌總鹽額引行銷本縣及湖廣之郴州宜章興寧永興四州縣但連樂二州縣之引多於衡郴八州縣之額以致此壅彼缺請量勻十分連州樂昌行銷十分之三桂陽郴州等行銷十分之七又潮州惠州贛州三府俱行銷廣濟橋鹽此三府所

屬平遠鎮平程鄉興寧長樂五縣額引較多而惠州府屬之龍州和平永安三縣及江西贛州府屬之十三縣額引獨少不敷民食應將平遠等五縣引勻銷於龍川等十五縣贛屬十二縣內信豐龍南定南三縣接壤惠川距潮路遠難運應就近改食惠鹽又福建汀州府屬八縣內長汀一縣額引幾居通府之半應撥銷於寧化等七縣廣西靈川陽朔義寧三縣鹽引難銷應撥於易銷之全州灌陽興安三州縣商民均有裨益部議從之四十九年八月擢福建浙江總督時海上鄭盡心羽黨騷擾遠至錦州等處兵部檄沿海各省嚴緝五十年三月時崇緝獲盡心解京四月疏言兵糧計口授食刻不容緩本年夏秋不敷兵米萬七千七十餘石請於嘉湖二府屬捐米石內各移萬石貯省倉以敷兵米下部議行五十二年五月疏言臺灣屬三縣年徵稻米十三萬八千餘石除折支各營兵米外歲餘七萬石現存六十六萬三千餘石貯已十年易致紅朽請將新收者勻留二十萬石備三年兵米之用其四十六萬餘石出糶給臺灣俸餉從之八月又言閩省福興泉漳四府一年兩熟本年興漳早禾豐收福州歉薄晚稻則興泉雨未沾足福州得雨更遲恐來歲青黃不接時民食可慮請於江浙運米內撥給收貯米貴平糶得

旨汀南運米內速將五萬石運至福建米到日卽行平糶毋致浥爛五十三年三月陞見瀕行賜御製詩有棟樑祖幹家聲重蘭桂孫枝令譽清之句序云浙閩總督范時崇陞見來京朕每念伊祖爲開創宰輔伊父乃忠義名臣所以待之優重今因回任特書御詩餞送五十四年十一月授左都御史五十五年五月因祈雨不親到經大學士嵩祝奏劾得旨范時崇著降三級留任革去恩詔所得廕生五十六年四月授兵部尙書五十八年九月振武將軍傅爾丹請於莫岱察罕廋爾與鄂爾齊圖果爾各築設臺站特命時崇前往料理五十九年三月回京十月以疾乞休允之十二月卒

年遐齡子希堯

年遐齡漢軍鑲黃旗人由筆帖式授兵部主事累遷刑部郎中康熙二十二年授河南道御史巡視中城尋遷內閣侍讀學士二十七年遷宗人府府丞二十九年晉內閣學士三十年授工部右侍郎三十一年二月轉左十月授湖廣巡撫三十八年奏言湖北武昌漢陽黃州安陸德安荊州襄陽等七府應徵匠役班價等銀千餘兩自明季迄今年代久遠子孫遷徙亡絕缺額無徵有司或代爲捐解或派

累小民官民交困查江浙二省因匠班無徵歸地丁帶徵湖北事同一例請自康熙三十九年爲始亦歸地丁徵收每畝加增絲毫而賦無缺額官民俱免賠累部議從之四十年二月給事中馬士芳劾遐齡徇庇老病廢弛之布政使任風厚不入大計詔令明白回奏風厚來京引見嗣遐齡奏風厚辦事老成並無遺誤風厚抵京引見諭曰任風厚尙未衰老可以辦事著仍赴原任馬士芳奏參不實以言官免其議處七月遐齡疏參黃梅縣知縣李錦虧空地丁銀三千餘兩請革職究追從之尋黃梅縣民會集萬人閉城留錦不容去任命總督郭琇嚴審速奏八月琇奏言黃梅縣未解銀三千餘兩實係民欠隨於七月徵完知縣李錦並無虧空百姓因錦平日清廉聞其解任一時圍聚生員吳士光等許爲糾人赴省保留久始解散亦無違抗情形請令錦仍留原任士光等革去衣頂應請復還得旨凡官員去留之權豈可令百姓干預聚衆肆行之風亦漸不可長該督撫庸懦無能平時不能約束軍民及至事出專務遮飾苟且議結殊屬不合李錦居官雖優不可仍留黃梅之任著令來京於直隸附近補用吳士光等著解部發往奉天郭琇年遐齡俱降一級留任四十三年遐齡以病乞休允之雍正元年以次子羹堯平西

藏功加尙書銜二年復以羹堯平青海功加太傅一等公賜雙眼孔雀翎三年羹堯獲罪遐齡及長子希堯俱應緣坐諭曰年羹堯剛愎殘逆之性朕所素知其父兄之教不但素不聽從向來視如草芥年遐齡年希堯皆忠厚安分之人著革職免罪五年遐齡卒特恩還原職致祭一次希堯由筆帖式補授雲南景東府同知康熙四十五年遷直隸廣平府知府五十年遷大名道五十二年晉廣東按察使五十五年晉安徽布政使五十九年潁州知府王承勳訐告希堯需索規禮徇庇鳳陽府蔣國正將虧空捏民欠冒蠲侵蝕等款經總督常璉奏參命左都御史田從典等往鞠俱無證據失察國正冒蠲希堯應革職從之六十一年以布政使銜署廣東巡撫雍正元年實授四月疏報欽州澄海南海東莞等二十九州縣衛所開墾六十一年分田地一百四十二頃下部知之三年七月擢工部右侍郎十一月因弟羹堯獲罪革職四年正月授內務府總管七月命管理淮關稅務十二年加都察院左都御史銜十三年江蘇巡撫高其倬疏參希堯庇惡縱貪鞠實削職乾隆三卒年

黃秉中

黃秉中漢軍鑲紅旗人初由廕監生任兵部筆帖式聖祖仁皇帝康熙二十年授山東范縣知縣二十八年遷貴州黔西州知州尋內陞刑部員外郎三十四年遷吏部郎中四十年授監察御史四十一年五月疏言各部院具題事奉有諭旨必由內閣發科鈔然後施行惟綠頭牌摺子口傳諭旨即行不由內閣不發科鈔日後無從查考請嗣後於奉旨遵行後即錄原卷並所奏諭旨移送內閣封呈御覽如偶有錯誤敕令更正俱發內閣登記以備稽核又欽奉清字諭旨各衙門譯漢奉行恐字句亦有未符宜令原奏官員送內閣繙譯遵照傳鈔疏入下部確議部臣以事涉繁瑣格礙難行議上得旨凡口傳諭旨及綠頭牌摺子啟奏事件著各衙門於每月終彙開奏覽四十四年二月疏言科道官由滿州漢軍陞補者大抵積俸二十餘年漢人一爲知縣俸滿三年行取到部即得考選科道殊覺太驟請嗣後行取知縣先以六部主事用俟練習有年始許考選上閱奏諭大學士曰御史黃秉中條奏行取知縣即補科道未免太過此言誠當下九卿詹事科道會同確議議如所請著爲例六月遷內閣侍讀學士四十七年十月擢內閣學士值浙江水災命往同巡撫賑饑十二月授浙江巡撫四十八年七月疏言寧波紹興等



處連歲歉收米價騰貴計惟招商可平而溫台二府豐收米賤格於出洋之禁請許商民由內洋販運以濟寧紹從之四十九年署總督事同提督王世臣疏報盜劫龍游縣村莊爲官兵追逐逃至遂昌縣山中處州右營都司張朝臣率兵搜剿遇盜六七十人抵拒以槍刺腹死隨有金衢兩協官兵齊至捕盜斬殺殆盡疏下兵部議部臣言盜夥六七十人非尋常盜案可比且都司已槍刺殞命而兵無一損傷顯有隱報情弊上命遣部院賢能司官一員往會巡撫將軍副都統至都司張朝臣陣亡處詳察情由議奏於是兵部郎中察爾欽等會勘奏言隨張朝臣之兵丁張斌同時陣亡潘文彩傷重致死並有烏槍兵五人因失火藥發焚死部議張朝臣張斌潘文彩予卹如例疏防及救援不力隱匿不報各官治罪有差秉中不察劾應降一級留任上以秉中前此奏報不實命降五級戴罪圖功九月調福建巡撫五十年六月同總督范時崇提督監理以泉州盜陳顯五等結夥二千餘人搶掠永春德化漳平大田等縣居民入奏上曰督撫提鎮等平時不能撫卹百姓訓練兵丁及事出又不能相機卽行剿撫縱容賊盜滋蔓騷擾地方肆行搶奪又遲延日久始行奏聞反稱百姓不廢耕織照常安業凡強盜竊盜合夥至三四

十人百姓尙且畏懼逃避今數逾二千豈得謂百姓不廢耕織安居舊業乎明係掩飾誑奏下部嚴察部議治罪革職有差命革監理職免治罪秉中與范時崇免革職降五級戴罪效力十月因前任浙江巡撫時不効奏糧道陳鑾改折漕糧事革任罰賠五十一年三月命以子牙河分司效力三年期滿直隸巡撫趙宏燮舉秉中自備工料修防隄岸俱各穩固下部議敘給還原品五十七年五月卒長子廷鑑次子廷鈺三等侍衛三子廷桂官至大學士世襲三等伯別有傳

鄂海

鄂海滿洲鑲白旗人姓溫都氏由筆帖式授內閣中書洊陟宗人府郎中兼佐領康熙三十六年聖祖仁皇帝親征噶爾丹鄂海先赴寧夏儲備牲畜駕至寧夏會陝西按察使缺命於軍營辦事之科道部郎內開列具奏特簡鄂海任之諭曰初任外官者每於朕前奏言潔清其身以圖報恩及莅任後輒背其言朕於從官二十餘員內簡爾爲按察使爾當益勵素行也三十七年遷陝西布政使四十年擢陝西巡撫四十二年十一月上幸西安閱兵以滿洲及綠旗兵皆善射鄂海與將軍博爾濟總督華顯並賜囊韃弓矢及御書扁額貂皮冠服加一級十二月詔於河

南府儲積米穀豫備山西賑貸並命督撫等會勘由黃河輓運事宜明年三月會勘三門砥柱溜急灘多舟行甚險應自河南府陸運至陝西太陽渡乃以舟運四月鄂海又奏勘閱渭河惟自寶雞至郿縣一百四十餘里水落時重載難行郿縣以東河深水平重船可以輓運疏下部議渭河與山西之汾河河南之賈魯河並令巡撫設法挑濬四十九年十月擢湖廣總督五十一年五月疏言臣前赴鎮筸閱視邊界聞邊外紅苗恃強滋事雖經永順土司招撫並未納糧乃令總兵張谷貞辰州知府遲熾鳳凰營通判黃樹傳集苗目宣布聖主威德令其改過輸誠於是毛都塘等五十二寨頭目開具八百餘戶丁口赴武昌投順八月又報盤塘窩等八十三寨投順頭目續至得旨鎮筸生苗居深山之中自古以來並未向化鄂海等宣示朝廷德澤布揚聲威盡行招撫殊屬可嘉在事官兵交部議敘今紅苗等已輸誠削髮宜安插得所從容化導教之禮義文武官弁其各仰體朕無分內外咸俾同享昇平宇內無不樂業之意五十二年四月上以鄂海曾任陝西才具素優兵民性情俱所熟悉調爲四川陝西總督十月疏言甘肅洮岷邊外大山生番悉歸順得旨洮岷邊外並無生番或係與外藩蒙古王貝勒貝子公台吉等納

糧之人不可止以投順爲美名其事甚有關係當再行詳察尋奏大山在洮州東南近土司楊汝松界外非蒙古納進番人今既率屬歸化請卽以楊汝松管理又疏言四川建昌鎮屬會川營界外涼山番甘阿木哨率屬歸順願每歲貢馬四匹請給職銜其所屬三千餘戶仍令管理五十二年正月疏言去歲甘肅所屬靖遠固原會寧諸處夏田少雨秋禾失收疊奉恩諭全免五十二年錢糧又經撫臣岳拜請動倉糧賑卹亦奉旨允行已遵照籌辦外惟是甘肅山高地冷歲止一收民無儲蓄其被災戶口或借或糶或賑三法並行災民方得安堵且春夏間青黃不接小民謀食無由宜乘春和時耕種若無籽粒牛具田畝坐荒秋收又復無望請於被災等處乏食窮民自二月至六月止日給糧大口三合小口二合以資養贍其有田地而無力耕作者每畝給糧五升每頃給銀三兩以爲籽本令所在道府等官確察妥辦諭令竭力耕種至流移未歸者臣與撫臣捐資資送回籍後如屋宇傾壞令地方官捐修安插十一月以朝邑縣與山西蒲州接壤疏請將同州州同及潼關營千總移駐以資彈壓事並下部議行五十六年十月四川巡撫年羹堯剿撫越嶲萬阿羊叛番奏繳土百戶印劄並奏把總皮登榜被射身死部臣以

所繳印劄未聲明西糾土百戶阿卡何往又皮登榜被射情節前後所奏不符令鄂海確察尋奏土百戶阿卡因大兵進剿畏懼潛逃已經招回西所至年羹堯前奏皮登榜督造浮橋中箭身死今據提臣康泰等咨稱實係身先渡河奮擊叛番被賊射斃乞敕部議卹賞疏下部議令川撫酌行給賞五十七年大兵征策妄阿喇布坦撫遠大將軍貝子允禩等率兵分駐西寧甘州莊浪豫備進剿鄂海奏撥西安藩庫銀四十萬兩解赴甘省協濟糧芻又奏撥平涼鞏昌寧夏貯倉米豆十萬石運赴蘭州充餉又府谷山丹等州縣衛以軍行所過奉旨免徵錢糧草束并請豁免一體運送軍需之陝屬葭州甘屬寧夏等二十八處丁糧以紓民力五十八年四月又言皇上軫念西陲百姓轉運急公特恩蠲免五十八年地丁銀兩以軍務未竣不及米豆草束第各省額徵類多折色惟甘省邊地銀數少而糧草多至平涼慶陽西寧涼州等府且有全徵本色者是沿邊軍需用力最多之地轉不得共沾實惠請將甘屬五十三四五六等年未完民欠銀糧草束一例蠲免使民盡力輸納本年額徵糧草以佐軍需則皇仁溥而民氣裕疏下戶部寢其議奉特旨盡予豁免五十九年五月固原提督金國正疏奏陝西兩年歉收百姓有流離

狀諭曰總督鄂海平昔居官亦優今因年老聲名漸不如前陝西兩年歉收之處並未詳悉上聞其令明白回奏鄂海尋奏西安等四府一州比歲豐稔惟延安沿邊堡所及甘肅涼州諸處歉收俱經題報所有五十七八兩年借給災黎銀米謹彙列實數陳奏疏入報聞六十年五月命鄂海辦理軍前糧餉而以四川巡撫年羹堯代爲總督十月疏言遵旨至甘州料理糧餉甘州等處山多田少所產糧草有限宜豫爲籌備請於河南湖廣運至陝西糧餉內撥米六萬石豌豆四萬石半送甘州半送涼州從之十二月諭議政大臣曰吐魯番現駐官兵其可種之地甚多總督鄂海在軍營無事可卽往彼效力六十一年六月靖逆將軍富寧安請派大臣專司吐魯番種地積糧上命鄂海同副都統克什圖管理遇有軍務一體調遣世宗憲皇帝雍正元年十月以原品休致仍在吐魯番種地效力三年四月卒

許汝霖

許汝霖浙江海寧人康熙二十一年進士由庶吉士授編修二十六年充四川鄉試正考官二十九年遷贊善尋提督江南學政三十三年四月任滿將還疏言教職雖微而訓迪士子責任綦重凡由俊秀捐授者應改爲州縣佐貳又疏言文章

一道關乎世運必使風氣操於上而後可化成乎天下自末學小儒羣尙私刻元魁之墨主考之評竄改假捏盡易本來甚至有一榜數十人一稿數十篇總非本人所自爲之耳目易淆好惡錯雜流弊遂以日滋近奉諭旨各省鄉墨禮部悉照原本刊刻頒行臣愚謂會試額數較少亦應刊四書經藝各省試牘仍由學臣頒刻此外概行禁止則士之習舉業者不致雜亂其心思兼可研窮乎經史亦訓迪人才維持風教之大端疏並下部議行又疏言生員不許結納官府法至嚴也康熙二十五年禮部議行江南學臣李振裕條奏以禮生冒濫衣頂選擇在學生員文行兼優者充補大學六名小學四名五年更易歲科試作爲優等以重典禮杜倖冒而歷久弊生凡地方大小各官到任落學祭壇講約朔望行香皆生員爲鳴贊情面旣熟奔競遂滋或私相夤緣或公行請託借結交官長以恐嚇鄉愚一不肖倡之而效尤者踵相接矣臣受事三年嚴行選擇嚴行懲誡而借口趨踰實難悉禁請敕部議裁其額惟萬壽令節元旦冬至春秋二丁仍用生員贊襄大典其餘有陰陽生及禮房執事不必衣頂皆可鳴贊一概不用生員則賢者閉戶潛修不肖者公庭罕至矣事下部議自後生員贊禮大學亦不得過四名停歲科試作

爲優等之例餘如所請是年遷侍講三十五年充順天武鄉試正考官三十八年轉左庶子遷侍講學士四十年轉侍讀學士擢工部侍郎四十一年調禮部右侍郎明年二月充會試副考官六月轉禮部左侍郎先是三十八年十二月上以江南學政張榕端浙江學政張希良居官平常命發往河工效力並諭以後分理河務酌遣曾任學政各員至是汝霖奉旨出任子牙河分司自備工料修築大城靜海青縣河間獻縣所屬漳釜滹沱諸河各隄三年期滿直隸巡撫趙宏燮入奏得旨仍以侍郎用四十六年二月補戶部右侍郎四十八年二月遷禮部尙書四十九年十二月以老乞休五十九年八月卒於家

慕天顏

慕天顏甘肅靜寧人順治十二年進士授浙江錢塘縣知縣遷廣西南寧府同知聖祖仁皇帝康熙六年遷福建興化府知府九年擢湖廣上荆南道福建總督劉兆麒奏天顏舊治錢塘多惠政士民至今思之及守興化奉使臺灣熟悉邊海情形於建造臺寨修葺戰船諸務殫心經理請調閩興泉道得旨俞允尋擢江蘇布政使十二年丁繼母憂總督麻勒吉巡撫瑪祐奏天顏廉明勤敏清理積年逋賦



剷除挪移諸弊以條款紛如尙未報竣請令在任守制部議從之十三年正月天顏入覲疏言江南田地錢糧有隱占詭寄諸弊臣莅任後飭各州縣通計田額均分里甲每甲若干編有定數以均賦役又因科則不等所刊由單小民未盡通曉應立徵收截票之法計每戶實徵錢糧分作十限於開徵日預給限票俾民自知應輸若干依限完納截票其逾限未截者按數催比吏不欺而民不擾第恐日久奉行不力乞諭部議行以期永遵又獄囚無親屬饋食者請月給米三斗疏下部議並著爲令十五年七月擢江寧巡撫十一月疏進錢糧交代冊上諭曰蘇松等處錢糧浩繁向來挪墊混淆慕天顏爲布政使後實心任事竭力清釐有裨國計據奏交代貯庫銀兩甚多款項清楚深爲可嘉嗣後布政使交代時應以此爲式十六年三月以節減驛站錢糧加兵部侍郎留任舊例有司侵盜公帑限一年完納逾限者遣戍財產入官天顏疏請於發遣前完納者仍貰其罪又言各省獄囚有因逸犯株連本無罪名而待質已三年者請卽於秋審時彙覈開釋皆得旨允行是時大將軍貝勒尙善討逆藩吳三桂於湖廣請以烏船濟師天顏奉詔督造四十艘遣送岳州下部議敍應加三級得旨慕天顏自簡任巡撫以來實心任事

勤勞茂著深爲可嘉著從優加太子少保兵部尙書仍兼都察院右副都御史授爲從一品十七年詔舉博學鴻儒天顏薦進士黃與堅教諭汪楫等並得旨召試與堅授編修楫授檢討十九年疏言江南上年苦旱今夏淫雨連綿河流四溢惟附近之吳淞江劉河諸州縣旣溢旋消幸不重困宜與東南賴震澤轉洩西北全無出水之路故受災倍於他邑若常熟武進江陰金壇等縣出水要口在在湮塞遂致積雨成壑先擇其工易費簡者次第勸民疏濬惟常熟之白茆港爲長洲崑山無錫諸水東北出海要道武進之孟瀆河爲丹陽以東宜興金壇以北諸水歸江要道請動帑疏濬兼可寓賑於工詔允所請於是濬白茆港自常熟支塘至海口四十三里濬孟瀆河自武進奔牛鎮至江口四十八里各建閘以時啟閉費帑銀九萬有奇初天顏任布政使時議濬劉河吳淞江淤道巡撫瑪祜奏行之又自疏請減浮糧除版荒坍沒公占田地額賦部議令確勘版荒坍沒許豁除二十年疏請募民墾版荒六年後起科部議如所請時守令挪移官帑相率徇隱有鎮江知府高德貴承前任虧帑數萬兩閱久未盡補旣調揚州府以他事劾罷旋病歿天顏檄追草豆減直銀七千餘兩於家屬京口防禦高騰龍德貴族弟也商之參

領馬崇駿以天顏浮冒奏銷諸款訐於將軍楊鳳翔副都統張元勳置弗理總督阿席熙旋劾崇駿騰龍婪取事上命兵部郎中圖爾宸刑部郎中鍾有德會天顏鞠勘崇駿騰龍遣人叩閭訟天顏奏銷浮冒惡其訐告構陷罪款唆總督劾奏詔圖爾宸鍾有德質訊定讞下部覈議崇駿騰龍婪取事實論絞天顏浮銷草豆價因戶部覈減七千餘兩諉罪於無產可抵之已故知府高德貴降三級調用仍賠銀得旨如議先是嘉定知縣陸隴其以才力不及部議降調山天顏疏劾之左都御史魏象樞摘其疏中操守稱絕一塵德有餘而才不足語謂今之有司惟守與德爲難耳既知其才與德矣何不卽留之以長養百姓請嚴飭督撫大破積習勿使廉吏灰心貪風日長會有詔舉清廉官象樞遂舉隴其事詳隴其傳至是天顏將去任疏述軍興以來徵發絡繹應時立辦遇連歲災荒竭蹶撫循自謂夙夜冰兢精白乃心不意突遭誣訐幸蒙睿慈鑒宥不加嚴譴僅予降調感泣無已上曰慕天顏自任巡撫以來未聞有清廉之名疏內稱夙夜冰兢精白乃心殊爲不合著嚴飭行二十三年二月起爲湖北巡撫諭之曰爾前任巡撫未能潔己率屬曾經申飭今宜痛改前非廉謹自持以副任使之意九月調貴州巡撫二十六年二

月擢漕運總督十二月疏言京口至瓜洲漕船往來風濤最險宜做民間渡生船式官設十船導引護防部議以非例不准上曰朕南巡時見京口瓜洲往來人衆備船過渡裨益良多其如所請行天顏又疏列江南江西累年未完漕項銀米數請恩貫得旨盡免康熙十七年以前積逋二十七年正月疏言皇上特發帑金濬下河海口消積水以救災黎甚大惠也又以治河事宜奉行尙未盡善命臣與督撫諸臣會同殫心料理乃去年八月河臣靳輔先具改圖之疏請築高家堰重隄束水以出清口復欲分洩黃河入海臣與督臣董訥撫臣田雯咸謂宜修舊隄盡塞減水壩疏暢清口合黃刷沙歸海爲要策迨廷議再上聖明洞照特命尙書佛倫熊一瀟科臣達奇納趙吉士會同勘議臣極言重隄必不可恃惟修築高家堰堅厚卽可閉塞減水各壩永杜水患又以黃水挾沙而行今從毛城鋪等處浸入諸湖若年深月久濁流淤沙勢必墊高洪澤湖底故毛城鋪閘壩斷宜堵塞時佛倫欲從臣言定議而科臣趙吉士謂必須靳輔擔承始可定稿輔言修築高家堰非十年之力不可成功佛倫乃有高家堰險處再築月隄之議臣維高家堰障遏全淮前人修築著有成效何獨今日不能加築完固況重隄旣估四十萬兩月隄

勢必再估二三十萬以如許經費豈不能并力堅築舊隄乃故難其說而待十年之久耶若下河海口各工因水鄉低窪時借宣洩衆論仍濬白駒丁溪二處已定藁矣忽改議盡停佛倫等攜藁至前途不知所改又奚若至屯田一事靳輔疏稱額外新淤河湖灘地招民屯墾多丈占民間熟田督撫二臣業已疏劾當勘河之日沿途百姓又紛紛訴告故佛倫亦謂必當停止而於疏藁中民田作爲屯田及屯官苦累小民句各爲竄改則又瞻顧河臣者也謹據實密陳得旨九卿詹事科道嚴察議奏會靳輔已爲御史郭琇陸祖修等交章劾罷靳輔亦劾天顏與見治下河之侍郎孫在豐兒女媼親欲其建功故堅阻上流築隄事下九卿質問在豐降用天顏革職初靳輔議鑿中河謂閉塞支河之日使駱馬湖水匯流中河漕運永無阻滯天顏則謂中河不久卽淤徒費無益至是工竣上遣學士開音布侍衛馬武往閱還奏天顏禁止堵塞支河口於已進中河之漕船勒令退回上以天顏有意阻撓下法司逮勘天顏反覆申辨副都御史噶爾圖詰天顏訴辭先後互異及素與會治下河之直隸巡撫于成龍書往來商議河工狀成龍削加銜天顏坐奏事上書不以實擬杖徒上曰慕天顏前任江寧巡撫造送烏船曾經效力從寬

免罪三十五年卒年七十有三

阿山

阿山滿洲鑲藍旗人姓伊拉哩氏初由吏部筆帖式累陞刑部主事戶部員外郎康熙十八年授翰林院侍講學士充日講起居注官二十一年遷侍講學士二十三年轉侍讀學士二十四年十月充經筵講官尋轉光祿寺卿太常寺卿至通政使二十六年遷都察院左副都御史二十八年遷戶部右侍郎二十九年奉命察視畿輔賑務三十年四月駕幸多倫諾爾綏來歸喀爾喀部長命阿山與大臣明珠等會同頒賞閏七月轉左侍郎十二月詔發帑二十萬兩賑西安鳳翔二府遣阿山同內閣學士德珠前往驗給明年二月回京上曰聞被災之民有流於襄陽者今情狀何如阿山奏曰未曾至襄陽聞有至河南者自賑濟後人民安輯且正月兩次得雪不致流散失所上曰正月雖雪二三月雨水不調麥田亦未可望人民流於襄陽者甚多爾未知之耳尋諭大學士等曰阿山爲人庸劣奉差之事不能盡心凡事啟奏多涉兩可者著解任以郎中品級隨旗行走三十三年六月復用爲左副都御史九月命往宣化府監督餵養軍需馬匹三十五年二月上親征

噶爾丹阿山從五月師次克魯倫河噶爾丹望見御營驚竄克呼和碩計程百三十餘里上親統前鋒兵追擊期兩日至命內大臣阿密達爲將軍轄衆兵分四日程繼進以阿山及副都統瑚什巴沙濟爲參贊噶爾丹復自克呼和碩遁往特哱勒濟口遇大將軍費揚古軍邀擊大破之噶爾丹僅率數騎遠竄上追勦至託諾山班師擢阿山盛京禮部侍郎三十六年授翰林院掌院學士充日講起居注官及平定朔漠方略副總裁官又充經筵講官教習庶吉士三十九年五月授江南江西總督四十年三月上與大學士等論各省督撫諭及阿山雖任事未久居官亦甚善會安徽布政使張四教丁憂離任巡撫高永爵劾其在任時加派火耗挪移庫銀事下阿山察勘覆奏所加火耗及挪借帑銀皆充公用請免審擬上命詳晰再訊實情四十一年七月阿山奏言康熙三十八年皇上南巡不用民間一草一粒皆動正項錢糧豫備而大小各官惟恐供辦遲誤督撫等公議將司庫銀暫用張四教先後給發十一萬餘兩皆公議扣俸抵補者今訊問各官俱自承認臣不敢隱匿實情奏入上諭大學士等曰朕三次南巡所過地方蠲免錢糧稅課發出倉穀賑濟凡日用俱自京城備辦並未動用地方絲毫恐地方官藉端妄行科

派累民如有供給跟隨大臣官員者照軍法處斬諭旨甚明前阿山將張四教之案屢請停其審擬朕不允駁回今復奏稱虧空庫銀因南巡時動用張四教以庫銀私給各官阿山開釋其罪又不確究各官以何事支用殊爲徇情沽譽交部嚴加察議命漕運總督桑額鞫訊張四教罪款得實擬罪如律部議阿山應革職得旨從寬留任四十三年二月疏劾江西巡撫張志棟舉薦不公舍清廉素著之九江知府朱儼品行素優之彭澤知縣吳士鏹而舉居官平常之袁州府同知馬斌貪縱不法之南昌令王廷對擅自定稿且致書囑勿改易事下部議張志棟與布政使李興祖按察使劉廷機及道府等官俱革職阿山尋疏言李興祖劉廷機等呈辦大計舉劾皆係張志棟隨其喜怒任意增刪並非司道附和請與開復於是給事中許志進疏劾之曰阿山與張志棟意見乖違具疏題參部議以舉薦不公將兩司以下一同革職阿山復爲藩司李興祖臬司劉廷機道員韓象起等題請開復竊以徼倖之端不可開欺詐之風不可長張志棟傲慢自恣其計冊舉劾司道等當時瞻徇不言事後違例置辯謂無賄賂請託誰其信之若倖邀開復則勸懲之重典止屬虛文賞罰之大權不難假借督臣操縱自如恩威已出將來人盡



效尤顛倒是非變亂黑白弊端百出其害難言乞敕嚴究情弊以昭法紀疏下部  
察議議未上阿山疏辯許志進所劾誣妄且許志進係淮安漕標營卒之子素行  
不端誓爲張志棟報仇許志進又追論阿山徇庇張四教及收屬員賄賂盜賣倉  
穀弗問貪淫惡蹟審虛縱妾父招搖生事諸款並下部察議部議許志進因訐奏  
逞忿臚款應革職阿山妄請開復司道等官被言官糾劾不靜聽處分瑣屑訐奏  
應革任上命阿山仍從寬留任四十四年六月疏劾江寧知府陳鵬年以妓樓改  
建講堂製瀆聖諭及貪酷二款命會同漕運總督桑額河道總督張鵬翮審擬鵬  
年論斬詔陳鵬年來京在修書處效力十一月同桑額張鵬翮奏泗州西溜淮套  
開河築隄洩淮水至黃家堰入張福口會出清口事宜請駕臨閱視四十五年十  
一月授刑部尙書四十六年上臨視溜淮套諭從臣曰前阿山桑額等奏稱溜淮  
套另開一河出張福口可分洩淮水免洪澤湖之異漲保高家堰之危險繪圖進  
呈今朕乘騎從清口至曹家廟見地勢甚高雖開鑿成河亦不能直達清口與所  
進圖樣迥乎不同且所立標竿多有在墳塚上者朕何忍發此無數枯骨耶卽飭  
張鵬翮罷其事及回鑿九卿議阿山與張鵬翮等均溺職論大學士等曰聞驗視

溜淮套之時張鵬翮桑額皆謂不可開因阿山主議乃列名奏請命革阿山尙書任五十一年革職江蘇布政使宜思恭因虧帑訐告總督噶禮等頻向索銀下張鵬翮察審尋奏阿山任總督時亦收取節禮應議處上以阿山年老免之五十二年三月遇萬壽慶典復原品逾年卒

噶禮

噶禮滿洲正紅旗人姓棟鄂氏何和哩之四世孫也由廕生任吏部主事洊陞本部郎中康熙三十五年五月聖祖仁皇帝親征噶爾丹至克魯倫河噶禮隨左都御史于成龍督運中路兵糧以第一運米赴行在軍營諭吏部曰噶禮運米迅速甚爲出力人亦可用以應陞之缺題補七月陞盛京戶部理事官三十六年二月遷通政使六月遷副都御史八月擢內閣學士三十八年七月授山西巡撫四十四年六月太原知府趙鳳詔發左都御史李杻私書噶禮以聞李杻坐鐫秩調任四十二年十二月諭大學士曰頃以西巡閱視汾渭二水直與黃河相通若於河南府儲積米穀遇陝西等省歉收卽可由黃河輓運以備賑貸但聞三門砥柱水勢極溜其如何疏通轉運之法卽令陝西四川總督博霽陝西巡撫鄂海河南巡

撫徐潮與噶禮會勘具奏明年三月奏言陝州東北四十里山石鑿分三澗中流爲神門南爲鬼門水皆洶湧惟北爲人門水勢稍緩下流百餘步爲砥柱再下爲臥虎灘溜急灘多舟行甚險請從陸撥運便四月噶禮奉命閱視汾河以河津至洪洞船皆可行自趙城至省石多灘淺非別製小舟難以運輓請仿楚省麻陽船式製造並咨取湖南熟練水手令土人學習濟運上命與鄂海徐潮所奏挑濬渭河汴河情形並下九卿議行之四十四年七月疏言河東修築隄堰原以保護鹽池舊例工力物料無不責之民間未免苦累若專責之商人亦恐僱覓人夫輾轉貽誤請令商人出料民人出力庶使民無置料之費商免覓僱之累疏下戶部議行先是潞安知府員缺噶禮以霍州知州李紹祖保題補授及紹祖使酒自刎噶禮匿不以奏上聞之命大學士九卿議罪擬革噶禮職得旨從寬降二級留任御史劉若鼎疏劾噶禮貪婪無厭虐吏害民計贓數十萬兩知府趙鳳詔爲噶禮心腹專用酷刑以濟貪壑下噶禮回奏得辯釋四十五年七月平遙民郭明奇等以噶禮縱庇貪婪知縣王綬赴巡視南城御史袁橋呈控袁橋以聞且列款入奏一通省錢糧每兩索火耗銀二錢除分補大同臨汾洪洞襄陵翼城臨晉聞喜崞縣

長治介休諸處虧帑外入已銀共四十餘萬兩一指修解州祠宇用巡撫印簿分給通省勒捐入已一縱令汾州府同知馬遴婪贓分潤一令家伶赴平陽汾州潞安三府勒取富民饋送銀兩一因詞訟索臨汾介休富戶亢時鼎梁湄銀兩一納孝義知縣杜連登賄題調洪洞及連登以貪婪被揭復曲加庇護指稱訪聞列款輕參一隱匿平定州雹傷不報請旨究贓治罪下噶禮回奏會山西學政鄒士璉代太原士民疏留噶禮御史蔡珍疏糾士璉職在衡文借代題交結撫臣朋比營私漸不可長且袁橋疏於七月十八日甫經奉旨是月二十日太原士民何以即行具呈顯係誣捏噶禮與士璉同城委爲不知是憎憤也知而不阻是倖恩也並請敕部議處八月噶禮回奏以郭明奇等屢經犯案脫逃赴京誣告並奏袁橋蔡珍以無憑之事誣陷狀下九卿詹事科道察奏郭明奇等交刑部治罪袁橋蔡珍以誣奏褫革降調有差士璉降級留任四十八年四月內遷噶禮戶部左侍郎七月擢江南江西總督四十九年十二月奉命會剿海上鄭盡心等與鎮海將軍馬三奇由吳淞口出海歷內外洋抵浙江定海界獲舟三及羽黨鄭茂余國樑等四十餘人因疏請每年遣兵駐馬跡山諸處邏海洋盜賊其浙江大衢山亦請遣兵

駐守並令浙江官兵每月會巡海島下兵部議應如所請得旨前者捕獲洋盜皆係住居內地人民並未盤踞島嶼盡山花鳥山諸島原無海港可以納船今欲遣兵屯駐大洋之中徒勞兵力且恐滋擾地方文武職官惟撫綏內地使奸民不得出洋行劫則民生自然安戢此奏無益不必行初噶禮之莅江南也歷疏劾罷江蘇巡撫于準布政使宜思恭按察使焦映漢督糧道賈樸知府陳鵬年等及巡撫張伯行抵江蘇任復以事忤噶禮至是伯行發辛卯科場不公事正主考副都御史左必蕃亦檢舉知縣王曰俞方名所薦之吳沁程光奎二名平日不通文理命尙書張鵬翮赴揚州會同噶禮及張伯行察審五十一年正月伯行疏劾噶禮曰督臣噶禮自履任後所轄兩省文武屬官逢迎趨附者雖穢跡昭彰亦可包荒藏垢守正不阿者雖廉聲素著難免吹毛索疵此久在睿照之中無庸臣再爲瀆贅最可異者今科鄉試盛傳總督通同監臨提調攬賣舉人迨後取中不公正主考左必蕃疏中有或發督臣嚴審語又風聞總督要銀五十萬兩保全伊等無事及揚州會審既得副主考趙晉與程光奎交通關節實情旋得安徽布政使馬逸姿書役家人爲吳沁行賄供證督臣震怒輒令夾脛箝口臣謂此或是實話當細加

研究若動氣不許說將許其說假話耶督臣始令鬆夾卽停審散去自有制科以來從未聞賄賂公行濫觴名器如是科之甚者督臣駐劄省城素矜明察豈得委爲不知曾向尙書張鵬翮云今科舉人一大半是買的人說都是副主考賣的似已知之最詳且確而不卽據實入告則督臣必有不欲明言之隱其弊不獨在副主考矣奉旨澈底詳察而必不肯詳察奉旨嚴加審明而必不欲審明其前之通同監臨提調攬賣舉人後之要銀五十萬兩保全無事非無稽之輿論矣況監生鄉試例由學臣錄科送試以防頂替乃程光奎以兩淮巨商頂冒蘇州府籍逕由督臣大收送入鄉場其營私壞法更彰明較著矣以通同作弊之人同爲奉旨察審之人真情何由得出故自督臣震怒之後要犯未提一名確供未得一句尙書張鵬翮因其子張懋誠現任懷寧縣知縣係安徽所屬總督得挾制之恐遭陷害亦瞻顧掣肘督臣竟忍負皇上隆恩擅作威福賣官賣法復賣舉人可謂惡貫滿盈貪殘暴橫難逃聖明洞鑒豈容久流毒害祇緣權勢赫奕莫敢撓其鋒以買禍仰祈敕令解任一併發審俾舞弊之人失所憑藉承審之官亦無瞻顧庶真情得出國法得伸矣噶禮亦疏劾張伯行曰撫臣張伯行前冬泊船上海港內止臣不

必出洋恨臣不從遷怒於爲臣僱募舵工之船埠陷以通賊牽連監斃其違旨逗遛挾私斃命罪一也上海知縣許士貞誣良爲盜伯行因與同窗好友始終袒護淹禁無辜久不省釋罪二也臣嚴飭所屬力行保甲稽察匪類伯行與陳鵬年揚言臣查富戶竟寢不行以致盜賊充斥鎮江府同知施世驊緝獲盜首伯行陰囑陳鵬年不行究賊致斃在獄反參施世驊誣良其縱盜殃民罪三也蘇松道臧大受所屬被盜七案皆捏稱大受因公出境冀免處分其徇私作弊罪四也蘇松糧船遲誤奉旨明白回奏伯行飾詞欺誑罪五也刑部行提戴名世案內作南山集序之進士方苞向係伯行好友竟不差一官一役提拏且南山集刻版方苞收藏蘇州書肆印行三千餘部伯行豈得諱曰不知乃並不追問其背恩黨惡罪六也命盜案件蘇松等處最繁伯行專以賣書著書爲事性多猜忌心更糊塗溷行翻駁不能清理兼之濫准詞狀拖累株連屢奉嚴諭申飭恬不知改其違旨病民罪七也更可怪者科場作弊奉旨會審臣開口一問案犯伯行輒謂不該如此大聲又謂不該如此審問臣恐較論失體因而緘口結舌幾及四旬乃伯行遂陰謀誣陷以私賣舉人得銀五十萬兩汚臣名節臣實難與俱生果有絲毫情弊當卽伏

斧鑕如伯行不能指出一說事過付見證則逞訐誣陷亦難逃國法也上覽張伯行及噶禮疏並命解任下張鵬翮會同總漕赫壽查審尋以考官趙晉王曰俞方名與吳沁程光奎交通關節夤緣賄賣論罪如律噶禮劾張伯行不能清理案件是實餘皆督撫會銜題咨舊事方苞由張伯行遣員解部南山集刻版在江寧起出均免議張伯行妄奏噶禮攬賣舉人應革職贖徒上切責張鵬翮赫壽掩飾和解瞻徇定擬遣尙書穆和倫張廷樞前往再讞下部覆核如所擬定議得旨噶禮雖才具有餘辦事敏練而性喜生事並未聞有清正之名其互參之案皆起於私隙聽信人言所致誠爲可恥且噶禮屢次具摺參張伯行朕以張伯行操守爲天下第一斷不可參手批不准諭旨現在此所議是非顛倒下九卿詹事科道會同議奏復諭九卿等曰噶禮操守朕不能信若無張伯行則江南地方必受其腹削一半矣卽如陳鵬年稍有聲譽噶禮久欲害之曾將其虎邱詩二首奏稱內有悖謬語朕閱其詩並無干礙又曾參中軍副將李麟騎射俱劣李麟在口內迎駕朕試彼騎射俱好若令噶禮與之比試定不能及朕於是時已心疑噶禮矣互參一案初次遣官往審爲噶禮所制不能審出及再遣大臣往審與前無異爾等諸臣



皆能體朕保全清官之意使正人無所疑懼則海宇長享昇平之福矣尋九卿等議噶禮張伯行並任封疆不思和衷集事互相訐參玷大臣職均應革任上命張伯行仍留原任噶禮依議革職五十三年四月噶禮母叩闕稱噶禮與弟色勒奇子幹都置毒食物中謀害伊命噶禮妻以別戶子幹泰爲己子縱令糾衆毀屋噶禮攜貲財與伊子移居河西務奸詐兇惡請正典刑下刑部鞫訊得實以噶禮身爲大臣任意貪婪又謀殺親母不忠不孝已極應凌遲處死妻論絞色勒奇幹都坐斬幹泰發黑龍江家產入官得旨噶禮令自盡妻亦從死餘悉如部議

阿靈阿子阿爾松阿

阿靈阿滿洲鑲黃旗人一等公遏必隆第五子初任侍衛兼佐領康熙二十五年襲一等公授散秩大臣三十年擢鑲黃旗蒙古都統三十一年調鑲黃旗滿洲都統三十三年以誣謗其兄法喀革職仍留公爵三十五年授一等侍衛三十六年七月復授散秩大臣九月遷鑾儀使三十九年遷正藍旗蒙古都統四十年擢領侍衛內大臣四十四年授理藩院尙書四十七年十一月與揆敘等先舉允禩爲皇太子爲上詰責事詳馬齊及揆敘傳五十五年阿靈阿卒次子阿爾松阿降襲

二等公五十七年十月擢領侍衛內大臣十二月授刑部尙書雍正二年十月上召大學士九卿科道等諭曰本朝大臣中居心奸險結黨營私惟阿靈阿揆敘爲甚阿靈阿乃溫僖貴妃之弟當年貴妃喪事停殯於朝陽門外阿靈阿舉家男婦在殯所守孝伊與長兄法喀素不相睦必欲置之死地皇考洞悉其奸而加誡飭阿靈阿兇惡益甚致干聖怒嚴行處分阿靈阿遂敢怨望皇考二阿哥之廢斷自聖衷豈以臣下蜚語遂行廢立乃阿靈阿揆敘借此機會攘爲己力要結允禩等同爲黨援肆無忌憚日夜謀爲造作無稽之談轉相傳達以致皇考聖心憤懣莫可究詰此朕與阿靈阿揆敘不共戴天之恨也伊自知罪惡深重爲國法所不容自是心愈奸狠縱恣酒色以致滅身實天誅之也其子阿爾松阿朕見其言詞舉動似可教導驅使諭以爾父罪惡甚大固難赦宥但爾能改悔前非誠心效力便爲幹父之蠱近日阿爾松阿不但無改悔之念其柔奸狡猾甚於其父若復優容則縱恣日甚不至法難寬宥不止朕前往盛京恭謁陵寢時見阿爾松阿曾祖額亦都之墓附在二陵之間當日君臣相遇恩義之厚禮待之隆千古罕有迄今令人景慕不已適伊族姪奉天將軍唐保住隨行朕願謂唐保住爾祖受國厚恩無

可倫比爾等宜效法爾祖輸忠盡力方不愧勳臣之後今阿爾松阿所行如此著革爵發往奉天守伊祖墓令其思過若能改悔前非安靜謹守則已倘不痛自懲艾尙敢逞其故智必置重典著將阿靈阿墓上碑文磨去改鐫不臣不弟暴悍貪庸阿靈阿之墓以正其罪昭示永久四年五月王大臣等議阿爾松阿與鄂倫岱固結死黨怙惡不悛效父行逆大干法紀應斬決其妻子沒入內府詔如所請乾隆元年諭曰從前表著阿靈阿罪惡令於伊墓前立碑其族人竟立於祖塋之前今伊墓已遷他處而此碑仍存其祖父係國家懋著勞績之人此碑可不必設立並釋其妻子歸旗籍

### 揆敘

揆敘滿洲正黃旗人大學士明珠子初任佐領康熙三十五年由二等侍衛特授翰林院侍讀三十六年充日講起居注官三十九年遷侍讀學士四十一年十月上駐蹕德州揆敘與侍讀學士陳元龍等奉召入行宮命各書呈字一幅上諭以臨摹之法諸臣請瞻仰御書上親書大字示之十二月擢翰林院掌院學士兼禮部侍郎四十二年命冊封朝鮮王妃尋教習庶吉士充經筵講官四十七年四月

遷工部右侍郎十一月上以皇太子既廢召滿漢文武大臣集暢春園諭令於諸皇子中舉奏一人諸臣莫敢言揆敘私與領侍衛內大臣阿靈阿散秩大臣鄂倫岱尙書王鴻緒議示意諸大臣書八阿哥三字於紙入奏命再盡心詳議次年正月復召諸大臣詰先舉允禩者爲誰諸臣莫敢對上詰再四羣指都統侯巴理岱上曰朕知之矣此事必侈國維馬齊以當舉允禩示意於衆衆乃依阿立議耳馬齊奏實不知上復問大學士張玉書玉書奏云會議日大學士馬齊先臣到班臣問所舉爲誰馬齊答云衆意欲舉允禩遂公同保奏上命革馬齊職並詰責侈國維事詳馬齊傳五十年揆敘轉工部左侍郎五十一年遷都察院左都御史仍掌翰林院事五十三年疏言近聞各省提塘及刷寫報文者除科鈔外將大小事件探聽寫錄名曰小報任意捏造駭人耳目請嚴行禁止庶好事不端之人有所畏懼下部議行五十六年卒賜祭葬如例謚文端雍正二年十月上召大學士九卿科道等諭曰本朝大臣中居心奸險結黨行私惟阿靈阿揆敘二人爲甚當年二阿哥之廢斷自聖衷豈因臣下蜚語遂行廢立乃阿靈阿揆敘借此機會攘爲己力要結允禩等同爲黨援肆無忌憚日夜謀爲造作無稽之談轉相傳達以致皇

考聖心憤懣莫可究詰此朕與阿靈阿揆絃不共戴天之恨也而揆絃挾其數百萬家貲與阿靈阿等合謀買囑優僮下賤每於官民讌會之所將二阿哥肆行汚蠛人所共知卽明理者聽之亦不能辨其事之真假無父無君莫此爲甚著將揆絃墓上碑文磨去改鑄不忠不孝柔奸陰險揆絃之墓以正其罪昭示永久乾隆二年揆絃兄性德之孫副都統瞻岱奏言臣祖性德叔祖揆絃附葬曾祖明珠墳塋內前立神道碑一向未勒書因揆絃身蹈重愆勒其罪狀彼時差往員役卽刻於神道碑之上今叩蒙誥命仰乞天恩將原碑改刻明珠官銜允之

### 鄂倫岱

鄂倫岱滿洲鑲黃旗人一等公佟國綱長子初任一等待衛康熙二十七年授廣東駐防副都統二十九年遷鑲黃旗漢軍都統十二月襲一等公三十一年員外郎馬迪奉命往諭策妄阿喇布坦抵哈密爲噶爾丹屬所戕詔各旗兵備調以鄂倫岱領火器營三十五年三月上親征噶爾丹議派中路兵鄂倫岱統領漢軍鑲黃正白兩旗火器營出古北口九月扈蹕巡北塞領左翼兵三十六年二月擢領侍衛內大臣五月仍兼鑲黃旗漢軍都統四十一年九月以失察家人在古北口

禁地放槍革領侍衛內大臣及都統授一等侍衛尋授散秩大臣四十七年十一月與揆敘等先舉允禩爲皇太子爲上詰責事詳馬齊及揆敘傳四十八年九月鄂倫岱仍授領侍衛內大臣五十九年命料理蒙古驛站六十一年十二月召還授正藍旗漢軍都統雍正三年三月諭曰鄂倫岱與阿靈阿原係允禩等黨惡之首罪惡較重當日允禩得罪在遙亭地方將伊門下太監審訊供指二人爲黨彼時二人在傍無言可辯顏色改變己丑年春皇考從霸州回鑾自行宮起行至南紅門言及鄂倫岱等結黨之事沿途相顧切責鄂倫岱隨行三十里聖怒未解鄂倫岱悍然不知畏懼朕語婁徵額聖躬初愈今復動怒當同奏懇及聖駕出而鄂倫岱乃悍然向前迎立以觸聖怒懇奏再三方解又在熱河時皇考聖體違和大臣侍衛等俱請安求瞻仰聖顏惟鄂倫岱並不請安日率乾清門侍衛較射游戲鄂倫岱悖惡多端每事干犯聖怒皇考行圍哨鹿時曾悉數其罪令侍衛鞭責之後令其出邊料理驛站伊到彼並不撫恤驛站之人反將驛務敗壞致蒙古等不能存活朕俱行寬免調回任用伊之祖父母厚加恩典鄂倫岱並無感激報效之念在朕前無一語奏謝又違例引見不應襲職人員身爲火器營統領操練從不親

到去年從俄羅斯回奏請將蘇尼特爲賊之台吉調來京師披甲朕諭以不如交扎薩克王管束鄂倫岱並不遵照朕旨乃自行繕寫內有云皇考時調來披甲朕心不忍等語其意以爲皇考欲行之事朕不忍行欲將歸過皇考之名加之於朕也朕有硃批諭旨降與阿爾松阿者令鄂倫岱轉交鄂倫岱於乾清門衆人前將諭旨擲地其極力黨護阿爾松阿此等頑悍之狀有是理乎朕召旗下大臣面諭近日大臣辦事已改從前積習可以不用誅戮朕心甚喜諸臣無不喜動顏色鄂倫岱略無喜容俯首冷笑昨偶問一原充侍衛之人鄂倫岱並未認識妄奏云此人平常朕責以欺罔鄂倫岱奏云我信口回奏蓋因伊私相依附之人未遂其願故將怨望皇考之心怨望於朕鄂倫岱之罪雖置極典不足蔽辜朕念係皇祖妣皇妣之戚其父又經陣亡不忍加誅著從寬發往奉天令與阿爾松阿一同居住既遠離京師庶不至遇事生波煽惑朝政四年五月王大臣等議鄂倫岱與阿爾松阿固結死黨怙惡不悛應斬決詔如所議尋命領侍衛內大臣公馬爾賽傳諭鄂倫岱之妻子兄弟族人等曰昔佟國綱因鄂倫岱不孝奏請誅之皇考特從寬宥授廣東副都統既而調回授內大臣襲公爵伊不念大恩忍於背負與阿靈阿

等結爲黨與保舉允禩擾亂國家又屢次觸犯其倨傲兇狠之狀旁觀無不痛恨種種過惡不可枚舉朕卽位以來施恩保全乃復與阿爾松阿結黨阻撓政事朕屢諭改悔毫無悛心朕尙不忍治罪發往盛京伊乃不知畏懼妄生怨忿是以照王大臣等所議將伊正法至所議籍沒鄂倫岱家產及妻子沒入內務府之處特加恩寬免其妻子兄弟族衆應感戴隆恩咸知朕意鄂倫岱子四長補熙官至綏遠城建威將軍次介福官至吏部侍郎

覺羅滿保

覺羅滿保滿洲正黃旗人康熙三十三年進士改庶吉士授檢討三十八年充浙江鄉試副考官尋充日講起居注官四十年遷侍講四十一年充山東鄉試副考官四十五年授國子監祭酒四十八年擢內閣學士充經筵講官五十年十一月授福建巡撫五十二年正月疏言福州府屬之閩縣福清長樂連江羅源興化府屬之莆田泉州府屬之晉江惠安同安南安漳州府屬之龍溪漳浦海澄詔安福寧州與所屬之寧德共十六州縣皆瀕海要地必得諳練庶務素著才能者治之而後人地相宜嗣後遇缺請於直隸各省卓異官內特簡調授三年俸滿陞用疏



下吏部議御史璩廷祐疏五方風土不齊秦晉燕趙之治未必可治閩越驟易其處官與民不相習安能遽展其才迨稍稍諳練已屆三年又陞遷他往於地方無益且懸缺久待事多貽誤滿保所奏未可爲例不如就本省擇員調補疏下吏部議滿保所指十六州縣非海濱煙瘴地方應循例歸部選上諭大學士等曰督撫爲地方得人起見懇切陳奏理所應然御史言其未可爲例似皆由卓異官不願往海濱苦地囑其於未經部覆之先條奏自然部議不准如此則權歸科道是明季惡習漸不可長其閩省十六州縣當揀選發往著九卿詹事科道再奏尋覆奏璩廷祐愚昧不達事理宜如滿保奏卽行揀選卓異官引見補授發往五十四年十一月擢福建浙江總督五十六年十二月疏言鹿耳門爲臺灣咽喉澎湖爲廈門藩衛安平鎮爲水師三營重地及海洋各岸口分別極衝次衝修築墩臺擇地建造營房巡防分守又言海船出入宜取船戶澳甲保結限以人數並禁漁船私載米糧軍器其臺灣商船往來令毋徑趨大洋悉赴廈門給照驗行除泊港貿易貨物照例納稅外其往江南浙江貿易者仍在江浙海關納稅免其重徵五十七年四月疏言福建駐防兵孳生衆多有壯丁未得披甲者二千餘名請挑選撥補

綠旗各標營缺食糧又言淡水雞籠山爲臺灣北界三面濱海西南夷舶往琉球日本者皆望北山爲準的且澳港深闊可泊巨艦百餘內爲肩豆門沃野百里番社衆多請增置淡水營設官駐防以扼臺灣之尾五十九年五月同浙江巡撫朱軾疏陳修築海塘六事一海寧縣老鹽倉北岸石塘自蒲爾兜至姚家堰凡築隄一千三百四十丈一石塘高二丈每丈累石十層塘外聚漲沙擁護隄根一開中小鹽淤沙使復江海故道一築上虞縣下蓋山石塘一千七百九十丈防南岸潮患一調委經理各官以專責成一江海潮神加增封號令有司春秋致祭諸疏俱下部議行六十年四月臺民朱一貴自稱明裔僞號中興王下大元帥聚衆倡亂於鳳山縣之姜園地遂陷臺灣府治總兵歐陽凱副將許雲參將羅萬倉遊擊游崇功等率兵剿擊並遇害五月丁卯滿保奏聞檄調水陸兵俱赴澎湖發運省倉及上游州縣各倉穀數萬石濟軍食自率標兵至廈門六月丙午提督施世驃與南澳總兵藍廷珍進征鹿耳門敗之於安平鎮壬子克復臺灣府治乙卯滿保於廈門奉到上頒招撫臺灣衆民硃筆諭旨曰朕思爾等俱係內地之民非敵衆可比或爲飢寒所迫或因不肖官員刻剝遂致一二匪類倡誘衆人殺害官兵情知

罪不能免乃妄行強抗其實與衆何涉今日遽行征剿朕心大有不忍故諭總督滿保令其暫停進兵爾等若卽就撫自原諒爾等之罪執倘迷不悟則遣大兵圍剿俱成灰燼矣臺灣祇一海島四面貨物俱不能到本地所產不敷所用止賴閩省錢糧養生前海敵占據六十餘年猶且剿服不遺餘孽今匪類數人亦何能爲耶諭旨到時卽將困迫情由訴明改惡歸正仍皆朕之赤子朕知此事非爾等本願必有不得已苦情意謂與其坐以待斃不如苟且偷生因而肆行擄掠原其致此之罪俱在不肖官員爾等俱係朕歷年贍養良民朕不忍剿除故暫停進兵若總督提督總兵官統領大兵圍剿爾等安能支持此旨一到諒必就撫毋得執迷不悟妄自取死於是滿保令興泉道陶範率都司守備等官往臺灣傳宣上旨閏六月丙寅諸羅縣溝尾莊民人楊旭等密約壯丁六百餘人佯與賊附宰牲結盟誘朱一貴等夜飲達旦俟醉臥收藏其鬪械四面合圍生擒朱一貴及其黨十二人獻施世驃軍前世驃與滿保先後入奏檻送朱一貴等至京磔誅於市滿保疏言若輩蠢動時惟淡水營守備陳策鼓勵兵民堅守汛地擒殺亂民范景文等以待大兵進援協同剿撫實爲奮力效忠上遂擢陳策爲臺灣總兵官又疏言前者

三月間鳳山縣民在檳榔林地方演劇羣飲知府王珍縱役需索妄拏多人朱一貴乘機倡亂於四月十九日樹旗聚衆臺廈道梁文煊及所屬官員一無備禦退回澎湖應革職提問其戴罪效力之遊擊張彥賢等應解任審擬得旨如所請行八月以臺灣颶風大作入奏諭曰臺灣地方官平日但知肥己刻剝小民激變人心及大兵進剿殺戮之氣上干天和颶颶陡發倒塌房屋淹沒船隻傷損人民此皆不肖有司貪殘所致也宜令速行賑恤以慰兆民世宗憲皇帝雍正元年八月兵部議臺灣陣亡總兵歐陽凱副將許雲等予加贈廕卹征剿有功之提督施世驃總兵藍廷珍等予世職敍錄有差滿保爲封疆大吏致匪類竊發失陷城池其聞變卽赴廈門調度有方應以功抵罪得旨滿保雖有失陷地方之罪但一聞事發卽親往廈門撫慰衆心遵依皇考指示調遣官兵七日之內克復臺灣著兼兵部尙書職銜先是上杭縣奸民溫上貴往臺灣從朱一貴得僞元帥劄付及木刻僞印仍還上杭縣將煽誘其鄉人從附聞朱一貴伏誅遂竄江西潛結棚匪數百人謀掠萬載縣城知縣施昭庭調集鄉勇同營汛官兵剿捕擊斃三百餘人生擒溫上貴與其黨十數人並正法於是大學士白潢尙書張廷玉各條奏禁戢棚匪

策敕所在督撫詳議滿保疏言閩浙兩省棚民以種麻種靛種煙造紙燒炭煽鐵等項爲業奸良不一令地鄰出保結五棚長連環互結若有爲匪不法事蹤跡可疑之人而弗首報者依律連坐則自不敢容隱州縣官於農隙時徧履各棚稽察如始勤終怠約束不嚴卽劾罷之浙江之鄞縣奉化等二十七縣福建之閩縣龍巖等四十州縣皆有棚民宜如沿海州縣例於通省內揀選才守兼優之員題請調補則治法與治人咸收實效矣疏下部議以福建通計六十州縣無棚民而又非沿海者僅十三縣難供四十七州縣之選補其約束事宜及浙江二十七縣揀補應如所奏行議上得旨嗣後凡有棚民之閩省州縣吏部將所出之缺於進呈月官履歷時具奏朕於月官內揀補發往二年十一月上諭大學士等曰凡督撫大吏任封疆之寄其所陳奏皆有關國計民生故於本章之外准用奏摺以本章所不能盡者則奏摺可以詳陳而朕諭旨所不能盡者亦可於奏摺中詳悉批示以定行止此皆機密緊要之事不可輕洩是以朕將內製皮匣發於諸臣令其封鎖奏達蓋取堅固密慎他人不敢私開也去年初行時諸臣尙皆敬慎近聞浙閩總督滿保山西巡撫諾岷等皆有信託之人在京私看奏摺及朕所批密旨朕待

諸臣推心置腹事事至誠言無不盡諸臣正當仰體朕懷謹慎周密凡有奏摺據理敷陳候朕裁奪何必委託其子弟親戚探聽消息以致洩露密旨藉生種種情弊此皆由諸臣不能自信又不能信朕其存心如此則密奏又何益乎嗣後傳其摺奏有事只照例具本其餘督撫大吏奏摺若有子弟親朋在京私開者一經發覺朕必將私開之人正法督撫等照溺職例革職決不寬貸滿保尋疏言摺奏不能慎密臣罪實無可道蒙恩不卽罷斥仍任海疆重寄遇有緊要之事必得具摺奏請聖訓方可料理無誤得旨滿保既知過懇切奏請准照常摺奏三年九月卒於官遺疏言新任巡撫毛文銓未至總督印信不便遠送謹交福州將軍宜兆熊署理并留解任巡撫黃國材暫緩起程如舊辦事得旨滿保向來居官雖無廉介之稱然才幹優長盡心辦事整飭營伍經理海疆實爲稱職昔年臺灣一事雖不能消弭於未然而能於七日之內卽行克復功過足以相抵朕卽位以來時加教誨滿保亦知奮勵矢志廉潔及至抱病沈篤之際尙能留心地方將黃國材留閩以待新任巡撫並將總督印務交與將軍宜兆熊其辦理俱屬得體今聞溘逝朕心深爲軫惻下部察例議卹時尙書隆科多獲罪法司鞠訊其家人得滿保餽金

三百狀及禮部議卹疏入上留中久之始發出諭曰滿保居官賢否衆論不一是以賜卹之典朕未卽定今細加訪察知其居官甚屬平常於吏治民生毫無裨益但諂媚隆科多年羹堯而已不必賜卹與諡

### 施世驃

施世驃漢軍鑲黃旗人靖海侯施琅第六子聖祖仁皇帝康熙二十二年隨其父剿海上鄭克塽委署守備取澎湖及臺灣敘功加左都督銜三十年授山東濟南城守營參將三十五年二月上親征噶爾丹天津總兵岳昇龍奏薦世驃隨征召試騎射命護糧運卽至奎素地復隨大將軍馬斯喀追賊至巴顏烏蘭地凱旋仍任濟南參將乞歸福建葬父得旨施琅久在海疆功績懋著其子施世驃頃隨軍進剿亦效有勤勞准給假葬親事畢卽回任三十七年遷臨清副將四十年擢浙江定海總兵四十二年四月上南巡御書彰信敦禮匾賜之時海上未靖世驃累出洋巡緝先遣裨將假商船以餌盜擒獲甚衆斬其首江崙四十六年上南巡詢及擒斬海盜事溫諭嘉獎賜戴孔雀翎四十七年擢廣東提督五十一年調福建水師提督六十年四月臺民朱一貴自稱明裔僞號中興王下大元帥聚衆倡亂

於鳳山縣之姜園地害臺灣總兵歐陽凱副將許雲參將羅萬倉遊擊游崇功等  
遂陷臺灣府治五月丙寅世驃聞報卽率所部進扼澎湖總督滿保檄南澳總兵  
藍廷珍等以師會衆議三路進攻世驃謂南路打狗港在臺灣正南南風正盛不  
可泊北路之清風隙去府百餘里餉運頗艱度彼必屯聚中路宜直搗鹿耳門時  
臺灣文武官相率退回澎湖惟北路淡水營守備陳策堅守汛地世驃遣遊擊張  
賊等赴援而自統師詣中路選勁卒乘兩小舟載旗幟先伏於南北港六月丙午  
抵鹿耳門外洋彼踞臺灣拒阻世驃登樓船督戰擊鼓發礮中其貯火藥器火大  
熾乃驚潰衆軍齊進兩港悉樹我軍旗幟彼不敢犯遂揚帆直渡鯤身鯤身者海  
沙也大舟不能過是日海水驟漲八尺戰艦乘風迅達遂復安平鎮明日斬獲四  
千於二鯤身辛亥又率衆八千來犯復擊敗之壬子遣守備林亮等由西港進遊  
擊朱文謝希賢林秀秀等越七鯤身由鹽埕大井頭諸路奮勇登岸並趨府城世驃  
身先將士指揮布陣若輩敗潰朱一貴竄遁遂復府治復遣參將林政等分路撫  
剿閏六月丙寅諸羅縣溝尾莊民人楊旭等誘擒朱一貴及其黨翁飛虎王玉全  
張阿三李勇陳印等以迎參將林秀縛送世驃軍前羽黨抗拒者先後擒斬略盡



餘衆就撫臺灣南北兩路悉平上詔部臣優敘有功將士賜世驃東珠帽黃帶四團龍補服九月世驃卒於臺灣軍營遺疏言臣父琅昔日蒙恩葬閩今臣骸骨願得與父相依並留臣幼子隨臣妻守塋近因剿賊借藩庫銀一萬兩容臣長子雲南知府士岡次子廣東遊擊廷勇變產交完疏入得旨施世驃效力年久勞績懋著沿海水師營務極爲諳練簡任提督實心盡職當臺灣亂民竊發卽調遣官兵親渡海洋屢次大敗賊衆七日內克復臺灣擒獲其首朱一貴等俾地方寧謐深爲可嘉海疆要地正資料理忽聞將星隕落朕心深爲悼念著贈太子太保祭例賜卹所借藩庫銀一萬兩免其償還其安葬福建及妻子留住之處并照所請行賜祭葬如典禮諡勇果世宗憲皇帝雍正元年八月兵部議敘克復臺灣功以應否給世職請得旨臺灣地方自古未屬中國皇考以聖略神威取之載入版圖居民朱一貴等倡亂占據臺地皇考籌畫周詳指授地方官員遣調官兵七日之內剿滅數萬羽衆克復全臺皇考當春秋高邁威揚海外功德峻偉官兵感戴皇考教養之恩奮勇攻取甚屬可嘉固不必援引前例後亦不得爲例茲仰副皇考從優議敘之旨官員現行議功敘加之外著概行各加一等提督施世驃統領大兵

徑渡海洋鼓勵將士屢經大戰擊敗其衆七日之內克復臺灣著給予一等輕車都尉世職尋以其子廷勇襲

藍廷珍

藍廷珍福建漳浦人由行伍於康熙三十四年拔補浙江定海鎮標右營把總明年遷中營千總二十九年遷温州鎮標右營守備四十五年遷左營遊擊哨巡屢擒洋賊五十七年八月擢福建澎湖副將尋授南澳總兵六十年四月臺灣居民朱一貴聚衆倡亂於鳳山縣之姜園攻陷臺灣府治總兵歐陽凱副將許雲等遇害廷珍奉總督滿保令赴澎湖與提督施世驃合師鹿耳門進敗之於安平鎮由西港仔登岸擊敗其衆克復府治分剿南北二路餘黨一貴遁諸羅爲溝尾莊民楊旭等計擒之官兵搜獲餘黨殆盡敍功予廷珍三等輕車都尉世職雍正元年擢福建水師提督賜花翎上以廷珍居心忠赤人材度量俱無可議惟操守未優屢加訓誡二年入覲諭令赴馬蘭峪叩謁聖祖仁皇帝景陵回京召對賞賚稠疊四年諭曰爾所短者惟砥礪清操耳近聞爾陛見回任實力梭改頓非前比朕甚嘉悅勉之七年二月賜御書福字并食品廷珍具疏謝恩諭曰爾近日聲名較前

更好但有人論爾頗存親戚瓜葛之私鄉井照顧之念卽此亦當改易十一月卒遺疏入得旨藍廷珍自簡任福建水師提督以來整頓營伍訓練士卒於海疆事務熟習諳練向年平定臺灣著有勞績前聞患病特遣御醫星往調治今聞溘逝深爲軫惻已降旨賞銀二千兩以爲喪事之資其應得卹典察例具奏尋議加贈太子少保予祭葬諡襄毅子日寵襲三等輕車都尉世職卒子元枚襲現官江南提督

### 富寧安

富寧安滿洲鑲藍旗人姓富察氏大學士阿蘭泰之子也其從祖尼喀納以隨征逆潘吳三桂有功得騎都尉世職康熙二十五年卒無子以富寧安襲尋授侍衛任佐領遷驍騎參領兼管火器營事四十一年授鑲紅旗滿洲副都統四十四年擢正黃旗漢軍都統四十六年改授都察院左都御史先是富寧安以副都統署倉場侍郎至是仍兼任疏言大通橋舊設滿漢監督四十一年裁併坐糧廳兼管今會清河糧務改歸坐糧廳經理勢難兼顧大通橋請復設監督事下戶部議從之四十七年五月遷禮部尙書仍命兼管倉場事四十八年二月聖祖仁皇帝諭

廷臣曰朕觀部院官員辦事優而又極謹慎如富寧安者未可多得能始終不易則善矣三月調吏部尙書又諭廷臣曰富寧安從武員擢用人皆稱其操守兼善是以授爲吏部尙書今部院中欲求清官甚難當於初爲筆帖式時卽念日後擢用可爲國家大臣自立品行也五十四年四月上以策妄阿喇布坦侵掠哈密敕西安將軍席柱甘肅提督師懿德等領兵援剿命富寧安率侍衛等前往總統調度諭之曰朕以爾堪信任故命爾前往軍機大事毋遲緩爾至彼有急應調遣之事不必請旨卽與將軍席柱商酌而行時賊兵二千餘逼哈密城駐防哈密遊擊潘至善率綠旗兵二百擊斬賊兵九十人生擒三人賊解圍潰走五月富寧安至甘州同席柱奏言吐魯番與哈密接壤係準噶爾咽喉要地當先取之大兵秣馬五旬應齊赴巴里坤從哈密之北大山後烏蘭烏蘇路進兵關展越山取吐魯番相機進剿上命富寧安至巴里坤擇水草佳處駐兵俟明年前進尋詔還駐肅州經理糧馬五十五年奏言自嘉峪關運糧至哈密應設十二臺用山西陝西小車三千兩每車用三人每臺分車二百五十兩陸續轉運哈密至巴里坤雖近中有科舍圖嶺間之自哈密至嶺之南設三臺令駐哈密兵牽駝運送自嶺北至巴里

坤亦設三臺令駐巴里坤兵接運又言哈密所屬布魯爾圖古哩克接壤處並巴里坤都爾博勒津喀喇烏蘇及西吉木達哩圖布隆吉爾附近之上浦下浦皆可開墾以裨軍食又言布隆吉爾諸處田禾豐收人民漸集請遣官建倉廩及收貯農器房屋並於西吉木設赤金衛達哩圖設靖逆衛西喇郭勒設柳溝所分置守備千總同知通判兼管事並下議政大臣如所請行五十六年三月授靖逆將軍駐巴里坤命同振武將軍傅爾丹副將軍祁里德分界覘賊情形六月富寧安率兵赴烏魯木齊擒回人一百六十有九獲駝馬牛羊無算七月至畢留圖厄魯特兵三百餘尾我兵後我兵還擊擒斬數人餘賊越山遁乃還師五十九年七月進兵烏蘭烏蘇令侍衛哲爾德克什圖阿玉錫等分道襲擊擒阿克塔斯哨卒餘賊望風竄遁復於伊勒布爾和碩奪賊谷中馬百餘破其所踞山隘獲台吉垂木珀爾斬賊三十餘生擒二十四人別遣散秩大臣阿喇納等率兵諭降關展城回人進擊吐魯番降其酋長獲馬駝甚多十月疏言我兵襲擊賊境大振軍威賊人窮促遣使乞降不過爲緩兵計耳奸詭之性不足深信請乘勝直搗賊穴臣所統巴里坤固原甘肅兵萬有七千請選八千人由額稜哈畢爾漢路進六千人由吐魯

番阿勒輝路進各持三月糧應令巡撫綽奇設置臺站先期運米及馬駝至巴里坤草廠豫備進剿疏下傅爾丹祁里德會議議入復下九卿詹事科道詳議如富寧安請命選傅爾丹軍前三千人并其軍明年四月以烏蘭烏蘇地狹移兵駐伊勒布爾和碩尋奉諭暫停進剿時策妄阿喇布坦遷其所屬吐魯番回人而行回人多不願往中道遁回駐魯克齊木衆萬餘擊敗賊所遣宰桑和勒博斯額木齊兵推託克託瑪木時爲首赴我軍乞降富寧安以聞且以屯兵守護糧運維艱人奏上諭議政大臣曰策妄阿喇布坦旣不能移吐魯番回人又不能護衛準噶爾之人其萬不能敵我兵明矣回人歸降卽係吾民其令富寧安派綠旗兵一千察哈爾厄魯特蒙古兵一千赴吐魯番駐劄收撫安插如遇賊衆侵擾速行救援無使失所富寧安乃遣阿喇納率兵二千駐吐魯番收撫回人九月聞賊衆來犯又遣副都統壯圖穆克登各率兵二千援剿而自率兵四千進駐伊勒布爾和碩調遣策應會阿喇納自吐魯番與賊迎戰屢敗賊衆賊遠遁乃還駐巴里坤六十一年四月疏言嘉峪關外布隆吉爾之西爲古瓜沙燉煌地昔吐魯番建城屯種遺址尙存且濱河土肥若駐兵屯牧設總兵官一人統之可扼黨色爾騰之路六月

又請專遣大臣領屯田諸處儲糧事宜又言駐守官兵月糧及進剿大軍裹帶隨運糧若一時並輓費多而人亦不給今巴里坤牧駝悉臙壯又於喀爾喀買駝至八月皆肥以駝運糧甚便乘炎熱草盛時分起領運南路至哈密北路至圖古哩克軍營收貯免使臨事張皇上並可其奏是冬世宗憲皇帝御極授武英殿大學士仍駐巴里坤管理軍務三年二月上以富寧安在軍營久謹慎小心賜敕獎諭并賜帑銀二萬兩四年十一月還京賜御用冠服並雙眼孔雀翎黃轡鞍馬及朝珠銀緞諭王大臣曰富寧安自任將軍一心肫篤爲國宣力再三奏請進兵皇考憐念準噶爾生靈不忍翦除是以未允其請倘如所奏富寧安定能滅賊矣軍中約束兵丁辦理諸務井井有條且行止端方廉潔年來領兵將軍聲名未有出其右者實心奮勉不負任使益彰皇考用人之明朕實嘉賴焉其錫世襲侯爵以示殊異於是出騎都尉晉爲一等侯五年四月諭獎其公忠誠實加太子太傅七月管鑲白正紅二旗漢軍都統事十月命往西安署駐防將軍六年五月諭兵部曰富寧安署理將軍爲時已久所屬武職並未題補一缺省城管兵之員關係甚重在富寧安之意以爲可俟新授將軍常色禮到日題補曾不計常色禮於今冬自

軍中至京明春方到西安如許員缺安可經年虛懸富寧安曾爲巴里坤將軍西安官員認識過半何難量才授任況現任大學士尤不宜苟且推卸若此朕向日聞其操守甚好辦事誠篤自任大學士以來恩賜頻仍錫封侯爵寵眷優渥理應屏除一切奮不顧身乃惟自圖保全膜視國事深負朕恩其交部嚴行察議部議革大學士及一等侯得旨削恩賞世爵免革大學士六月以疾卒於西安事聞諭曰富寧安人品端方操守廉潔敷歷中外懋著勤勞勤慎小心始終一致簡任綸扉正資倚畀忽聞溘逝朕心深爲軫悼其喪櫬起程及歸途之費令陝西督撫料理所過地方官員於櫬前奠醢仍下部議卹櫬至京遣郡王及內大臣侍衛奠茶酒賜祭葬如典禮諡文恭十年九月入祀賢良祠其原襲尼喀納之騎都尉世職以嗣子烏魯理襲

田從典

田從典山西陽城人聖祖仁皇帝康熙二十七年進士三十四年授廣東英德知縣四十二年行取考選科道四十三年五月授雲南道御史八月疏言近見督撫不拘成例請調州縣有秉公而調者卽有徇私而調者在州縣求調之弊有三一



曰希圖美缺一日規避衝地一日預爲卓薦地在督撫濫調之弊亦有三一日曲徇請託一日公行賄賂一日引用腹心皆借整飭地方爲名簡拔賢能爲說巧爲朦朧竟成捷徑屢經敗露有駭聽聞卽如原任安徽巡撫李鈞請調知縣錢啟整一案指桐城縣之繁以爲簡指休寧縣之簡以爲繁賄調被劾之山西大寧知縣許晉一案先圖夏縣繼圖介休手書銀至一萬數千兩之多其他調繁後劾貪婪虧空者歷城知縣管承寵南昌知縣王廷對蓋營求得調之員或前任之錢糧未完或上司之酬謝未足雖欲不侵用庫帑剝削民財其勢有所不能請嗣後除江南浙江等七省中錢糧難徵之一百一十餘縣及邊遠煙瘴地方仍舊例調補外其餘一概不准濫調嚴定督撫違例處分庶吏治清而官方肅疏下部議嚴定濫行奏調處分四十四年十一月疏言近日考選科道開列部郎翰林斷自聖裁而行取知縣特旨以額外主事用此誠皇上立賢無方之盛意也今九卿定議知縣論俸行取以主事用不由督撫保舉矣而京官考選科道猶令部院堂官保送例不畫一旦恐平日之交結與臨時之營謀在所難免將使臺垣於部院弊端迴護瞻徇莫與發覺請敕吏部嗣遇考選科道凡正途出身之部屬及由知縣陞任之

中行評博等與翰林一體論俸開列聽候考選則定例畫一矣疏下九卿議京官考選照各項次序開列停其由堂官保送十二月巡視西城四十九年四月授通政使司右參議五十年四月轉左參議十月遷右通政十二月轉左通政五十一年三月遷光祿寺卿四月遷都察院左副都御史兼管光祿寺六月疏言光祿寺買辦人積年拖欠戶部庫銀三十五萬餘兩自康熙四十五年前寺卿偉齊等題定一九帶銷至四十九年又欠六萬八千四百餘兩寺卿瑪良等截數總算請二八帶銷自五十年正月至十二月扣交戶部七千九百餘兩尙有自四十四年起移取廣善庫銀每年約用九千九百餘兩因不由戶部支銷未經除扣嗣後應照二八帶銷例每年例取廣善庫銀一萬兩亦扣除二千兩交送戶部年終入冊奏銷得旨如所請行其自四十四年以來遺漏扣交之寺臣下都察院議處降級罰俸有差五十二年五月擢兵部右侍郎仍兼管光祿寺五十八年十二月擢左都御史時兩江總督長蘅以潁州知州王承勳首告安徽布政使年希堯鳳陽知府蔣國正婪取事入奏上遣從典同副都御史屠沂往勘還奏蔣國正以應賠所屬虧空帑銀三千七百餘兩混入恩免民欠錢糧內應斬年希堯失察應革職五十

九年十月擢戶部尙書六十年充會試正考官世宗憲皇帝雍正元年九月調吏部尙書仍兼管捐納軍需事賜清謹公方匾額並御製詩有出納望同天北斗清芬品擬省中蘭之句十一月充武會試正考官二月充順天鄉試正考官六月協辦大學士九月詔陝西運糧至巴里坤悉作正項報銷停止戶部與陝西捐例並諭嘉從典與尙書張伯行兩年以來辦理清正下部議敘各加二級三年二月授文華殿大學士兼吏部尙書六年三月乞休得旨卿才品優長老成練達端方公直恪慎恭謹服官供職宣力多年簡任綸扉正滋倚眷覽奏以老病乞休情詞懇切著加太子太師銜以原官致仕於居第頒賞筵宴令部院堂官齊集並賜帑金五千兩爲還家路費及高年頤養之資馳驛回籍起程前著來陛辭朕面加恩諭起程之日著在京官員等祖餞以寵其行所過地方其有司在二十里以內者俱著迎送旋里之後懸掛朕所賜御書匾額時令巡撫兩司親至其家將來頤養康健一二年後再入京陛見以慰朕眷念老臣之至意及陛辭賜御書對聯並冠服朝珠等物四月行次良鄉疾劇逾日而卒年七十有八上諭廷臣曰田從典自辦理部務以及簡任綸扉實心宣力勤勞懋著屢以老病乞休朕因允其所請加太

子太師銜賜以帑金馳驛回籍忽聞患病溘逝朕心深爲軫悼遣散秩大臣一員三旗侍衛六員往奠茶酒并念伊子年幼無辦理事務之人遣內閣漢學士一員滿洲侍讀學士一員前往辦理事畢之後令該地方官酌量委員沿途照看送至原籍加恩優恤伊子年幼家居著山西巡撫傳諭地方官就近時加照看其新舊接任之員俱將此旨傳知通行遵奉前朕賞賜匾對聯額可暫收巡撫衙門俟諭祭之時於兩司中令一人齎捧前往頒賜伊家其應得卹典該部察例具奏賜祭葬諡文端十二年十月諭曰原任大學士田從典品行端直老成謹厚居官廉潔奉國公忠應入賢良祠以風有位著九卿會議具奏議上入祀如例並於本家賜祭一壇于懋由從典任戶部尙書時遇恩詔廢員外郎官至吏部侍郎

遜柱

遜柱滿洲鑲紅旗人姓棟鄂氏曾祖耶色太祖高皇帝時偕其兄耶格率瓦爾哈什所屬來歸祖阿爾泰任護軍參領順治元年隨睿親王多爾袞入山海關擊敗流賊李自成兵追至望都縣敘功授雲騎尉世職遜柱於康熙八年補吏科筆帖式三十二年授工部主事三十四年遷戶部員外郎三十七年遷本部郎中尋調

緞疋庫四十三年授監察御史四十六年遷翰林院侍講學士仍兼御史事明年授內閣學士四十八年奉命祀江濱明年遷盛京工部侍郎五十年調吏部左侍郎五十二年奉命祀東嶽五十六年擢兵部尙書五十九年三月疏言皇上勤求治理加意人才武臣推用時自提鎮以及千總必親考其騎射驗其年力如此其重也兵部向有武舉武生官員子弟效力一途三載役滿考試弓馬分別一二等以守備千總用定例遵行已久但人廣銓滯每逢月選效勞出身者多係弓馬生疎材力不及則裁汰不可不嚴也請於差官六十名裁三十名站堂辦事三十名裁四名停用武生官員子弟專取武舉武進士願效勞者其宗人府鑾儀衛兵科效勞之人一體取用武舉三年役滿內大臣會同兵部嚴加考試武進士頭等以營守備用二等以衛守備用武舉頭等亦以營守備用二等以守禦所千總用弓馬牛疎人材不及者不准推用詔如所請六十年命兼吏部尙書六十一年十一月世宗憲皇帝御極充經筵講官雍正元年十月賜老成戎府扁額二年十月疏言國家設官分職一部之事分寄數司司無大小事有繁簡向來滿司員由該堂官酌派惟漢司員俱係指缺補授竊思人材不一或才長而事簡則不得展其才

或才短而事繁則事或致遲誤臣愚請漢司員指缺補授後各部堂官試看一二月如其人才能與指補之司相宜無庸置議儻才與缺不相宜奏請引見調補見在應調者卽照此例庶能員得展其才卽中才亦可循分供職下九卿議從之三年六月充實錄館副總裁四年二月調吏部尙書仍兼兵部事七月命專理兵部事五年正月署大學士九月授文淵閣大學士兼兵部尙書先是遜柱曾受檢討沈竹原任道石文彬私餽應追入官逾限未完部議奪俸展限七年十一月諭曰遜柱雖素餐多年尙無大過且年已八旬先帝舊臣今在朝者甚少伊應追銀兩俱豁免停俸案件亦著開復以昭優卹老臣至意九年疏陳兵部事宜六款一各司案件例有專責胥吏以上皆有當盡之職乃或因案涉繁劇或因事稍勞苦遂巧爲推卸諉之他司甚至推之別部往返遷延每至遲誤臣等嚴加戒飭儻有慢不悛改仍蹈故轍者參處一外省暨各部咨行事件例皆按日登記然輕重緩急難以一律其稍關緊要者分別先後限辦乃有故意推延或稱無例可查或稱舊案未得不思朝廷用人惟才原責以隨宜辦理若止據成例舊案只一書吏可查何須司員何須堂官請嚴爲條約務令該司竭其才力如事涉疑難許呈堂酌定

儻有舛錯臣等身任其責若諉推遲誤者照溺職例議處一議敘上關國典奉命之日卽應辦理乃展轉支吾如一案議敘人員多至百十人其中有一二人註冊未明一二字重複錯誤藉端駁詰遲延日久弊竇百出請嗣後議敘等案件隨到隨辦卽一二人當駁查不得因一二人稽遲至一二字重複錯誤詳查原案立可分晰而不肖官吏往往藉此需索臣等見行嚴禁若仍有此弊將該管官吏治罪一軍功議敘所關尤重介冑之士效命疆場非尋常勞績可比查從前敘功案內力戰一次予一功牌力戰數次亦止予一功牌該司稱係定例是一經立功之人不得再與議敘甚非國家勸功行賞之意雖成例亦當更定請查明前案盡予改正一武職議處盜案疏防往往反覆駁詰如初參疏防之案則駁以或係疏防或別有隱匿及該處以實無隱匿報又稱確盜窩主應俟刑部審結再議查刑部盜案有遲至數年未結者若必俟結案定議則應開復人員其中雖有可用之才該上司以參案未結例不升補而應行議處者轉得將降級罰俸之處遷延歲月徒滋弊端請疏防案件卽照該督撫提督所報定議仍咨刑部如審結後有隱匿捏報等情將該員及查報不實之上司參處庶事案隨到隨結不至壅滯於律法亦

無疏縱一胥吏之設祇令收送文簿此外原無執掌乃猾吏舞文或將新到文卷故意推延舊存案牘擅自隱匿在堂司官以爲稍遲一二日偶遺一二件未必遽有大弊然推升之案稍差一二日其得缺先後各異承審之案稍遺一二件其情罪輕重迥別請嚴爲條禁其遲誤一二日遺漏一二件者量行懲戒遲誤至五日以上遺漏至五件以上者分別輕重杖責若別有行私索詐等弊送刑部定議並如議行十年三月特諭遜柱年逾八旬不必兼兵部十一年七月命以原官致仕八月卒年八十有四得旨遜柱醇厚和平服官多年且年逾八旬應給恩典賜祭葬如例

高其位子起

高其位漢軍鑲黃旗人父天爵已有傳其位初隸鑲白旗由筆帖式管佐領康熙十二年逆藩吳三桂陷湖南順承郡王勒爾錦統師討之其位隨征署參領駐防襄陽時叛鎮楊來嘉王會等頻掠鄖西穀城南漳等縣其位嘗率二十騎往偵遇賊土地嶺知將犯南漳馳越賊隊中創不退直入南漳城告守者爲備賊逼城三日不能陷而遁十五年正月叛鎮譚宏引賊三萬水陸合犯鄖陽其位率百人扼



之楊谿鋪踞崖射賊相持七十餘日糧盡煮馬糞以食及副都統李麟隆率兵來援乃擊潰賊衆十九年追論賊犯穀城南漳禦戰失利諸將罪革其位職任二十年授火器營操練校尉二十八年襲二等輕車都尉初其位祖尙義於康熙元年卒所遺世職其位弟其仕襲至是其仕卒以其位襲之二十九年七月隨大將軍裕親王福全征噶爾丹擊之烏蘭布通破其駱駝營三十三年擢參領三十五年從上征噶爾丹凱旋加一級復管佐領三十九年四月授甘肅永昌副將四十七年正月遷湖廣襄陽總兵五十二年四月擢湖廣提督賜孔雀翎藥鞭及鞍馬五十六年九月自陳乞罷諭嘉和輯兵民聲名素優令供職如舊六十年六月調江南提督六十一年七月兩江總督常鼎疾劇以印齋巡撫吳存禮暫管上特命其位署理十二月受代尋赴京雍正元年二月命仍回提督任四月奏請保護聖躬得旨此奏字句之外實有一片愛君之心發乎至誠非泛泛虛文可比二年三月奏言松江之泖湖澱湖澄湖港汊叢雜江浙錯壤與太湖昆連經兩省督撫與臣委官勘議防奸法計松江所屬通船要口百十三處釘椿立柵以時啟閉官捐工料百姓樂趨事將次告成奏入諭以權宜措施必無礙商民乃善七月賜詩有

裨益軍民資偉略劑調文武在和衷之句十月奏進黃浦漁人所網得雙夔龍紐未刻玉印諭曰此事若出自他人非卿奏聞朕不信也卿乃忠心老臣封疆大吏斷不至有捏造虛誕之舉以阿諛取容今賜卿數物以示嘉悅三年五月諭廷臣曰提督高其位前署總督印務時年夔堯奏其年老衰憊兩耳重聽貪位隱飾貽誤地方不應畀以重任是以聖祖仁皇帝降旨罷其署理及朕卽位猶記年夔堯之言特召高其位來京陛見朕視其爲人老成忠厚善氣迎人雖已年老精力猶可任用適值年夔堯在京遂令伊詢問高其位觀汝筋力尙可爲朕效力數年不得固辭目下現有鑿儀使一缺旗下都統一缺著量其力之所能自行陳奏彼時高其位奏都統事務向來不甚熟練鑿儀使又無可效力之處朕遂降旨令回松江此乃出自朕意加恩老臣並非年夔堯贊助之力在年夔堯必隱其從前之參劾反市德於高其位而高其位不知亦以爲出於年夔堯贊助之力也去年高其位奏進松江漁船所獲玉寶朕賞以四團龍補服等物又值年夔堯在京必又向高其位居功冀其感激聞年夔堯將一無賴小人薦與高其位高其位卽授以把總未幾又特拔爲千總此事卽向時督撫提鎮中皆所不免年夔堯尤視爲常事

但高其位向被年羹堯參劾及朕加種種之恩皆特出朕意與年羹堯毫無干涉而年羹堯竊君恩爲己功高其位奉私囑如公令卽此見年羹堯之巧詐營私隨處要結而內外臣工之爲所愚者不少矣九月授文淵閣大學士兼禮部尙書加太子少傅其位以衰老不勝機務奏辭詔俟交代後卽來京供職四年五月至京改隸鑲黃旗尋乞休諭以跪拜艱難高年常有之事不必遽行求退十月十八日生辰賜匾聯及服食等物銀一千兩十一月復乞休得旨卿宣力年久恪慎奉職老成練達茂著賢聲是以簡預機務用昭優眷前以老病乞休朕未忍俞允特命供職數年以示眷念耆舊大臣之至意今復行奏謂情詞懇切准以原官致仕五年正月卒命王大臣侍衛奠茶酒賜祭葬如例謚曰文恪十二年十月入賢良祠原襲之二等輕車都尉循例改騎都尉以其次子纘勳襲長子起康熙五十九年由廕生授四川茂州知州六十一年遷陝西漢中知府雍正五年遷湖北荊州道十年內陞光祿寺少卿十一年三月遷鑲黃旗漢軍副都統四月授兵部右侍郎十二年二月協理步軍統領十三年二月擢兵部尙書尋協理鑲黃旗漢軍都統復兼署正白旗漢軍都統九月罷尙書任以都統銜在雍和宮行走十月刑部劾

起前署都統時短價勒買原任侍郎黃炳房屋挾嫌捏奏其隱匿入官家產株連無辜酷刑鍛鍊又私買本旗管下女口兵部劾起任尙書時恣意專擅紊亂章程徇私袒護假公洩忿十一款革職逮問得實論斬乾隆元年命發往軍臺效力贖罪七年回旗十三年十月卒

蕭永藻

蕭永藻漢軍鑲白旗人父養元管佐領永藻由廕生補刑部筆帖式康熙十六年六月授內閣中書十七年四月遷禮部員外郎襲管佐領二十四年八月遷郎中二十七年監督湖口關稅務尋授御史二十八年八月遷內閣侍讀學士三十四年七月遷順天府尹三十五年十二月擢廣東巡撫三十七年三月疏言開鑪鼓鑄原爲便於兵民而粵東偏在海隅用錢無多開鑄將及三年錢文倍增錢價益減現在每千市價三錢二三分不等兵丁月餉按定例而支照市價而用已屬苦累距省遙遠各搬運需費領一兩之錢不及數錢之用民間亦因錢價日減貨物難行暫停鼓鑄爲便八月疏言鼓鑄雖停其局內存錢照舊搭放兵餉自夏徂秋錢價更賤兵丁月餉無幾請卽支給全糧俾有實濟俟錢價稍昂再行搭放十一

月疏言兩廣鹽政沈愷曾一年差滿請展限一年俾理積年未完課銀五千餘萬兩未銷鹽引一百餘萬道下部議並從之三十八年十月疏言開山掘礦招集多人羣聚一方良莠混雜臣受事之初再三通飭嚴禁乃近有長寧縣匪徒集衆私採臣卽飭惠潮道察究完結知縣尤鵬翔不先通報難以姑容請敕部議處下部議革尤鵬翔職三十九年正月疏言廣州府屬之南海番禺東莞新會四縣幅幘遼闊逼近海洋最爲難治必須選調賢能前撫臣高成爵選員調補南海東莞部議二縣不在欠糧難完應調之例未准行臣思在昔荒逃逋賦故止就欠糧議調今遷復日久不患民賦逋而患盜賊未弭請以清遠乳源茂名海豐知縣張象乾姚炳坤錢以壇白章調補南海番禺東莞新會四縣得旨如所請行後不爲例十二月給事中湯右曾疏劾永藻與總督石琳於瓊州府屬擾害黎崗致黎人爭鬪事遲至一載始行具題其交相徇庇可知縱貪殘之屬員腴民漁利吏治安得不敝民生安得不困民生旣困遂爲盜賊如在海則有電白陽江在山則有英德翁源及普寧縣富美寨等處橫行劫掠雖經剿滅而民間受害已多不知平日之察吏安民者奚在也上遂調廣西巡撫彭鵬至廣東永藻調廣西仍命回奏下部察

議應降二級調用得旨從寬留任四十年三月入覲諭曰彭鵬在廣西居官甚好爾可效彼所行爾在廣東時盜案甚多牽連數百人俱罹法網近復有黎人之事爾居官果善豈至如此爾所薦人亦未必賢嗣後但當擇清廉者舉之居官既廉辦事自善卽錢糧稍有未完百姓自爲彼勉力急公也爾其識之四十一年五月疏言粵西僻處邊陲猺獞雜處而南寧太平慶遠施恩四府地接交夷兼轄土州縣司崗寨五十餘處尤爲難治前經九卿議定四府所屬官員缺出選擇桂林平樂等府品級相當者調補三年俸滿陞用惟自南太慶恩四府廳州縣共二十九員桂林平樂等五府知縣以上共五十八員當奉行之始尙有久任之員可以選擇迄今一十六年除調補參劾陞任病休外多係任事日淺才守未知卽日久任者亦係循分供職與選擇調補之例不符前撫臣彭鵬於調補各員恐以地方之美惡爲趨避酌一掣簽之法實屬至公嗣後四府官員缺出應仍以五府內之廉能者掣簽調補如無可調之員請旨特簡補授上是其言下部議從之四十五年四月內遷兵部右侍郎時湖廣總督石文晟疏劾容美土司田舜年違制不法各款上命左都御史梅鎔內閣學士二格會審與石文晟異議復命永藻與大學士

席哈納侍郎張廷樞往湖南察審還奏田舜年已故被控僭越各款俱虛誣控之  
向久忠等擬罪如例總督石文晟不能詳察草率題參應議處從之四十六年正  
月擢都察院左都御史九月遷兵部尙書四十八年十二月命同副都御史王度  
昭往湖南察巡撫趙申喬提督俞益謨互訐事覆奏俞益謨違例抽取衡州協兵  
餉三十五名以致兵丁缺額應革職所訐趙申喬貪虐各款俱不實但趙申喬每  
事刻意苛求失大臣體亦應革職上命俞益謨休致趙申喬留任四十九年四月  
調吏部尙書十一月授文華殿大學士五十六年三月命在議政處行走六十一  
年世宗憲皇帝御極以永藻勤慎清廉加太子太傅銜命往馬蘭峪總理陵寢事  
務雍正五年十一月宗人府奏閒散宗室廣善恩給公銜在陵寢居住越分請安  
永藻不行攔阻應革職得旨蕭永藻向來操守甚好每自恃其有操守驕矜偏執  
諸事任意朕因其年逾七旬爲舊日大臣加恩優待念景陵事重特命伊總理且  
令就閒散之地以頤養暮年正所以善全之也乃不知感恩遇事推諉瞻徇不實  
心辦理希圖安逸來京不候旨卽去此等疏慢之處甚多惟知阿諛允禩以長其  
傲慢狂肆之罪而其特行條奏者則裁汰舊設之官員減去祭祀之乳牛以爲節

省錢糧之計不知大體深負委任著革職仍在陵寢地方居住效力七年卒年八十有六

沈近思

沈近思浙江錢塘人康熙三十九年進士四十五年選授河南臨潁知縣五十二年巡撫鹿祐以卓異薦遷廣西南寧同知旋以病告歸五十九年五月浙江巡撫朱軾奏稱近思初任河南縣令循績特著以卓異陞補同知因不服水土告休歸家足不出戶鄉里欽敬臣於宣講上諭處見其年力尙壯精神強健乞敕部調取引見破格擢用得旨以緊要缺用六十年二月監督本裕倉四月浙閩總督覺羅滿保奏請揀發福建候補知府雍正元年特用吏部文選司郎中予加二級賜第一所帑金四百兩九月充會試同考官十一月授太僕寺卿仍兼理文選司事二年正月充山東鄉試正考官二月擢吏部右侍郎賜詩有操比寒潭潔心同皎月明之句七月奉命同尙書阿爾松阿往河南審理生員王遜等糾衆罷考一案論如律十月充武會試正考官三年六月吏部議年羹堯誣參道員金南瑛等不實罪尙書隆科多擅會同兵部僅議革年羹堯將軍職上以吏部應議事含混會奏



巧爲徇庇下都察院議隆科多削太保近思等坐附和降調得旨寬免四年三月轉左七年充江南鄉試正考官十月諭曰閱江南鄉試錄見主考官沈近思出題正大不尙詭僻三場策問內發揮性理具有本源以此試士實有裨於人品學問甚屬可嘉著卽交部議敘加二級時查嗣庭汪景祺俱以悖逆伏誅近思與同籍因疏言浙省遠處海濱奢靡澆薄以詭詐爲能以忠厚爲拙以勢利爲重以廉恥爲輕以逢迎奔競爲有才以安分守己爲無用以請託徇私爲多情以孤介剛方爲刻薄以健訟打降爲豪傑以退讓辭遜爲怯懦以捏詞造謗爲智謀以謹言慎行爲迂闊人心之壞風俗之頹淪胥已極如查嗣庭汪景祺者大逆不道罪不容誅是浙江一省逆種並生越水爲之增羞吳山盡皆蒙恥荷皇上至聖至明至慈至斷明正其罪特簡儒臣爲觀風整俗使滌除邪穢咸與維新臣受恩深重無可報效敬陳浙省舊弊十事一士人修身立品全在初學乃浙省童生初應縣府試卽請託勢要求開公摺府縣官憑以錄取最爲惡習請懲責以端始進一生員初得青衿便思鑽營當事不得則編造浮言得則通謁顯貴求通關節請將本人治罪外其私書關通者依律治罪一在籍鄉紳多在各衙門關說公事顛倒是非最

爲民害請分別斥革治罪一不法生員妄借條陳名色向各衙門呈告地方公事藉以欺壓愚民武斷鄉曲并結聯匪類連名具控名曰公呈請褫革治罪一浙省凡兩造結訟未見曲直輒請訟師造作揭帖攻發隱私污人名節或捏貪酷款蹟誣治官長或編德政歌謠聳動聽聞以致上司誤信賢否混淆請照光棍治罪一士人刊刻詩詞並一切誨淫誨盜之書甚爲心術之害請毀板重懲一訟師爲害最甚浙江省會士農工商而外游手好閑之徒鮮衣美食遨遊城市伺察鄉里偶有口角是非教唆興訟或代作呈詞或鑽求書吏卽欲具公呈一呼而集甚者挾持官府串通衙役保官告官閉城塞署皆此輩爲之請於保甲內將無籍之徒嚴加查察至放告時先查代書審問如係訟師嚴加懲治一衙役作弊各省皆然浙省尤甚劣紳訟棍皆以衙役爲線索此輩侵盜錢糧魚肉小民本官一有覺察則勾引鬪堂塞門冀圖挾制皆由白役人多每衙門動皆數百請飭浙省大小衙門遵照經制役定數一切白役幫差盡行革退如有書役勾通罷市抗官立賞重典一士子讀書當以聖賢爲法一切博戲最易放心喪志士紳犯賭法所必懲而豪家暗養打降之人船埠橋埠各有棍徒雄霸欺弱凌寡威嚇鄉里請嚴治首從一

民間演戲原屬豐年報賽之常浙省有坐方地棍借端科歛糾黨勒索應予重懲  
又如雲林天竺各寺廟每至春二三月婦女遊觀輕薄士子呼朋引類混雜訕笑  
毫無忌憚宜嚴申禁得旨據奏二逆並生越水增滄吳山蒙恥等語浙省有沈近  
思一人不爲習俗所染可稱上智不移實足盡洗越水吳山之羞恥矣所陳風俗  
十事切中情弊委曲詳盡甚屬可嘉發與巡撫李衛觀風整俗使王國棟照所請  
嚴行禁約五年正月擢左都御史仍兼管吏部事三月充會試正考官六月教習  
庶吉士十二月卒於官命平郡王福彭往奠諭曰沈近思人品端方持躬廉潔凡  
所委用悉心辦理正資倚任忽聞溘逝深爲悼惜著加禮部尙書太子少傅銜廕  
一子入監讀書其子尙幼著該地方官加意照看撫養待成立時送來引見賜銀  
五百兩吏部派一謹慎司官爲伊料理後事賜祭葬如例諡端恪子玉璉於乾隆  
十一年十月授廣西桂林府同知

清史列傳卷十二終

清史列傳 卷十三

大臣畫一傳檔正編十

勵廷儀子宗萬

勵廷儀直隸定海人父杜訥刑部右侍郎贈禮部尚書有傳廷儀由康熙三十九年進士改庶吉士四十年丁母憂四十一年特命在南書房行走四十三年授編修尋丁父憂服闋充日講起居注官四十五年遷右中允累遷侍講學士五十六年擢內閣學士六十一年二月充經筵講官十一月充翰林院掌院學士尋遷兵部右侍郎仍兼掌院學士雍正元年正月恭修聖祖仁皇帝實錄充副總裁二月擢刑部尚書八月疏言各省常平倉米穀雖有知府司道盤查管理不能保無徇隱當責督撫覈實存倉及現捐穀數共貯若干支用若干委幹員不時盤查年終造冊保題督撫離任將冊籍交新任詳覈虧空題參新任徇隱察出議處分賠部議從之是月奉旨刑部事務繁難以兼理掌院禮部事務簡著張廷玉兼理掌院使勵廷儀得專心料理本部事務十月疏言古北口外命案向由本處武職詳解刑部

派司員往驗路經三四百里或五六百里往返需日傷痕已變審擬難確請於口外適中處設理事同知一員遇民命案驗明取供分別詳解題結盜案亦如之其詞訟細事聽該員自理稱職請照捕盜同知例卽陞詔下部議設滿洲理事同知一駐熱河隸霸昌道轄二年二月奏請團練民壯每州縣選五十名分習槍箭尤壯者選爲頭役於州縣俸工內酌給工食勤加訓練得旨此奏甚好著該部嚴諭直省督撫實心奉行三年十二月疏言監禁宜分內外內監以居重要人犯外監以居現羈輕犯並案內聽審人其女監另牆隔別庶防範嚴肅亦不致串供部議從之五年三月充會試正考官五月以保題到部甫及三月之筆帖式麻色爲主事部議降一級六月以保送到部甫及月餘之郎中邵希節赴盛京辦事部議降二級均奉旨從寬留任七月廷儀與侍郎高其佩赫壽審擬菩薩保罪名錯誤奉旨革職留任八月三法司議覆河南通許縣民吳三保勒死曹柱兒一案巡撫田文鏡原擬斬決其佩妄改監候廷儀等並不詳核隨衆畫題部議廷儀應降三級調用已革職應革任得旨免革任俟三年無過開復前案之日降三級留任十月特命復職六年八月疏陳考職積弊四條一監生遇考職時每倩人代考請照科

場例先期驗照查明年貌履歷捐納年分事例於卷面註明臨期編號分坐使不能代作傳遞一考職例由地方官具文書本生領文或借與他人頂名冒考請取其同鄉京官印結外再取具同鄉同考監生連名互結扶同治罪一監生身故斥革例應繳照竟有隱匿未繳者考職時報名混考請飭地方官查追送部一監生內有先經考職未得揀選復頂名重考者請並責同鄉印結官及互結監生首告知情不舉者治罪十一月疏陳禁止私鹽四條一窩藏私販之家宜究一無引私鹽之禁宜嚴一獲鹽不獲人概行免追之例宜明一有司拏獲不報及減多報少之罪宜重十二月疏陳清查入官家產四條一承辦官毋許於料估變價時任意核減希冀分肥並索平頭解費一田畝房產該管官毋許私自賃租器物不得乘機抽換一本犯家屬毋許常年占據不卽退出與該管官通同影射令親友出官代買一田產既經估報卽非無項著追可比應勒限速售銀兩依限完解諸疏俱下部議行七年十月加太子少傅賜矜慎平恕額八年三月疏言各部院欽奉諭旨及題奏奉旨並咨結事件應行文各衙門直省者值日司員一人專司其事錯誤遲延卽將該員參處若竟遺漏行文或遲至經月該司滿漢各員均難辭咎自

應一例參處因向無定例彼此推卸或祇歸咎一人情理殊未允協嗣後如應行事件漫不經心以致遺漏遲延滿漢官一併參處部議如所請九年三月疏言向例鐵貨不許私出外境而廢鐵不在禁例近聞射利之徒專收廢鐵鎔化運至近邊近海地方請嚴禁如販賣硝磺例從之九月遷吏部尙書仍專管刑部事務十年五月以病乞休上慰留之閏五月卒遺疏入得旨勵廷儀侍直內廷蒙皇考聖祖仁皇帝知遇之恩教養有素伊父尙書勵杜訥老成端謹學問優長朕幼年在宮中讀書時資其講論至今念之不忘朕御極之初勵廷儀爲皇考多年教育之人擢用司寇數年以來勤慎小心安詳歷練克稱厥職是以特賜宮銜晉秩冢宰以示恩眷秋官重寄正資料理今聞溘逝深爲傷悼已命大臣往奠茶酒其更下所司議卹尋賜祭葬如例謚文恭子宗萬康熙六十年進士改庶吉士散館授編修雍正二年命在南書房行走五年七月充日講起居注官十一月提督山西學政六年三月疏言學臣舉黜優劣任滿始行造報不無瞻徇顧忌之弊請嗣後每考一棚卽分別獎戒各生名數造冊達部不惟瞻顧可杜且使優生知部冊有名益加勉勵劣生知部冊可畏均思改悔於士習有益八月疏言河南原設運學係



蒲解二州及臨晉榮河萬泉河津安邑夏縣平陸芮城垣曲聞喜十縣額設鹽丁子弟考試嗣因修理鹽池隄堰募十二州縣民夫幫修其子弟亦遂冒考商籍童生亦有冒入民籍者往往以一童冒兩籍考試數次甚或本籍已取入將冒考之名賣與他人頂充應試請澈底查禁使商民不得互冒均下部議行是年遷國子監司業七年三月宗萬按試潞安有臨晉縣民解進朝詐稱御前辦事總管私書請託宗萬疏聞諭曰凡私書請託者皆屬夤緣僥倖之徒若內外官員咸肯據實參奏則鑽營之弊可息宗萬此奏甚屬可嘉著交部議敕九月遷翰林院侍讀奏言州縣爲親民之官職守綦重若擅離職守赴省參謁於公事難免遲誤請敕各督撫藩臬嚴禁屬官私謁以免曠誤得旨此奏可嘉朕另降諭旨飭行十一月命管理巡察山西事務八年九月疏言額設民壯必技藝嫻熟臣查閱四十餘處州縣官係旗員民壯尙有可觀其餘生疏不堪蓋以州縣不習武事之故請令該州縣會同在城武職定期操演務期精熟部議從之是月巡撫石麟疏劾宗萬騷擾驛遞得旨革職仍留巡察之任九年石麟復劾其縱僕索銀及短發物價等款命革任十年閏五月特授鴻臚寺少卿在南書房行走十一年九月遷光祿寺少卿

十二年八月遷鴻臚寺卿十月擢內閣學士兼禮部侍郎十三年正月充皇清文  
穎館副總裁九月遷禮部右侍郎尋調刑部左侍郎十二月命兼管禮部侍郎乾  
隆元年四月疏言每科進士除選庶吉士外分派各部以額外主事學習行走三  
年期滿以部屬知縣分別錄用查各部主事共四十八缺每科分布不下四五十  
人若期滿不卽題補固無以爲勤敏者勸然不分優劣概以主事題授不但冒濫  
名器且候補候選應陞行取各項人員無缺可補若將不諳部務之員概以知縣  
選用則民社重寄又非庸材所可濫膺請嗣後學習期滿人員令該堂官出具考  
語分爲三等帶領引見一等補用主事二等卽用知縣三等補用國子監助教監  
丞及司經局正字等缺又前因禮部事簡停止分派額外主事請仍照舊例與五  
部一體簽派部議從之五月以知貢舉失察火夫脫逃降二級留任六月奉旨勵  
宗萬不必兼管禮部侍郎事十月吏部疏劾宗萬於奉旨保舉河員時受候選州  
同錢良楫請託徇私濫舉得旨革職尋命在御書處辦事四年命在武英殿行走  
七年五月補侍講學士六月充武英殿總裁十月遷右通政八年正月擢通政使  
十一月命在懋勤殿行走九年二月遷都察院左副都御史五月疏言直隸居民

無山澤之利家鮮蓋藏一遇災荒生資立匱往往就食鄰省各地方官自宜一體撫綏使之得所近來資送流民之例原以保全流離但果有業可歸自能回籍若徒資遣是途中暫有餬口之資而歸鄉仍無謀生之路請敕奉天山東山西河南等處大吏務飭各府州縣官凡流民入境除有親知可依及手藝傭工力能趁食者聽自便外其實因災出毫無生計之人務設法安頓或棲寺廟或設席棚勸諭殷實之家隨力周給不足則益以常平倉穀略仿宋臣富弼知青州安集流民之法選誠練紳士分境散給不得假手胥吏數月後喘息少舒設地方或有曠土可耕工程可作隨宜處置務令遂生倘故鄉已慶豐年流民情願復業則給以路引聽其自歸毋庸押送至興工代賑原救荒善策直屬應修城工三十餘處中有甌城土城不同甌料難於猝辦不若興修土城貧民得以擔挑版築傭工食力更爲有益查雍正五年直隸被水興舉營田水利准大學士朱軾所請暫開營田事例前年淮揚被水亦暫行好善樂施之例今直屬疊被旱災與往事情形相類而江南捐限屆滿請俟江南停捐後改於直隸收捐助賑詔下大學士九卿科道議行七月疏言我朝制科取士立法嚴明近年積久玩生士不務學多以夾帶獲中竟

有纒識之無已登高第者卽素稱能文之士亦相率效尤不但鑒衡淆實而苟且僥倖之私中於人心者爲患甚大查科場原設兵役搜檢但定例每場點名先官卷次旗卷監試官礙於情面兵役等畏其聲勢點過卽放竟不一搜後點民卷難於獨嚴遂至一例從寬虛應故事請敕禮部順天府步軍統領及臣院五城等衙門先期出示申明禁諭凡士子無論滿漢官生民籍悉遵科場條例不得夾帶片紙干罪點名時請特派近信大臣官員監同察查官卷旗卷一體嚴搜徇縱卽將監試官指參仍約束兵役不得陵辱刁難得旨著照所請行十二月遷工部右侍郎十年調刑部右侍郎十一年以縱容其弟門客沈文傑招搖生事部議革職予杖徒諭曰勵宗萬從前在山西巡察任內居官不謹已經廢棄蒙皇考天恩棄瑕錄用至於大員乾隆元年朕復加簡擢因徇私濫舉經部議革職閒居數年朕仍念其爲大臣之後復加恩用至於今職冀其改悔前愆勉效力今覽大學士等覆訊沈文傑行賄作弊一案內稱勵宗萬未受贓私朕細閱此案情節現在實未得財而知勵宗萬平日之爲人將來事後酬謝伊斷無不收受之禮朕此諭旨令勵宗萬捫心自問不切中其隱微乎但朕思伊之所以敢於踰越規矩不守官箴

者固勸宗萬之罪而其間亦尙有故蓋因朕前歲纂修祕殿珠林一書張照梁詩正薦勸宗萬等在懋勤殿行走編輯朕或召見講論書籍勸宗萬遂恃此虛張聲勢縱放自恣朕不曾早加戒飭以致罹於罪愆著革職從寬免其杖徒令回籍閉戶讀書十三年直隸總督那蘇圖疏劾勸宗萬弟原任郎中宗奕霸買官地未經交價遣僕強收糧石宗萬知情故縱下部議罪應杖徒奉旨寬免命承修固安縣城工十五年以查辦廢員諭調取來京酌量錄用十六年授侍講學士十七年以考試不到降二級調用十八年補鴻臚寺少卿尋遷太常寺少卿二十年以征收先農壇空地草價含糊具題降一級留任二十二年以天壇遞香失儀降二級留任二十四年六月遷光祿寺卿九月卒

### 張廷樞

張廷樞陝西韓城人康熙二十一年進士改庶吉士散館授編修三十年充日講起居注官尋遷侍講轉侍讀三十八年充江南鄉試正考官累遷侍講侍讀內閣學士四十一年任江南學政四十四年上南巡賜御書及冠服四十五年四月遷吏部右侍郎五月充經筵講官先是湖廣容美土司田舜年揭其子昞如貪庸暴

戾奉旨革職究擬兩如逃桑植土司向長庚所匿不赴審總督石文晟奏聞並劾  
舜年僭妄不法命左都御史梅鋗內閣學士二格與文晟等詳鞫會舜年赴武昌  
訴文晟拘之病卒長庚亦解兩如聽勘鋗文晟各議具奏而二格以證佐未集不  
便率定奏十月命廷樞同大學士席哈納侍郎蕭永藻赴鞫舜年各款俱虛兩如  
暴戾虐民抗不赴審已革職仍枷杖安置內地長庚隱匿兩如降四級留任並以  
草率具奏下部議革鋗職文晟及湖北巡撫劉殿衡偏沅巡撫趙申喬提督俞益  
謨各降罰有差四十七年轉左四十八年充會試副考官尋遷刑部尚書四十九  
年刑部訊擅盜倉米之張三等犯尚書齊武等擬照例斬監候廷樞另擬充軍下  
九卿議廷樞改擬不合應罰俸一年得旨張廷樞諸事偏執素性好勝有忝大臣  
之任著革職五十一年授工部尚書時江蘇巡撫張伯行劾總督噶禮貪索科場  
舞弊銀五十萬兩噶禮亦砌款劾伯行尚書張鵬翮總督赫壽察審弗得實命廷  
樞與戶部尚書穆和倫再鞫如鵬翮等議伯行所奏全虛應革職諭九卿確勘革  
噶禮職伯行復任五十二年五月仍授刑部尚書九月充武會試正考官五十六  
年河南宜陽縣賊首亢珽自配脫逃懼緝藉稱知縣張育徽加徵火耗據神屋寨

結澠池山賊李一臨抗拒官兵並刦永寧知縣高式青入寨而是時閩鄉縣賊首王更一亦脅丁憂知縣白澄指軍需豫徵錢糧勒養騾馬聚衆圍城上以巡撫張聖佐河北總兵馮君侁不能盡獲賊黨又未將啟釁事由入告命廷樞與內閣學士勒什布馳往拏鞠尋廷樞等奏珽自縊更一一臨等成就擒應依律擬斬澄育徽絞監候聖佐君侁革職至令屬員加徵橫派致激變係原任巡撫李錫任內事錫應斬決部議從之是年蘭陽縣白蓮教首袁進等謀不軌廷樞等遵旨併嚴鞠論罪如例五十八年正月奉命偕內閣學士高其倬往勘南陽鎮兵辱知府一案勘明浙川縣把總營效力民人楊四因賭博爲知縣崔錫枷責兵丁王爵等向知府沈淵告理不允遂聚衆昇淵至教場圍辱王爵等依律擬斬八月以浙江巡撫朱軾疏參巡鹽御史哈爾金貪婪各款復偕內閣學士德音奉命往勘哈爾金受商人宋永寧銀七百兩屬實應絞監候係不枉法贓且事在五十七年恩詔前照例減等枷責得旨如議尋疏言河南漕米自康熙十四年改折起每石折銀八錢解部後因御史孫必振奏豫省連年粟米甚賤部議一錢五分解部餘六錢五分巡撫買米起運巡撫分委州縣州縣復派小民買輸不無費累請照舊例以一錢

五分解部外餘交糧道辦米毋得分委派累該撫容隱併從重治罪又言關聖帝君五十六世孫關爵原籍解州遷洛守墓請照宋儒邵子程子例恩賜世職博士俱下部議行雍正元年以與尙書陶賴審擬在誠郡王處招搖生事之陳夢雷有心徇縱特命降五級調用尋因病回籍廷樞子縉官中允亦告病家居六年陝西巡撫西琳疏劾縉招集悍僕放債收租剝削鄉里又廷樞曾收受原任河督趙世顯贓銀六千兩奉旨催追抗不完納諭曰張廷樞於朕登極之初徇情枉法其罪實不可道本應卽行正法朕格外加恩祇令降職閒居理應感戴朕恩省愆改過其名下應追銀皆貪婪不法之贓款自當速行完納何至以抗延被參其子張縉復倚仗聲勢剝削鄉里甚屬可惡張廷樞張縉俱著革職拏問交該督撫嚴審定擬具奏若云士可殺而不可辱卽應依律正法也七年總督岳鍾琪奏廷樞解至中途病故縉於伊父應追贓款故意抗延請依律擬斬家產查鈔入官法司會議如所請得旨張縉家產入官之處著寬免將伊交與岳鍾琪於川陝沿邊應修城垣派委一處令其效力贖罪

隆科多



隆科多滿洲鑲黃旗人一等公佟國維第三子康熙二十七年任一等侍衛三十二年授鑾儀衛鑾儀使三十四年兼鑲白旗漢軍副都統四十三年調正藍旗蒙古副都統四十四年因所屬人違法妄行諭責隆科多不實心辦事革副都統鑾儀使在一等侍衛行走五十年授提督九門步軍巡捕三營統領五十九年擢理藩院尙書仍管步軍統領事六十一年十一月世宗憲皇帝御極命同大學士馬齊等總理事務先是佟國維以孝懿仁皇后父封一等公五十八年卒其一等公爵所司以承襲請旨疏留中至是命隆科多襲十二月授吏部尙書仍兼步軍統領是月諭獎總理事務王大臣恩晉爵職有差隆科多一等輕車都尉世職以其長子岳興岱襲次子玉柱由侍衛擢鑾儀衛鑾儀使雍正元年三月命隆科多與川陝總督年羹堯並加太保二年六月兼管理藩院事纂修聖祖仁皇帝實錄大清會典並充總裁官又爲明史監修總裁官復同年羹堯得賜雙眼孔雀翎四團龍補服黃帶及鞍馬紫轡三年正月解步軍統領任六月以玉柱行止甚劣命革職交隆科多管束年羹堯獲罪下吏部議處上諭大學士曰日前因隆科多年羹堯頗著勤勞賞給異數以示鼓勵今二人交結專擅諸事欺隱所賞之黃帶紫扯

手雙眼翎俱不許用四圍龍補服著交入吏部議處年羹堯僅請罷任不議革公爵別以妄劾道員金南瑛事請嚴加治罪上曰所議甚屬悖謬年羹堯所犯之罪甚多卽行正法亦不足蔽其辜並不在此一事朕處此事卽當就此事定議乃前議旣屬徇庇今議復處分過當此必隆科多有意擾亂著交都察院嚴加議處時有旨議敘銀庫郎中等員隆料多議予卽陞上以熟練人員概議卽陞必致辦事多屬生手亦下都察院察議尋議隆科多徇庇年羹堯應革職其議敘銀庫各員不從公商酌擅囑司官概議卽陞沽恩市惠應革去所襲公爵奏入並得旨從寬免革公爵僅削太保及一等輕車都尉職命往阿蘭善等處修理城池開墾地畝四年正月法司鞠訊隆科多家人牛倫等得其挾勢婪索財物及隆科多收取總督趙世顯滿保年羹堯巡撫甘國璧蘇克濟等金銀諸款請革隆科多尙書及一等公爵與牛倫並擬斬立決上曰隆科多婪贓犯法卽應治罪但其才尙可用朕心憫惜著革退吏部尙書令其料理阿爾台等路邊疆事務尙能盡心辦理卽可贖其前愆如有怠忽定難寬宥伊家人牛倫從前犯罪應死彼時交與隆科多自行處置乃徇私容留實屬可惡今招搖受賄諸事又復敗露再難寬宥將牛倫卽

正法尋命往議俄羅斯邊界事初隆科多與尙書公阿靈阿左都御史揆敘等互相黨附及阿靈阿揆敘死與總督年羹堯交結最厚至是上盡發阿靈阿揆敘年羹堯罪狀宣諭中外又禮部侍郎查嗣庭爲隆科多所薦舉以紀載悖逆伏誅隆科多每奉密旨詰問俱不吐實五年閏三月宗人府劾奏輔國公阿布蘭私以玉牒繕本與隆科多收藏在家阿布蘭革公爵圈禁隆科多亦革公爵仍命回奏奏至下議政大臣等察議因奏隆科多私鈔玉牒存貯家中及降旨詢問又不據實具奏應俟辦完俄羅斯疆界事拏問上曰俄羅斯事最易料理朕前遣隆科多前去非以不得其人必須隆科多而使之也特與效力之路以贖罪耳乃其去後所奏事件不但不改伊之兇心逆行且並不承認過失而舉動狂悖全無愧懼將朕行查之事隱匿巧飾無一誠實之語伊既不實心效力則留伊在彼反致攪擾毫無裨益可調回令其速來十月隆科多既至命王大臣勘鞫讞成議曰隆科多私鈔玉牒收藏在家大不敬之罪一將聖祖仁皇帝御書貼在廂房視爲玩具大不敬之罪二妄擬諸葛亮奏稱白帝城受命之日卽是死期已至之時大不敬之罪三盛京兵部主事瑪岱之事屢奉聖諭隆科多明知干犯復行妄奏大不敬之罪

四皇上賞銀三千兩令修理公主墳墓隆科多遲至三年竟不修理大不敬之罪  
五聖祖仁皇帝升遐之日隆科多並未在皇上御前亦未派出近御之人乃詭稱  
伊身曾帶七首以防不測欺罔之罪一狂言妄奏提督之權甚大一呼可聚二萬  
兵欺罔之罪二時當太平盛世臣民戴德守分安居而隆科多作有刺客之狀故  
將壇廟桌下搜查欺罔之罪三妄奏被劾知縣關隲原係何官欺罔之罪四皇上  
謁陵之日妄奏諸王心變紊亂朝政之罪一妄奏調取年羹堯來京必生事端紊  
亂朝政之罪二妄奏舉國之人俱不可信紊亂朝政之罪三交結阿靈阿揆敘邀  
結人心奸黨之罪一保奏大逆之查嗣庭奸黨之罪二徇庇傅鼎沈竹戴鐸巴海  
不行查參奸黨之罪三比暱伊門下行走之蔡起俊奸黨之罪四徇庇阿錫鼎法  
敏將倉場所奏沕爛倉米著落歷年監督分賠之案巧爲袒護具奏奸黨之罪五  
曲庇菩薩保囑託佛格免參奸黨之罪六任禮部尙書時所辦銓選官員皆自稱  
爲修選不法之罪一縱容家人勒索財物包攬招搖肆行無忌不法之罪二徇庇  
提督衙門筆帖式詹泰囑託原任吏部侍郎勒什布改換成例不法之罪三發遣  
安西人犯應給口糧并赤金等處應裁應補兵丁之處故行推諉欲以貽誤公事

不法之罪四因係侈姓捏造惟有人冬耐歲寒之語向人誇示以爲姓應圖識不法之罪五自知身犯重罪將私取金銀預行寄藏菩薩保家不法之罪六挾勢用強恐嚇內外人等不法之罪七索詐安圖銀三十八萬兩貪婪之罪一收受趙世顯銀一萬二千兩貪婪之罪二收受滿保金三百兩貪婪之罪三收受蘇克濟銀三萬六千餘兩貪婪之罪四收受甘國璧金五百兩銀一千兩貪婪之罪五收受程光珠銀五千兩貪婪之罪六收受六格貓眼映紅寶石貪婪之罪七收受姚讓銀五百兩貪婪之罪八收受張其仁銀一千兩貪婪之罪九收受王廷揚銀二萬兩貪婪之罪十收受吳存禮銀一萬二千兩貪婪之罪十一收受鄂海銀一千五百兩貪婪之罪十二收受佟國讓銀二千四百兩貪婪之罪十三收受佟世祿銀二千兩貪婪之罪十四收受李樹德銀二萬一千四百餘兩貪婪之罪十五收受菩薩保銀五千兩貪婪之罪十六以上罪案昭著隆科多應斬立決妻子入辛者庫財產入官疏入上召議政大臣內閣九卿等諭曰隆科多所犯四十一款重罪實不容誅但皇考升遐之日大臣承旨者惟隆科多一人今因罪誅戮雖於國法允當而朕心則有不忍隆科多免其正法於暢春園外造屋三間永遠禁錮伊之

家產何必入官其應追贓銀數十萬兩尙且不足抵償著交該旗照數追完其妻子免入辛者庫伊子岳興岱著革職玉柱著發往黑龍江當差六年六月隆科多死於禁所賜銀一千兩辦理喪事弟慶福襲一等公

年羹堯

年羹堯漢軍鑲黃旗人湖北巡撫遐齡次子康熙三十九年進士改庶吉士散館授檢討四十四年充四川鄉試正考官四十七年充廣東鄉試正考官歷遷侍講學士明年二月授內閣學士旋擢四川巡撫四十九年二月幹偉生番羅都等掠寧番衛戕遊擊周玉麟上命羹堯同提督岳昇龍相機剿撫七月昇龍率兵進剿斬馘七千擒羅都羹堯至平番衛聞羅都就擒卽還爲川陝總督音泰所劾部議革職命從寬留任五十年疏劾打箭爐監稅員外郎博羅侯等苛索狀詔音泰鞫實論罪如律五十六年二月越籛衛所屬番人與普雄土千戶那交等據險叛羹堯遣遊擊張玉剿平之四月直隸巡撫趙宏燮訪獲鑲藍旗逃人孟光祖徧歷直省請託賅利奏聞事下刑部嚴訊光祖赴川時曾詐稱誠親王允祉使致餉遺羹堯受之且餽以銀馬令所屬應夫役上以羹堯不將孟光祖查拏反行餽送敕令

明白回奏尋因所奏巧飾不實部議革任得旨仍留任是年策妄阿喇布坦遣其黨策凌敦多卜襲西藏戕拉藏汗四川提督康泰出黃勝關偵禦兵噪回羹堯諭參將楊盡信撫其衆密奏泰失兵心難統領請親赴松潘辦理軍務上嘉其實心任事遣都統法喇率兵赴川協剿五十七年六月羹堯請令護軍統領溫普駐裏塘自打箭爐至裏塘增設驛站八月又請增駐防四川兵允之十月諭曰年羹堯自軍興以來辦事明敏又能度量西去追剿之兵運餉接濟甚屬可嘉巡撫祇理民事無督兵責任今軍機緊要著授爲四川總督兼管巡撫事五十八年三月羹堯奏賊情叵測請自往備廷議以松潘諸路軍務緊要不便率兵出口檄法喇進師六月法喇率副將岳鍾琪撫定裏塘巴塘羹堯亦遣知府遲維德招乍了察木多察哇番日來歸因請撤回法喇兵從之五十九年二月詔平逆將軍宗室延信自青海往定西藏授羹堯定西將軍卽自拉里會剿並命以堪署總督之人具奏羹堯疏言總督印務一時無可署理之人請授護軍統領噶爾弼爲將軍而調法喇駐防打箭爐上特從所請時部臣議准雲貴總督蔣陳錫疏言巴塘裏塘本滇省麗江土府屬地仍歸土知府木興管轄羹堯言進藏運糧要路不宜隸滇仍請

歸四川便五月又言成都駐防滿兵需米甚多請令近省瀕水州縣應收折色者改本色運省充餉七月又言州縣虧空錢糧知府扶同徇隱參革分賠皆下部議行八月噶爾弼延信先後抵西藏策凌敦多卜敗遁西藏平羹堯遵旨酌議凱旋軍士入口路令法喇回京十一月遣兵剿撫裏塘所屬之上下牙色上下雅尼巴塘所屬之桑阿壩林卡石諸生番悉降之六十年五月入覲賜弓矢授四川陝西總督九月以青海郭羅克番肆掠命羹堯等酌調滿兵及外藩蒙古兵會剿羹堯奏言郭羅克有隘口三悉險峻宜步不宜騎若調兵多則賊得潛爲備不如以番攻番臣素知雜谷諸土司土目亦病郭羅克肆惡臣已移提臣岳鍾琪率赴松潘進剿上是之十二月鍾琪率土兵敗郭羅克伏卒千人進克番寨四十餘斬馘三百擒其渠餘衆悉降先是西藏既平內大臣公策旺諾爾布奉命駐守六十一年七月駐藏喇嘛楚爾齊木藏布知府石如金以在藏官兵不睦訴羹堯密奏策旺諾爾布委靡及副都統常齡侍讀學士滿都員外郎巴特瑪等任性滋事請撤回駐藏兵事下廷臣議以羹堯聽信喇嘛及知府飾詞擅請撤兵應飭所司嚴議上原之特命滿都巴特瑪石如金楚爾齊木藏布等來京遣四川巡撫色爾圖西安



布政使塔琳赴藏助策旺諾爾布駐守是時陝西庫帑多虧羹堯累疏參革守令嚴追充餉西安巡撫噶什圖以虧項不能速完密奏又與羹堯請加火耗以完虧空諭曰陝西錢糧所以虧缺最甚者自用兵以來資助車馬糗糧衣服銀兩府州縣無可設法勢必挪用庫帑及撤兵時亦然卽如自藏回京將弁沿途所得反多於正項是以各官虧空動輒萬金年羹堯欲追虧項以充兵餉及追之不及又與噶什圖議加火耗以完虧空此摺若批發便謂奉旨加徵若不批發又謂此事已曾奏明竟自私派民間火耗祇可議減豈可加增朕在位六十一年從未徵民間火耗今若聽其加派必致與正項一例催徵將肆無忌憚矣著傳旨申飭尋命發帑銀五千萬兩解送陝西資餉十一月撫遠大將軍貝子允禩還京命羹堯管理軍務雍正元年三月議敘平定西藏時運糧及守隘功封三等公世襲罔替加太保時詔撤駐藏官兵羹堯條奏八事一打箭爐外中渡河口爲通藏要隘請移駐守備建城分防一保縣在大河南土番出入隘口請撥千總防汛一松潘口外各番惟阿樹部落最大請給長官司職以資鈐束一建昌所屬越巂衛多蠻獠請改設遊擊分兵防守一金川土舍莎羅奔隨征羊峒有功請給安撫司銜以分小金

川之勢一烏蒙蠻達日等兇暴不法土舍祿鼎坤等請擒獻俟至日給土職分轄其地一川省捐造滿兵營房之官民請予議敘一軍營自備資斧效力之武進士舉人請酌補守備千總部議從之八月青海羅卜藏丹津脅衆台吉叛刼親王察罕丹津侵掠青海諸部十月夔堯自甘州率師至西寧疏請進剿特授撫遠大將軍以前鋒統領素丹提督岳鍾琪爲參贊敕授方略夔堯奏調總兵周瑛截賊往藏後路都統穆森駐吐魯番副將軍阿喇納駐噶斯參將孫繼宗駐布隆吉爾於是遣總兵楊盡信黃喜林副將王嵩參將宋可進遊擊元繼尹馬成輔等先後敗賊鎮南堡南川西川由中北川奇嘉等堡馘俘甚衆賊衆竄走遂移察罕丹津及其屬人於蘭州因奏進剿青海五事一請選陝西甘肅四川大同榆林綠旗兵及外藩蒙古兵萬九千令鍾琪等分領由西寧松潘甘州布隆吉爾四路進剿一防守西寧永昌布隆吉爾巴塘裏塘黃勝關察木多諸邊口一除歸化城張家口所買馬駝外請太僕寺撥孳生馬三千巴里坤選駝二千赴軍備用一貯備軍糧卽以臣在西安時預買米六萬石充運一請以景山所製火器給軍總理事務王大

臣議如所請十月敘平郭羅克功晉二等公十二月察罕丹津屬部各殺羅卜藏

丹津守者來歸羹堯堯宣布德威安置四川邊外有堪布諾門汗者察罕丹津從子也爲塔兒寺喇嘛叛從賊糾衆拒戰至是亦來歸羹堯堯數其罪斬之四月繼宗擊賊之犯布隆吉爾者鍾琪率瓦斯雜谷兵剿南川口外郭密呈庫和爾喜諸部盡殪其衆二年正月上以羅卜藏丹津負國叛賊斷不可宥授鍾琪奮威將軍命羹堯堯令討賊時西寧東北郭隆寺喇嘛應賊羹堯堯令鍾琪等襲斬六千餘燬其寺因分路進剿敗賊哈爾吉山擒其酋阿喇布坦溫布別遣涼莊道蔣河等擒阿岡賊番又敗賊石門寺三月鍾琪等師至柴達木羅卜藏丹津率二百餘人遁追擊至烏蘭伯克擒其母及賊酋吹喇克諾木齊等盡收其人戶馬駝青海平敘功進羹堯堯爵一等公再給一子爵令其子斌襲其父遐齡如羹堯堯爵加太傅銜命議防邊事宜羹堯堯以八事入奏一策安阿喇布坦恭順遣使請降請撤回大兵而選兵二千駐巴里坤千五百駐吐魯番二千駐哈密一布隆吉爾築城駐兵五千轄以總兵其新城請欽定嘉名以垂永久沙州哈密亦各設兵防守一駐布隆吉爾兵請卽以甘涼肅三路所罷兵給資遣往一布隆吉爾駐防兵內請每營撥餘丁二百給牛籽口糧往屯赤金衛柳溝所墾地三年後計畝收糧充餉免由內地轉輸

一請移靖逆衛同知駐布隆吉爾理民事增設衛守備理屯糧沙州亦設衛千總一專司屯務並歸肅州道管轄一邊外既設駐防肅州鎮祇於口內分守應汰兵八百一邊外嘗爲蒙古牧場今駐兵耕種不應仍令游牧滋事應遣大臣率幹員往布隆吉爾迤南山中分地居之務令地界明晰一寧夏舊設總兵應援哈喇道遠甚無益寧夏邊外阿拉善去哈密近宜滿兵駐防詔如所請四月羹堯遣侍衛達爾副將紀成斌搜剿餘賊至布哈色卜蘇擒台吉阿布濟車陳又遣副將岳超龍剿河州口外鐵布等寨番殺賊二千餘克寨四十一餘悉降之又以莊浪番賊竊據卓子山及碁子山遣兵自西寧進剿鍾琪率可進成斌河等奪隘入轉戰五十餘日殲賊甚衆遂移附賊喇嘛於別寺燬其巢於是頒條示禁約又奏青海善後十三事一青海諸部宜分別功罪加賞罰一青海部落請於內札薩克編置佐領申約束一朝貢交易宜立期定地青海王貝勒台吉等分作三部自備駝馬由邊外赴京請安進貢三年一次其交易定於那拉薩拉地方不得擅移一居青海之喀爾喀宜弗隸青海請編旗置佐領增設扎薩克以分青海之勢一凡陝省甘州涼州莊浪西寧河州川屬松潘打箭爐裏塘巴塘滇屬中甸之西番部人自明

時不能撫治或歸喇嘛耕種或屬青海納租今已歸化爲民請增設衛所撫治酌減土司糧額以示寬大一青海喀木藏衛乃唐古特四大部顧實汗據有之以青海地廣可游牧喀木人衆糧富令其子孫分處二地而以藏衛二部施予達賴班禪二喇嘛爲香火地今因青海叛盡取其地分隸川滇而喇嘛遣人赴打箭爐貿易仍索各部銀名曰鞍租至爐納稅請禁喇嘛不得再收鞍租稅員亦免收喇嘛之稅一諸廟喇嘛多至數千易藏奸宄甚至通賊聚兵抗大軍請定例廟舍無過二百楹衆無過三百人仍取首領結狀其番民納糧令所在官吏經理給發一黃河入邊至河州西寧蘭州中衛寧夏榆林莊浪甘州其間水草豐美林麓茂密自蒙古越據爲牧廠致與內地相通請於西寧川北邊外創築邊疆建城堡則番邦仍爲內地又寧夏以阿拉善爲險要應令額駙郡王阿寶等飭屬悉歸山後游牧一大通河宜設總兵鹽池宜設副將河州保安堡宜設遊擊則蒙古不敢覬覦一打箭爐外木雅吉達巴塘裏塘諸路請增設將弁以爲川滇二省聲援一陝西之富寧寧夏四川之重慶川北諸鎮宜歸併裁汰一請發直隸山西河南山東陝西五省軍罪當遣者盡行發往大通河布隆吉爾墾種一諸般部落宜加意撫綏請

令奮威將軍岳鍾琪留兵四千暫駐西寧經理並令招撫西番諸部疏上上諭總理事務王大臣等曰自逆賊羅卜藏丹津背棄國恩招集同惡殘其骨肉侵犯邊城朕命年羹堯揆度機宜指揮將士犁庭掃漠迅奏膚功今具奏善後事宜運籌措置覽之喜悅惟新闢邊疆宜廣屯種而欲令五省有罪之人發往開墾恐此輩未必習於耕種又無家室可以羈留邊塞爾等其悉心妥議具奏尋奏大通河駐兵六千其子弟親戚及西寧民人俱願開墾屯種惟布隆吉爾距邊遠應令遣犯僉妻發往官給籽種屯墾三年後起科如例餘悉如所奏行六月羹堯奏徙卓子山降番噶住等於土司魯華齡所約束八月撫定雙蓬諸番並剿撫貴德至松潘口外諸番部因奏撤涼州甘州諸軍又以甘肅河西各廳生聚繁庶奏改寧夏西寧涼州甘州四廳爲府其所屬各衛皆改爲州縣十月羹堯入覲賜雙眼孔雀翎四團龍補服黃帶紫轡及金幣十一月敕平卓子山等功加一等男世職以羹堯第二子富襲時年氏家僕有桑成鼎者自平西藏時隨軍敕功累官至直隸守道魏之耀亦敕功至署副將羹堯恐人議已奏稱成鼎係僕妻前夫之子之耀爲乳母子力爲辨白又請發文武員弁數十人隨往軍營委用特允所請及抵西安卽

劾罷驛道金南瑛等七人而以請發之主事丁松請署糧道上以題奏錯誤傳旨切責羹堯又嘗薦其私人西安布政使胡期恆按察使王景灝可大用並劾四川巡撫蔡珽威逼所屬知府蔣興仁至死罷珽職翰治擬斬監候景灝遂得擢任川撫及羹堯之劾南瑛等也期恆亦已擢甘肅巡撫離西安任尙以布政使銜順羹堯意作詳揭上命期恆率所劾人員來京具奏三年正月珽至京刑部請監禁特召珽入見珽自陳平日抗羹堯及被誣陷狀具奏其貪殘諸款上特宥珽罪擢左都御史諭曰蔡珽係年羹堯參奏若置之於法人必謂朕聽年羹堯之言而殺之矣朝廷威福之柄臣下得而操之有是理乎三月期恆入京奉旨胡期恆人甚卑鄙奏對荒謬豈特不勝巡撫卽道員亦屬有玷下部議革職上命更定打箭爐外增汰弁兵事宜凡羹堯奏裁川陝諸鎮兵皆復尋撤鹽池防兵四月諭曰年羹堯曾妄舉胡期恆妄劾金南瑛等又遣官弁築城南坪不惜番民致驚惶滋事反以降番復叛巧飾具奏又青海蒙古饑饉匿不上聞年羹堯從前不至於此或自恃己功故爲怠玩或誅戮太過致此昏瞶豈可仍居總督之任念其尙能操練兵丁可補授杭州將軍嗣山西巡撫伊都立疏劾羹堯私占鹽窩擅用正課諸款都統

原任西安巡撫范時捷亦劾羹堯借口捕治鹽梟遣運使金啟勳等率兵夜圍邵陽民堡致死多人特命侍郎史貽直高其佩赴山西察審五月時捷復劾羹堯欺罔貪婪五事並請治啟勳期恆及桑成鼎魏之耀罪尋下吏部議處議上僅請罷任不請革公爵別以妄劾南瑛事議嚴處諭曰此議甚屬悖謬年羹堯所犯之罪甚多雖卽行正法亦不足蔽其辜並不在此一事朕交此事卽當就此事定議乃前議旣以徇庇今議復爾過當此必尙書隆科多有意擾亂其下都察院議罪隆科多坐是削太保銜解部務命吏部另議羹堯罪諭九卿曰朕御極之初隆科多年羹堯皆寄以心膂毫無猜防所以作其公忠期其報效孰知朕視如一德伊竟有二心朕予以寵榮伊倖爲邀結招權納賄擅作威福敢於欺罔忍於背負彼旣視憲典爲弁髦朕豈能姑息養奸耶至其門下趨附奔走之人或由希其薦拔畏其加害所致急宜改散黨與革面洗心若仍舊情性惟務隱匿巧詐一經發覺定治以黨逆之罪向日明珠索額圖結黨行私聖祖仁皇帝洞見其情因解其要職置之閒散何嘗更加信用隆科多羹堯若不知恐懼痛改前非欲如明珠等之故習則萬不能也殊典不可再邀覆轍不可屢陷各宜警懼無得自干誅滅羹堯行



至儀徵逗遛不前回奏又多狡飾部臣請嚴鞠並逮期恆改勳及桑成鼎魏之耀等治罪詔下期恆等於法司革富等爵職羹堯暫免逮問命分案議罪削太保銜七月追恩賞團龍服黃帶雙眼翎紫轡等物及硃批摺奏並令繳入革將軍職授閒散章京在杭州效力內閣詹事九卿科道合詞奏言年羹堯受聖祖仁皇帝參養深恩又蒙皇上殊恩異數不思公忠爲國貪婪成性驕橫居心顛倒官常草菅民命按其罪狀罄竹難書幸聖恩不卽加誅令其回奏仍復怙惡不悛更肆欺罔請亟罷斥立正典刑以爲不法不忠者戒得旨年羹堯爲川陝總督貪婪放縱網利營私本應卽加治罪因其青海之功尙欲委曲保全罷其總督授爲杭州將軍令其效力以贖前愆乃今事事敗露不料欺罔悖逆之罪至於此極使更加寬宥將來何以示懲此所奏乃在廷公論而國家賞罰大事必諮詢內外大臣僉謀畫一可令將軍督撫提鎮等各抒己見入奏是月降公爵二等八月以直隸總督李維鈞匪羹堯產革任尋吏部議盡革羹堯世職是時川陝總督岳鍾琪河南巡撫田文鏡侍郎黃炳鴻臚寺少卿單疇書原任直隸巡撫趙之垣等各舉發羹堯罪狀侍郎史貽直高其佩亦以讞辭奏請依大不敬律斬決十月命逮羹堯來京嚴

翰十一月將軍督提鎮次第入奏請速加誅戮以彰國法章下所司十二月議政大臣三法司九卿等奏言年羹堯罪蹟昭彰彈章交至其大逆之罪五一與靜一道人鄒魯等謀爲不軌一奏繳硃批諭旨故匿原摺詐稱毀破做寫進呈一見浙人汪景祺西征隨筆詩詞譏訕及所作功臣不可爲論語多狂悖不行劾奏一家藏鎖子甲二十八箭鏃四千又私貯鉛子皆軍需禁物一偽造圖讖妖言其欺罔之罪九一擅調兵捕邵陽鹽梟致死良民八百餘奉旨查詢始奏並無傷損後乃奏止傷六人一南坪築城官弁騷擾番民不卽劾奏一詭劾都統武格等鎮海堡失律一西安解任時私囑咸寧令朱烱賄奸民保留一縱令劉以堂詐冒已故保題武功令趙勳名姓赴任知而不奏一將幕友張泰基等冒入軍功共十八案一家人魏之耀家產數十萬金羹堯妄奏毫無受賄一西寧效力者實止六十二員冊報一百九員一退役王治奇冒軍功得授州判其僭越之罪十六一出門黃土填道官員補服淨街一驗看武官用綠頭牌引見一設坐當會府龍牌正坐一穿用四袂衣服鵝黃佩刀荷囊一擅用黃袱官員餽送曰恭敬一縱子穿四團龍補服一與屬員物件令北面叩頭一受總督李維鈞巡撫范時捷跪道迎送一令蒙

古扎薩克郡王額駙阿寶下跪一行文督撫書官書名一進京沿途填道疊橋市肆俱令閉戶一館舍牆壁彩畫四爪龍一轅門鼓廳畫龍吹樂人蟒服一私造大將軍令箭將頒發令箭燬壞一賞賚動至千萬提鎮叩頭謝恩其狂悖之罪十三一兩次恩詔到陝西不宣讀張掛一奏摺不穿公服拜送祇私室啟發一不許同城巡撫放礮一勒取蒙古貝勒七信之女爲妾一以侍衛前引後隨執鞭墜蹬一大將軍印不肯交出一妄稱大將軍行事俱循俗例一縱容家僕魏之耀等朝服蟒衣與司道提鎮等官同坐一違旨逗遛儀徵一勒令川北總兵王允吉以老病乞休一要結邪黨沈竹戴鐸等懷欺惑衆一袒庇私人馬德仁阻回甘撫石文焯參劾奏疏一本內引用朝乾夕惕故作夕惕朝乾其專擅之罪六一築郃陽城堡不行題請擅發銀兩一委侍衛李峻等署理守備奉旨飭駁仍不令行調回一擅用私票行鹽一諭停捐俸仍令照舊公捐一捕獲私鹽擅自銷案一守備何天寵患病不照例填注軍政又囑直督李維鈞勒清苑令陸篆接受前任王允猷虧項其忌刻之罪六一凌虐現任職官縱任私人奪缺一軍前官兵支糧實冊不先咨晉撫諾岷欲令遲誤致罪一尙書綽奇至軍營商辦糧餉清字咨文不交新任總

督岳鍾琪欲令違誤軍需一捏參夔州知府程如絲販賣私鹽殺傷人命一欲令李維鈞爲巡撫計陷原任巡撫趙之垣一遏抑中書阿炳安等軍功其殘忍之罪四一郟陽鹽梟案中故勘良民無辜馮豬頭至死一鎖禁筆帖式戴蘇一劾金南瑛等七人急欲出缺與私人一不善安輯蒙古台吉齊克濟扎卜等致困苦失所其貪贖之罪十八一收受題補官員銀四十餘萬兩一勒索捐納人員銀二十四萬兩一趙之垣罷職發往軍營羹堯勒餽金珠等物價值二十餘萬兩一受樂戶竇榮銀兩一收受宋師曾玉器及銀萬兩一徧置私人私行鹽茶一私占咸寧等鹽窩十八處一收受鴻臚寺少卿郭繼孔古玩一索屬員傅澤灃賄不據實劾虧帑一西安甘肅山西四川效力人員每員勒銀四千兩一受參革知府欒廷芳賄奏隨往陝省一掠各番衣物爲己有一私徵新撫各番租銀一擅取蒲州盤獲私鹽價銀一萬兩一遣僕販買馬匹一私販馬發各鎮勒重價一遣莊浪縣典史朱尙文赴湖廣江浙販賣四川木植一令人賣茶得銀九萬九千餘兩其侵蝕之罪十五一冒銷四川軍需入己一冒銷西寧軍需入己一冒銷軍前運米費入己一侵用各員並俸工凡五年皆入己一築布隆吉爾城冒銷工料入己一隱匿夔關

稅銀又加派糧規入己一盤獲私茶取罰賣銀入己一侵用河東鹽政盈餘入己一西安米萬石未運至西寧冒銷運費入己一寧夏各衛貯倉穀及留西寧養馬銀並收入己一侵用城工餘銀入己一鈔沒塔兒寺礪砂茜草諸物私變價銀入己一侵用紀運韶等捐解銀入己一斫桌子山木植入己共計贓銀三百五十餘萬兩罪凡九十二款供狀明白律應大辟其父及兄弟子孫伯叔之子兄弟之子年十六以上皆斬十五以下及母女妻妾姊妹並子之妻妾給功臣家爲奴奏上恩予自裁子富立斬餘十五歲以上之子發極邊充軍其父遐齡兄廣東巡撫希堯革職免罪於是就獄中傳諭堯堯曰歷觀史書所載不法之臣有之然當未敗露之先尙皆僞守臣節如爾之公行不法全無忌憚古來曾有其人乎朕待爾之恩如天高地厚意以爾實心爲國故盡去嫌疑一心任用爾作威作福植黨營私辜恩負德於心果忍爲之乎卽如青海之事朕命於四月備兵又命於八月進兵爾故意遲延及嚴加督催然後進剿孤軍冒險幾至失機又如爾命阿喇納之兵由噶斯前進涉險惡必不可行之路豈非欲陷阿喇納乎又如爾令富寧安將駱駝三千從巴里坤送至布隆吉爾爲無用之需豈非設計欲陷富寧安乎又如調

岳鍾琪之兵至西安爾令舍近就遠紆道數千里欲使蔡珽運糧不濟豈非欲巧陷蔡珽乎此皆軍務大事而爾視爲兒戲借快私忿尙得謂之有人心者乎又如爾所奏善後十三事於不應造城處議造城不應屯兵處議屯兵籌畫邊機如此草率是誠何心青海用兵以來爾殘殺無辜顛倒軍政朕尙未令人於廷讞卽就所議九十二款爾應服極刑及立斬者三十餘條朕覽之不禁墮淚朕統御萬方必賞罰公明方足爲治爾悖逆不臣至此若枉法曲宥曷以彰憲典而服人心今寬爾磔死令爾自裁又赦爾父兄子孫伯叔等死罪爾非草木雖死亦當感涕也羹堯旣死其黨次第伏法五年諭曰向因年羹堯狂悖妄亂結黨肆行法難寬宥不得已將伊治罪又恐黨援固結別生事端故令諸子徙居邊地今年羹堯正法後平日同黨之人皆悔過解散無一人比附之者而當日平定青海年羹堯亦著有功績可將伊子俱赦回交與年遐齡管束以示格外恩全至意

蔡珽

蔡珽漢軍正白旗人康熙三十六年進士改庶吉士授檢討四十九年充日講起居注官遷左中允五十年轉左諭德五十一年提督貴州學政五十四年遷左庶

子五十五年丁母憂五十八年二月補右庶子十月遷侍讀學士五十九年充河南鄉試正考官六十年遷少詹事六十一年二月晉翰林院掌院學士兼禮部侍郎七月擢四川巡撫雍正二年川陝總督年羹堯奏開鼓鑄珽言四川不產白鉛開採非便下部議珽阻撓公事革職又珽辱重慶府知府蔣興仁自殺珽以病卒聞羹堯劾之降旨詰責再三始款服部議因事非軍務錢糧酌情減等擬珽枷責上以部臣欲寬珽罪非是再議擬斬三年正月解珽至都請旨諭曰蔡珽所犯應如律然劾之者年羹堯也論死人將謂朕以羹堯故殺珽是羹堯得操威福柄也不可其免珽罪尋召見蔡珽極陳羹堯貪暴及己所以抗拒羹堯狀特旨授都察院左都御史三月奏請設安徽學政如江蘇從之四月兼正白旗漢軍都統七月晉兵部尚書仍兼左都御史八月以直隸總督李維鈞匿羹堯財產命珽偕內大臣馬爾賽往究得實革維鈞職以珽署總督時直屬被水賑濟復發帑修河間靜海諸城以工代賑珽奏言省會米價昂貴請令臬司浦文倬至天津運截留漕米二萬石於保定平糶留萬石接濟沿途地方上如所請敕再運通倉米十萬石往天津聽珽調度加賑一月倘不敷用著珽奏明增發珽奏條約十四款一察參地

方官侵冒一重懲胥役捏報一嚴訪衿棍挾制若貧士膏火無資一體給賑一飭地方官親查賑恤一貧民戶給印券以杜重冒一預示賑期勿致淆混一俟漕米入倉開賑未免守候應令五十里內居民卽於水次赴領遠者因地酌通一各屬倉儲不敷賑給者先計限成數均給撥令米至補領一造冊遺濫者許自首改正一災黎外出來歸者續報給賑一舞弊胥役卽重處地方官失察治如溺職例一三日之米全數給與恐愚民資耗應分兩次散給一每村各給村名紙旗依次給領以免踐踏一派武弁巡查以防搶奪又言賑滿三月便續修城工賑時所給印券領米後仍給本人修城日驗券傭工不待更查至玉田豐潤兩城亦殘壞請一體估修又請增置布政使經歷理問各一按察使經歷一延慶衛守備梁城所千總各一又請移保定通判駐通州又言督撫不同城會奏者皆於具題後知會名曰會稿實未與聞至參劾屬官例由司道揭送往往有先拜疏而後補揭者事雖小節實屬欺僞請嗣後地方重事督撫必會議具本餘者各自陳請不必會稿其參劾屬官司道等倘有徇庇一體題參或到任未久差委公出毋庸列銜是去虛罔之虛名而收簡便之實效也諸疏均如所請九月調補吏部尙書其兵部左都



御史都統事兼理如故十月充經筵講官四年四月以珽領事多解左都御史都統事七月解禮部尙書專管兵部事十月因前徇庇直隸昌平營參將楊雲棟部議革職得旨姑從寬降爲奉天府尹先是岳鍾琪代年羹堯爲川陝總督珽於上前言鍾琪叵測上弗信及珽署直隸總督鍾琪入覲過保定珽造蜚語冀惑鍾琪事覺嚴旨詰詢珽諱不吐實五年三月召珽回京質審時上閱年羹堯案內伏法舉人汪景祺逆書載珽撫川時得夔州府知府程如絲賄保治行第一上以景祺雖不道此言未必盡妄令侍郎黃柄往川審理使珽同往柄覆奏屬實下法司彙齊擬奏尋議珽挾詐懷私罪案山積如怡親王查勘水利撥兵引導訛傳七省騷擾軍營罪一其子已革蔭生違例請復罪二錯誤本章敢爲狡飾罪三屬州私借倉米徇隱不參罪四刑名重案違限不提罪五屬縣侵蝕倉項代爲欺隱罪六各屬徵收銀米擅令停解罪七支給俸工銀兩並不飭查日期罪八寧遠等屬所收莊頭糧草改折銀數亦不詳查罪九鋪司公文被刦竟不飭拏罪十訛詐重情告發不理罪十一侍郎五格參屬官私縱之事本屬秉公珽妄言冤抑罪十二私受夔關稅銀千八百八十兩富順縣鹽規銀五千兩罪十三假充公用冒銷藩庫銀

萬兩罪十四婪得貪殘不法之程如絲銀六萬六千兩金九百兩挾欺保薦罪十五交結大逆不道之查嗣庭罪十六黨庇行止妄亂之戴鐸罪十七讒毀岳鍾琪造爲荒謬之言搖動重臣罪十八珽諸所犯均應斬決妻子入辛者庫財產籍沒得旨從寬改爲應斬監候六年二月管理旗務多羅信郡王德昭奏查珽家藏硃批摺子三件應照大不敬律立斬得旨蔡珽俟四川解送來京請旨正法先是珽嘗薦其故吏已革知縣黃振國起用爲河南信陽州知州巡撫田文鏡劾振國貪劣不法經侍郎海壽史貽直覆讞有蹟廣西巡撫李紱黨於珽陛見時力陳振國無罪文鏡言皆妄珽等又嗾御史謝濟世劾文鏡言振國事悉與紱合上怒其結黨亂政謫濟世振國擬斬至是七月諭曰前因蔡珽袒護黃振國尙無顯然昭著之款蹟是以將黃振國暫行監候今觀四川各案蔡珽因黃振國而將地方官民株害殞命者五六人此則顯然袒護黃振國之案件中外所共知共聞者也從來人心風俗之害莫大於朋比爲奸黨同伐異朕爲此時加訓誡提命諄諄而蔡珽李紱黃振國等輒敢固結黨援肆行欺妄合謀協力傾陷清正無私之田文鏡以遂其報復而快其私心甚至蠱惑謝濟世捏喪心昧理之言參劾田文鏡冀以激

朕之怒而受誅戮諫官之名用心狡獪已極究其根源皆因黃振國一人而起是黃振國實匪黨之渠魁若不明正典刑則陰謀結黨排擠陷害之風不能止息何以懲戒衆人黃振國著卽處斬蔡挺改爲應斬監候十三年八月今上御極赦免乾隆八年卒

### 李維鈞

李維鈞浙江嘉興人康熙三十五年由貢生選授江西都昌縣知縣尋丁母憂服闋補四川榮昌縣知縣四十六年遷山東莒州知州四十九年內遷刑部員外郎五十年授江南道監察御史五十三年遷直隸守道雍正元年正月擢直隸巡撫七月疏言順天保定河間永平宣化五州地多旗圈丁銀留爲民累請自雍正二年始攤入通省地糧內按地輸丁八月疏言宣化所產高粱味澀性燥人皆不食祇作燒酒計每歲所鬻不下六七十萬金自禁燒酒鍋以來多以高粱養牲畜殊屬可惜請弛其禁部議均如所請二年正月疏言前宣化鎮出師共給十月行糧兩月口糧經部議免扣還古北密雲官兵同時出師所給銀請一體免扣從之三月疏奏現行地方事宜一虧空丁銀均攤十分之四逐漸完補一減火耗每兩二

三分舒民力一起解兵餉例有知府規禮今裁令州縣自行解司一各官署鋪墊向派里甲今悉除一清查地畝毋致隱占一行保甲以杜奸匪一嚴飭武弁除募兵虛冒之弊一親檢三營甲幟勤操演一修煙臺建營房增設兵五名嚴防汛一遍飭村莊築牆掘壕兼選壯丁習練防盜賊一驛路兩傍種柳恤行旅奏入諭曰天下督撫皆當如此留心擴而充之何虞吏治不肅民生不遂耶村莊溝壑實係有益之事但須預爲陳說利害使愚民灼知有益踴躍樂從秋成之後方可行之斷不宜急遽強迫民壯頭目殊難其人須擇平素爲衆所推服者方可委之董率尤須飭地方官不時稽察勿致生事至種樹卽古人列樹表道之意朕現刊諭一道尙未頒發爾奏恰合隨卽通行直隸各省矣六月疏言永定河隄柳岔口至王家園一帶淤千餘丈請速濬又郭家務隄工係沙土幫築不能防急溜請嚴飭專營及分修各員培固又言正定府轄三十二州縣實有鞭長不及之虞請設直隸州分轄將南宮新河棗強武邑衡水五縣分隸冀州栢鄉隆平高邑臨城寧晉五縣分隸趙州武強饒陽安平三縣分隸深州無極藁城二縣分隸晉州曲陽新樂二縣分隸定州直隸知州照知府例稽查屬縣錢糧案件其府州錢糧令直隸守

道不時委員盤查均下部議行十月特改直隸巡撫爲總督卽以維鈞陞授十一月命加兵部尙書銜提鎮俱聽節制會有密奏維鈞厚餽撫遠大將軍年羹堯禮物又覓二女子相贈者特諭誡之十二月疏請改張家口副將標籐牌兵三百名爲鳥槍手大刀三百名爲弓箭手從之三年二月疏言京衛歲考取入武童共百名燕山等六衛地丁編屬順天保定河間正定四府衛學武童亦應分歸四府請於大宛二縣各取進二十名歸順天府武學其餘六十名於保定河間二府各取進二十名惟正定府又分設直隸州應於正定府取八名趙州冀州各三名定州晉州深州各二名俱撥入本府州學庶人材相埒額數均平三月疏言直隸向未設藩臬二司故通永天津霸昌大名口北五道俱挂山東山西河南等布按二司銜今直隸守巡二道既改爲布按二司其五道俱應改直隸布按二司銜均從之五月奏報各屬晴雨並稱現在遵漢儒董仲舒春秋繁露祈雨法虔誠祈禱諭曰似此皆可不必凡地方水旱沴不虛生或政事缺失或封疆大吏治理紕繆與小民習尙澆漓所致消弭之道當應以實不以文惟返躬修省克己改過然後齋肅籲懇則天人交感之際潛孚默契如響應聲但庸愚視爲杳渺無憑且朕卽位以

來凡有所禱從未令僧道設壇作法朕嚴恭寅畏敬天之心無時敢懈至於鬼神之道體物不遺宜敬而遠之固不可輕忽亦不可溺信而涉於詔瀆茲亟應省察吏治檢點刑名其有關於國政者奏聞於朕我君臣期共懋勉以恭迓天庥可也維鈞又奏直隸地方每有蝗蝻土人虔禱劉猛將軍廟輒不爲災諭曰弭災惟當恐懼修省交相儆戒人事既盡自然感召天和災祲可消豐穰可致此桑林之禱所以捷於影響也若專恃祈禱而置恐懼修省於不事是濬流而舍其源執末而遺其本矣尋復諭曰觀爾一切章奏文情口氣甚與年羹堯相仿總因爾等字跡往返熟習之故朕每諭毋務虛詐爾竟不能領略徒爲浮泛套語朕深不取維鈞奏言向與年羹堯通問歲不過一二次近已與絕得旨據奏與年羹堯通問歲不過一二次是何言歟西安總督官廳內未有隔五日不見直隸李維鈞之介使衆目昭彰何可強辯似此巧言粉飾以狡獪爲得計以隱蔽爲深謀恐一旦發覺罪無可遁爾其思之維鈞尋疏劾羹堯言羹堯上年進京回陝過保定曾有大將軍印我已交不出去之語再原任湖南巡撫王之樞在陝修城效力其原籍定州田房自應變價充公乃早爲羹堯所得匿不咨查原任江西學政徐昂發在軍前效

呈明原任江西巡撫王企靖曾得伊銀三萬顯係贓銀羹堯並不題奏私咨臣查  
追又聞羹堯誅西寧無故喇嘛五千獲輜重數十萬入己六月間臣姪李宗渭由  
西安至保定臣詢知羹堯僭妄驕侈奸詐貪罔十款一出署淨街百姓填道一屬  
員稟參稱引見送禮稱恭進一同知途見巡捕官長跪回話一採買貯穀每石較  
市價短發二三錢一委用運同嚴士俊將鹽升改小內攙和沙土一造報平定青  
海功冊輒將並未身至西寧之人竄入一差典史朱尙文販賣四川木植獲利一  
家人魏之耀嚴二乘轎進京州縣道旁打恭遊擊守備跪道一嚴士俊冒認嚴二  
爲父肆行無忌一羹堯赴浙輜重出關不計其數起身後尙有十餘馱一切車驟  
不許商僱七月詔各省將軍督撫提鎮公議年羹堯罪維鈞覆言羹堯不忠不法  
請立正典刑時羹堯疏辯維鈞所劾皆不實部議維鈞素與羹堯交結往來雖陽  
爲參劾實陰圖開脫詐僞顯然請逮訊會奉旨查抄年羹堯保定所置家資維鈞  
匿不詳奏諭曰朕本欲開一面之網保全爾之生命無如爾自執迷亦末如之何  
矣又諭曰李維鈞居心險譎陽順陰違如保定府城內現有年羹堯私置家產藏  
留財物伊並不參奏迨朕降旨令查尙具摺故作猶豫之狀希圖延挨俾得隱匿

著馬賽蔡珽同往保定詳察奸欺黨惡實情卽將李維鈞拏問八月詔革職來京尋命賠修天津倉廩俟工竣日刑部按律治罪四年三月上以維鈞任總督時將議准改隸河南以濬滑內黃三縣漕糧擅請仍在直隸元城之小灘鎮受兌挾私阻撓敕令明白回奏欺詐失實又侵欠直隸庫帑數十萬未完命浙江巡撫李衛查抄維鈞家貲十一月衛劾維鈞及其子蔓狡獪多端私將家財各處埋隱寄頓現查出三十餘萬請革李蔓廕生研審究追再蔓生母張氏並非維鈞聘娶繼室乃家奴張大婦維鈞先占爲妾假稱繼妻且曾與魏之耀認爲乾親濫膺誥命並請敕部追奪諭曰李衛清查李維鈞家產不徇情面一一查出可嘉但參奏李維鈞婢妾一節未免過刻不合大體前蔡珽曾奏稱於北直旅次壁間見一對聯乃譏訕李維鈞家奴之事朕彼時切責戒其勿言朕以忠厚之道教天下此事並不必議覆若云請追誥命李維鈞旣已獲罪革職自有定例何必特行參奏餘著該部議覆嗣部臣以維鈞現在天津遵旨俟工竣一併議罪五年三月工竣部議李維鈞身受國恩不思潔己報效賊私累累又將直隸庫項侵蝕令子李蔓埋藏寄頓貪狡已極且與年羹堯朋比私暱情詞詭譎又挾私借改兌小灘爲名阻撓國



事照律擬斬監候妻子入內務府爲奴維鈞尋病歿乾隆元年恩釋其妻子還原籍

### 陳鵬年

陳鵬年湖廣湘潭人康熙三十年進士初任浙江西安知縣四十年河道總督張鵬翮薦其才猷敏練堪理河務調赴江南河工四十一年授山陽縣知縣遷海州知州四十二年聖祖仁皇帝南巡過沂州詔截漕四萬石令張鵬翮選賢員運兗州分賑以鵬年董其事四十三年擢江寧知府四十四年六月兩江總督阿山疏劾鵬年收鹽店當舖年規侵欺龍江關稅銀無故捉拏關役重責枷號各款又以甫經驅逐窩娼之南市樓基址改造鄉約講堂寫列聖諭十六條中懸天語丁寧四字扁額不敬莫大事下總督桑額總河張鵬翮會同阿山定讞論斬得旨革職從寬免死來京在修書處效力四十七年九月特授蘇州知府四十八年十一月江蘇布政使宜思恭爲總督噶禮劾罷詔以鵬年署布政使四十九年噶禮續劾宜恭思虧帑又劾糧道賈樸侵蝕建關開河銀項並坐鵬年覈報不實部議革任發往黑龍江仍得旨來京修書五十一年十月吏部議噶禮與巡撫張伯行互訐

事擬革伯行職上以張伯行居官清廉下九卿改議並諭曰陳鵬年稍有聲譽學問亦優張伯行聽信其言是以噉禮欲害之曾奏其虎邱詩中有悖謬語朕閱其詩並無干礙朕纂輯羣書甚多詩中所用典故朕皆知之卽末句鷗盟二字不過託意漁樵陳鵬年詩見在今與爾等公看五十六年出署霸昌道旣受代仍回京修書六十年四月命隨尙書張鵬勳閱山東河南運河九月河道總督趙世顯奏令往視河南武陟縣釘船幫決口十月鵬年疏言黃河老隄衝開八九里見今大溜直趨決口應於對岸上流廣武山淤灘另開引河使溜南趨再於決口稍東逢灣取直亦開一引河引溜東行仍歸正河方可漸次堵築得旨朕每留心河務黃河衝決之處一經奏聞卽詳晰指示今覽陳鵬年所奏皆與朕前頒諭旨相合下部知之十一月趙世顯爲屬員訐罷詔鵬年署河道總督十二月奏言近年淮安權關以河工同知管理捐納銀項令淮徐道貯庫應用並歸總河稽覈臣思河工同知職在修防道臣總理工程皆難兼顧臣則馳驅河干之日多旣不暇清理恐付託非人請另遣部員管淮安關而以捐納事例歸江蘇巡撫稽覈貯銀藩庫俾臣得董率屬員專力河務疏下部議如所請行六十一年二月奏言河南榮澤

縣黃河兩岸隄工止出水面三四尺五六寸不等一遇水長卽漫隄而過上流水既漫散則下流河身日漸淤高隄岸卑矮且有殘缺難資捍禦宜於挑濬以前增高培厚疏下部議令河南巡撫楊宗義速行修築是月武陟縣馬營隄爲冰凌水衝漫鵬年自清江浦往視疏言馬營地勢低窪從釘船幫南壩尾衝開至此二十餘里已成大溜撫臣楊宗義堵築上口止濬六丈餘下口止濬四丈餘無如水深溜急難施人力今惟有分其上流借沁水偪黃就廣武山下淤灘之上王家溝開引河使水由東南會入滎澤舊縣前正河用杏葉鐵鈹濬深釘船幫下首新生淤灘建挑水壩於新河口東偪沁水會淮南趨不使東下則大溜往南馬營決口庶可堵築完固疏下部議行會奉使閱河之副都御史牛鈕祭酒齊蘇勒等奏築沁河隄頭至詹家店十八里遙隄楊宗義以武陟百姓僉言此十八里若築隄則田畝易淹且致衝決鄰邑奏寢其役詔鵬年確勘鵬年奏黃河南北兩岸從滎澤縣始築隄其上十八里並無隄蓋以南岸有廣武山爲屏蔽而北岸則沁水從此出口當沁黃交漲時聽其流入水寨及原武縣之黑羊山沙地水勢寬平不致衝溢前人實非無見若一併築隄則暴漲必衝射隄根工險難以防護歲修亦糜費不

貲宜仍留此無隄之十八里以備宣洩從之又疏言臣與撫臣楊宗義商議暫停馬營決口堵築以三月朔興工開王家溝引河並建挑水壩於沁河口謹繪圖呈覽尋奉詔回辦南河事務八月疏言蕭縣黃河南岸田家樓險工須建月隄以資保障邳州運河徐塘口迤下河道淺滯應於徐塘口迤上挑挖月河接入彭家河而彭家河亦應挑深其山陽縣運河文華寺下引河淤墊應加挑濬又高家堰山盱二汛一帶河隄風浪衝激應加倍築土一萬四千餘丈山盱汛天然南北兩壩原防湖水暴漲相時開放今南壩與東水南隄偪近應築實爲隄改北壩爲南壩另於迤北百丈之外建壩則東水南隄地寬流緩可免激射之患疏下部卽行是月鵬年復至武陟閱工先是馬營決口因桃汛流急水深停工牛鈕奏於上流秦家廠堵築甫竣旋決鵬年至同楊宗義疏言秦家廠南壩尾刷開一百二十餘丈入馬營東下應於南壩臺轉東建扇面壩挑溜西行用長椿大埽建攔河大壩於秦家廠上流又疏言前因河勢北趨宜分洩上流先開王家溝二十餘里引河嗣因沁黃並漲河流遷徙引河口門沙淤移上接開至劉家溝水已暢流衝刷寬深復因上流沁河積灘二十餘里隔河溜爲南北兩道南入引河北仍趨決口今宜

從劉家溝上流無灘隔之官莊峪開接引河一千四百餘丈庶全河之水俱洩而秦家廠及馬營決口易以堵築矣疏下九卿等同牛鈕齊蘇勒議官莊峪在廣武山腳下淤灘窄而且長上流無進水之勢開引河不若堅修挑水壩令鵬年同楊宗義酌行十月疏言秦家廠之北壩尾隄向係漫灘根腳虛鬆自霜降後連日西北風鼓浪衝刷漫開百餘丈大溜歸入馬營前此南壩尾水深至三丈有餘自北壩尾衝開後漸次平緩十月三日堵築合龍訖其北壩尾及馬營決口可以次剋期堵築十一月疏言前經定議自詹家店起至榮澤縣老隄止包築大月隄誠爲重門保障若俟決口堵塞後興工恐土凍不堅乘其天氣尙在融和卽行鳩築惟中間約有百丈因兩年汕刷寬深應俟春融積水漸消另取乾土夯礮堅實乃可竣事是月世宗憲皇帝御極實授鵬年河道總督尋疏言前經定議自沁河隄頭至詹家店無隄之十八里留備宣洩今河勢北趨較前迥異若留此空隙亦屬可虞應如牛鈕齊蘇勒原奏自沁河隄頭至詹家店連築大隄直接榮澤縣老隄通計三千四百四十丈俟春融併築竣工下所司知之又疏言秦家廠北壩尾十二月初八日合龍旋復爲冰凌水衝漫二十餘丈至二十一日堵閉完竣其馬營隄

埽八九丈亦可剋期堵塞奉諭曰秦家廠北埽尾漫溢之處雖經堵閉但係冬日所築明春冰融之時務期預爲加謹保固雍正元年正月鵬年卒年六十有一遺疏至得旨陳鵬年潔己奉公實心爲國因河工決口自請前往堵築寢食俱廢風雨不辭積勞成疾歿於工所聞其家有八旬老母室如懸磬此真鞠躬盡瘁死而後已之臣著賜司庫銀二千兩其母給以封典照一品廕其子仍下部議卹賜祭葬如典禮諡曰恪勤十年詔各省建賢良祠河南巡撫孫國璽疏請以鵬年入河南賢良祠疏中有功侔砥柱語上以言過其實申飭國璽諭稱鵬年一生居官尙不愧有爲有守仍允入祀後江寧建賢良祠鵬年亦入祀

### 齊蘇勒

齊蘇勒滿洲正白旗人姓納喇氏初由官學選天文生爲欽天監博士遷靈臺郎尋以內務府主事出任永定河分司康熙四十二年聖祖仁皇帝南巡閱河齊蘇勒隨至淮安奉諭曰朕觀黃河險要地方應下挑水埽壩現今永定河經朕親臨指示挑水埽壩俱有裨益爾遵照朕指示式樣前往烟墩九里岡龍窩三處築挑水壩數座於朕回鑾前完工齊蘇勒遵旨如期竣事乃回任洊遷翰林院侍講國

子監祭酒仍管永定河分司事務會奉命同副都御史牛鈕監修河南武陟等縣決口隄工奏自沁河隄頭至滎澤縣大隄十八里平衍處接築遙隄使全河之水盡歸一道專力刷深不致旁溢六十一年十二月世宗憲皇帝授爲山東按察使兼理運河事命先往河南籌辦黃河隄工時河南巡撫楊宗義奏請於馬營口南舊有河形處修挑引河齊蘇勒同河道總督陳鵬年疏言河不兩行此洩則彼淤有必然之勢馬營口甫經築隄若開引河有旁洩浸隄之慮寢其事雍正元年正月命齊蘇勒署理河道總督尋實授四月疏言陽武祥符商邱界黃河北岸有支流三逼隄繞行五十餘里南岸青佛寺邊有支流一逼隄繞行四十餘里不急爲截斷恐刷損大隄已築壩堵絕並接築子隄九千二百八十八丈隔隄七百八十八丈會奉詔豫籌山東諸湖蓄洩事宜以利漕運疏言汝上縣之南旺馬踏蜀山等湖東平州之安山湖濟寧州之馬場湖魚臺縣之昭陽獨山等湖滕嶧二縣之微山稀山等湖皆運道所資以蓄洩昔人名曰水櫃因土人乘涸占種漸致狹小宜乘湖水稍落時除墾熟田畝外文量立界嚴禁侵占設法蓄水如遇運河水漲引注湖中相平卽築堰截堵遇運河水淺則引之從高下注其諸湖或應築隄栽樹

或應建閘起閉令各州縣循例辦理則湖水深廣運道流通漕艘無阻滯之虞矣八月奏言洪澤湖水微弱黃水有倒灌之勢臣率道廳督築清口兩岸大壩各寬八丈東長二十六丈七尺西長二十四丈中留水門五十丈東高清水以抵黃河現在淮水暢流惟此壩在洪濤大溜中兩面受敵必須加意修防因派工員協同汛弁率領河兵一百長夫三百常川住宿工所多備埽料樁繩等項如遇湖漲壩工稍有墊陷卽用料加鑲下埽搶護遇黃漲卽用混江龍鐵籠子諸器駕小舟往來疏濬不令少停九月奏報秋汛已過河工平穩得旨下部優敘加三級特賜戴孔雀翎二年四月廣西巡撫李紱將之任上諭及淮揚運河淤墊年久水高於城危險可虞李紱奏言若於運河之西另挑新河一道以所挑之土另築西隄而以舊河之身作爲東隄則東而永無潰決之患上卽命紱往會齊蘇勒商酌齊蘇勒奏言淮揚運河綿長三百餘里上接洪澤下通江口河之西岸逼臨白馬寶應界首諸湖水勢汪洋一望無際今若改挑新河築西隄於湖水之中畚鍤難施東岸之開壩涵洞皆須另行創建不惟糜費千百萬帑金而且大工終難告就上是其言九月奏報秋汛得旨齊蘇勒督率屬員修築壩隄堅固雖河水泛漲而各工無



虞甚屬可嘉下部議敘特予騎都尉世職是時上知臣下有與尙書隆科多總督年羹堯夤緣結交者諭齊蘇勒曰爾之勤勞固不待言而一塵不染獨立不倚從未聞夤緣結交更屬可嘉又諭曰近日隆科多年夤堯大露作威福攬權勢光景朕若不防微杜漸此二臣將來必至不能保全爾等皆當疏遠之隆科多止論爾操守平常而年羹堯前歲數奏爾不學無術必不能料理河務朕以此知爾之獨立也三年二月副總河嵇曾筠奏請挑挖祥符縣回回寨引河詔與齊蘇勒商酌嵇曾筠復奏言亟宜乘汛水未發興工不及待會勘既而齊蘇勒至武陟奉詔同總督田文鏡察視引河有無裨益齊蘇勒奏言挑挖引河必須上口正對頂衝而下口有建瓴之勢方可吸引大溜歸入新河借其水力滌刷寬深嵇曾筠所挖引河工已將竣臣往看上口之地勢與現在水向不甚相對改挖上首三十餘丈以對頂衝以迎大溜又往對岸指示建築挑水壩挑溜順行以對引河之口俟水漲時相機開放庶河勢得以直暢東注而南岸隄根可保無虞矣奏至諭曰朕慮嵇曾筠或料理未妥今覽奏方慰可謂得法矣七月命內閣學士何國宗偕測算官員攜儀器閱河遇齊蘇勒所駐近地會同勘視齊蘇勒尋奏言皇上頒發儀器測

度地勢於河工高下之宜甚有準則今洪澤湖滾水石壩舊立門檻太高不能隨勢洩水請敕閱河諸臣於明春視海口後繞至湖口用儀器測度地勢改落石壩門檻庶全湖宣防有賴又奏言治河物料葦柳爲先每年捲埽之葦輒千百萬束俱動帑購買仍須以柳枝爲骨在官園伐以濟用柳多則工堅而帑省柳少則用葦多而工不固臣於去冬勸令道廳等官及標下營弁各於空閒之地栽種柳秧陸續據報一百二十三萬二千餘株今通行察閱除枯損之外成活八十九萬二千餘株又臣往來看工見山東江南蓄水沮洳之地皆可種葦今春令廳員買葦根試種近據報微山湖遷種葦八頃餘畝蔓延青蔥此皆各官自願試種非邀議敘者今行之已有成效應請敕部酌定嗣後議敘之例以種柳八千種葦二頃各紀錄一次爲率並責成專汛守備及千總把總培養柳枝遇枯損卽爲補栽違者分別議處如此三五年柳株處處成林湖葦叢生不費購買而工料充裕矣並得旨允行十二月奏言河臣薪水舊由各廳供應每年有一萬三千餘兩臣奏明禁止並裁革四季節禮又河標四營舊有坐糧四十分每年一千一百餘兩臣到任後交中軍爲修造墩臺製換盔甲器械之用其鹽商陋規銀二千兩爲出操驗兵

賞功犒勞等費而每年往來勘估及伏秋兩汛駐劄三省適中之地隨役及案卷不可減省凡車馬舟楫日用米蔬之需遠者數百金近者一二百金前此尙可勉強支持今春由徐州赴武陟拮据實甚現據河庫道張其任言庫收額解錢糧向有隨平餘銀四千兩除道衙日用及各項工食不過千金餘銀四千兩請支銷看工車船等費臣因未經奏明不敢擅便倘蒙恩賞給則看工之盤費弗缺益得殫竭心力辦理河務矣奏至得旨此項通融取用甚好卿之清勤朕所深悉勉爲之四年四月奏睢寧縣朱家口黃水驟長東岸壩臺大埽蟄陷現在防守修築上諭大學士曰齊蘇勒在工年久歷練老成清慎勤三字均屬無愧今年已望七見壩埽蟄陷必晝夜焦急朕甚憐之且此時勉強施工將來伏汛秋汛恐又不免衝決可令酌量情形不必急迫齊蘇勒尋奏水復大漲壩埽倏陷水底凜遵聖諭俟過伏秋二汛並力趨修十二月奏報朱家口決口堵閉合龍黃河自豫省至海口西岸壩隄完整諭獎其悉心任事經理有方加太子太傅五年以衰病奏遣太醫賚瀆診視尋入覲諭嗣後歲支養廉銀萬兩六年兩江總督范時繹江蘇巡撫陳時夏奉詔開濬吳淞江因於陳家渡築壩松江知府周中鉉率千總陸章乘船督工

下埽值潮迴溜激壩陷船傾周中鏹陸章俱歿於水事聞予卹贈齊蘇勒知濬工未竟卽前往經理其事尋奏言吳淞江陳家渡舊有土埂三道未曾挑清致有停沙淤塞之患今築壩開濬適逢江水海潮並長刷淨土埂檻限毫無阻滯工程可期速竣上諭部曰吳淞江工程雖交與齊蘇勒一同料理實則范時繹陳時夏應辦之事齊蘇勒一聞陳家渡壩工衝塌卽親往踏勘悉心經理仰賴神佑水勢湧長將泥沙澈底刷淨水無阻滯工可告成此卽封疆大臣實心爲國爲民感召天和之明驗著從優議敘尋部議加三級七年正月以疾劇奏上命江蘇巡撫尹繼善署理河道總督復遣太醫診視齊蘇勒疾二月卒得旨齊蘇勒忠誠爲國志行端方操守潔清辦事明敏自簡任河道總督殫心竭力奉職勤勞邇年黃水安瀾運道通順隄工堅固河帑核實厥功懋著今聞溘逝深爲軫惻應得卹典照例議奏外著加恩晉三等輕車都尉照例承襲並賞給藩庫銀三千兩爲歸櫬之資起程日同城文武官齊集奠送沿途地方官親往奠醮並撥兵護送歷來河道總督如靳輔齊蘇勒二人實能爲國宣勞有功民社著尹繼善等就近擇地爲靳輔齊蘇勒合建祠宇令有司春秋致祭以昭朕優獎功勳至意賜祭葬如典禮諡勤恪

以其子華善襲三等輕車都尉世職八年詔建賢良祠於京師齊蘇勒與靳輔並入祀

### 楊宗仁

楊宗仁漢軍正白旗人由監生於康熙三十五年授湖廣慈利縣知縣四十年五月調藍山四十四年總督喻成龍巡撫趙申喬疏薦卓異遷甘肅階州知州四十五年遷蘭州同知四十九年十一月總督殷泰巡撫鄂奇復疏薦五十年五月遷臨洮知府五十二年以巡撫岳拜疏薦老成練達有守有才邊俗番情素所熟習授西寧道五十三年七月遷浙江按察使五十四年十一月丁父憂五十七年八月補廣西按察使旋署廣西巡撫十一月擢廣東巡撫五十八年上以直省錢糧虧空甚多令各督撫立法清理宗仁疏言粵東虧空現在嚴飭各屬勒限追完至於防杜將來惟督撫司道府廳交相砥礪勿藉事勒索無論正雜錢糧知府照例不時盤查庫銀隨徵隨解米穀實貯在倉毋許虧缺若州縣自行花費知府寧肯代爲彌縫甘蹈分賠之嚴例州縣既無由挪移掩飾卽虧缺諒必無多亦易補足倘敢徇縱除本官嚴行治罪上司從重議處庶上下皆知儆惕若地方有不得已

之公務挪用難責州縣獨賠又難使倉庫虧缺應以督撫等所得公項銀抵補如不敷仍設法公捐總不致課帑虛懸於清釐虧空不無小補下部議如所請六十年十一月世宗憲皇帝御極授湖廣總督雍正元年正月丁母憂命在任守制併停陞見宗仁疏請停給恩詔應得本身妻室封典及廕爲父母求諭祭得旨俞允仍給封廕尋賜孔雀翎四月疏言湖廣素稱俗薄民刁兵驕吏玩細究其故皆由文武各員向所屬官弁索取陋規節禮州縣必致橫徵私派武弁必至虛兵冒餉兵民挾比逞私員弁不敢過問臣今概行禁革不許文官有私派武弁有扣冒之弊庶兵民不得藉詞逞私驕悍之習冀可默化潛消再兩湖南北鹽價逐漸增長窮民每興嗟怨揆厥所由各官多貪鹽規商人借此長價卽如總督衙門鹽規漸次加至四萬從前一錢一包之鹽今則公然昂貴至一錢五六分不等臣今盡革鹽規令商人減價出售以惠窮民俾地方漸有起色至於嚴禁官宦富室囤積止令商販往來俾米價漸平與力行保甲稽查匪類等件皆臣職分應行之事不敢一一瑣陳得旨覽爾所奏朕深嘉悅在他人猶聽其言而觀其行至於爾則信而不疑斯乃全楚地方否極而泰之機也五月疏薦廣東南海知縣宋瑋陞湖南

寶慶知府廣州左衛守備范宗堯改補湖北漢陽知縣得旨姑允所請後勿踵行  
又疏言俸工一項乃朝廷祿養官役之恩豈可任意飾捐以填貪壑湖廣州縣以  
上俸工報捐已經十有餘年總無分釐給發責成官役枵腹辦事焉能禁其不需  
索閭閻今自雍正元年起一切官役應支俸工臣俱令各照額編支領俸均沾實  
惠從前凡有公事無一不令州縣分捐實皆派累百姓臣通長核算但令州縣於  
所得加一耗羨內節省二分解交藩司以充一切公事之費此外絲毫不許派捐  
近奉部文又將解部餘平一分恩賜免解承辦公事更得有餘況節禮陋規概行  
禁革則州縣亦易於補苴從前虧空矣得旨所言全是一無瑕疵勉之尋以病請  
以子榆林道文乾隨任終養詔加文乾按察使銜馳驛速赴並遣御醫診視七月  
疏言湖北糧道管理全省漕運兵糈一歲中計有半年公出舊設驛鹽道管全省  
驛遞號船應付勘合火牌淮鹽到楚盤驗察私督運額銷引日職守迥異康熙五  
十八年依前督臣滿丕奏以驛鹽道歸併糧道似未妥協請復設以專責成下部  
議行九月疏言襄陽府屬之樊城鎮五方雜處商賈輻輳奸宄易以潛踪請移襄  
陽府同知駐樊城彈壓從之又言清淨盜源稽察窩賭窩逃法莫善於力行保甲

臣到任後卽通飭所屬令紳衿兵役與齊民一體鱗次挨編保甲不許脫漏一戶聯絡守望百姓稱便誠恐州縣奉行不得法今專委本管道員稽察如有未盡合法之州縣卽令指示照式編次擇其善者另予優獎得旨此論甚好凡舉行一法必示以勸懲方期有效耳二年正月疏言立社倉實係美政臣與各官加意講求先擇地建倉然後勸捐穀本出納聽民自主不許官吏會計侵肥並立獎掖尙義之典士民咸踴躍爭先江夏武昌蒲圻等二十州縣各建倉三五十所不等共捐納穀本將三十萬石效驗已著臣又傳湖南循此成法施行得旨據奏社倉一事於各省中爾先成創始之功殊可褒嘉三年六月諭獎督撫諸臣中居官行己可風有位者加宗仁太子少傅銜七月卒於官年六十有五遺疏入得旨楊宗仁敬慎持躬廉能供職效力年久懋著勤勞自簡任總督以來潔己奉公孤介端方始終一節忽聞溘逝朕追念良臣深爲悽惻難釋於懷應沛特恩以示優眷加贈少保並給騎都尉世職准襲二次仍察例子卹賜祭葬諡曰清端御製像贊有廉潔如冰耿介如石句八年入祀賢良祠子文乾仕至廣東巡撫自有傳

王國棟



王國棟漢軍鑲紅旗人康熙五十二年進士改庶吉士五十四年授檢討五十七年充會試同考官逾年遷國子監司業六十年授侍講尋轉侍讀雍正元年三月充陝西鄉試正考官四月復設日講起居注官以國棟充補六月遷侍讀學士十一月充廣東鄉試正考官二年六月授右通政八月充會試同考官十月命爲河南學政四年五月遷光祿寺卿十月特旨授浙江觀風整俗使國棟抵任以浙江風俗澆漓諸務廢弛仰遵聖訓時以尊親大義宣諭紳士懲頑抗以清積欠究包訟以警奸徒革虛冒以飭營伍嚴保甲以弭盜源巡歷所至據實以聞溫諭獎之是年遷宗人府府丞五年二月上以浙江被水米價騰貴命國棟同巡撫李衛動帑銀四萬兩於杭州嘉興湖州三府修城濬河築隄俾民傭工食力國棟奏杭州至海寧河淤應濬太湖隄閘及嘉興石塘多圯應修理但冬春雨雪多興工未免過費請俟九月十月間水落再行修築疏濬上是其言五月擢湖南巡撫諭曰本欲令爾在浙整飭數年以期成效但湖南廢弛日久急需治理今命爾巡撫其地勉之八月疏言督撫大吏去任者固不可沽譽市恩新莅者尤當加意整飭風聲所播庶可令行禁止若意示寬大則吏治必弛民情必慢事難整理諭嘉國棟得治

理寬嚴之要惟期實力行之時上命湖廣總督邁柱會修兩省隄工國棟疏言長沙岳州常德三郡逼近洞庭如湘陰巴陵華容安鄉澧州武陵龍陽沅江益陽九州縣環繞大湖隄陞甚多居民恆於秋冬水涸時築隄堵水而耕但地勢卑下每江漲水不能洩反灌入湖以致隄岸衝決田禾淹沒民難安堵現有潰口四百餘處已飭水利各官刻期完築此外險工次第興修更嚴禁包折等弊務期加高培厚工程堅固七年六月疏言岳州府屬遼闊中隔洞庭石門慈利俱係苗疆九谿永定軍屯雜處文移每至稽遲有鞭長不及之慮請改所屬澧州爲直隸州轄石門慈利安鄉三縣改九谿永定二衛爲一縣設知縣教諭訓導巡檢各一員初僉都御史申大成奏黔省屯田百姓賤價頂種易啟紛爭請仿民田一體買賣每畝納稅五錢官給執照爲業並推行各省七月國棟疏言湖南屯田瘠薄不比黔省膏腴均與民田一例買賣無賤價頂種之弊其科則輸賦較民田更重若照黔例畝稅五錢是合屯糧十餘年常賦之數斷非民力能勝應按各屬屯糧全書分別差等其微價頂種未立賣券糧仍軍戶者令頂種人完稅五錢給照爲業如時價平買並非頂種糧未過割者照屯糧一石稅五錢給照過割其已過割者稅二錢

至龍陽武陵長靖諸屯田土賦重應令售主按券價每兩稅三分諸疏並下部議行先是湖南靖州逆犯曾靜遣其徒張熙投逆書於川陝總督岳鍾琪鍾琪以聞上命刑部侍郎杭奕祿副都統海蘭至湖南偕國棟拘訊國棟據曾靜妄供並未究出黨羽又阿其那塞思黑門下太監以罪徙廣西流言於路直隸河南督撫並查奏國棟稱湖南接解兵役未聞一語又茶陵州黨犯陳蒂西傳播流言敕國棟提問亦不得實證九月降旨切責十月革職回京八年正月命辦理刑部右侍郎事十月充武會試副考官十一月署山東巡撫國棟前任河南學政時薦教職申程章才品俱優特旨申程章以知州銜授浙江臨安知縣後遷江蘇淮安知府以詐典商場紀鹽商程星所贓爲巡撫尹繼善所糾部議國棟濫舉應革任得旨寬留九年二月河南祥符封邱等縣水災詔國棟往查賑七月署江蘇巡撫尋署浙江巡撫十年仍回刑部侍郎任十一年偕尙書彭維新等稽察京通各倉十二年以與尙書福敏等議福建民藍厚正毆斃胞兄事失當敕責其糊塗姑息下部嚴查部議降三級調用以國棟係革職留任之員無級可降應革任得旨派充苦差十三年十月命署刑部右侍郎十二月卒

法海

法海滿洲鑲黃旗人姓佟佳氏祖圖賴都統議政大臣一等公諡勤襄父佟國綱都統內大臣一等公諡忠勇贈太傅均有傳法海國綱次子也康熙三十三年進士改庶吉士命在南書房行走三十七年授檢討尙書房行走三十九年三月充日講起居注官四十四年五月遷侍讀學士五十五年十月擢廣東巡撫五十七年正月疏言沿海官員向有遊巡之例請輕裝減從由粵東至浙江江南等處查勘海道上特允所請四月疏言雷州府屬遂溪海康二縣近海洋田萬頃設隄岸包圍因年久未修致潮溢侵田今現任福建巡撫陳瓚奏請修築敕臣查明臣查二縣東洋塘隄岸十七處水閘十三處向用土築今請改木石工可免隨時修築之勞從之先是廣東巡鹽御史常保奏因欠課撤鹽政交替撫專管至是法海奏廣東鹽務緊要不可無專轄之員請仍遣御史會撫臣督徵下部議行八月上覽法海請安奏語意似病癲命九卿詢明議奏尋議法海患噎膈不勝封疆重寄請革職詔赴西寧軍營效力雍正元年召還命提督江南學政二年十一月授浙江巡撫時兵部侍郎牛鈕請酌裁各站驛馬額數變價充餉敕下各省督撫詳查議

奏三年四月法海奏言浙省驛站從前酌定衝僻議留差馬百匹分隸嘉興秀水石門仁和錢塘五縣所屬西水皂林吳山浙江四驛無可再減惟查仁錢二縣各馬十八匹吳山浙江二驛各十二匹應差相同馬數稍有多寡應將仁錢二縣各撥三匹入吳山浙江兩驛各設十五匹其嘉秀二縣共一西水驛每縣各十五匹石門縣之皂林驛祇十匹應將嘉秀二縣各撥五匹入皂林驛則西水皂林各二十匹多寡適均至養馬募夫歲需銀二千九百餘兩今以仁錢二縣每匹日支銀六分每夫日支銀三分適中之數爲準一例支放實減衝餉銀二百三十兩有奇下部議行六月疏言吳上大夫伍員唐武肅王錢鏐宋安濟公張夏實爲浙江江海保障之神明紹興府知府湯紹恩剏建三江闡有功其地請各加封修廟歲春秋致祭得旨伍員封英衛公錢鏐封誠應武肅王張夏封靜安王湯紹恩封寧江伯八月諭曰法海操守頗好但其性情偏執於外任不相宜著調來京是月署兵部尙書十二月授左都御史四年二月授兵部尙書充繙譯鄉試正考官七月命協理禮部事兼內務府總管十二月諭曰法海本無能之人聖祖仁皇帝加恩擢用獲罪革職發往軍營效力伊至西林遂與允禩私相交結允禩貪縱不法之事

法海並不勸阻朕卽位後令允禩來京法海乃效力廢員未奉朕旨卽潛至京師且詔附年羹堯稱爲天下豪傑其所言之狂悖如此朕近命法海往西寧搬塞思黑家口伊竟不請訓旨冒昧前往及至保定又不候朕旨擅將塞思黑家口帶領來京強交內務府收管種種不法悖亂妄行著革職拏問五年閏三月王大臣等議照大不敬擬斬決特旨從寬免死發往察罕託渾在水利處效力九年十二月命回京乾隆元年五月給副都統銜協理咸安宮事務二年五月卒

### 田文鏡

田文鏡漢軍正黃旗人由監生於康熙二十二年任福建長樂縣縣丞三十一年遷山西寧鄉縣知縣四十四年遷直隸易州知州四十五年內遷吏部員外郎四十八年遷刑部郎中五十一年改授監察御史五十五年巡視長蘆鹽政疏言山東鹽引節次請復尙缺額引五萬七千五百五十六道今商人願先輸課增復原引自五十六年爲始在長清等縣運行奉旨加引雖可增課恐於商人無益下九卿議奏行山東巡撫定議具題如所請行五十六年擢內閣侍讀學士雍正元年上命告祭華嶽尋又命往山西賑濟平定等四州縣九月署山西布政使二年正

月授河南布政使八月署河南巡撫奏言開封府轄四州三十縣地方遼遠請照  
晉省改設直隸州分轄開封府屬之西華商水項城沈邱四縣分隸陳州臨潁襄  
城鄆城長葛四縣分隸許州密新鄭二縣分隸禹州滎澤滎陽河陰汜水四縣分  
隸鄭州原武縣就近歸懷慶府轄延津縣歸衛輝府轄又河南府屬之靈寶閿鄉  
二縣分隸陝州汝寧府屬之光山息縣固始商城四縣分隸光州各縣錢糧知州  
查核督催照知府例處分直隸各州縣錢糧光州歸南汝道陳許禹鄭陝五州歸  
開歸道盤查徇隱亦照知府例議處部議如所請行十二月授河南巡撫三年正  
月奏言豫省河工向設堡夫九百餘名修防嗣因連年水漲撥江南河兵千名協  
力防護是河兵原以濟堡夫之不足河臣齊蘇勒請過秋汛裁堡夫竊思每年俱  
有水發時大隄新築更須巡防新設河兵雖諳鑲墊釘樁捲埽下埽而搜索狼窩  
鼠穴及防守風雨瞭望水勢不若堡夫熟悉所有原設堡夫斷難裁汰六月又言  
堡夫學習樁埽須河員董率堡夫諳練即可拔河兵雖有千把統轄應令管河道  
稽查並責各河工同知教習庶可約束疏入下部議行是月又言豫省漕船向於  
衛輝水次受兌道經直隸大名府屬之濬滑內黃三縣隔省呼應不靈請將三縣

改隸彰德衛輝統屬既專漕不致誤奉旨允行四年九月奏言賦役法丁隨糧派請將豫省各邑丁糧均派地糧內紳衿富戶不分等則一例輸將於雍正五年爲始部議從之十二月浙江道御史謝濟世參奏文鏡貪虐不法諭責謝濟世自恃言官胸懷詭詐令大學士九卿等嚴訊具奏訊得濟世自認風聞無據顯係受人指使要結朋黨擾亂是非擬斬決疏入諭大學士九卿等曰田文鏡於雍正元年告祭華山復命時備言山西荒歉情形朕以其直言無隱令往山西賑濟卽授爲山西布政使剔除未清案件吏治一新嗣因河南諸事廢弛調爲河南布政使旋卽用爲巡撫整飭河工每事秉公潔己實巡撫中第一今大學士九卿等究訊謝濟世所參田文鏡各款皆虛則謝濟世受人指使情弊顯然謝濟世著卽革職發往軍前效力贖罪姑免深究五年二月奏言黃河汛水漲發素平易者忽成險工宜暫用民力每歲夏至後將距隄一二里村莊照佃戶數認夫有急赴工搶護工完立散若非計日可竣者按名給工食河印汛弁各員不得擾民間三月又言河北彰德衛輝懷慶三府向設守道一員康熙二十五年裁但三府共轄二十二縣幅員甚廣請復設河北守道統轄加兵備職銜河北隄工埽壩廳汛各員河兵堡



夫一應錢糧令就近督率並巡防小丹河等水利再衛輝屬之胙城縣地狹且離延津僅三十五里請裁併延津其學額仍准附延津照舊考取部議均如所請行七月特授河南總督加兵部尙書銜先是文鏡係正藍旗漢軍奉旨擡入正黃旗六年五月諭曰田文鏡自到河南忠誠體國公正廉明豫省吏畏民懷稱爲樂土山東吏治民風宜加整飭著授田文鏡爲河南山東總督管理兩省事務此因人設立之曠典不爲定例七月奏言交界地方易藏匪類伏讀上諭交界地方失事探實賊盜處一面差役密拏一面移文關會拏獲後報該管地方添差移解洵捕盜良法也但捕役畏奸徒奪犯不敢越界密拏每因拒劫致成人命迨隣境關拏彼處仍復徇庇是以盜賊潛聚請嗣後如隔屬密拏賊盜彼處有縱奪徇庇者許拏盜之地方官詳本省督撫移咨會參奉旨允行時豫省漕糧惟附近水次之河北三府運本色其不近水次之河以南州縣均徵折色仍在河北三府採買三府偏累文鏡奏准各徵各漕將距水稍遠州縣照舊徵本色臨水之儀封考城暨新改歸豫省之濬滑內黃均增辦本色距水最遠之靈寶減辦米二千石閩鄉三千石歸臨水五縣徵輸南陽汝寧二府光汝二州永寧嵩盧氏三縣皆路遠難運免

其辦解卽分撥五縣協辦按程遠近每加價銀五分至二錢三分不等九月奏言東省倉庫俱有虧空且多挪新掩舊請嗣後知府直隸州知州離任時將所轄州縣倉庫錢糧照豫省交代例限三個月令接任官查明結報如有虧空知府知州均半賠結方許赴新任接任官徇情出結卽令分賠再府及直隸州倉庫向係該管道盤查嗣後道員離任照此例交代又言東省錢糧舊欠二百餘萬之多雍正六年錢糧將屆全完之期完不及五分由於火耗太重私派太多其向民加派加耗由於上司需索雖有自愛州縣不得不改廉易節今欲禁加派加耗必先嚴禁收受陋規請旨嚴諭山東撫藩二臣於半年內協同臣澈底查清分別請參應追應禁應革毋得瞻徇容隱諸疏入皆蒙俞允七年七月遵旨議奏山東青州府爲適中要地內聯陸路各營外與沿海營汛呼吸相通設立滿洲駐防兵可以資彈壓而重保障府北城外有廢東陽古城址建城署營房可駐兵數千議政大臣議如所請行十月加太子太保十二月奏請分東昌府屬之高唐州爲直隸州轄濟南府屬之禹城平原陵縣臨邑四縣濮州爲直隸州轄觀城范縣朝城三縣兗州府屬之東平州爲直隸州轄東阿平陰壽張陽穀四縣青州府屬之莒州爲直隸

州轄日照沂水蒙陰三縣從前所改之直隸濟寧州仍歸兗州府轄其濟寧原轄之鉅野嘉祥縣改隸曹州鄆城縣仍隸兗州下部議行八年二月奏言武弁養贍家口僕從名糧外別無所資但給步糧不敷用請將提督至守備馬步各卒千總馬一步四把總馬一步三作爲定額一體遵行從之五月特命兼任北河總督十一月奏言今年豫省被水州縣收成雖不等實未成災士民踴躍輸將所有特恩蠲免之錢糧請仍照額完兌部議應如所請得旨士民急公奉上固屬可嘉著該督確查歉收分數仍照例蠲免即將現兌正糧作下年正供九年二月上諭上年山東有水患河南亦有數縣被水朕以田文鏡自能經理未另遣員查賑今聞祥符封邱等州縣有賣男女與山陝客商者田文鏡近來年老多病精神不及爲屬員欺誑不能撫綏安插而但禁其賣鬻子女以避離散之名是絕其生路也豈爲民父母者所忍言乎著刑部侍郎王國棟前往賑濟四月以病乞休命解任來京調理七月病痊回任十年八月疏言登州鎮新增兵一千其中右二營請增千總一員把總一員約束下部議行十二月以病奏請解任允之是月卒於河南遺疏上得旨田文鏡老成歷練才守兼優自簡任督撫以來府庫不虧倉儲充足察吏

安民懲貪除暴不避嫌怨庶務具舉封疆重寄正資料理前以衰病請解任調理勉從其請今聞溘逝深爲憫惜應得卹典察例具奏尋賜祭葬諡端肅特命河南省城立專祠祀之並准入祀豫省賢良祠十三年十一月尙書史貽直奏稱河南開墾捐輸累民甚宜速罷請特簡廉明公正大臣往撫綏查核廷議如所請奉旨河南地方自田文鏡爲巡撫總督以來苛刻搜求以嚴厲相尙而屬員又復承其意旨剝削成風豫民重受其困卽如前年匿災不報百姓至於流離蒙皇考嚴飭遣官賑卹始得安全此中外所共知者乃王士俊接任河東不能加意惠養且擾亂紛更以爲幹濟借開墾之虛名而成累民之弊政彼地方民風淳樸竭蹶以從罔敢或後甚屬可嘉然先後遭督臣之苛政其情亦可憫矣王士俊著解任來京候旨並將此旨宣示豫民咸使聞知乾隆五年四月河南巡撫雅爾圖奏言文鏡在豫百姓至今怨恨不應入豫省賢良祠奉上諭朕觀雅爾圖此奏係見朕降旨令李衛入祀賢良意謂李衛與鄂爾泰素不相合特借田文鏡之應撤以見李衛之不應入耳當日王士俊將田文鏡奏請入祀賢良祠係奉皇考允行今若撤出是翻前案矣鄂爾泰田文鏡李衛皆皇考所最稱許者其實田文鏡不及李衛李

衛又不及鄂爾泰而彼時三人素不相合亦衆所共知也於是文鏡遂得祀豫省賢良祠

### 李衛

李衛江蘇銅山人由捐納員外郎於康熙五十六年授兵部五十八年遷戶部郎中六十一年十月授直隸驛傳道未赴改雲南鹽驛道雍正元年管理銅廠二年擢布政使仍兼理鹽務上以李衛褻躁尙氣訓之曰近有人奏汝恃能放縱於督撫上司前粗率無禮操守亦不能純閒有巧取處若如此行爲則大負朕之倚任嗣後極宜謙恭持己和平接物川馬骨董之收受俱當檢點兩面欽用牌不可以已乎是皆小人逞志之態何須乃爾其克謹克慎毋忽尋衛以不避嫌怨奏諭曰不避嫌怨與使氣凌人驕慢無禮判然兩途弗相交涉汝宜勤修者惟涵養二字最爲切要務須勉爲全人方不有負知遇殊恩書云習與性成若不痛自刻責未易改除將來必以此受累後悔何及諄切訓誨實由朕衷有則改之無則加勉當時刻自檢也三年授浙江巡撫陛見時奏江南朱家海決口命衛便道至清江浦與河道總督齊蘇勒議河工四年三月奏言遵旨與齊蘇勒相見知決口已合龍

因詢以此番決口全河俱由朱家海歸洪澤湖恐沙淤墊湖底據稱勤淤懶沙不能遠至洪澤湖當至上流三處小湖而止臣問三小湖既與洪澤相連又在上流乃大湖支派受水分洩之淵藪若墊高將來洪澤蓄水漸少且由近及遠再遇水發仍填入湖堰勢陡且險尙當留蓄水處爲是伊云別無善法惟加防期不至決口臣又問治河當借急湍之勢以濬洩下流疏通海口爲要抑或專顧衝決堅牢工程爲主據稱海口緊要上年我於清口築壩留口甚狹令其敵黃並借二水之勢將清江迤東河底刷深海口亦無阻滯臣觀齊蘇勒操守學問甚優辦事不避勤苦但無好官相輔兼自負過高不納衆言疏入報聞六月奏言浙江戶口繁多米不敷食四川產米甚多川江直抵湖廣盤運亦易請照兩淮買穀例於鹽政歸公項內以十萬兩委員赴川置運俟青黃不接時分發米少州縣減糶以濟民食歸還司庫原銀有餘爲修理城垣等用又請增子母礮四十八位分給駐防滿漢兵選協領等員教習演放俱得旨允行是月命兼理兩浙鹽政七月疏言烏程縣屬之烏鎮近接太湖易藏姦宄請將湖州府同知移駐十一月奏言竈丁課餉應歸竈地徵收如仁和場之仁和倉及許村等八場向有沿海灘蕩給丁樵刮卽以

每丁應納之課攤於所給之地計畝徵收其仁和場之錢塘倉西路等九場北監場之峽門華嚴二倉黃巖等六場白沙岳頭二倉原無給丁蕩地者或暫令各丁照舊輸納其丁多蕩少者或於舊稅上加攤竈丁蕩戶俱有苦累須清查升漲抵補請將許村等場新升蕩地稅銀抵除前報暫攤並無地可攤之丁銀如續有漲坍蕩地照例增減又疏言浙省私販出沒之所海寧海鹽平湖桐鄉爲最而海寧之長安鎮乃其適中孔道請專設千總一兵百分巡隘口再撥撫標兵百千總一協緝各場官俱係微員不能杜弊請以候選同知通判州縣等官分發各場專其責成俟有成效題請照原銜升用又疏言江南蘇松常鎮四府食鹽例銷浙引鎮江接壤兩淮僅隔一江私販易於偷渡致浙鹽壅滯請令常鎮道督同鎮江府海防同知京口將軍標副將鎮江城守參將嚴拏水陸私鹽仍禁官弁兵役勒措俱下部議行五年二月奏修海寧縣浦兒兜草壩老鹽倉姚家堰章塘海鹽縣閩餘等字號石塘蕭山縣鎮湖庵王家池聞家堰一帶石塘錢塘縣午山一帶仁和縣總管廟前各坍塘十月又奏修海寧縣沿海東西塘俱從之十一月授浙江總督管巡撫事六年三月奏言浙江交界積窩惡賊查拏甚多頗有屢犯漏網大盜緣

地連兩省每致影射作弊如浙江究出夥賊姚二姚天生兩犯咨江南震澤縣提  
拏竟以替身起解爲浙省押往認識之張德隆指破而此案經江南督臣范時繹  
留審未得歸浙並究今查出徇庇首犯舉人金士吉等已質明有據請褫革嚴審  
並提齊江南所留案犯窮究黨羽剪除巢穴以期靖盜安良得旨嘉獎瀕海玉環  
山界連台州太平縣温州樂清縣周七百餘里有田千餘萬畝山巒平行土性肥  
饒前浙閩總督滿保因地隔海汶防範難周屢禁開墾衛委員查勘見其田可耕  
各畧口潮水侵灌成灘者可煎鹽其要隘又可防緝洋匪奏請設兵增戍聽本省  
近地民取結往墾上允所請至是條奏經理玉環山各事宜一請設玉環清軍餉  
捕同知一員將太平縣界之禁門老峯南塘北塘芳杜東畧密溪洞林樂清縣界  
之盤石蒲岐黃大畧狀元畧茅埏等處俱歸管轄裁樂清縣驛丞改設巡檢聽同  
知差遣一玉環山田逐一丈明給太平樂清兩縣民入籍管業其附近玉環有願  
入籍耕種者准一體編入保甲所墾田卽於本年起科分上中下則納賦一按畝  
徵收本色其濱海潮溼地折穀收貯餘米許民運售温台等處給票查驗毋得私  
販出洋一玉環可耕之田向有隄塘捍衛年久傾圮應聽民自行修建或借帑承



修秋收還項一玉環設汛置官所需用多查各舉有捕魚船應給牌查驗其濱海鹽戶亦編入保甲併竈聚煎官收官賣所有魚鹽稅銀卽充各項公用俟經理完備後解歸藩司鹽政一玉環立左右二營歸温州鎮轄設參將一守備二千總二把總四兵九百以左營爲陸路右營爲水師其弁兵卽裁盤石營水師將弁及原額兵並於太平樂清大荆等營就近分撥以符新置弁兵之數其舊隸黃巖盤石兩營防守之陸路並盤石營原管之洋面籍隸黃巖之洋汛俱玉環營轄下部議行五月以清查馬廠等事與將軍鄂彌達爭論具疏自辨上諭以識見通達爲貴勿狹勿滯六月疏言鄞縣大嵩港灌民田數萬畝日久淤淺且無支河蓄水請疏通嵩港於港口建壩分濬支河於通海之橫山頭等處築土塘並石閘六又鎮海縣之靈巖大邱二鄉有浦口通流入海閘已圯廢應築塘修閘以資蓄洩又定海縣初名舟山曠田甚多不無隱占應委員查丈清理並從之七月諭曰江南蘇松等處盜風不息巡撫陳時夏不能嚴拏懲治總督范時繹戢盜之才亦覺不足朕深爲廬念李衛於浙省盜案留心緝捕不致漏網甚屬可嘉著將江蘇所屬七府五州一切盜案俱令李衛管理文武官聽其節制調遣尋疏言紹興府屬之上虞

縣沿海田潮汐浸削坍塌五十餘畝業戶有賠納錢糧之累而縣屬之夏蓋湖周百餘里漲淤成田者已飭丈明許民自首認業請將坍塌田除額新墾升科庶額賦永清如所請行蘇松偪近海濱向受潮患廷議築松江石塘三千八百餘丈並將接段土塘盡易石上以江南督臣范時繹辦理未協令衛查議具奏衛赴工履勘覆奏松江海塘已築二千四百餘丈不必拆改未築者應做浙江海鹽舊塘建築已築完者鱗次居中無庸更加高厚土塘附石塘後宜一例高厚每年派員歲修東灣自周公墩張家舍至倪家路俱距海甚近應先建築金山背老土塘至東華家背原報丈尺未確應依營造尺估計舊塘坍塌石旁築新塘疏入得旨依議仍令衛會同江南督撫稽查辦理是月奏言臣籍隸江南徐州族繁丁衆有堂弟李懷謹李信枝臣因其放縱不循理法行文准徐道拏解來浙懲以家法圈禁在署族人交口騰謗甚有欲改姓氏爲加罪之地者臣除窩拏盜諸事獲罪於范時繹而奉命議河工又與齊蘇勒不無芥蒂皆臣本籍大吏恐因家事致心迹難以自明諭曰范時繹乃不足置論之人齊蘇勒之有芥蒂大抵因前歲赴任中途相晤奉旨論河時微啟釁端或係汝與接待之際禮貌疏慢所致其過不在齊蘇勒也朕

意舉凡此等形迹皆不必繫念人事參差不齊何能計較纖悉無遺況審辦公私最爲不易儻向日於鄰里鄉黨間先存曲嫌小憾則又當一論朕每言公中私私中公樞機正在於此其中原委既不確知難以批諭是非當否也十二月上以衛留心營務凡江南軍政舉劾命衛同范時繹等辦理是月遣侍郎王機彭維新往江南清查積欠錢糧亦令衛與聞七年四月加兵部尙書銜尋疏請復設江南南匯縣下砂二場浙江黃巖縣杜瀆場永嘉縣永嘉場場官各一裁江南金山衛浦東場官一又請增設台州府屬之海門前所家子三江口新亭章安道頭江口等汛礮臺巡船俱從之五月陞見未及回任丁母憂命在任守制十月加太子少傅銜十二月疏言海寧海塘東至尖山西至翁家埠縣互百里皆臨大海今南岸潮頭直射北面護沙刷洗無存一線草塘不能禦全海潮勢請於西塘內自荆煦廟至草庵就舊有草塘收進二三丈砌築石工東塘於陳文港小文前薛家壩及二十里亭等處分築挑水盤頭大草壩五使水勢稍緩可引漲沙漸聚其年遠塊石各塘酌量加高培厚下部議行先是衛陞見時奏清口之西聖祖仁皇帝所建御壩今較短窄應加築上以詢河道總督孔毓珣則稱此壩遞年培築較原建丈尺

已增至是特發毓珣原摺示衛衛奏臣並未親經其地失言咎實難辭上訓諭之八年二月疏言嘉興秀水二縣舊有民捐義田餘租學臣周清源題歸官徵備賑租有定額窮佃苦累並累及原捐之後裔請豁免年久未完銀米將田分別歸社永免官徵又疏請移寧波府同知駐鄞縣之大嵩海口四明驛驛丞駐鄞縣之甬東岑溪司巡檢駐定海縣之岱山沈家門爲定海咽喉增設沈家壘巡檢並從之是時江寧有張雲如者以符咒惑人謀不軌衛遣弁密緝得其黨甘鳳池陸同庵蔡思濟范龍友等私相煽誘狀令效力遊擊馬空北齋文提拏張雲如而范時繹及按察使馬世炯回護失察咎又曾與雲如往來輾轉關查不解且賄空北稟節衛具疏劾之四月命尙書李永升赴浙會鞫得實時繹解任世炯斬監候空北杖流雲如及鳳池同庵思濟龍友各擬斬如律九年三月條奏江南蘇州府營制事宜一胥閭二門五方雜處請增蘇州城守營守備一把總二分汛駐防並移蘇州府經歷駐社壇一蘇州舊設城守二營請將左營改爲中營以新設之守備爲左營將滄墅關把總一外委把總一及原防兵歸併管轄以成三營一胥閭門外應增水陸防汛請將提督塘撥兵百二十巡鹽兵二十壯丁五十撥入左營酌分水

陸駐防一濟墅關之東黃埭一帶向設巡船二應給腰牌爲憑如無牌冒充巡役文武官嚴行查究一蘇州染造青藍等布踰坊四百餘處踰匠不下萬人請設甲長坊長互相稽查其踰匠著落包頭取結存案十一月奏修浙江海寧縣鎮海塔前等處坦水海鹽縣南首三澗寨一帶險汛平湖縣獨山東西石土各塘錢塘縣徐村梵村等處坍塌裂江塘並從之十年閏五月署刑部尙書九月授直隸總督十月命節制直隸提督等官十一年八月疏言獨石口邊城外河西請造偃水隄並東西雁翅二道張家口邊城外舊有土隄請增高三尺改石壩九月疏言直隸地方遼闊州縣事繁佐雜官應酌量增改請於故城縣鄭家口景州龍華鎮河間縣景和鎮北魏村獻縣韓村南皮縣舊縣鎮滄州孟村呂家橋鹽山縣楊二莊青縣杜林鎮天津縣葛沽西沽等處各增設巡檢一東明縣杜勝集復設巡檢一又請移磁州州判駐彭城鎮河間縣管河縣丞駐張名莊清河縣管河縣丞駐油坊鎮俱兼巡檢職銜下部議行是月衛疏參戶部尙書署步軍統領鄂爾奇壞法營私紊制擾民各款詔革鄂爾奇職命果親王偕侍郎莽鵠立海望等秉公審理尋訊得實請加倍治罪上以鄂爾奇係大學士鄂爾泰弟今鄂爾泰裨益政務甚多宥

鄂爾奇罪衛議敘加一級十月疏言直隸百四十餘州縣守巡則有口北霸昌二道請復設大名道駐筭原治轄大名順德廣平三府其屬內河道工程悉歸管轄各河道向專管水利今請令清河道兼管保定正定二府並原分之直隸五州通水河道兼管通薊遵化三州三河武清寶坻寧河四縣及永平一府天津河道兼管天津河間二府又請增設保定府同知一糧捕通判一駐保定天津府糧捕通判一分駐滄州十一月疏言易州秦寧山太平峪恭建萬年吉地山西廣昌縣之草橋店七村在內垣近障之中宜敬謹保護請改易州爲直隸州以保定府之涞水縣山西之廣昌縣隸之並將廣昌之草橋店七村改隸州界以肅拱衛十二年正月條奏運河事宜一直隸故城縣與山東德州衛武城縣毗連係運河東注轉灣之處向未築隄水發卽溢請以工代賑趨築土塘隄一直隸山東運河交界各州縣犬牙相錯遇命盜案件互相推諉請定地界撥換以專責成三月疏請將直隸晉州及州屬之無極藁城二縣定州屬之新樂縣俱隸正定府轄保定府之深澤縣隸定州轄增設正定府平山縣洪子店巡檢一下部議從之四月諭曰近有人謂卿任性使氣動輒使口肆詈謹言之戒朕屢經諄訓不啻再三丈夫立身行

已於此等小節不能操持尙何進德修業之可期後當竭力峻改時自檢點勤加從容涵養之功漸融粗猛傲慢之習則謗毀不弭自消矣十一月疏言京師五城及巡捕京營所管地方與州縣交錯人命案件未免彼此交接請將附近京城地方酌定地數統歸五城及京營轄其附近州縣及外營交錯地方俱改正歸併分晰界限使內外文武不至牽誘下部議行乾隆元年三月疏言喜峯口外之八溝與喀喇沁接壤旗民事件向歸理事通判管理後增設喀喇沁同知及承德州知州分理不無牽制請將通判管轄之附近喀喇沁地方如八溝龍鬚門等汛旗民案件俱歸喀喇沁同知其餘汛屬旗人案件歸熱河同知民人案件歸承德州知州分管八溝通判請移駐蒙古四旗適中之土城子地方土城子及黃沽屯各增設巡檢司千總一馬兵十五步兵二十五白虎溝設把總一馬兵五步兵十郭家屯大閣兒各設把總一馬兵十步兵二十上黃旗設把總一馬兵十步兵二十俱聽通判管轄喀喇沁增設千總一馬兵十步兵二十聽八溝同知節制統歸河屯營兼轄至河屯營之下板城熱河之中關各設把總一馬兵十步兵二十俱歸河屯營參將管轄設承德州州同一改遷安驛丞爲巡檢以西河司巡檢駐鞍匠屯

俱從之四月兼管直隸總河先是直隸營田設觀察使二員督率稽查至是上命裁觀察使敕衛派道府大員兼理詳議具奏衛以營田數處京外三十七州縣請交各州縣收管以專責成如本任事繁委所屬佐貳協理本管知府暨直隸州知州就近稽查順天府屬營田四路同知分轄通永霸昌天津清河大名五道各按所屬營田統率經理督臣藩司不時考察如州縣實力督課著有成效准照卓異例不論俸滿卽升怠忽者參處其豐順霸州天津永年新安玉田文安大城磁州等州縣營田最廣缺出請於熟習水利各員內揀選具題調補下部如所請行二年正月奏誠親王府護衛庫克於安州民爭控淤池一案赴州囑託顯有指冒誑騙情弊上嘉其執法秉公特賜四團龍服七月奏報盧溝橋良鄉固安永清東安等處水災上命於天津北倉截漕五十萬石撥被水州縣以備賑恤三年四月奏言滄州青縣挑濬甌河占用旗民地畝其糧銀應請造冊開除並照濬武清縣筐兒港壓占地畝之例按畝給價部議從之九月疏參直隸總河朱藻挾詐誤公貪劣各款又藻弟革職廣寧縣知縣蘅輒敢以私書挾制地方官干預賑務奏入命尙書公訥親及尙書孫嘉淦會鞫得實革藻職擬杖流蘅擬杖十月衛卒諭曰李



衛才猷幹練實心辦事宣力封疆勇往直前無少瞻顧畿輔重地正資料理前聞患病准其解任調理特遣太醫診視頒賜葢藥冀其痊可今聞溘逝深爲悼惜應得卹典察例具奏尋賜祭葬如例謚敏達五年直隸總督孫嘉淦奏請入祀直隸名宦祠得旨俞允並諭入祀賢良祠四十五年三月諭曰朕巡幸江浙臨莅杭州見西湖花神廟所塑神像及後樓小像牌字俱書湖山神位其像雖有大小面貌相倣聞係李衛在浙時自塑此像託名立廟是以後樓並有正夫人及左右夫人像甚爲可異李衛於督撫中並非公正純臣在浙江無甚功德於民間其仰借皇考恩眷頗多任性驕縱之處設使此時尙在猶當究治其愆豈可令其託名立廟永享祭祀所有廟中原像著該督撫撤燬另塑湖神之像以昭信祀

### 楊文乾

楊文乾漢軍正白旗人湖廣總督宗仁之子由監生效力永定河工康熙五十三年授山東曹州知州五十七年遷東昌府知府六十一年卓異遷陝西榆林道雍正元年加按察使銜命隨父任侍疾三年正月授河南布政使三月奏言山東曹州西南之桃園集壤接七縣係山東河南直隸交會之區距城遼遠巡察難周奸

徒朝此暮彼出入無常請以曹州州同移駐彈壓如所請行四月擢廣東巡撫賜孔雀翎及冠服鞍馬尋丁父憂命在任守制十二月奏言臣自楚赴粵途中聞告休布政使朱絳倚與總督孔毓珣姍親虧帑三萬餘兩交代未清卽嚴飭作速賠補諭曰司庫此項挪用孔毓珣曾經奏過爾等封疆大吏惟宜一心一德以和爲主切毋聽信屬員離間之言以致好惡參差文乾又奏言臣抵任後查盜案塵積請概爲速結論曰盜案非命案可比命案遲延拖累無辜固屬不宜若因監斃者多遂立意輕縱盜案尤爲不可此事朕難批諭況亦非摺奏完結之事儻慮積案拖累任汝秉公嚴催詳情度理而爲之孔毓珣於緝捕盜賊甚爲盡力彼擒之汝縱之恐汝難當此論縱虎歸山豈爲仁政此等作爲非積陰功乃大壞德行事也若不加意斟酌萬萬不可四年四月疏言廣東省城盜賊甚多非編保甲不能清理旗兵與民人連居臣擬會同將軍不論滿漢兵民逐一編查省會奸匪旣清各府州縣可漸舉行盜風庶少息諭曰此見甚好弭盜之法此爲探本窮源之上策也又疏言廣東去歲薄收今春米價日增臣委員赴廣西買穀運糶詎有鑲黃旗披甲閻尙義等誘集多人赴廠搶穀毆傷監糶官旗兵等赴將軍衙門喊稟將軍

李枚令赴臣衙門講說尙義等卽擁至衙門及臣拏獲數人李枚令臣釋放臣未聽從又囑理事同知苕文求從寬完結枚身膺重任不能約束兵丁事關旗兵鼓衆乞皇上欽差大臣來粵確審定擬上命禮部右侍郎塞楞額兵部右侍郎阿克敦往審得實枚及尙義等俱論罪如律十一月疏言廣東民納糧俱用老戶臣今改立的名令各屬申報或因墾買過割之際就本名註冊或赴縣完糧時問明辦糧人的名登於原冊老戶下百姓既知改立的名則己身完賦後他人未完者不致累及且就糧管業不致詭寄飛灑諸弊爭先開報一二年後通省俱可改註至丁銀自康熙五十年審定後不復加額廣東丁隨糧辦者已十之四五其未隨糧辦者令布政使確查將丁銀盡歸地糧永免無糧徵銀之累得旨嘉獎十二月疏言廣東地狹人衆米不敷食積貯宜豫今見存倉穀一百六十餘萬石存七糶三每年出穀五十萬石春夏季兵丁於糶三穀內碾撥三十三萬餘石僅存十七萬石誠爲民食久遠計應酌量要地加貯二百餘萬石擇水陸總口可達數州縣適中之地建倉貯穀有需卽可撥運疏入下九卿議僉以濱海地不宜收貯以致滯爛惟惠潮瓊三府僻處海隅遇歉歲輓運維艱潮屬之海陽加貯穀十萬石潮陽

加貯穀八萬石程鄉加貯穀六萬石饒平加貯穀二萬石惠屬之海豐加貯穀二萬石瓊屬之瓊山加貯穀六萬石得旨依議又奏言秋審緩決人犯雖非可矜亦不至情實將三次緩決者請減等發邊遠爲民諭曰朕甚不取汝此奏且恐汝務小而遺大寬嚴不得其宜朕甚憂之大凡應嚴者旣不能嚴則應寬者必不能寬果能以公忠血誠對越天地神明刑所當刑卽決人亦造福之事何況其他四年四月奏言粵省辦公銀每年六七萬兩向於火耗提用臣商同督臣及司道等將可省者盡裁必不可少之項約需四萬兩查民間置產推糧過割例有州縣公費又奉裁衛所屯糧陋規兩項約定提作公用無庸再藉火耗又各官養廉一項州縣徵收火耗每兩加一其實連戩頭併封積零合算一錢三四分不等計解司平頭三分並繳二三分爲修戰船及按察司道府廳員養廉每兩淨存五六分留作州縣養廉其解司平頭共三萬兩有奇除每兩撥給三釐爲布政司衙門工食外督撫藩司各得養廉銀九千餘兩俱足用諭曰但務得中爲是若暫邀一時之名使將來至於難措非善舉也民情亦不可令至驕慢屬員亦不可令至窘乏天下事惟貴一平所以古人有平治天下之語若一偏之見致遠恐泥故君子不爲利

不十不變法害不十不易制似此通盤更移之舉必徹始徹終籌畫妥當而爲之  
慎毋逞一時之興而輕舉也五年三月乞假葬父允之七月福建巡撫常賚疏參  
文乾徵收太平粵海關稅設立專行得銀二十餘萬兩致夷船進口無行承攬去  
歲將夷人銀豫行加一扣收得銀四萬三千餘兩及上餉復每兩抽分得三分九  
釐令六專行先繳又發銀數萬兩於他處買湖絲茶葉等物貯如升行勒令賣完  
方許各行買貨所以商船稀少上以常賚所奏銀數未晰洋行貿易外楊文乾再  
有見小漁利之處據實入告嗣常賚疏稱粵海關稅年額四萬有奇雍正四年楊  
文乾奏報連羨餘九萬有奇臣細訪實十五萬兩抽分夷人銀二萬餘兩賄縱紅  
黃綉緞出洋得銀萬兩餘番銀不論是否買貨先加一扣收得銀四萬餘兩此係  
例外之求復選洋船奇巧之物入署令所派專行賠償計銀二萬餘兩又交鹽商  
銀萬九千作二萬兩營運生息此見小漁利處也疏入得旨從來操守一事實難  
得其人在楊文乾自以爲不關國計民生設法巧取名實兼收不知人之耳目如  
何能欺所謂弄巧成拙若不改悔立見名實俱敗耳尋諭楊文乾曰洋行一事確  
鑿可據汝意以爲巧取暗獲名實兼收殊不知人之耳目難瞞但一圖利誰肯甘

心服汝既巧取獲利而居清官之名屬員亦必令有巧利方可禁其婪取否則雖令不從此干係屬員生效尤之心至於百姓汝曾經奏朕粵人惟利是視身命皆視爲次汝一徇利則百姓孰肯服汝而聽從耶爲督撫大吏者旣失屬員百姓之心而欲令地方就理豈可得乎汝若不深自愧悔痛改前非必至噬臍不及矣八月上以福建州縣倉庫虧空甚多命文乾同浙江觀風整俗使許容吏部郎中鄂彌達內務府員外郎伊拉齊往查文乾疏奏閩省八府中惟福泉漳三府最要福州府臣就近委盤漳州府擬委候補知府潘體豐署印盤查郎中鄂彌達督察泉州府擬委候補知府劉而立署印盤查員外郎伊拉齊督察延平府擬委建寧府知府莊令翼盤查其建寧府另行委員盤查所報無虧空州縣亦恐挪新掩舊必將各員交錯調用本身一離原任諸弊盡露諭曰料理頗好竭力爲之文乾又奏言各州縣聞盤查信紛紛買補興化府倉穀已買足延建邵等府素產米穀今歲年景亦佳見責令速補漳泉福等府素不產米入秋雨稍缺請寬限陸續買足逾限再參究諭曰買足者與未買足者原經虧空卽屬一體豈可因其見在買足與否而分別之耶若如此不論居官之賢否止看地方豐歉竟論造化而已爾請此

旨大謬矣朕意無他將通省人員於此倉穀一案內查其好者概留劣者概去此二句乃朕本意要在爾等秉公論人辦理朕亦難以詳悉指示總期通盤還朕一是字或能與不能關係爾一生榮辱看汝之福量何如耳九月疏稱臣在閩聞廣南韶道林兆惠採買木料被劫又聞有盜數百搶龍門營七子汛軍器恣劫鄉村署督臣阿克敦令地方官從寬批結高州府電白縣山內聚盜千餘白日沿村行劫又聞將軍標兵張萬良窩盜分贓署撫常賚咨提將軍石禮哈袒護囑令審作誣良又常賚署中被盜將御賜奏摺匣之鎖鑰失去而借用將軍之鑰彼此隱匿盜風日熾乞敕諭督臣孔毓珣通飭文武勒限嚴緝諭曰如此據實陳奏方是汝若身在廣東又未必如此直達也十二月文乾查明福建倉庫官虧者勒追補完民欠者陸續催徵無可著追及平糶存價採買不敷者令前任巡撫毛文銓賠補詳悉入奏上以文乾秉公辦理毫無瞻顧命從優議敍部議隨帶加二級又疏稱閩省八府一州知府同知通判州縣共八十員前後參革改教休致五十餘員其倉庫無虧居官尙好之縣令十餘員其交錯調用不使仍原任致滋弊端所出之缺於先後命發人員內量才題補惟是邊海重地俗悍民刁新補各官多係初任

若責其典守倉庫則有餘資其治理繁劇則不足乞皇上再將熟諳民事者發數員交替撫於緊要縣缺補用可收得人之效得旨此奏可嘉之至尋諭各省督撫除川陝雲貴廣西外每省於歷任年久知縣內擇謹慎敏練者一員一面具奏卽行咨送閩省令該督撫酌補緊要縣缺六年二月疏參廣東布政使官達用幕友謝禹臣招搖納賄三月疏參署巡撫阿克敦勒索暹羅國船戶葉舜德規禮銀兩詔革官達及阿克敦職命文乾同總督孔毓珣會訊未及訊文乾卒得旨楊文乾才識優長辦事勤敏簡任巡撫以來實心供職粵海地方正資料理伊自閩回粵五月閒卽患畏風心煩之證而急公心切力疾辦理不以病狀奏聞洵屬殫力封疆之臣其心實可憐惜今聞溘逝深爲憫惻應得卹典察例具奏楊文乾柩起程之日著省城官吏齊集奠送所過廣東地方文武官員親往奠醮並遣人護送其別省經過州縣亦著地方官照看尋賜祭葬如例子應琚官至大學士有傳

嵩祝

嵩祝滿洲鑲白旗人姓赫舍哩氏父岱袞天聰時協管佐領兄來袞崇德時任侍衛順治元年二月授內院學士四年考滿予雲騎尉世職遇恩詔晉騎都尉世職



卒後弟瑚蘭布子瓦爾達姪雅圖遞襲十八年八月以嵩祝襲騎都尉康熙九年  
管佐領二十三年遷護軍參領三十三年五月擢內閣學士三十四年以盛京遇  
旱命同侍郎珠都納往會將軍等支海運存貯米萬石散給貧民以萬石平糶七  
月回京上問盛京各處田禾嵩祝奏上下不等盛京比年失收今歲雖有秋難支  
來歲上曰盛京貯米幾何若散賑可支幾月嵩祝奏臣等往賑五十日所用不至  
二萬石今天津海口所運及錦州積貯共十二萬石若以賑濟可支六七月上曰  
海運有定時其令來歲再運九月命同珠都納往開原等處散給兵米諭曰將軍  
等請給米但言兵丁而已其陵上報事人及衆百姓並不言及此皆朕赤子可一  
併散給嵩祝奏臣等前次散給正當其乏之時故計口月給倉米一斗五升今總  
發數月月給米一斗足矣上曰照前月給米一斗五升勿減省可給至來歲四月  
爾等親加覈散十一月回奏遵旨以盛京倉米計口給散兵丁執事人等均需實  
惠三十五年二月上親征噶爾丹嵩祝分管正黃旗行營五月至克魯倫河凱旋  
命協同內大臣公長泰統領後隊滿漢兵緩一日行接受西路軍營奏章閱視賚  
遞御營六月遷兵部侍郎九月改護軍統領三十六年扈蹕至寧夏命昭武將軍

喀斯喀等窮追噶爾丹嵩祝參贊軍務聞噶爾丹竄死其黨伊拉古克三胡土克圖奔投策妄阿拉布坦奉詔追剿至摩該圖不及而還以軍中散給兵丁米糧羊隻缺少嵩祝未將原奉詔旨宣示軍前削加級罰俸一年四十年九月遷正黃旗漢軍都統十二月廣東官軍剿連州瑤人失利命嵩祝偕副都統達爾占侍郎傅繼祖往會總督石琳調廣西湖南兵進剿卽授爲廣東將軍四十一年正月瀕行諭曰瑤人所居之山通連廣東廣西湖廣三省林木叢密山勢崇峻恃此險僻頑梗不馴自宋明以來卽在此三省擾害民生爾等務體朕好生至意不必遽行征剿宜先曉示招撫爾等到彼卽以瑤人山寨形勢三省官兵進剿之路及立營之處繪圖呈覽如瑤人歸順止將殺害官兵之爲首者正法可也二月師次連州駐軍三江口檄三省官兵分布要隘繪圖以進疏言瑤人爲數無多棲身之地亦未寬廣所恃者山險路狹耳諭曰瑤人就撫則已否則於其居處要隘立營圍之不必勞兵力彼自窮迫四月疏言臣等遵奉皇上指示機宜勘示八排山寨卽於要地設立營壘先遣人招撫連州界內油嶺行祥橫坑三排瑤人先行薙髮開報家口荷負雞蔬酒食呈送行營而連山界內之軍寮馬箭火燒坪大掌嶺四大排並

雞公背等各小排以次薙髮投誠最後里八峒排瑤人將爲首殺害官兵之李貴  
鄧二等九人擒獻卽行正法示衆遣兵察驗人口共八千一百餘安插事宜責成  
提督料理臣等撤兵回京閏六月赴熱河復命奏言瑤人俱已受降皆由聖主威  
德無遠弗屆前者臣等請訓時皇上豫料五月內受撫之事必成今果如聖明洞  
鑒分毫不爽三省督撫提鎮以及軍民無不欽服九月調正紅旗滿洲都統四十  
八年二月署奉天將軍四十九年八月疏報錦州離城百二十里雙島有賊船十  
停泊又二百餘人樹旗二湖嘴哨上施放槍礮城守尉馬哈達等帶領哨兵屯丁  
分兩路截賊歸路賊衆爭路上船我兵追擊殺死三十餘名獲船一并牌刀槍礮  
等物生擒賊船水手王遇機正法得旨嘉獎陞賞在事官兵有差五十年二月疏  
言奉天所屬金州鐵山距山東所屬隍城島僅半日程請令山東防海水師官兵  
巡哨兼及金州鐵山俾海邊賊匪無所容身又請揀選盛京滿洲兵一千教習烏  
槍爲火器營俱下部議從之十月遷禮部尙書五十一年四月授文華殿大學士  
兼禮部尙書五十五年四月扈蹕熱河上以天時亢旱命嵩祝傳諭在京諸臣竭  
誠祈禱勿因遇端午節互相會飲越旬餘在京大學士蕭永藻王揆等以接奉諭

示熱河得雨霑足臣等不勝懼忭具奏諭責嵩祝曰朕因憂慮曠旱兩降諭旨在京諸臣遲延日久始摺奏熱河得雨臣等不勝懼忭語止於此得雨有何忻幸部院諸臣貪圖在家安逸祈雨之處未必親到朕兩降諭旨命爾鈔發京師乃並不直書申飭又不察明劾奏爾乃大學士也是非所在豈特當與衆言之卽於朕前亦當懇切言之可馳驛回京嚴查題參嵩祝至京察劾祈雨不到及奏報遲延之大學士蕭永藻王揆尙書赫碩色張鵬翮趙申喬陳詵王頊齡等以不早察劾自請敕部議處部議革職得旨從寬留任革退恩詔所得廢生六十一年冬世宗憲皇帝御極復原職加太子太傅充纂修聖祖仁皇帝實錄並重修玉牒總裁雍正元年賜詩有訐謨屬老成之句五年八月以奉天將軍噶爾弼察奏盛京庫銀虧缺三萬餘兩由康熙三十八年貝子蘇努任將軍私令官員借放收貯接任之將軍蒙俄洛嵩祝唐保住等徇隱不舉應分賠追繳敕部嚴議嵩祝革職罷任十三年卒年七十有九其原襲之騎都尉循例改雲騎尉以其孫蘇楞額襲

拉錫

拉錫蒙古正白旗人姓圖伯特氏聖祖仁皇帝康熙三十年由親軍授藍翎侍衛

三十七年遷三等侍衛四十二年遷二等侍衛四十三年四月命同內閣侍讀舒蘭往窮河源五月還京復命繪圖以奏語具舒蘭傳四十九年正月諭大學士等修纂滿洲蒙古合璧清文鑑以拉錫與教習唐古特書之蒙古官阿爾必特祜等會同繙譯五十三年遷一等侍衛六十一年十一月世宗憲皇帝御極命管理藩院侍郎事旋授鑲白旗漢軍副都統又擢正白旗蒙古都統雍正元年八月授散秩大臣時喀喇沁蒙古部落歲歉拉錫請行察乏食人數得旨據奏俟查覆加賑則現今乏食人必至失所其令戶部派員賚銀五萬兩前往一面清查一面給發毋得稽遲十月調本旗滿洲都統仍管理藩院事十一月諭王大臣曰拉錫任正白旗滿洲都統未及一月卽將本旗事件澈底清查明晰具奏著賞給騎都尉世職以爲盡心辦事者勸二年二月奏言八旗閒散人蒙恩旨挑取養育兵前臣等會議計甲喇人數挑取令正白旗滿洲各甲喇應行挑取者多寡不等請無拘甲喇通計一旗挑取如額數皆允當得旨所奏甚是可通行八旗均照此辦理六月奏言察哈爾右翼四旗屢失去馬匹請敕所司嚴捕竊匪下理藩院議行七月授議政大臣八月劾奏二等侍衛武爾登額越分妄用引馬上曰所奏甚爲可嘉凡

爲大臣者悉宜如此留心整飭豈可謂妄訐細事耶先是諭八旗都統曰朕前降旨清釐八旗拖欠庫銀遲之既久爾等並未具奏拉錫甫任都統兩月所奏甚詳朕但令一二人償還其餘盡行賞免拉錫誠能仰體朕心者所賞世職尙未從優也至是命以騎都尉兼一雲騎尉三年四月兼管太僕寺四年八月以隱匿烏梁海事不奏吏部議革職治罪得旨拉錫將烏梁海之事有心隱匿情殊可惡但伊辦理旗務亦有效力處從寬免治罪其議政大臣散秩大臣都統兼管理藩院及賞給世職俱革退以一等侍衛管太僕寺卿事效力行走五年五月授鑲白旗滿洲都統十月署江寧將軍六年十二月署天津滿洲水師營都統七年四月疏言水師營官兵俸糧每歲從北倉新廩逐月運送往返紛繁請於水師營堡城內西北隅蓋造廩房二座截留運往薊州遵化漕米三萬石備貯二年之需俟支放一年外每年截留一萬五千石易陳支放並設倉大使一員專司出入事下部議如所請九年八月授領侍衛內大臣署正白旗滿洲都統十一年十二月卒

福敏

福敏滿洲鑲白旗人姓富察氏康熙三十六年進士改庶吉士散館歸班世宗憲

皇帝在藩邸時今上初就傅福敏侍讀康熙六十一年十一月世宗憲皇帝御極擢授內閣學士兼禮部侍郎尋充經筵講官雍正二年八月充會試副考官十一月充繙譯鄉試副考官十二月教習庶吉士三年四月遷吏部右侍郎六月疏言漢官陞任級非隨帶者例改紀錄滿官則一概銷去請照漢官例畫一下部議行八月署浙江巡撫十二月疏言海塘工程原議皆用條石後因限迫遂用條石托外亂石填中恐日久坍塌請寬限照原議改築得旨交新任巡撫李衛查勘修理特命都統拉錫至浙抄查年羹堯財產羹堯先已自燬書札福敏於拉錫回程後查出西征隨筆逆書二冊係錢塘舉人汪景祺撰上嘉其細心論景祺罪如律四年二月擢都察院左都御史四月兼翰林院掌院學士九月署湖廣總督十月奏沔陽潛江等十州縣水災請暫借常平倉穀六萬石發賑續將盈餘銀買補又奏被水各州縣現遵旨煮賑但老幼頗難就食丁壯亦覺路遠時當種麥恐妨生業請查丁口一體給米均得旨嘉獎十二月諭曰朕原命爾暫署督篆若一得人卽命往替近日廊廟中頗乏卿貳滿臣皇子左右亦須爾來輔翼留爾在楚乃出於不得已宜體朕意勉力爲之五年正月疏言湖廣苗猺地方不產硝磺而多槍礮

傷人案明係私販轉入查革職藩司張聖弼濫給硝磺牌照甚多前任藩司鄭任鑰亦縱戚林西周販賣射利應嚴禁得旨硝磺乃違禁之物湖廣苗獠雜處例禁更嚴鄭任鑰縱其私人犯禁取利著革職在楚修理江岸工程處效力贖罪二月奏請以耗羨銀兩築江寧松滋等縣隄岸奉旨著動帑金委員監修成後仍算民隄百姓加意保護俾永受其益四月謬冲花苗叛福敏檄黔兵截後路以楚兵擣巢平之下部議敘加二級七月疏言安陸荊州各府被水隄塍冬初水退正可興工除被災老幼婦女照常賑濟外丁壯悉令修築優給賑米俾飢民得食而隄亦完固上善其議如所請行九月奏請增設湖北糧道庫大使一裁蒲圻縣羊樓司巡檢從之先是閏四月召福敏回至是得代進京授吏部尙書六年四月以前巡撫浙江時瞻徇布政使佟吉圖擅動庫銀事革職八年四月命協理兵部侍郎五月兼戶部侍郎九月擢左都御史仍兼戶兵部事十年七月署工部尙書特命協辦大學士事十一年十一月署刑部尙書十二年五月以審理戶部尙書彭維新一案朦混徇隱奉旨申飭又議福建武平縣民藍厚正毆死胞兄擬斬留養一案糊塗姑息降三級留任乾隆元年五月命同左都御史孫嘉淦辦廢員案嘉淦劾



福敏偏執上以福敏既拘執嘉淦亦沾名另派大臣辦理八月充順天鄉試正考官二年三月充會試正考官六月教習庶吉士三年正月擢武英殿大學士兼工部尙書二月充繙譯鄉試正考官十一月兼翰林院掌院學士四年五月加太保六月八旗通志告竣加二級六年七月上初宰木蘭行圍福敏奏事宜六條一行圍邊外內外奏章按期馳送較宮廷清穆勞逸懸殊尤宜朝乾夕惕清明在躬從容應之一留京百官道在隨事警察因人懲戒不使偷惰者得行其私一巡行之日言路不可不闢然有大奸惡大利害宜參奏不當瑣細瀆陳傷政體一聖祖仁皇帝於獵地之平易險阻莫不了然故周旋中度馳射如神願皇上籌度於馳射之先一弁兵布圍未必無參差乞少加從容使未習後生得暇勉從事一弁兵從行日久必至資斧不濟量加恩澤費無多而受惠無窮得旨覽大學士所奏俱見老誠忠懇補袞陳善之意朕皆嘉納七年福敏年七十御製詩賜之曰前世文昌宿當朝王者師典型鸞鷲序標準鳳凰池有問鳴鐘應方瞻鬢月披耆年緣令德初度值良時堂敞槐陰茂筵開日影遲春風生綺席仙酒介龐眉久賴經綸手猶疏弟子儀壽身兼壽世長佐太平基八年七月奏時政三條一河防事宜動關呼

吸難容遲滯江南石林口等處新工初就愈宜保護懇照災民請賑例一而辦理一而奏聞一災民勢必流移自謀生活若有司不善拊循但禁越境致輾轉溝壑宜加以玩視罪一江南湖廣等處偏災請留六省南漕賑濟懇宸斷數日截留庶上不虧儲下足濟食奏入報聞十年十二月以疾請解任諭曰卿才品優長老成端諒內廷講誦多年恪慎小心實有裨益特簡綸扉正加眷倚覽奏情詞懇切朕勉從所請著解任調理加銜太傅以示篤念舊學之意卿善自頤養以承恩澤遇精神康健風日晴和仍舊詣宮門請安並到內廷書房看視十二年上以詩存問曰經時未到禁門邊食履多宜心泰然月霽風清煩暑遠忽教重憶講帷前十七年福敏年八十御製詩賜之曰光霽由來衆式觀絳帷黃閣領儒冠身名應擬濟南伏年德原同沛下桓松鶴作朋還侑酒孫曾繞膝合加餐還丹益算何須藉兩字傳經永不刊二十一年十月以疾卒諭曰致仕大學士福敏品行端嚴學問醇正老成耆碩宣力年深久侍講帷清勤懋著予告以來朕時加存問前歲抱疴曾經親往看視賜以醫藥調養就痊方謂精神康健期頤可望今聞溘逝實深軫悼卽日朕親行致奠著賞內庫銀一千兩經理喪事所有應得卹典著該部察例具

奏尋賜祭葬諡文端入祀賢良祠四十四年御製懷舊詩稱爲龍翰福先生詩曰  
今古旣殊宜其教亦異施古方教數年今爲出閣時憶年舞勺歲皇考掄賢師卽  
從師授經詎惟習少儀循循旣善誘嚴若秋霜披背誦自幼敏匪曰詡徇齊日課  
每速畢師留爲之辭以此倍多讀忠益平生資誰知童時怨翻引老日悲不失赤  
子心能無繾綣思嗚呼於先生吾得學之基

清史列傳卷十三終

清史列傳 卷十四

大臣畫一傳檔正編十一

朱軾

朱軾江西高安人康熙三十三年進士由庶吉士改授湖北潛江縣知縣四十四年行取授刑部主事歷遷本部員外郎中四十八年提督陝西學政五十二年授光祿寺少卿五十四年遷奉天府府尹明年遷通政使五十六年授浙江巡撫五十七年條陳修築海塘六事一築北岸海寧縣老鹽倉石塘自蒲兒兜至姚家堰千三百四十丈一石塘應高二丈每丈疊石十層縱橫側立互相牽掣塘內面培土塘使潮汐不致泛溢一開中壑淤沙復江海故道則土塘石塘可免潮患一築南岸上虞縣夏蓋山石塘千七百九十丈一調委經理各官以專責成一專員歲修保固又疏言海寧縣沿塘俱浮沙塘腳空虛雖長椿巨石難期保固惟用水櫃法以松杉木爲櫃實以碎石以固塘根仍用大石高築塘身附塘另築坦坡高及塘半亦用水櫃法爲幹外砌巨石二三層以護塘腳不致潮汐浸入再塘內向有

河道名備塘河爲居民築壩所淤應去壩疏河卽以所疏土培岸俱下部議如所請杭州南北兩關稅例由巡撫監收軾以稅口五十餘稽查匪易請委員兼理巡撫得專力封疆錢糧亦不致貽誤部議以杭州府捕盜同知監收仍令巡撫統轄五十八年疏劾巡鹽御史哈爾金筆帖式三格勒索商人命刑部尙書張廷樞學士德音往審得實論如律五十九年擢左都御史六十年三月丁父憂命在任守制軾疏懇辭上不允軾復請往軍營效力上以山西陝西旱發帑五十萬兩命軾偕光祿寺卿盧詢分往二省勸糶給賑軾往山西疏奏救荒五事一被參司道以下貪劣人員請從寬留任令養活飢民以觀後效一令富戶出資協同商人於南省販糶停淮安鳳陽等關米船課稅半年紳士能捐賑者按所捐數優敘一各省驛站夫大半虛冒請查實募補一人受募卽可活一家一飢民流徙請令所在地方官安置能捐資贍養多人者核實題薦一飢民羣聚易生癘疫請交所在地方官設廠醫治疏下部院會議行八月疏言積貯貴裕有司平日侵蝕一經報災復借平糶借貸煮粥爲名以少報多有名無實請敕各督撫詳查虧空數少者勒限補還數多者卽嚴究治罪至因賑支倉穀輒稱捐俸抵補俸銀有限倉穀甚多不

但抵補無期且浮開捏報借非實借還非實還宜清查勒限追賠徇隱者議處從之又疏請山西建社倉以備荒歉引泉溉田以興水利諭曰凡建社倉須擇地方殷實之人董其事此人並非官吏無權無役借出之米遣何人催納卽豐收之年不肯還補亦無可如何若遇歉收更誰還補倘米石虧缺勢必令同事者賠償社倉之法始於朱子此法僅可行於小邑鄉村若奏爲定例屬官吏施行久之與民無益前朕巡幸山陝知其地山多水少並無河渠窪隰間有水泉亦不能暢引溉田今朱軾以建立社倉引水入田具奏卽令伊久駐山西鼓勵試行若所言有效甚善軾以冒昧引咎乞免試行得旨朱軾親至山西深知地方情形著仍留山西鼓勵試行十一月川陝總督年羹堯參西安府知府徐容鳳翔府知府甘文煊虧空銀米請特簡親信大臣會審上命軾赴陝會同審訊尋鞫得實論如律六十年二月乞假葬父回籍十一月世宗憲皇帝御極恭修聖祖仁皇帝實錄軾充總裁官賜第及銀千兩雍正元年正月入直南書房詔封軾母冷氏一品夫人並給銀二千兩三月加吏部尙書銜尋加太子太保四月充順天鄉試正考官以公慎校閱輿論翕然詔議敘晉太子太傅九月充會試正考官時修明史會典則例並

充總裁二年六月兼理吏部尙書八月復充會試正考官上以軾曾任浙江巡撫命赴浙議海塘事宜並勸蘇松塘工三年三月疏言浙江餘姚縣自澣山鎮西至臨山衛舊土塘三道係民竈修築今民竈無力應動帑興修自臨山衛至上虞烏盆村自烏盆村至會稽瀝海所東西土塘七千丈坍塌甚多應於塘底開深二尺填築亂石上鋪大石以固塘基貼石築土塘內植榆柳近塘窪地一概築平又海寧縣自陳文港至尖山土塘七百六十六丈塘外積沙尙薄水注塘下應將土塘加寬頂補條石以防泛溢其草塘七十四丈並依式改修再塘外亂石子塘遮護塘腳最要應修砌完固其無子塘處亦依式興築又海鹽縣東自秦駐山三澗塞至西演武場石塘樁壞坍八十餘丈應與衝潰之七十丈並築統計需銀十五萬五千七百兩有奇又疏言江南華亭婁上海等縣塘工自金山衛城北至華家角土塘六千二百餘丈內自滌缺墩至東灣九百六十九丈餘緣洋面大小金山北積沙潮直衝滌缺塘坍入海自金山墩至西新墩七百六十八丈兵廠至張家舍二百八十八丈况家路至三岔墩三百六十丈周公墩至花家角千四百六十餘丈皆老岸久坍新塘屢潰請均易土爲石其餘二千四百丈自上海汛頭墩至嘉



定等處水勢稍緩土塘足捍禦應堅築高原密釘排椿多種雜樹以固塘身計修築石塘土塘統需銀十九萬二千九百兩有奇疏下部並議行七月疏言國家封贈之典榮及所生所有本身妻室封典可移之父母即可移之祖父母請凡四品以下文官願將本身妻室封典移封祖父母者皆許之八品以下各官例封本身不及妻室是以移封父而不及母並請每格於例請八九品官准封父母不封本身妻室又教授學正教諭訓導俱以正途補用請將教授照知縣學正教諭照縣丞訓導照主簿例封繼母生男請與嫡母俱封又疏言縣丞主簿雙月應選人員皆四十五年前考授職銜之監生年貌與部不符預選之員年近八旬內外豈能供職間有年非老邁者核其考職時甚幼情弊顯然請暫停選將康熙五十年以前願赴選之考職縣丞主簿由各督撫考驗擇年力未衰者送部銓選至雙月應班二缺現無可選之人查捐納學正教諭訓導任滿者改補縣丞主簿向例歸單月選用請將此項人員除本班照舊補用外並於雙月暫選二人俟考職監生開選日仍歸單月選並從之九月授文華殿大學士兼吏部尙書命怡親王往直隸查勘水利營田十二月合疏言直隸之水會天津達海北來爲白河南來爲衛

河淀河貫乎其間惟白河安瀾無患衛河源出河南輝縣至山東臨清州與汶合東下德棣滄景滄州南有磚河青縣南有興濟河乃減衛水故道今河形漸石尙存請照舊疏通築減水壩以洩衛河之漲又靜海縣權家口亦宜築壩減水至白塘口入海處舊有石碣二座磚河興濟河之尾宜開直河一道歸併白塘出口澇則開放不惟殺運河之漲而河東積潦亦得稍洩再東西二淀跨雄縣霸州等十餘州縣畿南六十餘河水會於西淀經霸州之范家口會同河合子牙永定二河水爲東淀蓋羣水所瀦也近諸淀淤塞旁溢爲患故直隸之水必自淀始凡古淀尙能存水者均宜疏濬並多開引河使淀淀相通其已淤爲田者四面開渠中穿溝洫以達於河於淀疏淀內河身爲衆流之綱周淀舊有隄岸應加高厚無隄者量築其趙北范家二口爲東西二淀咽喉趙北口隄七里現有石橋八應加高闊並於易陽橋南添木橋一塘身高五六尺范家口北新開中亭河近復淤宜疏深濬廣其上流玉帶河對岸爲十望河舊道宜開張清口入中亭河會蘇橋三岔河以達東淀子牙永定二河以淀爲壑子牙爲漣漳下水清濁二漳發源山西至武安縣交漳口會經廣平正定而漣沱滏陽大陸之水會焉考任邱舊志子牙下流

有清河夾河月河皆分子牙之流趨淀今宜尋故道決分以緩其勢永定河俗名  
渾河水濁泥淤遷徙無定宜去淤以復故道二河口俱在東淀之西故淀常淤塞  
前奉諭旨令引渾河別由一道誠經久計今自柳叉口引渾河稍北繞王慶沱東  
北入淀約束子牙之西流合爲一河使永定子牙二河分道而東於淀內築隄河  
自河淀自淀庶濁流不爲患至高陽河宜疏故道新安之三台村宜開新河及各  
處隄岸均宜以時興工再京東之灤薊天津京南之文霸任邱新安等處宜各設  
營田專官經理並請揀發人員委用得旨嘉獎下部議速行四年正月又合疏請  
分直隸諸河爲四局南運河與藏家橋以下之子牙河范家口以東之淀河爲一  
局請令天津道就近總理永定河爲一局請改永定河分司爲河道駐固安縣總  
理其沿河州縣各設州判縣丞主簿等分防北運河爲一局請裁去舊分司令通  
永道兼管范家口以西各淀地及畿南諸河爲一局請改大名道爲清河道移駐  
保定府管理其河道各員必久任熟練應聽直隸總督選題引見簡用其同知以  
下各員俱於河員內選補下部議速行二月丁母憂諭曰大學士朱軾之母冷氏  
壺儀淑慎訓子成名今聞在籍故深可軫惻朕優禮大臣推恩賢母用頒異數

以示眷懷著江西巡撫動支司庫銀二千兩賞給俟朱軾抵家讀文致祭一次朱軾查勘水利事竣到京後著馳驛回籍又諭曰朱軾事母至孝今伊母病故哀痛必切但伊母年已八十餘祿養顯揚俱無餘憾正當節哀抑慟護惜此身為國家出力盡忠正所以盡孝著再賞銀二千兩為伊奔喪回籍費用守孝百日後即來京辦事軾奏謝乞終制上允解任仍管理畿輔水利事命於八月來京九月軾將至上遣學士何國宗副都統永福迎勞賜食復諭准素服三年時上以浙江風俗澆漓特設觀風整俗使軾疏言風俗之澆漓莫甚於爭訟昔臣巡撫浙江知杭嘉湖紹四府率多唆訟之徒全無情實告訐紛紛查分守巡道職任巡察兼理詞訟請添設杭嘉湖巡道一員其紹興一府屬寧台道管轄凡民間詞訟冤抑州縣不能申理者巡道准理該員能秉公執法訟師自知畏懼爭訟漸息風俗自臻淳厚上特允所請十一月疏請收用效力營田人員准其議敘十二月疏奏營田事例四條一自營己田者照頃畝多寡予九品以上五品以下頂帶一效力者量工程難易頃畝多寡分別錄用一降革人員效力者准開復一流徙以上人犯效力者准減等俱下部議行六年十二月以病乞解任調理上手詔慰留之八年五月怡

親王薨命軾總理水利營田事十一月兼兵部尙書十二月署翰林院掌院學士先是運河隄工水溢部議降級留任浙江巡撫任內失察呂留良逆書議革職特旨予留任十二年二月奉旨朱軾從前革職等案俱著開復十三年七月議築浙江海塘軾請往董其事得旨俞允特敕督撫及管理塘工諸大臣咸聽節制九月皇上御極召還命在總理處協同辦事尋以總理妥協賜騎都尉世職十月疏言州縣田地間有未盡開墾處緣山田磽确旋墾旋荒或江岸河濱坍漲無定是以荒者未盡開墾墾者未盡陞科至已熟之田有糧額甚輕者亦由土壤磽瘠數畝不敵腴田一畝卽古者一易再易三易之意非欺隱者比不但丈量不可行卽令據實首報小民惟恐查出治罪勉強報陞將來完納不前仍歸荒蕪請停止丈量飭禁首報惟詳查現在報墾之田有虛捏不實者題請開除下王大臣議行乾隆元年二月充會試正考官恭修世宗憲皇帝實錄及纂三禮義疏俱充總裁九月病篤上親臨軾第視疾軾知駕至力疾服朝服令其子扶掖迎拜戶外上嘉軾知禮且甚憐之未幾卒遺疏入諭曰大學士朱軾品行端方學術醇正爲聖祖簡用大臣皇考眷注有加簡任機務純修清德望重朝端朕自幼讀書宮中常聞講論

卽位以來正資老成襄贊昨聞抱恙沈篤朕親往看視尙冀調治痊可今聞溘逝朕心深爲軫悼特命輟朝一日親臨祭奠以昭敬禮賢大臣之誼又兩賜內庫帑金經理喪事茲覽遺疏拳拳以吏治民生爲念具見忠悃著加贈太傅入祀賢良祠應得卹典察例具奏尋賜祭葬諡文端著有周易註解周禮註解儀禮節略及歷代名臣名儒循吏傳諸書子必塔官至大理寺卿堪官至左庶子必坦襲騎都尉世職女許字李姓未婚守節侍郎蔡世遠爲撰傳御製詩題之有卓哉朱氏賢女子柏舟矢志終不徙之句四十四年上追念軾清操宿學御製懷舊詩稱爲可亭朱先生詩曰皇考選朝臣授業我兄弟四人胥宿儒徐朱及張嵇設席懋勤殿命行拜師禮其三時去來可亭則恆矣時已熟經文每爲闡經旨漢則稱賈董宋惟宗五子恆云不在言惟在行而已如坐春風中十三年迅耳先生抱病深命輿親往視未肯竟拖紳迎謁仍鞠臆始終弗踰敬啟手何殊爾嗚呼於先生吾得學之體

蔡世遠

蔡世遠福建漳浦人康熙四十八年進士改庶吉士四十九年請假省親五十年

丁父憂服闋赴京以假滿逾期休致時方纂性理精義大學士李光地請以世遠分修上允之書成回籍掌教鼇峯書院雍正元年六月特召來京授編修入直南書房十一月遷侍講二年充日講起居注官四年五月授右庶子十一月遷侍講學士五年二月授少詹事五月擢內閣學士七月充經筵講官六年授禮部右侍郎七年上以福建宜設觀風整俗使詔世遠偕同籍京員會議合疏言自海疆平定後泉漳文武官員有因功驟擢通顯者子弟驕悍無所凜畏如監理身爲大員縱容子弟害民聖祖仁皇帝將監理革職治罪人心咸知懲創我皇上澄敘官方振興民俗上年學臣程元章奏准泉漳風俗未醇責成巡道加意整飭自此益加儆戒但人有賢愚或鄙劣薄行致玷士類其鄉民又多因忿互爭種種惡習雖畏戢一時未必洗心滌慮茲奉旨會議斷不敢隱庇使稂莠不除貽患鄉里應請設觀風整俗使一員防範化導於風俗人心有益得旨允行八年七月轉左八月福建總督高其倬奏參世遠長子舉人蔡長漢違例私給船照上以原疏發世遠閱世遠疏言臣家屬八載在京長子長漢去冬來京會試現住京邸此所給照係本年五月日期不知何人所爲但有臣官銜圖書非臣族姓卽臣戚屬請敕督撫盡

法懲治並請交部嚴鞫部議以失察族姓家人降二級調用十年十二月特旨復原職十二年正月卒十三年九月皇上御極諭曰原任侍郎蔡世遠學問素優自雍正元年在內廷行走勤勞敬慎於經義文詞悉心講究多所裨益應加恩以示篤念舊勞之意部議加贈禮部尙書致祭諡文勤乾隆四年詔入祀賢良祠所著二希堂集御製序弁其簡端四十四年御製懷舊詩稱爲聞之蔡先生詩曰先生長鬣峯陶淑學者衆奉命訓吾曹風吟而月弄雖未預懋勤八載寒暑共常云三不朽德功言並重立言亦豈易昌黎語堪誦氣乃欲其盛理乃欲其洞是實爲學力虛車徒駕屢因以書諸紳未敢妄操縱德功吾何有言則企該綜嗚呼於先生吾得學之用次子長澐由廩生保舉優行引見特授知縣歷遷松江府知府江南驛鹽道乾隆二十六年授四川按察使二十七年特擢兵部右侍郎二十八年卒第三子觀瀾乾隆六年恩賜舉人歷江西道監察御史以陳奏乖方降二級調用二十八年諭曰蔡觀瀾係原任禮部侍郎蔡世遠之子部議降調需次無期著加恩以刑部員外郎用尋補刑部浙江司員外郎三十一年告病回籍五十年卒第六子長汭乾隆三十年恩賜舉人孫本崇乾隆四十九年恩賜舉人



馬齊

馬齊滿洲鑲黃旗人姓富察氏戶部尙書米斯翰次子聖祖仁皇帝康熙八年六月由廕生授工部員外郎十一年管佐領十四年調戶部二十一年七月遷工部郎中尋監督蕪湖關以稅銀溢額敍陞二十三年九月遷內閣侍讀學士二十四年九月授山西布政使二十五年九月擢山西巡撫十二月陞辭諭曰爾居官勤慎聲名亦佳但朕觀各督撫其始未有不善後多改轍爾若始終如一不易其初則善矣二十六年四月上嘉直隸巡撫于成龍清廉命九卿於各督撫中有似其人者各以所知奏大學士等以馬齊及范承勳姚締虞對七月奏定武職副將以上丁憂參將以下在任守制例十二月御史陳紫芝疏劾湖廣巡撫張汧貪黷馬齊與于成龍奉命同副都御史開音布往鞫先是侍郎色楞額往鞫上荆南道祖澤深被劾各款有旨并察張汧有無穢跡色楞額覆旣開釋祖澤深又不糾劾張汧至是馬齊會同于成龍等察審張汧勒索屬員科派鹽商祖澤深婪取民財皆得實論罪如律色楞額徇情欺罔亦獲罪二十七年三月遷左都御史命籌議遣官與俄羅斯定界事疏言俄羅斯侵踞疆土我守邊官兵困之於雅克薩城本可

卽行剿滅聖慈寬容不忍加誅釋歸故土今悔罪求和已蒙俞允特遣大臣往議垂之史冊所關最鉅其檔案宜兼書漢字漢員一體差往事下部議行尋九卿等會推應差大臣官員御史陸祖修以病辭楊燾以年老辭馬齊劾之又劾大理卿邊聲廷於奉旨集議河工事詭稱耳聾緘默無言有愧職掌下部議降調五月命同尙書張玉書圖納等往閱罷任總河靳輔所修中河諸工善否暫署河道總督八月還奏中河挑濬旣竣南運河內永安隄及歸仁隄五堡減水壩有被水衝壞處宜令新任河臣修理堅固黃河南北岸之減水各閘壩皆靳輔酌量形勢以防異漲無容更改三十八年十一月疏言數年以來噶爾丹與喀爾喀搆兵上屢遣大臣曉諭業已和好又分設喀爾喀佐領與內地蒙古視爲一體此亙古所未有也臣見理藩院案冊止用滿洲蒙古文並未有漢字請嗣後兼用以昭垂永久下部議如所請添滿洲漢軍漢字堂主事二員繙譯漢字滿洲筆帖式每旗各一員漢軍筆帖式每翼各二員二十九年二月命同理藩院尙書阿喇尼列議政大臣舊例理藩院尙書左都御史俱不預議政自是始十一月署兵部尙書尋兼署理藩院尙書三十年正月授兵部尙書三月詔安輯喀爾喀於沿邊內外避噶爾丹

刦掠馬齊同侍郎布圖等先往調集左右翼部長至上都河額爾屯河兩界中候上親行撫綏四月駕臨閱視命詳定喀爾喀次第宴賚之尋議喀爾喀諸王貝子公等爲九等分別坐次禮儀以進五月外藩阿噶台吉奔塔爾首告烏珠穆沁台吉車根等叛附噶爾丹馬齊奉命往審覆奏台吉車根阿穆爾充科阿達里諾壘喇扎卜等順附噶爾丹屬實二等台吉博託和拉扎布附阿喇什博羅特及爲引路之綽克圖等曾送駝馬與噶爾丹其部校阿爾塔等爲噶爾丹往來通信應分別斬絞從之三十二年二月調戶部尙書三十三年盛京歉收奉命往賑以開原等八城承德等九州縣貯倉米石給散兵民七月山西巡撫噶爾圖奏大同右衛駐防兵供給浩繁請以米豆草束抵給本色正賦上命馬齊往會將軍希福等確議還奏右衛官兵應用米豆草束折抵銀數並無浮冒其有不敷本色者應照改徵之價支給令官兵自行採買再右衛所出之草不多應以殺虎口迤東地方給與官兵俾資樵牧向有鑲黃旗馬廠應令旗下蒙古移駐殺虎口東北得旨俞允三十四年奉命往賑山西平陽臨汾等州縣地震被災戶口動帑一十二萬餘兩並停徵洪洞浮山等處額賦三十五年二月上親征噶爾丹先期命馬齊往調喀

喇沁翁牛特兵還京兼理藩院尙書命與大學士阿蘭泰等分班直宿禁城是年噶爾丹敗遁詔以來春駐蹕邊外調度搜剿機宜命馬齊於沿邊至寧夏先往安設驛站並察勘行途宿次三十六年十一月命會同吏部察審革職按察使囊吉理副將楊琳洸岷道董紹孔等運糧遲誤事覆奏囊吉理等所運糧米非供進剿大軍但令送至翁金爲西安回兵之用囊吉理等依限以一半運至翁金又以一半送至納拉特並無違誤應復原職從之三十七年三月命偕副都統烏達禪侍郎滿丕往莅喀爾喀諸部會盟宣諭禁令十二月以漕臣桑額奏請挑濬引河命偕侍郎喻成龍常綬往勘二十八年二月疏言桑額所奏邵伯鎮南金灣小海場鮑家莊等處挑濬引河建築草壩俱屬無益惟蝦鬚沙溝及興文閘草堰等處開濬淤塞稍可洩水庶漕有濟而民不害從之時山西巡撫倭倫與布政使齊世武以太原知府孫毓璘等虧空事互訐倭倫又劾齊世武於汝陽知縣李聯虧空任情朦隱上命馬齊往審七月疏言孫毓璘虧空庫銀倉米屬實倭倫駁回齊世武揭文令知府李成龍代孫毓璘彌補又李聯虧空案內有民欠銀兩經通判韓開藩徵解倭倫反指爲科派劾齊世武隱諱不報應降三級調用齊世武揭報孫毓

璘虧空經巡撫駁回不復再請又於李聯虧空案內未以民欠聲明應降一級調用並從之十一月授武英殿大學士四十三年七月御書永世翼戴扁額賜之四十七年十一月內大臣佟國維等以建儲事密奏上諭滿漢大臣會議保奏特諭馬齊勿預其事四十八年正月上問廷臣曰去年冬朕躬違和命爾等保奏可爲儲貳者何以獨保允禩其日先舉允禩者爲誰諸臣奏公同保舉並無倡首者上曰朕知此事必係佟國維馬齊授意於衆衆乃依阿立議耳馬齊奏是日議其事奉旨命臣毋得干預是以臣卽避去諸臣所議臣實不知上復問大學士張玉書等玉書奏曰會議日大學士馬齊溫達先臣到班臣問議舉者爲誰馬齊答以衆議欲舉允禩臣等同行保奏上曰此事明係馬齊暗中喻衆如此大事尙懷私意伊等謀立允禩豈非欲結恩於允禩爲日後恣肆專行之計耶翌日諭廷臣曰馬齊效力年久朕初心俟其年老聽彼休致以保全之昨問保舉允禩之時乃身作威勢拂袖而出如此不誅將誰誅乎著將伊族屬一并捉拏并傳問伊之作威何益馬齊奏曰臣因事關重大心中驚懼不覺舉動乖謬臣罪當死奏入下王大臣等議擬馬齊立斬弟副都統馬武等坐罪有差族人概革官職諭曰馬齊本應立

斬以爲衆戒因任用年久不忍加誅卽交允禩嚴行拘禁其族人官職革退四十八年十二月俄羅斯貿易人至上以馬齊舊管俄羅斯事復令其管理馬武等尋亦起用五十一年九月諭廷臣曰內務府事件積滯甚多所關最要著馬齊署理總管事又諭曰馬齊兄弟舊所管鑲黃旗佐領前曾撥給允禩今已撤回可仍令馬齊馬武等管轄其族人并隨入本旗五十五年復授武英殿大學士五十七年正月充纂修省方盛典總裁官五十九年五月命察奏副都統永泰所奏世祖章皇帝實錄內失載其祖圖賴事覆奏實錄祇載國家大政其餘細微之事例不編入永泰妄行疏奏應議處下部議革永泰職六十一年十一月世宗憲皇帝諭曰馬齊任大學士二十餘年甚屬敬謹寬厚皇考出巡每常隨從殊爲出力此番大事又公同善爲辦理眊勉勤勞著賞給一等輕車都尉世職尋命承襲其祖哈什屯一等男爵合新給世職晉二等伯充纂修聖祖仁皇帝實錄總裁官加太子太保雍正元年改保和殿大學士晉太保三年八月以總理事務竭盡忠誠賜騎都尉世職於其第十一子富良襲十三年九月引疾乞休奉今上旨以原品致仕乾隆四年五月諭廷臣曰原任大學士二等伯馬齊在皇祖時卽簡任機務倚毗甚

殷及皇考卽位特命總理事務嘉予勞績賞給伯爵世襲罔替朕卽位之初伊以年老力辭解退朕重違其意俞允致仕頤養高年以示優禮耆舊之意念伊歷相三朝年逾大耋抒忠宣力端謹老成領袖班聯名望夙重舉朝大臣未有若此之久者昨聞在家患病卽命太醫加意調治今聞病勢沈重朕心深爲憫惻本欲親臨看視因北郊在卽時值齋戒不獲親往特命和親王及皇長子永璜公訥親代朕看視望其痊可倘果不起著賞給銀五千兩辦理後事是月卒年八十有八諭部議卹贈太傅賜祭葬如例謚文穆以第十二子富興襲爵十三年因富興爲散秩大臣不能奮勉行走革退命富良襲爵合前襲之騎都尉晉一等伯兼一雲騎尉十五年七月詔加伯號曰敦惠

### 徐元夢

徐元夢滿洲正白旗人姓舒穆祿氏康熙十二年進士由庶吉士散館改戶部主事二十二年遷中允充日講起居注官尋遷侍講二十六年四月同尙書陳廷敬湯斌侍郎徐乾學少詹事耿介侍讀學士高士奇德格勒等召試乾清宮聖祖仁皇帝諭曰人之學問有一定分量眞僞易明如德格勒每評論時人學問朕心不

以爲然故召爾等面試也是年十二月翰林院掌院學士庫呼納奏劾德格勒私抹記注事並言徐元夢與德格勒互相標榜因革職逮訊得旨寬釋籍入內務府三十二年命入上書房課皇子讀書尋授內務府會計司員外郎四十一年充順天鄉試副考官五十年三月諭大學士等曰內閣繙譯通本事甚緊要如一二語不符漢文則於事之輕重大有關係內閣侍讀學士及侍讀俱係按俸補授之人恐所繙本章不甚妥當在內廷行走之徐元夢現今學繙譯者無能過之可授爲額外侍讀學士五十一年同左都御史趙申喬爲會試考官五十二年擢內閣學士兼禮部侍郎免隸內務府歸原旗五十三年十月充經筵講官十二月授浙江巡撫諭之曰浙江有滿洲兵爾當與將軍協同訓練錢糧或有虧空爾宜清理無累百姓至於用人宜隨材器使不可求全賜御製詩文集及鞍馬以行明年三月疏言上年杭州紹興台州金華衢州嚴州處州七府旱潦成災田畝邀恩分別蠲賑並截留漕米二十萬石以九萬石發各縣平糶貧民得資餬口而應完額賦尙有十三萬餘兩目下青黃不接輸納維艱請俟秋成後先徵一半來歲徵完以紓民力得旨允行十月疏言杭州萬松嶺自明代建立書院本朝康熙十年巡撫范



承謨興修後年久荒廢臣鳩工整理漸有規模因擇觀風考取諸生及學臣歲科兩試前列者肄業其中捐資給以膏火無不踴躍樂從第書院未有嘉名請御書匾額俾諸生出入瞻仰動其欽崇鼓舞之志並賜日講解義古文淵鑑諸書御書諸法帖以廣文教上悉允所請賜浙水敷文匾額因復奏以敷文二字爲書院名五十六年正月左都御史及翰林院掌院學士缺員吏部疏奏上曰是當以不畏人兼學問優者任之遂特命徐元夢爲左都御史兼掌院學士充日講起居注官經筵講官並教習庶吉士五月諭以科場中鑽營積習未除主考與同考官有聲名不好者宜糾劾之俾知警戒於是劾罷編修儲在文張起麟徐用錫沈宗敬宮鴻歷叢樹等又劾罷聲名平常之任滿學政王雲錦林之睿車鼎晉萬經鄭晃魚翔等五十七年五月遷工部尙書仍兼翰林院掌院學士教習庶吉士六十年十月上曰徐元夢乃同學舊翰林康熙十六年以前進士祇此一人矣因賜以詩有常懷舊學窮經史更得餘閒力簡編之句世宗憲皇帝雍正元年正月命入上書房課皇子讀書二月同大學士張鵬翮尙書田從典左都御史朱軾侍郎張伯行李紱掌院學士阿克敦勸廷儀奉詔甄別翰詹各官不安本分有玷官箴者勒令

解退回籍五月因大學士富寧安留辦西路軍營事特命署理內閣大學士兼署左都御史充明史總裁官十月調戶部尙書仍辦大學士事賜御製詩有報國訐謨切銜恩竢贊勞之句二年充繙譯鄉試正考官四年八月以繙譯本章錯誤吏部議革去署大學士戶部尙書請交刑部得旨徐元夢在內廷行走多年從寬免其交部著革職在內閣學士之列辦理票簽本章一切繙譯事務效力行走八年以前任浙江巡撫失察呂留良逆書應革任命同繙譯中書行走十三年二月充繙譯鄉試副考官是年八月今上御極命南書房行走尋諭曰徐元夢年逾八旬效力甚久茲當皇考龍馭上賓繙譯祭文甚屬敬慎著卽補授內閣學士十月授刑部右侍郎自以年老衰邁不能辦理刑名事件疏辭得旨調禮部右侍郎會纂修世宗憲皇帝實錄充副總裁官詔編輯八旗滿洲氏族通譜大學士鄂爾泰尙書福敏董其事十二月轉左侍郎命入上書房課皇子讀書乾隆元年二月同尙書徐本福敏侍郎姚三辰奉命閱取會試迴避卷五月同尙書楊名時教習庶吉士奏言滿洲庶吉士宜熟悉繙譯上命是科滿洲庶吉士來年以清書散館七月充三禮義疏副總裁官八月以年老乞休上曰徐元夢耆碩舊臣今以年逾八旬

精力衰邁請解其侍郎之任朕念情詞懇切允從所請特加以尙書職銜照現任食俸仍在史館內廷等處行走九月上親撰世宗憲皇帝聖德神功碑文特敕繙譯二年二月疏言恭遇皇上隆禮先師特命國學文廟易蓋黃瓦肇舉臨雍大典於廟學配享之制宜予釐定四科十哲之目雖始自論語後旣以顏子特配先師因升子張於殿以補其數聖祖仁皇帝復以朱子昌明聖教有益斯文命禮臣升躋神位於十哲之次是殿享不盡沿舊制也如有子之言行氣象與聖人相似最爲游夏諸賢所推尊允宜升堂配享至宰我冉求一因短喪有不仁之責一因聚斂有非徒之斥向來論者謂宜移祀兩廡其舊在兩廡之南宮適宓不齊俱以君子見稱於孔子亦宜並予升配用明聖朝崇尙德行也疏下大學士九卿議以有子升祀子夏之下移祀朱子於子張之下國子監及直省府州縣學均遵行九月復乞休上曰徐元夢老成望重雖年逾八旬未甚衰憊可照舊供職量力行之不必引退其繙譯日講春秋等書暨一切碑文祭文並姓氏館咸安宮事務另派員代管以便頤養四年正月二日召同諸大臣賦柏梁體詩以扶鳩朝序歲月延賡爲韻五月諭獎抒誠宣力諸大臣加太子少保六年九月遘疾遣太醫院診視賜

濩藥十一月疾劇上諭大學士等曰尙書徐元夢人品端方學問優裕踐履篤實言行相符歷事三朝出入禁近小心謹慎數十年如一日謂之完人洵屬無愧且壽逾大耋亦廷臣中之所罕見者前因年老乞休特加尙書銜復加太子少保照現任食俸俾得優游頤養以享遐齡今冬在家患病卽命太醫調治並賜濩藥近聞病勢日漸沈重朕本欲親行看視因舉行慶典在卽不便前往著皇長子永璜往視其疾冀其痊可倘至不起著賞銀二千兩辦理後事令和親王皇長子往奠茶酒再加贈太傅准入京師賢良祠以示朕優禮耆舊格外加恩之至意翌日卒年八十有七遺疏入諭部議卹賜祭葬如典禮諡文定

陳元龍

陳元龍浙江海寧人康熙二十四年一甲二名進士授編修入直南書房二十五年充日講起居注官四月元龍侍班乾清宮西煖閣上顧元龍曰朕素知爾精於楷書可寫大字一幅命就御前作書上嘉獎以御書闕里碑文示之二十八年左都御史郭琇疏劾原任少詹事高士奇左都御史王鴻緒等植黨營私元龍與士奇結爲叔姪不顧清議爲之招納賄賂有玷朝班乞罷斥詔元龍及士奇鴻緒等

休致回籍詳見士奇鴻緒傳三十年十月詔復任三十三年遷侍講尋轉侍讀三十四年御書鳳池良彥額並御書一卷賜之三十五年隨上征噶爾丹三十六年遷右庶子三十八年充陝西鄉試正考官三十九年遷侍講學士明年轉侍讀學士四月上御便殿作書賜內直翰林同觀諭曰爾等家中各有堂名不妨自言當書以賜元龍奏父之闈年逾八十擬愛日堂三字御書賜之四十二年擢少詹事充經筵講官十月遷詹事四十三年以父病乞終養上俞允並諭曰爾思親念切天氣漸熱可卽起身賜其父人蔭二斤復令攜賦彙歸校對增益四十四年上南巡元龍迎駕上慰問並詢及其父賜御書南陔日永額并賜其父人蔭金扇等物又追賜其母陸氏慈教貽休額諭元龍家有老親不必遠送尋丁父憂四十九年服闋擢翰林院掌院學士教習庶吉士復充經筵講官五十年授吏部右侍郎四月轉左八月擢廣西巡撫上曰爾至廣西當使文武和睦兵民相安巡撫有管兵之責宜不時操練爾任翰林年久朕特試用邊疆之職觀爾辦事何如宜盡心加勉五十二年疏言自廣東歉收米穀騰貴臣不敢遏糴聽商販運米以濟遂致廣西乏食米價亦增臣現已借支藩庫銀一萬兩遴員赴湖南採米平糶下部知之

五十四年三月疏奏現行事宜三條一桂林貯穀高建倉廩百餘間以避潮溼一興安縣陡河水通灘江達廣東爲三楚兩廣運糧要道舊聞傾圮率屬捐俸修築一養濟院外別構屋數十間收養鰥寡又立義學卽以貧士爲師量給修膳創育嬰堂施藥餌設粥廠以賑窮民下部知之五十七年擢工部尙書復充教習庶吉士六十年調禮部尙書疏言各省貢監生願應順天鄉試者於鄉試前一年齋本省地方官印文投監肄業臨場取同肄業監生連名互結并同鄉京官印結移送入場以杜頂冒又選拔停止年久請照康熙三十六年例令學臣於府州縣每學優等生員中選拔一名送國子監肄業並從之六十一年世宗憲皇帝御極詔元龍奉守景陵仍食禮部尙書俸雍正元年五月吏部以恩詔題給臣工誥命得旨陳元龍係年老一品大臣朕念景陵緊要重地特行遣往伊當樂於行走乃反不樂往若似罪謫者到處怨望此等之人雖加恩亦不知感其應得封典廕生俱不必給七年正月諭曰滿漢大學士俱各全備辦理妥協無容再增因聖祖仁皇帝時所有年久老臣今在朝者甚少時深注念尙書陳元龍左都御史尹泰歷事聖祖多年屢經任使雖年近八旬而精力尙健著加恩授額外大學士以示優眷至

意尋授元龍文淵閣大學士兼禮部尚書先是元龍任廣西巡撫時以廣東方開捐例赴捐者懼湖廣江西灘河及梅嶺險阻稽遲盡向廣西採買米價騰貴疏請廣西一體開捐下部議行嗣廣西巡撫李紱請將廣西監穀爲開墾費上曰廣西捐穀係陳元龍王沛愷經手其閒有名無實首尾不清之處甚多李紱難於料理故借開墾之名以爲開銷虧欠之地著陳元龍王沛愷前往廣西將此項澈底清楚倘有不清著李紱據實參奏李紱奏稱元龍廣西捐穀自康熙五十三年至五十五年停止桂州梧州柳州南寧四府共收百十七萬八千餘石當日因捐納之人買穀需時願交穀價經前任布政使黃國材議定每石折銀一兩一錢各府自存六錢爲買穀蓋倉等費內有贏餘係管捐府廳分得其餘銀五錢按察使及本道各分得四分元龍實分得羨餘銀十一萬七千八百二十五兩除在廣西捐公費銀九萬三千二百餘兩又屢次捐助軍需共十萬兩均經奏明在案外今倉穀尙有虧空各官自應一體分賠疏至詔下部議各員按數賠補元龍應追賠得過羨餘及認分賠部科等費共銀二十一萬二千兩有奇捐助軍需俱不准扣抵分限五年完納至是諭曰大學士陳元龍在廣西任內有應行追賠之項查伊曾有

效力之處著准其照數扣除七月疏請各省提奏本章增揭帖一通送起居注館記注後貯內閣從之八月疏言凡稽察游民嚴設處分內城專責巡捕營弁外城專責巡城御史及司坊官不時密訪各省宜令各督撫嚴飭地方官稽察又言近日各衙門番役往往與流棍串通如拏賭博鬪毆等犯不卽送官懲治匿犯索財卽行私釋其窮苦無錢者方送官宜嚴定卽日送官期限羈留者卽嚴訊番役詐贓賣放之罪俱下部議行十一年七月以年老具疏乞休得旨大學士陳元龍老成練達學問優長奉職多年宣勞中外朕念聖祖仁皇帝簡用舊臣晉秩綸扉俾承恩眷今以年逾八旬乞休勉從所請著加太子太傅銜以原官致仕令伊子編修陳邦直隨歸侍養起程之日賞給酒膳果品著六部滿漢堂官餞送沿途官弁送迎盡禮乾隆元年恩予在家食俸八月卒諭曰陳元龍耆舊大臣服官宣力五十餘年今乞休在籍朕方望其頤養林泉以承恩眷忽聞溘逝深爲軫惻應得卹典察例具奏賜祭葬如例諡文簡

白潢

白潢漢軍鑲白旗人由筆帖式授內閣中書遷侍讀康熙三十九年授福建糧驛



道四十二年丁父憂四十五年補山東登萊青僉事道四十九年遷貴州分守貴東參議道五十三年遷貴州按察使五十五年擢湖南布政使未赴命護理貴州巡撫五十六年六月改江西布政使七月擢江西巡撫五十七年疏言江西湖口縣關地形甚險兩山插江夾峙商船候驗停泊虹橋港逼近山腳夏秋僅容小船一二百冬春水涸來往報稅必由梅花洲嘴紆行十餘里遇水漲則江湖二流橫激港口微風卽蹈不測惟關右里許山勢開闊有武曲港可容千艘但冬春亦涸請自江岸至港口大爲挑濬於港口建草壩二以阻游沙外加排椿以固壩根可利停泊商民俱便部議如所請行五十八年疏言江西科第之盛遠勝浙楚康熙三十五年奉旨增額江西七十五名浙江七十一名湖廣七十名是向來中額多於浙楚四十一年浙江湖廣二省以督臣郭琇撫臣趙申喬請照江南中額增至八十三名江西未經題請不增至五十年特旨增直省中額浙楚又各增十六名江西僅增十五名近科入場士子多至一萬二千餘人而中額不得比於浙楚通省合詞請題廣額懇恩將江西鄉試中額照浙楚一例取中疏下部議從之五十九年七月疏言州縣因公挪用虧空錢糧請照霉爛倉穀例者不論在任解任及

分賠之知府能於限內全完准其開復如所請行尋因病乞補京職授戶部右侍郎十月擢兵部尙書六十一年十一月世宗憲皇帝御極命潢協辦大學士事務十二月晉文華殿大學士潢具疏懇辭諭曰朕素聞爾居官操守甚好巡撫江西時綏輯地方甚有裨益及任兵部尙書清勤恪慎皇考每加優獎今朕以機務重大資爾料理爾卽遵旨供職不必固辭時恭纂聖祖仁皇帝實錄以潢充總裁官雍正元年賜詩一章有蓼蕭多雨露應及老成人之句三年七月以病乞解任從之先是江西南昌吉安撫州饒州四府有落地稅銀千三百餘兩各以大使徵收潢以官役費浮於稅不免苛徵將四處稅銀停徵巡撫司道公捐銀代完假造商民名冊報部稅大使已無職掌仍舊設立後任相沿辦理未奏至是江西巡撫汪滌奏其事並請裁汰大使上諭大學士等曰此項稅銀不應徵收則白潢當奏請於聖祖仁皇帝施恩豁免若係應徵則令商民完納何得公捐完課曲示私恩似此沽名邀譽豈人臣事君之道至汪滌凡事不能據理而行乃將白潢所行悖理之事奏聞冀朕批示爾等同九卿詢問回奏尋奏白潢沽取虛名擅變舊例應嚴加議處汪滌妄行瀆奏亦應察議部議白潢照溺職例革職汪滌降二級調用課

稅仍照舊例徵收稅大使不得於額外勒索從之乾隆二年潢卒三年九月上諭原任大學士白潢向在巡撫任內尙有清廉之名告休後緣事革職今聞病故著給還大學士銜以示優待大臣之意

鄂爾泰弟鄂爾奇

鄂爾泰滿洲鑲藍旗人姓西林覺羅氏世居汪欽高祖屯泰國初率族來歸授佐領曾祖圖捫天聰五年從征明大凌河力戰陣歿授騎都尉世職雍正三年入祀昭忠祠祖圖彥圖襲世職官戶部郎中父鄂拜國子監祭酒鄂爾泰由舉人於康熙四十二年襲佐領授三等待衛五十五年遷內務府員外郎雍正元年充雲南鄉試副考官特擢江蘇布政使八月授廣西巡撫三年十月命署雲貴總督四年五月貴州狝苗負險肆橫議撫久無成鄂爾泰分三路進剿一由谷隆一由焦山一由馬落孔焚其寨七進克長寨羊成聖等奏於長寨增駐遊擊又以鎮遠土府刁澣霑益土州安於藩凶詐計擒之者樂甸土司刁聯斗乞免死歸流奏給職銜示鼓勵尋奏狝苗及川販窩黨悉就擒上嘉其成功速議敘加三級又奏經理狝苗事宜十一條一未獲犯中脅從者自首概寬免一苗民失耕種期免本年正賦

一歸寨者月給米鹽撫恤並給耕種逾一月未歸田土賞兵一苗多占地仇殺令契開明界址官給印信承業一同名各照祖先造冊不知木姓者爲立姓一軍器悉繳隱匿及私造處決一兵不得欺陵官不約束嚴參一移貴陽府同知駐長寨化導一移長寨把總駐打壤寨控制一員弁聞刦掠卽拏一面申報獲犯會審毋袒徇部議從之十月實授總督先是四川烏蒙土司祿萬鍾擾東川府與滇接壤鄂爾泰奏改東川隸滇從之命會同川督岳鍾琪辦理烏蒙事嗣招其魁祿鼎坤爲土守備萬鍾不就撫至是檄總兵劉起元整兵直入各寨投誠萬鍾遁鎮雄五年正月萬鍾潛投四川被獲解鍾琪軍前其黨鎮雄土司隴慶侯亦赴川繳印獻土敍功加二級特旨給騎都尉世職三月鎮沅猺賊戕官焚掠剿平之獲賊首刁如珍等又廣西土府岑映震淫虐鄂爾泰曾奏敕懲治上命廣西巡撫韓良輔赴滇會議用兵鄂爾泰以滇粵相距遠貴州安籠與泗城接卽親往商六月映震惶懼乞改流存祀奏革世職免罪安置浙江原籍給其弟映翰頂帶奉其祖岑繼祿祀七月同楚省會剿謬衝花苗擒其渠餘衆歸順九月擒威遠猺賊札鐵匠降新平野城李百疊等議敍加三級十一月招撫長寨後路生苗百八十四寨編戶口

定額賦得旨嘉獎授一等輕車都尉十二月攻破雲南猓賊窩泥種其六茶山地千餘里劃界建城設員弁議敘加二級先是前任雲南總督高其倬查奏安南國界有內地舊境百二十里應清理於賭咒河立界國王黎維禔奏辯復命鄂爾泰清查給與八十里於鉛廠山下小河以內四十里立界頒敕曉諭至六年正月國王具表謝鄂爾泰以聞上嘉其知禮仍賞給地四十里又奏烏蒙設鎮駐總兵改貴州威寧鎮爲營置參將與鎮雄東川二營歸統轄並烏蒙設府治改鎮雄爲州隸之俱議行三月剿擒東川謀逆之法夏伙日祿天佑則補營長祿世豪等又米貼土日祿永孝緣罪斬候妻陸氏勾猓獯反調總兵張耀祖等攻門坎山所向皆克擒陸氏米貼平時廣西猓顏光色等不法提督田峻不能剿鄂爾泰調兵至賊殺光色等降六月命總督雲貴廣西三省事務七年正月雲南卿雲見由一等輕車都尉加授三等男三月疏奏貴州丹江雞溝生苗向不服化前檄按察使張廣泗相機剿撫今攻克各寨苗衆投誠其上下九股及清水江古州等處以次寧貼敘功加二級九月奏乞銷去苗疆議敘賞給曾祖圖捫封典俾昭忠祠牌位得以改書贈官允之其苗疆功仍議敘尋加少保十二月奏新開苗疆立營設官事宜

一八寨距都勻府九十里地方遼闊改都勻營爲協設副將駐筭一丹江逼凱里素爲生苗盤據增丹江營設參將一九股尤强悍移黃施營遊擊駐施秉舊縣一清水河有南北兩岸居中增清江協設副將一鎮遠協原防清水江生苗今改爲營設參將歸清江協一天柱營近生苗向設參將今既分設營汛改爲都司一古州爲都勻黎平要隘設古州鎮駐總兵改黎平協爲營廳統轄一營汛既定設文員分駐增都勻府同知一駐八寨通判一駐丹江鎮遠府同知一駐清江黎平府同知一駐古州俱加理苗字樣一所設同知通判於同駐官兵內各撥把總兵丁爲親標護衛一施秉舊縣添設施秉縣縣丞分駐從之八月八日烏蒙猥賊結涼山等蠻反總兵劉起元被害祿鼎坤姪萬福與賊合鄂爾泰飭諸將進討參將韓勳大敗賊於奎鄉總兵哈元生復烏蒙同攻克大川與關兵會十二月擒萬福渠兇盡獲奏入諭曰烏蒙改設府治之初諸事尙未就緒又值劉起元不善撫卹激成事端逆黨勾連幾有猝難收拾之勢而將弁軍士奮勇爭先旬月間削平寇亂此皆鄂爾泰平時節制封疆以公忠表率官僚以義勇訓練將士而臨機應敵又復調度有方用能迅奏膚功永安苗境論功行賞當以鄂爾泰爲先但念該督自

聞賊變以來時時以先事疏防引過自責今軍事告竣不肯自居蕩寇之功屢次陳奏情詞懇切朕曲從其請以成其謙抑之素志九年六月疏奏烏蒙善後事宜烏蒙鎮舊設中左右三營請增設前營四營各遊擊一守備一千總二把總四中營駐府城左營駐大關右營駐永善前營駐涼山鎮雄東川二營俱增設守備一分左右軍左軍守備各駐府州城鎮雄右軍守備駐奎鄉東川右軍守備駐阿白溪又改威寧營爲協設副將仍歸烏蒙鎮轄尋甸州增奇兵營設參將歸督標轄從之尋奏全滇水利事宜一濬嵩明州之楊林海周圍草塘可開墾一宜良縣開河五其四灌田惟江頭村舊家河形高自胡家營北另開一道資灌溉一尋甸州尋州河有石難以灌溉應另濬沙河十五里一東川府城北漫海地肥水消令民承墾一浪穹縣羽河等處加修堤工一臨安等處修築工程暨通粵河道嵩明州河口俱查勘以時興工下部議行十年正月陛見二月授保和殿大學士兼兵部尙書辦理軍機事務諭曰大學士鄂爾泰節制雲貴廣西三省歷有歲年於所屬苗疆悉心經理使蠻夷慕義向風咸登樂土至於古州等處生苗自昔未歸王化鄂爾泰運籌調度剿撫兼施俾苗人懷德畏威抒誠內嚮疆域開拓邊境輯寧數

年以來變績實非尋常可比鄂爾泰著授一等伯爵世襲罔替四月諭曰朕與鄂爾泰面加商酌新疆遼闊兼有內地舊汛非古州一鎮能統轄都江清水二江地界形勢兩路劃然牽合歸一終難控禦而古州鎮處都江適中清江協處清江適中遙對雄峙各踞要區若於清江協裁去副將改設一鎮將新疆之丹江營與內地之銅仁鎮遠黃施天柱石阡平越等協營俱歸管轄其餘都勻協黎平營並新設之上江下江諸協營俱隸古州鎮轄則數千里之苗疆可無鞭長不及之慮更屬妥協著將靖江協改鎮時大軍剿準噶爾七月命督巡陝甘經略軍務九月奏報我兵敗北路賊於額爾得尼昭賊遁必由畢躋一路中有袞塔馬哈戈壁係要隘咨行署寧遠大將軍張廣泗選將弁堵截並令廣泗繼進以壯聲援得旨嘉獎又奏屯田事宜一總理屯田大員頒給關防一客民首報地畝分別給工價其夫役等工價口糧外加賞衣帽銀一夫役在甘涼肅雇募地方官出結以免逃逸沿途給口食並築土堡客居一屯田諸務令所在有司協理一各項支用銀令總理屯田大臣奏報在軍需銀內支者另行報銷十一年五月奏言明歲大兵前進阿勒台應先將特斯台錫里二處所駐兵令秋後至科布多水草佳處并於札卜堪



察罕鄂羅木築堡規守臺站運路又於塔木託羅海額克阿喇勒默爾根西納所  
在各駐兵四千俟進剿時卽前至科布多候調遣俱從之六月還京仍兼兵部事  
十月充八旗志館總裁兼署吏部十二年二月奏參兵部堂司官造冊朦混冒銷  
驛站錢糧上以鄂爾泰實心任事議敘加一級七月署鑲黃旗滿州都統十三年  
正月充皇清文穎館總裁五月台拱逆苗叛鄂爾泰自以從前籌畫未周請罪並  
陳疾乞賜罷斥削伯爵暫假調理得旨卿才品優長忠誠任事歷經簡用未負朕  
恩今以抱病虛羸懇請罷斥情詞皆實著解大學士之任削去伯爵俾得悉心調  
攝至於古州苗疆從前石禮哈等皆曾奏請用兵朕悉未允行及鄂爾泰爲滇黔  
總督以此事必應舉行剴切陳奏朕以鄂爾泰居心誠直識見明達況親在地方  
悉心籌畫必有成算始允所請命其慎重辦理彼時苗民相率向化成功迅速朕  
心甚悅特錫伯爵以獎勵庸乃平定未久苗卽數次蠢動近則直入內地煽惑熟  
苗焚劫黃平一帶地方居民受其擾害朕詢問情由鄂爾泰亦以出於意外爲詞  
是從前經理之時本無定見布置未協所至則朕昔時之輕率誤信亦無以自解  
國家錫命之恩有功則受無功則辭乃古今之通義今鄂爾泰請削伯爵於情理

相合朕鑒其悃誠而俞允之並請將前後情事宣諭中外以示吾君臣公而無私過而不飾之意尋命仍留三等男爵八月今上御極命同莊親王允祿果親王允禮及大學士張廷玉總理事務十二月詔授一等輕車都尉並前男爵爲一等子乾隆元年二月充會試正考官七月充三禮義疏總裁二年五月充農書總裁八月查直隸河道九月奏言永定河上游無分洩下游不得暢達以致爲患請於半截河隄北開新河卽以北隄爲南隄沿之東下入六道口經三角淀北至青沽西入大河更作洩潮埝數段俾沙停埝外水歸河中則下口無阻再於上游河身自半截河以上挑濬深通南北岸分建滾水石壩四各開引河一合清隔濁補救無難又言千里長隄爲數十州縣保障隸霸州保定文安大成境者最險要今年風浪摧壞擬於淀口出口處至陶家營築培隄工照底閘頂突法修成坦坡形龍堂灣轉角處補築月隄以資重障疏大隄對岸支河淤淺禁攔河壘道俾得暢達又言靜海縣北至獨流內受淀水外當河道亦最險處請於東岸建滾水壩開引河注之中塘窪疏通下口達海建閘防潮下王大臣議行十一月命爲軍機大臣兼理侍衛內大臣十二月以總理事務議敘由一等子加騎都尉併授爲三等伯賜

號襄勤三年兼議政大臣四年二月充經筵講官先是河南河道總督高斌請開新運口論者以爲不便至是上命鄂爾泰閱視四月奏言漕河運口因時制宜屢經改易今所建新口離黃稍遠可避倒灌不無小效臣愚以爲可用圍水挑壩稍短應再築長壩竟圍過水口一如磨盤墩式俾外通大溜抵黃內引迴流入運其新運口內頭二三壩向東轉北及天妃閘舊運河路自三壩向東南灣轉而北過越閘卽河臣擬改新運河路舊河直接新路紆曲爲漕運計應行舊河今新建閘壩未開仍取道天妃閘旣屬便利永宜遵行又言陶莊引河長而稍曲旋開旋淤築引河法宜徑直乃能迅駛頭沙並須頭迎溜尾順溜放水及時臣擬定河頭於舊之東迎溜處東北直下四百六十餘丈尾對惠濟閘仍係順溜俟大溜盛時開放再於對岸上流二壩三壩間接築挑水大壩令黃水全勢趨北倒灌之虞可免得旨如所請行又言湖河機要二事一天然二壩不宜開免湖水全洩並興化鹽城等縣水患一毛城鋪壩已經變遷宜酌復河取直兼放淤培岸省埽壩費下大學士九卿議從之時河東總河白鍾山奏請復漳河故道諭鄂爾泰於歸途勘奏尋奏言漳河故道有二由山東邱縣城西者舊跡全湮難以開通由城東者疏濬

較易應自和爾寨村東承漳河北折之勢接開十餘里至漳桐村入舊河卽於新河頭下東流入衛處建閘衛水弱敗以濟運足用則閉再於青縣下另建閘壩酌水勢分洩以保萬全從之五月加太保七年三月充玉牒館總裁十二月副都御史仲永檀以密奏留中事洩於鄂容安命王大臣鞠實請將鄂爾泰革職拏問諭曰仲永檀如此不端之人鄂爾泰於朕前屢奏其端正黨庇顯然久在朕洞鑒中若欲將伊革職拏問則已於前日降旨何待爾等今日之奏請蓋以鄂爾泰乃皇考遺留之大臣於政務尙爲諳練若以此事深究不但罪名重大承受不起而國家少一能辦事之大臣爲可惜耳但其不擇門生之賢否不訓伊子以謹飭朕亦不能爲伊屢寬也鄂爾泰著交部議處以示薄罰尋議降二級調用奉旨抵銷留任八年管翰林院掌院事十年正月以疾請解任調理上慰留三月加太傅四月卒遺疏入得旨大學士伯鄂爾泰公忠體國直諒持躬久任邊疆茂著惠績簡領機務思日贊襄才裕經綸學有根柢不愧國家之柱石允爲文武之儀型嚮用方殷倚毗正切昨冬忽嬰痰疾朕心屢念選醫調理存問日頒今春病勢有加朕往看視加銜太傅冀其獲痊不意竟至不起朕心深爲震悼親臨祭奠輟朝二日披

覽遺疏具見忠君愛國之悃忱尤爲追念不置昔皇考有配享太廟遺詔著該部遵奉舉行並入賢良祠加祭二次尋予祭葬諡文端二十年甘肅巡撫鄂昌與詩詞悖逆之胡中藻倡和事覺革職治罪諭曰胡中藻係鄂爾泰門生且與其姪鄂昌敍門誼則鄂爾泰從前標榜之私適以釀成惡逆其詩中讒舌青蠅供指張廷玉張照二人卽張廷玉之用人亦未必不以鄂爾泰胡中藻爲匪類也鄂爾泰張廷玉亦因遇皇考及朕之君不能大有爲耳不然何事不可爲哉使鄂爾泰尙在必將重治其罪爲大臣植黨者戒著撤出賢良祠四十四年御製懷舊詩列諸五閣臣中詩曰業師祇三人其三情向剖皇考重英才率命書房走鄂蔣以閣臣蔡法列卿九胡顧劉梁任邵戴來先後其時學亦成云師而實友不足當絳帷姓名茲舉偶鄂其中巨擘內外勤宣久初政命總理顧問備左右具瞻鎮百僚將美惠九有好惡略失尙性陰陽則否遵詔命配享旌善垂不朽鄂爾泰弟鄂爾奇康熙五十一年進士改庶吉士散館授編修雍正元年三月充山西鄉試副考官六月遷侍讀七月擢詹事府詹事四年五月署國子監祭酒九月授二部侍郎五年教習庶吉士六月調禮部七月充順天鄉試正考官八月充會試副考官尋命總理

國子監事署兵部侍郎九月陞戶部尙書兼管步軍都統十年充繙譯鄉試正考官十一年九月直隸總督李衛劾鄂爾奇捉拏越控細事濫用部牌庇護私人並壞法營私案制擾民各款命革職交王大臣等會鞫得實加倍治罪得旨鄂爾奇受朕深恩有玷職守大負伊兄鄂爾泰教訓理宜從重治罪朕念鄂爾泰裨益國家政務甚多以之相抵鄂爾奇加倍治罪之處著從寬免十三年卒

張廷玉 弟廷璐廷瑒 子若鷟

張廷玉安徽桐城人大學士英次子康熙三十九年進士改庶吉士四十二年授檢討四十三年命入直南書房尋充日講起居注官四十七年丁母憂尋丁父憂五十一年遷司經局洗馬五十四年遷右庶子尋授侍講學士五十五年擢內閣學士五十六年充經筵講官五十九年授刑部右侍郎六十年二月山東鹽販王美公等糾衆不法巡撫李樹德獲奏命廷玉同都統託賴學士登德往會撫鎮嚴訊分別定罪如例六月調吏部左侍郎六十一年十二月世宗憲皇帝御極命廷玉協同翰林院學士阿克敦勵廷儀等辦事賜一品廕生十二月擢禮部尙書恭纂聖祖仁皇帝實錄充副總裁雍正元年正月入直南書房四月充順天鄉試副

考官五月上嘉廷玉偕正考官朱軾衡文公慎議絃加太子太保七月充明史總裁官八月兼翰林院掌院學士御製詩一章賜之詩曰峻望三台近崇班八座遵棟梁材不忝葵藿志常存大政資經畫訐謔待討論還期作霖雨爲國沛殊恩九月充會試正考官調戶部尙書十月充國史館總裁二年五月充會典總裁尋疏言浙江之衢州江西之廣信贛州等府毘連閩廣無藉之徒流移失業入山種麻搭棚居住號曰棚民歲月既久生息日繁懦者或守本業悍者輒結爲匪近西崖有搶劫之事皆棚民倡首請敕督撫題補廉能州縣曉諭約束編入戶口冊籍若居住未久踪跡莫定者取具五家連環保結稽核毋許遺漏中有膂力技勇及讀書向學之人查明具詳分別考驗錄用庶生聚教訓初無歧視而一時失業之徒不致陷於罪戾亦屬靖地安良之一法下督撫議行八月充會試正考官三年二月充治河方略副總裁七月署理大學士事四年授文淵閣大學士仍兼戶部翰林院事五年晉文華殿大學士六年正月疏言內閣部院奉旨事件俱交起居注登記檔案惟八旗事件向例不交起居注無從記載請自雍正五年始亦照閣部送館以便纂入記注從之三月晉保和殿大學士十月兼署吏部尙書七年晉少保

八年十月諭曰大學士馬爾賽張廷玉蔣廷錫自簡任綸扉以來祇遵朕訓仰體朕心懋著忠勤恪恭奉職今年夏秋之間朕躬偶爾違和馬爾賽張廷玉蔣廷錫贊襄機務公正無私慎重周詳事事妥協數月之中朕躬得以靜養調攝者實伊等翊贊之力也今朕躬已經全愈宜加恩錫以褒良佐以勵臣工著各賞給一等輕車都尉世職仍各加二級其世職或帶於本身或給與伊子聽自便廷玉奏准以長子編修若靄承襲十一年三月條奏慎刑二事一各省人犯罪重收禁罪輕取保獨刑部遇各衙門送犯不論情事大小罪犯首從俱收禁致累無辜請敕議送部人犯分別收禁取保定例遵行一刑部引用律例往往刪去前後文止摘中間數語卽以所斷之罪承之甚有求其彷彿比照定議者高下其手率由此起都察院大理寺同爲法司衙門若刑部引例不確應令院寺駁正不改卽行題參如院寺扶同朦混草率從事一併處分疏入命九卿議行九月諭祭賢良祠大學士張英於本籍准廷玉馳驛回籍舉行典禮賜帑金萬兩爲祠宇祭祀費並賜冠帶衣裘及貂皮人參等物頒內府書籍五十二種於其家十二月廷玉奏言臣行經直隸州縣近河窪地遭水已蒙賑濟其中尙有災重之處積潦未消難以種麥明



歲青黃不接民食倍艱請敕督臣確查加賑一月再查該地方應修工程酌議舉行俾窮民得傭工餬口得旨允行是月會典告成議敘加二級十二年二月廷玉回京上遣內大臣戶部侍郎海望迎勞於盧溝橋頒賜酒膳十三年正月充皇清文穎館總裁八月今上御極命廷玉同莊親王允祿等總理事務九月賞給一等輕車都尉併前世職爲三等子仍以其子若靄襲十月恭纂世宗憲皇帝實錄充總裁官嗣以廷玉所領事多不必兼管翰林院事乾隆元年充纂修玉牒總裁七月充三禮館總裁九月明史告竣議加二級十月命仍兼管翰林院事十一月充經筵講官二年三月充會試正考官三年上將視學以三老五更之禮可行與否詢軍機大臣廷玉奏言伏思三老五更之名始見於禮經蓋古養老尊賢之禮也考養老之禮如王制內則所云則於夏殷周皆然又云五帝三王憲有乞言則伏羲神農黃帝以來已然是其典爲最古至所云食三老五更於太學天子袒而割牲執醬而饋執爵而酌冕而總干是其禮爲最隆我皇上至道在躬式稽前典以三老五更之禮下詢甚盛事也願禮待人行事因時起臣妄臆議以爲未可舉行者約有數端蓋皇上至德淵懷聖不自聖何難屈禮臣下但天子有所施必令臣

下有可受如所云袒而割牲者其始親袒衣割牲以爲俎食也執醬而饋者其繼執醬以饋熟也執爵而酌冕而總干者繼食畢又親執酒以酌口且又端冕舞位而以樂舞侑食也禮如是不已重乎古有斯禮而今未行似非皇上殷殷復古之意如特行此禮度臣下誰敢受者此其難行一也漢宋均曰三老乃老人知天地人之事五更乃老人知五行更代之事者各以一人爲之所謂知天地人之事者蓋上通天文下徹地理中察人倫三者明一亦難矣況兼之乎所謂知五行更代之事者如伏羲以木德王故風姓代之者火也炎帝以火德王故曰炎帝以火紀官代之者土也黃帝以土德王故曰黃帝之類此非洞達天人之際孰能知其所以然者惟其有如是之德是以天子隆以賓師之禮三公九卿皆在執事之列今此禮果行必求其人以當之竊思致仕諸臣及現居職者誰克任之恐皇上卽下明詔而其人必悚惕慙惶而不敢應此事之難行二也考漢以李躬爲三老桓榮爲五更魏以王祥爲三老鄭小同爲五更周武帝以于謹爲三老其時五更無人第未審諸公如前所述之三老五更果克副其名而無愧乎園橋觀聽漢明帝時極盛然先儒胡寅譏桓榮僅能授經章句不知仲尼修身治天下之微旨故所以

輔翼其君者德業不過如是觀先儒之論是桓榮猶不免譏評下此者何足以當  
鉅典三也三老五更之名雖見於樂記祭義文王世子諸篇然不言何代如以爲  
虞夏殷周皆然則二帝三王大經大法載於尙書何二典三謨不見有老更之名  
如以爲惟周有之則保息養老見於司徒獻鳩以養國老見於羅氏以財養死政  
之老見於司門三百六十如是之詳且悉何亦不載有老更之名臣愚以爲養老  
之禮古時典制可稽至所謂三老五更者疑屬漢儒附會此其事未可盡信四也  
是以唐宋至今已千餘載此禮未曾舉行卽本朝世祖聖祖世宗皇帝重道尊師  
明經造士事事度越前古而於老更之禮亦未之及蓋以典至古而禮尤隆名實  
難副倘有幾微未稱不愜觀聽則必滋議論之端豈不褻至尊而羞大典乎此事  
似應停止舉行不必敕下廷議疏入上聽其言尋以總理事務敬慎周詳賞給騎  
都尉由三等子特恩晉三等伯仍令其子若靄承襲四年五月加太保八月充明  
史綱目總裁七年五月吏部則例告成議敘加二級十二月上諭我朝文臣無封  
公侯伯之例大學士張廷玉伯爵係格外加恩伊子不合承襲著帶於本身八年  
七月駕往奉天謁祖陵廷玉留京辦事照扈從王大臣例加一級十月上念廷玉

年逾七十令不必向早入朝遇炎蒸風雪亦不必勉強進內十一年廷玉長子內閣學士若靄病故諭令節哀自愛以廷玉行走內庭需人扶掖命其次子庶吉士若澄在南書房行走十二年二月充會典館總裁京察引見翰林官改列薦一等之吳紱朱荃金牲三員爲二等廷玉保薦不實部議降二級抵銷十三年正月具疏乞休諭曰大學士伯張廷玉年來屢於燕見之次以衰老乞休朕輒宣諭慰留但年齒既高時切軫念前後數頒溫旨令其盛暑祁寒不必勉強赴直隨時量力以資調護每見其精神矍鑠深用愜懷以爲邦家祥瑞昨緣召對復力以年近八旬請得榮歸故鄉情辭懇款至於淚下朕向諭以卿受兩朝厚恩且奉皇考遺命將來配享太廟豈有從祀元臣歸田終老之理而伊昨奏稱宋明配享之臣曾有乞休得請者舉數人爲證且稱七十懸車古之通義又引老子知足不辱知止不殆爲解朕謂不然昔人久處要地恐滋讒謗將致貪戀貽譏勢必迫於殆辱故易云見幾而作不俟終日要豈所論於與國家關休戚視君臣爲一體者哉設令昏耄龍鍾不能事事瘼官曠職於治體有妨亟當避賢路者在朝廷亦不得不聽其引退然昏耄龍鍾者固將神明憤然其於去留已瞶不知使其心尙知覺則日日

同堂聚處之人一旦遠離雖屬朋友尙有不忍況在君臣豈其怱然書曰天壽平格又曰耆壽俊在厥服秦穆霸王尙猷詢茲黃髮使七十必令懸車何以尙有八十杖朝之典卿精采不衰應務周敏不減少壯若必以泉石徜徉高蹈爲適獨不聞武侯鞠躬盡瘁之訓耶若如卿所奏武侯遭時艱難受任軍旅生逢熙洽優游太平未可同日而語朕又謂不然皋夔稷契與龍逢比干所丁之時不同而可信其易地皆然其心同也設皋夔稷契無龍逢比干之心必不能致謨明弼諧之盛龍逢比干無皋夔稷契之心亦必不能成致命遂志之忠遭遇雖殊誠蓋則一夫旣以一身任天下之重則不以艱鉅自諉亦豈得以承平自逸爲君則乾乾不息爲臣則蹇蹇匪躬所謂一息尙存此志不容稍懈朕爲卿思之不獨受皇祖皇考至優至渥之恩不可言去卽以朕十餘年眷待之隆亦不當言去卽令果必當去朕且不忍令卿遽去而卿顧能辭朕去耶卿若恐人議其戀職因有此奏則可若謂人臣義當如此則不可朕嘗謂致仕之說必古人遭逢不偶不得已之苦衷而非士人之盛節爲人臣者斷不可存此心何則朝廷建官命職不惟逸豫惟以治民而人生自少至老爲日幾何且筮仕之年非能自必設令預以此存心必將漠

視一切泛泛如秦越人之相視年至則奉身以退耳誰復出力爲國家圖庶務者此所繫於國體官方人心世道者甚大我朝待大臣恩禮篤至而不忍輕令辭職大臣苟非癯老有疾不輕陳請恐不知者反議其貪位戀職而謂國家不能優老全其令名是不可以不辨故因大學士張廷玉之請舉朕所往復曉譬者布告有列其所陳既未允行重違其意所有吏部事務不必兼理俾從容內直以綏眉壽十四年正月復諭曰大學士伯張廷玉三朝舊臣襄贊宣猷敬慎夙著朕屢加曲體降旨令其不必向早入朝而大學士日直內廷寒暑罔間今年幾八袞於承旨時朕見其容貌少覺清減深爲不忍夫以尊彝重器先代所傳尙當珍惜愛護況大學士自皇考時倚任綸扉歷有年所朕御極以來弼亮寅工久遠一致實乃勤勞宣力之大臣福履所綏允爲國家祥瑞但恭奉遺詔配享太廟予告歸里誼所不可考之史冊如宋文彥博十日一至都堂議事節勞優老古有成模大學士紹休世緒生長京邸今子孫繞膝良足娛情原不必以林泉爲樂也著於四五日一入內廷以備顧問城內郊外皆有賜第可隨意安居從容几杖頤養天和長承渥澤副朕眷待耆俊之意且令中外大臣共知國家優崇元老恩禮兼隆而臣子無

可已之日自應鞠躬盡瘁以承受殊恩俾有所勸勉亦知安心盡職御製詩一章以勸有位詩曰職曰天職位天位君臣同是任勞人休哉元老勤宣久允矣予心體恤頻潞國十朝事堪例汾陽廿四考非倫勗茲百爾應知勸莫羨東門祖道輪十一月上以廷玉年老不能復兼監修總裁之任以大學士傅恆代之諭曰大學士勤宣伯張廷玉先朝耆舊宣力有年光輔端揆幾三十載上年陳情請告朕以其精神不衰尙可從容襄贊皤皤黃髮領袖班行當以匪躬之節爲羣臣先詎可愬然動林泉之興是以未允所請復申明大義布告在廷自是而大學士弗復以此爲言蓋亦深知於義有所不可也乃自今年秋冬以來精采矍鑠視前大減蓋人至高年閱歲經時輒非曩比每召見之頃細加體察良用惻然朕思鞠躬盡瘁固臣子致身之誼而引年尙齒亦聖人安老之仁在爲臣者預存一奉身而退之念則將匪國是恤惟身是圖始而營心干進則策勵奉公迨志願滿而榮寵備則乞身強健樂志林泉舉若是其工於自謀國家將何賴焉此在三之誼矢以畢生實分所固然也然自爲君者視之則壯用其力老息其勞使臣以禮事君以忠斯爲各盡其道朕之前旨乃謂人臣不當存此心大學士尤不當存此心初非欲著

爲成例卽至年邁力衰不能任職必不欲令其歸榮故里也昨召對尙書梁詩正偶論及此事梁詩正奏云故鄉爲祖先墳墓所在桑榆暮景之人依戀彌篤此言雖屬宛轉亦於情理未協蓋離鄉遠宦者早已不能歲時瞻掃豈待遲暮方知設當榮寵少壯或五六十時溘先朝露又將奈何梁詩正亦無辭以對第朕旣體察及此安能無動於懷惟是大學士在皇祖時直內廷陟卿貳皇考復加柄用榮冠臣僚朕在書齋卽所敬禮御極至今眷倚隆重夫座右鼎彝古器尙欲久陳几席何況廟堂元老誼切股肱然親見其老態日增強留轉似不情而去之一字實又不忍出諸口用是躊躇者久之旣而念大學士養疴暫告已屢賜醫存問因令軍機大臣等同往省視傳朕諭旨大學士感激涕零謂受恩至深無可圖報何敢以孱軀動履日煩軫念因遵前旨不敢自陳仰蒙體恤實出望外請得暫辭闕廷於後年江寧迎駕大學士旣陳奏懇款如此應加恩遂其初願示朕優老眷舊恩禮始終之意著准以原官致仕伯爵非職任官可比仍著帶於本身俟來春冰泮舟行旋里屆期朕當另頒恩諭南巡時卽可相見至朕五十正壽大學士亦將九十輕舟北來扶鳩入覲誠堂廉盛事不亦休歟御製詩二章賜廷玉詩曰早懷高義



慕懸車異數優留爲弼予近覺筇鳩難步履得教琴鶴返林閭銀毫無奈吟輕別  
赤芾還看賦遂初擬問蘭陵二疏傳可曾廿四考中書兩朝綸閣謹無過況復芸  
窗借琢磨此日蘭舟歸意定一時翰苑悵思多善娛鄉黨銷閒晝穩趁帆風送去  
波南國詩人應面晤爲詢食履近如何坐論朝夕久勤宣間別何能獨愜然同事  
當年今幾在得餘碩果又言旋江湖卿樂眞饒後廊廟吾憂詎忘先指日翠華臨  
幸處歡顏前席問農田又諭吏部大學士休致員缺俟廷玉登舟南還後再行請  
旨時廷玉請面見奏言前蒙世宗憲皇帝逾格隆恩遺命配享太廟上年有從祀  
元臣不宜歸田終老之諭恐身後不得蒙榮外間亦有此議論免冠叩首請上一  
辭以爲券上特頒諭旨並賜詩以安其心詩曰造膝陳情乞一辭動予矜惻動予  
悲先皇遺詔惟欽此去國餘思或過之可例青田原侑廟漫愁鄭國竟摧碑吾非  
堯舜誰舉契汗簡評論且聽伊廷玉具摺謝恩遣子若澄代奏上以其不親至傳  
旨令廷玉明白回奏次日廷玉早至上以軍機處必有泄漏者諭曰朕許大學士  
張廷玉原官致仕且允配享太廟之請乃張廷玉具摺謝恩詞稱泥首闕廷並不  
親至第令伊子張若澄代奏因命軍機大臣傳寫諭旨令其明白回奏而今日黎

明張廷玉卽來內廷此必軍機處泄漏消息之故不然今日旣可來何以昨日不來此不待問而可知者矣夫配享太廟乃張廷玉畢世之恩豈尋常錫賚加一官晉一秩可比不特張廷玉歿身銜恩其子孫皆當世世銜恩伊近在京邸卽使衰病不堪亦當匍匐申謝乃陳情則奏請面見而謝恩則竟不親赴闕廷視此莫大之恩一若伊分所應得有此理乎朕昨賦詩命翰林和韻獻諛者或擬以皋夔比以伊周夫皋夔尙可也伊周則不可也朕詩自有分寸謂兩朝綸閣謹無過不爲溢美之詞亦尙其實長也若因此而稱心滿意則並其夙所具之謹且忘之而不謹矣夫可例青田原侑廟者劉基以休致之臣而得配享曾有此例故事在可許伊試自思果能仰企劉基乎張廷玉立朝數十年身居極品受三朝厚恩而當此桑榆晚景輾轉圖維惟知自便未得歸則求歸自逸旣得歸則求配享叨榮及兩願俱遂則又視若固有意謂朕言旣出自無反汗已足滿其素願而此後更無可觀之恩亦無復加之罪遂可愬然置君臣大義於不問耳朕前旨原謂配享大臣不當歸田終老今朕憐其老而賜之歸是乃特恩也旣賜歸而又曲從伊請許其配享是特恩外之特恩也乃在朕則有請必從而彼則恬不知感則朕又何爲屢

加此格外之恩且又何以示在朝之羣臣也試問其願歸老乎願承受配享乎令其明白回奏昨朕命寫諭旨時大學士傅恆及汪由敦二人承旨而汪由敦免冠叩首奏稱張廷玉蒙聖恩曲加體恤終始矜全若明發諭旨則張廷玉罪將無可道此已見師生捨身相爲之私情及觀今日張廷玉之早來則其情顯然朕爲天下主而令在廷大臣因師生而成門戶在朝則倚恃眷注事事要被恩典及去位而又有得意門生留星替月此可姑容乎夫君子絕交不出惡聲朕昨令寫諭旨意尙遲回不欲遽發及觀張廷玉今日之來且來較向日獨早謂非先得信息其將誰欺若將二人革職交王大臣等質訊未有不明者但朕旣曲成其終張廷玉縱忍負朕朕不忍負張廷玉然軍機重地乃顧師生而不顧公義身爲大臣豈應出此朕嘗謂大臣承受恩典非可濫邀若居心稍有不實則得罪於天地鬼神必致敗露張廷玉一生蒙被異數即使詐僞亦可謂始終能保乃至將去之時加恩愈重而其所行有出於情理之外雖欲曲爲包容於理有所不可豈非居心不實之明效大驗耶天道之顯著如此爲人臣者其可不知所儆惕乎可不知所改悔乎廷玉以並未得信覆奏諭曰張廷玉明白回奏摺內稱十三日實因心恐謝恩

稽遲急欲趨闕泥首是以向早入朝並未先得信息等語張廷玉之早來必因先得信息伊向來謝恩不一而足並未早來何以是日來之獨早若謂並未得信而次日早來即可掩先日不來之過此所爲與兒童何異豈久經事理之老大臣而宜出此如果因風寒嚴切步履不前則次日何嘗不寒且何難於謝恩摺內聲明或張若澄遞摺時向奏事人口奏乃並不及此其回奏摺內於先得信息之處亦不承認是日承旨係傅恆汪由敦二人以二人並論則非汪由敦而誰卽萬有一分非汪由敦送信亦必司員中書等有人送信張廷玉在軍機處年久伊等皆其屬員此尙情理所有之事若降旨革職嚴訊未有不水落石出者但朕自卽位以來卽假借包容張廷玉至此矣何值因此遽興大獄然若迫於不得不辨則朕非可朦混了事者且張廷玉摺內於汪由敦不涉一字明係避重就輕朕加恩於張廷玉至深至厚卽近日之恩諭稠疊本欲保全終始寧於將去之時而顯暴其罪不爲包容但實有不得不然者蓋張廷玉與史貽直素不相合史貽直久曾於朕前奏張廷玉將來不應配享太廟在史貽直本不應如此陳奏而彼時朕卽不聽其言也張廷玉奏請面見時稱外人亦有議其將來不得配享者朕問謂誰卽明

指史貽直所言及問以大學士員缺卽奏稱汪由敦現在暫署將來卽可辦理其  
意謂在朝旣與史貽直夙有嫌隙今經休致則史貽直獨在閣中恐於伊未便故  
援引一素日相好之門生則身雖去而與在朝無異此等伎倆可施之朕前乎試  
思大學士何官而可徇私援引乎更思朕何如主而容大臣等植黨樹私乎史貽  
直卽與張廷玉不協又何能在朕前加之傾陷若因張廷玉旣去卽自矜得意是  
亦自取罪戾耳大臣等分門別戶衣鉢相傳此豈盛世所有之事我大清朝乾綱  
坐攬朕臨御至今十有四年事無大小何一不出自朕衷獨斷卽月選一縣令未  
有不詳加甄別者寧有大學士一官而不慎重詳審聽其援置私人乎其薦汪由  
敦非以愛之而實害之也張廷玉旣以衰老致仕朕何難曲示包容而正不然伊  
等有此隱伏形情若不明白宣示則伊等不知朕保全之深恩而直謂朕墜諸臣  
術中而不覺傳之史冊知者謂朕委曲包涵不知者謂朕爲何如主朕甘受此耶  
仍令張廷玉一一明白回奏廷玉覆奏言臣福薄神迷事皆錯謬致干嚴譴請交  
部嚴加議處得旨大學士九卿議奏尋議廷玉負恩植黨罪莫可道除配享盛典  
不應濫邀無庸置議外應革退大學士職銜並削去伯爵不准回籍留京待罪諭

曰大學士九卿所議固屬公論僉同然未喻朕始終加恩之意所議猶有未協夫張廷玉之罪固在於不親至謝恩而尤在於面請配享其面請之故則由於信朕不及此其所由得罪於天地鬼神也然朕念張廷玉爲耆舊大臣蒙皇考隆恩異數優渥逾涯自朕臨御以來加意矜全曲爲體恤卽今此許令原官致仕許令配享廟廷前後所降諭旨及御製詩篇其眷待之優崇中外大臣具所備悉本欲保其晚節以成全美今乃自甘暴棄實非思慮所及料假令朕意稍有勉強則進退予奪惟朕所命何難不許其予告其面請配享亦何難卻之不從且又何能逆料其不親來謝恩而故加此種種格外之恩以爲陷於有罪之地耶乃謝恩不來次日又來俱令人不解是豈非得罪於天地鬼神有莫之爲而爲者使之自爲敗露以爲在朝大小臣工之戒耶夫配享乃恭奉皇考遺詔朕何忍違觀其汲汲面請惟恐不得之意直由信朕不及故耳張廷玉事朕十有四年朕待羣臣事事推心置腹而伊轉不能信忍爲要挾之求觀其如此居心其有不得罪於天地鬼神者耶且配享大典千秋萬世自有公論得所當得則爲歿世之榮苟其過分叨恩徒足供人指摘何榮之有試思太廟配享皆佐命元勳張廷玉有何功績勳猷而與

之比肩乎鄂爾泰尙有經度苗疆成績而張廷玉所長不過勤慎自將傳寫諭旨  
朕詩所謂兩朝綸閣謹無過耳而覲然濫膺俎豆設令冥冥有知踧踖惶悚而不  
能一日安矣此在朕平心論之張廷玉實不當配享太廟其配享實爲過分而竟  
不自量度以此冒昧自請有是理乎及其老也戒之在得豈有展轉思維惟知自  
私自利不惟欲得之生前而且欲得之身後不亦昧於大義乎若但如大學士九  
卿所議不准配享而革去大學士勤宣伯令其在京待罪不知者將謂朕不許其  
歸里侑廟而始則謬加之恩終則抵之罪矣朕不云乎張廷玉忍於負朕朕不忍  
負張廷玉朕之許張廷玉予告原係優老特恩明諭甫降朕不食言其大學士由  
皇考時簡用至今二十餘年朕亦不忍加之削奪配享恭奉皇考遺詔朕終不忍  
罷斥至於伯爵則朕所特加今彼既不知朕而朕仍令帶歸田里且將來或又貪  
得無厭以致求予其子者皆所必有朕亦何能曲從至是著削去伯爵以大學士  
原銜休致身後仍准配享太廟夫以年老予休之大臣志滿意得自恃其必不加  
罪譴遂至求所不當求而忽其所不當忽必至入於罪戾而後已神明之昭鑒可  
畏如此大小臣工其可不以此爲戒乎十五年二月諭曰大學士張廷玉前因朕

念其年老許令致仕回籍仍准配享太廟屢沛莫大之恩而伊並不知感謝恩竟不親至本應如大學士九卿等所議治罪朕以耆舊老臣不忍加之罪譴僅削去伯爵仍以大學士休致邇來詳加體察實乃龍鍾昏憤力不能支當時聞命之下精神短淺或心思實有未到而非出於恃恩疏節亦未可知且朕從前降旨乃使爲臣子者曉然於事君之大義亦不爲張廷玉一人而發之也不然伊身已退矣朕之加恩保全已將畢乃生矣豈尙慮其敗官箴而妨政事而不爲之格外優容乎今中外臣工已具知大義之所在張廷玉綸閣舊臣宣力年久今日陛辭之際顧其衰老朕心尙爲憫惻所爲善善欲長惡惡欲短茲仍特加異數以寵其行賜給御製詩篇手書二卷御用冠服數珠如意諸物起程之日仍令散秩大臣領侍衛十員往送用示朕優老舊臣之至意時皇長子定親王薨甫過初祭廷玉卽奏請南歸上因閱配享諸臣名單諭曰侍郎管太常寺事伍齡安因額駙超勇襄親王策凌配享太廟位次開單條列具奏朕已另降諭旨辦理因詳閱配享諸臣名單其中如費英東額亦都諸臣皆佐命元勳汗馬百戰功在旗常是以侑享太烝俎豆至於今不替卽大學士鄂爾泰已覺過優以此並論益見張廷玉之不當配



享其配享實爲逾分在鄂爾泰尙有開闢苗疆平定烏蒙及經略邊陲勞績攸著若張廷玉在皇考時僅以繕寫諭旨爲職此爛於筆墨者所優爲自朕御極十五年來伊則不過旅進旅退毫無建白毫無贊襄朕之姑容不過因其歷任有年如鼎彝古器陳設座右而已夫在昇平日久固無櫛風沐雨躬冒矢石之事可以自見然亦必以德業猷爲有功社稷方足以當之無愧張廷玉曾有是乎上年朕許伊休致回籍伊卽請面見奏請恐身後不獲蒙配享之典要朕一言爲券朕以皇考遺詔已定伊又無大過何忍反汗故特允其請並賜詩爲券夫其汲汲如此者直由於信朕不及卽此居心已不可以對天地鬼神矣又何可冒膺侑食之大典乎及其謝恩並不躬親經廷臣議處朕仍加恩寬留原職並仍准其配享且於陛辭之日賜賚優渥並令於起身時仍派大臣侍衛往送伊遂心滿意足急思旋里適遇定親王皇長子之喪甫過初祭卽奏請南還試思伊曾侍朕講讀又曾爲定親王師傅而乃漠然無情一至於此是爲尙有人心者乎在大臣年老或患病不能任事如徐本任蘭枝楊汝穀等何嘗不准其回籍若張廷玉則不獨任以股肱亦且寄以心膂尤非諸臣可比朕從前不卽令其回籍者實朕之以股肱心膂視

之逾於常格之恩而伊轉以此怏怏及至許其原官致仕許其配享則此外更無可希冀無可留戀惟以歸田爲得計矣前於養心殿召對奏稱太廟配享一節臣卽赴湯蹈火亦所甘心夫以一己之事則甘於赴蹈而君父之深恩厚誼則一切置之不顧有是情理乎使皇考尙在御見張廷玉今日之行爲亦將收回成命則朕今日不得不明頒諭旨以勵臣節張廷玉非但得罪於朕抑且得罪皇考在天之靈矣且朕賜詩所謂可例青田原侑廟漫愁鄭國竟摧碑云者劉基在明原係從龍之佐有帷幄之功而當時配享尙不免訾議今張廷玉自問果較劉基何若乎至魏徵撲碑事在身後今張廷玉現在更不待身後始有定論朕前加恩降旨仍准其配享臺垣諸臣卽應力陳其不當濫廁元勳之列而乃噤無一語御史非無人卽有所觀望耳配享一節天下自有公論張廷玉亦當有自知之明今及其未至身後也正可折中定論朕豈肯爲唐太宗所爲卽著將此旨並配享諸臣名單令其閱看自加忖量能否與本朝配享諸臣比肩並列應配享不應配享自行具摺回奏到日令大學士九卿等定議具奏廷玉覆奏言臣老耄神昏不自度量於太廟配享大典妄行陳奏皇上詳加訓示如夢方覺惶懼難安復蒙示配享諸

臣名單臣捧誦再三慚悚無地念臣旣無開疆汗馬之功又無經國贊襄之益縱身後忝邀俎豆死而有知益當增愧況臣年衰識愆愆咎日滋世宗憲皇帝在天之靈鑒臣如此負恩必加嚴譴豈容更侍廟廷敢懇明示廷臣罷臣配享並治臣罪庶大典不致濫邀臣亦得安愚分得旨大學士九卿議奏尋議謹按禮經王功曰勲國功曰功民功曰庸事功曰勞治功曰力戰功曰多揆張廷玉平生律以六等無一可據張廷玉於配享大典不宜濫邀應請停罷再廷玉種種罪戾蒙皇上格外寬宥仍許原官歸里乃竟漠不知感急欲言旋圖一己歸逸忘君父隆恩罪實無可再道應請仍革去大學士職銜以爲大臣負恩者戒諭曰張廷玉配享太廟一節朕之本意並無令其停罷之見二三年前大學士史貽直曾於面見時議及配享大典張廷玉不當濫邀朕知伊二人素不相協且漢人中有配享大臣亦足爲臣工之勸是以未經允行及上年許令張廷玉致仕伊卽奏請而見汲汲以配享爲請求一言爲券朕卽允其請及其謝恩不至經大學士九卿議停其配享朕以皇考成命早頒仍曲示保全未允廷議在張廷玉卽不知朕心信朕不及而朕之始終加恩不欲停罷配享初未嘗有絲毫成見已可共白矣乃張廷玉受千

載難遇之恩而毫不知感覲然自居老臣朕西巡時伊隨衆送駕乃加恩免罪後初次見朕也伊亦未曾叩首道旁且毫無惶悚之意仍在皇城內與留京總理王大臣同列海子接駕亦是皆衆人所共見者及陛辭之日朕仍賜令召見意以伊老臣去國自必有嘉謨讜論規益朕躬合於臨別贈言之義而無一語及於國家政事古人居江湖而憂廊廟者固如是乎且奏稱去冬謝恩不至曾令伊子將緣由告知奏事太監未爲轉奏近日奏事太監有敢以大臣陳奏之言壅蔽遺漏而不爲轉奏者乎皇考臨御以至朕躬能容此等奏事太監乎此在外人或未盡知張廷玉在軍機處行走數十年寧不知之而欲以此委過於不足比數之小臣大臣居心豈當出此乎及遇皇長子之喪甫過初祭卽奏回南於君臣大義及平日師傅恩誼愬然不以動心其意不過以志願已遂更無可圖惟以歸榮故里爲急人臣如此存心於國家無幾微繫屬依戀國家安賴有此臣也夫遭皇長子之喪迫不及待欲歸故里在張廷玉則爲悖於大義在朕視之仍屬小節朕非因小節而督責去位之臣然於小節如此又安望其臨大事而能竭力致身乎在張廷玉老邁歸田豈更望其出力而我大清國億萬斯年君臣一體休戚相維之誼所

關甚大不可不剴切明示以正名教之大閑且張廷玉去志本不始於今日當在  
訥親時伊卽屢在伊前愆愆代奏訥親不敢明爲奏請而時時流露其意彼時張  
廷玉尙未龍鍾豈一二年亦不能待而營營思退者蓋自揣志不能逞門生親戚  
之素相厚者不能遂其推薦扶植之私所積貲產又已足贍身家是以伊十餘年  
來僅以旅進旅退容默保位爲得計及一一獲滿所願輒圖遠引朕向之曲示優  
容者則以皇考所貽卽古器亦加珍惜何況舊臣然亦以其原無大過耳今旣獲  
戾種種實乃得罪皇考無可復加原宥適因伍齡安之奏閱配享功臣名單益見  
其不可濫邀是乃天理昭彰不容倖竊非分朕雖欲屈公議以全初念亦有所不  
能也況配享大典不但酬庸實以示勸在朕初無成心鄂爾泰張廷玉同奉配享  
之詔鄂爾泰在生時朕屢降旨訓飭較之張廷玉尙爲嚴切此亦在廷所共知者  
然以其大節不虧終始克全自應叨榮勿替而張廷玉居心行事如此若仍令濫  
膺侑食誠不足以服公論不足爲天下後世臣工之勸卽朕亦何以仰對皇考在  
天之靈著照大學士九卿所議罷其配享至朕於張廷玉已格外加恩所議革去  
大學士職銜之處仍著寬免先是御史儲麟趾參奏四川學政朱荃匿喪趕考八

月諭曰朱荃在四川學政任內匿喪趕考賄賣生員並勒索新生規禮賊私累累實近年來學政所未有伊乃大學士張廷玉兒女親家其敢於如此狼籍婪贓明係倚恃張廷玉爲之庇護且查朱荃爲大逆呂留良嚴鴻逵案內之人倖邀寬典後復夤緣薦舉冒玷清華本屬衣冠敗類大學士張廷玉以兩朝元老嚴鴻逵之案繕寫諭旨皆出其手豈不知其人乃公然與爲姻親是誠何心在雍正年間伊必不敢如此卽在伊平日謹守遠禍之道亦不當出此而漫無忌憚至於如此其負皇考聖恩爲何如其藐視朕躬爲何如張廷玉若尙在任朕必將伊革去大學士交刑部嚴審治罪今既經准其回籍著交兩江總督黃廷桂於司道大員內派員前往傳旨詢問令其速行明白回奏再降諭旨張廷玉深負三朝眷注之恩卽其不得行私而欲歸之一念已得罪天地鬼神朕尙欲全其晚節今乃種種敗露豈容冒叨寵賚所有歷來承受恩賜御筆書籍及尋常賞賚物件俱著追繳時命內務府總管德保往查德保併廷玉家產查辦上以所辦錯誤命給還其家產以蠶池口住房爲聖祖仁皇帝賜原任大學士張英仍聽其子孫居住收回護國寺官房廷玉覆奏言臣負罪滋深天褫其魄行事顛倒自與朱荃結親以至今日如

在夢昧之中並無知覺今伏讀上諭如夢方醒恐懼驚惶愧悔欲死復有何言乞將臣嚴加治罪得旨該部嚴察議奏吏部議革去職銜交刑部定議以爲負恩玩法者戒諭曰張廷玉身荷三朝厚恩罕有倫比且膺配享太廟之曠典宜何如感激報效以盡匪懈之誼卽年已衰憊亦當依戀闕廷鞠躬盡瘁不忍言去乃伊平時則容默保位及其既耄不得復行己私但思歸榮鄉里於君臣大義遂愒然置之不問以如此存心不惟得罪於朕並得罪於皇考是以天地鬼神顯奪其魄俾一生居心行事至此盡行敗露情罪實屬重大卽褫其官爵加以嚴譴亦不爲過至黨援門生及與呂留良案內之朱荃聯爲兒女姻親之罪在伊反爲其小焉者矣旣經罰鍰且令追繳恩賜物件已足示懲若又如該部所議革職治罪在張廷玉忍於負朕自所應得而朕心仍有所不忍著從寬免其革職治罪以示朕始終矜宥之意二十年三月卒遺疏入諭曰致仕大學士張廷玉歷事三朝宣力年久勤勞夙著受恩最深前以其年屆八旬精神衰憊特加體恤准令退休實朕優念老臣本懷至於配享太廟一事係奉皇考世宗憲皇帝遺詔遵行而恩禮攸隆則非爲臣子者可以要請及朕賜詩爲券又不親赴宮門謝恩自不得不示以薄譴

用申大義今張廷玉患病溘逝要請之愆雖由自取皇考之命朕何忍違且張廷玉在皇考時勤慎贊襄小心書諭原屬舊臣宜加優卹應仍謹遵遺詔配享太廟以彰我國家酬獎勤勞之盛典尋賜祭葬如例謚文和四十四年御製懷舊詩列諸五閣臣中詩曰風度如九齡祿位兼韋平承家有厚德際主爲名卿不茹還不吐既哲亦既明述旨信無二萬言頃刻成繕皇祖實錄記注能盡誠以此蒙恩眷顧命配享行及予之莅政倚任原非輕時時有贊襄休哉國之楨懸車迴故里乞言定後榮斯乃不信吾此念詎宜萌臧武仲以防要君聖所評薄懲理固當以示臣道貞後原與配食遺訓敢或更求享彼過昭仍享吾意精斯人而有知猶應感九京五十年御題廷玉三老五更議曰戊戌年爲三老五更說亦既闢其躋駁而勒之新建辟雍之碑矣今秋駐避暑山莊檢讀四庫全書內文穎集中有三老五更議之篇而挂漏其名因命檢文津閣之書乃知爲張廷玉所撰憬然憶之事在乾隆戊午爲二十七月既闕諸禮畢舉之時於視學之前曾向軍機大臣等談及三老五更而諮其可行與否彼時鄂爾泰依違其間張廷玉則斷以爲不可於是奏此議而遂寢其說蓋鄂爾泰固好虛譽而近於驕者張廷玉則善自謹而近於



儒者且二人彼時皆可望登此席者也以今觀之則廷玉之議爲當設爾時勉強行之必有如廷玉所謂滋後人之議者矣若朕戊戌之所爲三老五更說戊戌去戊午歷四十年其事早已忘之蓋戊午朕方二十八歲而戊戌則六十有八此亦足驗四十年間學問識見之效而年少時猶未免有好名泥古之意至今則灑然矣茲觀廷玉之議與朕之說不約而同樹之前旌焉因命並勒辟雍碑以識己學之淺深及弗掩人之善也夫廷玉既有此卓識何未見及朕之必不動於浮言遵皇考遺旨令彼配享太廟而臨休致歸里時乃有求入廟之請此所謂老衰而戒之在得乎朕又以廷玉之戒爲戒且爲廷玉惜之廷玉弟廷璐康熙五十七年一甲二名進士授編修雍正元年正月充福建鄉試正考官尋遷右中允充日講起居注官五月擢侍講學士提督河南學政二年九月以封邱縣生員罷考事革職尋授侍講三年擢國子監祭酒疏請敕將軍提鎮轉飭所屬將弁每朔望齊集兵丁宣講聖諭廣訓下部議行尋遷少詹事十月充武會試正考官五年遷詹事七年提督江蘇學政八年四月疏言向例學政衙門發各州縣循環簿遇生員告狀作證者填註按季繳換以憑查考而州縣往往視爲具文且簿內但言詞訟不及

錢糧應飭各學將文武生員及貢監造簿送學鈐印發回各州縣於理事時生監令本人於簿內姓名下親書年月爲某事到案並著花押至應納錢糧若干已完若干一併註明申送則詞訟多寡錢糧清欠按簿瞭然庶優劣易定而勸懲可施矣部議從之十年六月充浙江鄉試正考官十月學政任滿命留任十一年六月擢禮部右侍郎十三年十月命仍留江蘇學政任乾隆元年諭祭大學士張英於本籍命廷璐就任所回里舉襄典禮四年九月充武會試副考官六年充江西鄉試正考官九年四月自陳年老詔以原品休致十年八月卒廷瑒雍正元年進士改庶吉士授編修六年充日講起居注官九年遷左贊善十年遷侍讀尋擢侍講學士十一年疏陳嚴禁賭具責成同居父兄伯叔互相覺察容隱者照竊盜同居例治罪出首者除不連坐外本犯罪准酌減得旨嘉獎交部議敘又陳各部院摺奏奉旨准行後將原摺并諭旨錄送內閣俾得按年查閱各部院書吏不能漏誤檔案亦無闕略下部議行尋轉侍讀學士十二年遷詹事擢工部右侍郎十三年十月恭纂世宗憲皇帝實錄充副總裁乾隆元年充會試副考官三年命辦理福陵隄工事四年正月轉左侍郎七月以工竣議敘加二級五年提督江蘇學政九

年五月調補內閣學士六月充江西鄉試正考官十一年以病乞休命回籍調理二十九年卒廷玉長子若靄雍正十一年進士廷試卷進呈諭曰諸臣進呈殿試卷朕閱至第五本字畫端楷策內公忠體國一條語極懇摯頗得古大臣之風因拔置一甲三名諸臣皆稱允當及拆號乃大學士張廷玉之子張若靄朕心深爲嘉悅蓋大臣子弟能知忠君愛國之心異日必能爲國家抒誠宣力大學士張英立朝數十年清忠和厚終始不渝張廷玉朝夕在朕左右勤勞翊贊時時以堯舜期朕朕亦以皋夔期之張若靄稟承家教兼之世德所鍾故能若此非獨家瑞亦國之慶也因遣人往諭張廷玉使知朕實出至公非以大臣之子有意甄拔乃張廷玉再三懇辭情詞懇至朕不得不勉從其請著將張若靄改爲二甲一名以表大臣謙謹之誠併昭國家制科盛事五月授若靄爲編修十三年六月充日講起居注官九月入直南書房乾隆二年遷侍講學士尋丁母憂服闋補原官八年三月遷通政司右通政七月遷光祿寺卿十月擢內閣學士十一年上西巡若靄扈從以病回京卒諭曰內閣學士張若靄在內廷行走十餘年小心勤慎能恪遵伊父大學士張廷玉家訓深望其將來尙有可成今秋扈從於途次患

病隨遣御醫調治且令先回冀得痊可以慰伊老父之心不意遽聞溘逝深爲憫惻伊從前曾襲伯爵因與定例未符是以令在本任供職今著加恩照伯爵品級賞銀一千兩料理喪儀賜祭一次次子若澄乾隆十年進士改庶吉士命在南書房行走十二年授編修累遷至內閣學士三十五年卒少子若淳現官內閣學士

楊名時

楊名時江南江陰人康熙三十年進士改庶吉士三十三年授檢討三十九年充日講起居注官四十一年正月提督順天學政十一月遷侍讀四十二年十二月上西巡肥鄉縣武生李正朝病狂衝突儀仗直隸巡撫李光地奏請治罪因劾名時濫取狂生請敕部議處得旨楊名時自督學以來賦性乖異縱有精於學業工於文章者但係殷實之人必不錄取其無產赤貧雖不能文或記誦數語亦得進學理應從重治罪現今年歲未滿又無賄賣生員之事從寬恕宥四十四年差滿奉旨著往河工效力繼丁父母憂五十一年服闋候補五十三年正月命入南書房行走六月充陝西鄉試正考官五十六年授直隸巡道五十八年遷貴州布政司五十九年擢雲南巡撫六十一年疏言滇省兵糧歲需十四萬九千餘石俱於

就地支放但駐兵衆寡不同徵米多少亦異其本處額米不足者撥別州縣米供用而舟楫不通輓運維艱雖有四年折徵一次之例然不折之年仍苦遠運請將兵多米少之雲南昆明等十六府州縣及劍川州駐劄兵米每年酌給本色三季折色一季統計折色米三萬一百五十石有奇應照時價預借庫銀放給於兵少米多解運最遠之祿豐等十二州縣額徵秋米內照數折徵還庫停四年折徵之例部議如所請行雍正元年二月奏請聖安得旨爾向日居官歷任有聲朕所稔悉自茲益當加勉莫移初志七月疏言雲南巡撫一切規禮臣一無所收所有鹽規五萬二千兩除留爲恤竈修井用外尙餘四萬六千兩爲臣供用累年供應在藏官兵軍需賞賚及公私所用皆取諸此又銀廠缺課每年約二三萬兩廠員視爲畏途臣曾將所得鹽規撥補銀廠缺課並捐賠前任督撫運糧倒斃牛馬等項各奏明在案臣有請者若藏兵旣撤費用簡省乞將鹽規准留若干與臣衙門充用其餘以供公用得旨督撫羨餘豈可限以科則取所當取用所當用固不可賒削以害民亦不必矯激以沽譽若一切公用犒賞之需至於拮据殊失封疆之體全在爾等揆情度理而行之可無煩章奏叟叟也二年八月疏言滇省白井河邊

出沙滷餘鹽每年可收百萬斤向係分地行銷今所收日增仍須分行查開化一府生聚日繁兼有鎮兵駐劄額鹽不敷且去白井遠幾千里應將易門縣原銷阿陋井鹽撥歸開化府添銷易門縣就近改食白井多出之鹽仍照原價每百斤一兩六錢一轉移間國課民食均有裨益又雲南專設提舉司三員除事簡之缺不議外其黑白二井甚關緊要缺出應揀選保題至彌沙阿陋二井離省遙遠井口較多大使亦應酌量揀調再各井俱有龍神廟昔年吳逆在滇滷水變淡彼雖加封杳然罔驗今則龍神效靈滷脈洋溢而神號尙仍吳逆舊封大非體統請將新舊各井龍神俱加敕封字樣以肅觀瞻並下部議行十月疏言鎮沅威遠地方有抱母按板鹽井前經奏明委員調劑煎辦此外尙有恩耕等井滷水與內地相同招撫竈戶煎辦於元江順寧等處行銷數月來獲息銀五千餘兩暫爲各地方修理等項之需俟定有成規另冊報銷再查黑白等井價俱公平惟琅安二井滷淡薪貴鹽價高昂應爲酌減卽以新開麗江土井餘息抵補毋庸再動別項其抱母按板等井每年所獲息銀二萬餘兩足供新設威遠地方文武井官並茶山一帶官兵俸餉毋庸動正項錢糧至琅安二井額銷鹽不敷民食仍須調劑查石屏州

路近威遠應就近額銷按板抱母等井之鹽其原銷鹽歸併琅安行鹽各屬分銷則琅安鹽無缺乏而土井亦可疏銷至各井起課統於雍正三年爲始又疏言滇省收貯米穀有捐納捐輸二項捐納監穀貯各處常平倉爲備貯之需捐輸之穀係遞年各官倡捐士民量輸附貯常平倉動給孤貧口糧因係報部之項民間猝有緩急不得擅動須題請支發滇省道遠往返動須數月無濟於事今酌議除前經報部之穀併以後常平例捐監穀仍貯官倉外今自雍正二年始請將捐輸穀其輸官者改行社倉便民之法各貯本里擇里中老成人專司其事地方官祇司監察不得挪移勒借每歲青黃不接時量行借貸秋收還倉歲豐則微取其息中歲則免收其息遇歉則報明地方官立即發賑凜遵諭旨隨民之便不必報部令糧道司其數目每年積貯若干題達一次事下部議均如所請行十二月疏言雲南民多無寸椽尺土而冊載丁名至有一人而當十餘丁者累代相仍名曰子孫丁雖老病故絕編審時從不除減貧人轉賣田產丁銀仍留本戶延累無休請將通省名丁額銀照直隸之例攤入田糧完納俾丁從糧辦均其偏累至於軍丁又與民丁不同其完額自二錢八分起有重至六錢二分難照民丁一概均攤查從

前平吳逆後尙有影射田土令逐一清出將軍丁最重者量加攤除使軍戶稍輕易於完納嗣後不拘年分漸次抵補又民間田產有因吳逆賦重差煩情願退吐與人者有沿湖窪地荒蕪賠糧情願不受價值與人者今見糧有定額荒已墾熟告找告贖爭控不休應通飭永禁又雲南府屬舊有三泊縣康熙八年併入昆陽州但僻處萬山中民俗刁悍去州遠至二百餘里鞭長莫及請改歸相近之安寧州勢方聯屬兼可便民又糧儲道爲通省道員之首請改爲守道永昌道轄迤西數郡有稽查地方之責請改爲巡道部議從之三年正月疏言麗江土府業經題請歸流其從前額徵錢糧不按田畝起科惟按門戶貧富派輸實屬弊累請將舊額錢糧照田畝等則均攤應徵銀米既有定額糧從田辦則有田無糧無糧輸賦之弊悉可除下部議行九月晉兵部尙書仍管雲南巡撫事十月授雲貴總督仍管雲南巡撫事先是上以名時洩漏密摺停其摺奏有事仍著具本至是疏言邊方事宜有須繕摺恭請裁示者乞恩宥前愆仍具摺奏上以名時旣知過失懇切奏請仍准摺奏四年七月轉吏部尙書尋命名時仍以總督管理巡撫事十一月名時以滇省未完鹽課具題誤將密批諭旨載入本中奉旨凡督撫奏摺經朕批



示發回者據朕一己之見即便批發伊等具本時祇宜就事論事聽候部議朕自有裁奪焉有具本時將密摺所批公然載入之理楊名時明係回護從前洩漏之罪其心中以爲不當有此密奏密批之事夫國家庶務殷煩亦有不便宣露於衆者故於密摺內往來斟酌期於周詳妥協楊名時始則將密摺洩漏於外人今則將密批全錄於奏章無人臣之體交部嚴察議奏部議請革職交刑部治罪上仍令名時明白回奏名時覆奏臣一時愚昧恐干朦混之愆遂照原案載入此實臣謬誤無可改免五年閏三月奉旨解任仍署理巡撫候旨六月疏參鎮沅府土知府刁澣強霸田地逼死人命等罪擬絞監候鎮沅已經改流應將刁澣家口遷置省城免留土屬滋事下法司議如所請得旨疏內所稱刁澣家口遷住省城之處若管束太嚴則不得其所疏放又恐生事著遷住江寧省城令該督酌量安頓十月新任雲南巡撫朱綱劾名時在任七載徇隱廢弛藩庫錢糧借欠累累倉穀虧空並不題參以致劣員剝民無忌請革職六年正月奉旨楊名時朕尙未識面向聞其爲人和平亦有操守觀其人性喜沽名邀譽而苟且因循置國家之事於膜外且虛僞偏執怙過飾非朕時時切加訓諭而伊堅執不改今據朱綱參奏楊名

時著革職交與朱綱勒限將各項清楚時具奏請旨此本內情由仍著楊名時明白回奏綱尋代名時奏稱從前辦理貽誤瞻徇竊位苟祿捫心自問罪無可道無可申辯得旨滇省錢糧倉穀虧空買補及借動扣還之處鄂爾泰原曾詳細奏聞然後辦理楊名時身為巡撫錢糧是其專責應據實陳奏方為無欺無隱乃伊任內並無一語奏及以為將來推卸之地乃巧詐之用意也此時朱綱參奏特令楊名時明白回奏鄂爾泰亦即具題認過朕批諭云滇省各案朕明知楊名時無虧空挪移之罪但伊巧詐居心於明白回奏時必直認不辯今伊果事事認罪無一剖白申辯之語全無人臣事上之禮著楊名時再行明白回奏嗣總督鄂爾泰代名時奏稱身受國恩忝任內外屢干罪戾猶荷矜全若復巧詐居心是誠大逆不道罪不容誅名時雖極愚蒙何敢自外生成上仍命鄂爾泰嚴訊名時自認沽名邀譽至狡詐堅供不承部議以名時始終掩護朦朧引咎無人臣事君禮應照挾詐欺公律擬斬監候得旨楊名時別案尙多此案治罪之處著從寬免先是有劾名時者上命刑部侍郎黃炳往雲南會同朱綱審理嗣炳等覆奏名時矯廉節以盜虛名其保舉之人俱係進士出身內粟爾璋係名時門生累年得鹽規等銀八

萬兩又受知府范溥孟緞等物依律擬絞其所得鹽規除自行捐補銀廠缺額外應仍追銀五萬八千餘兩至是部覆如炳議得旨楊名時俟各案清結之後再降諭旨名時仍待罪雲南十三年九月皇上御極諭曰原任尙書楊名時皇考原欲召令來京未曾降旨著該部行文宣召來京陛見乾隆元年二月特賜禮部尙書銜兼管國子監祭酒事在尙書房並南書房行走三月賜第一區名時疏請儲書太學以供肄業並刊板存太學聽諸生摹印講誦得旨所請書籍著將武英殿現有者各種發給二十部餘照所請行又疏言滇省舊例凡地方應辦公事皆取給民間謂之公件胥役頭人藉端科斂指一派十不勝其擾臣前撫滇時訪知其弊先將省城附近州縣核實需用之費酌定數目令民照數完納一應公事於此項銀兩備辦不得絲毫再派隨檄行各府州縣俱令核數開報緣諸府州縣糧有多寡公事亦有煩簡據各屬開報輕重不等屢次駁減終未歸畫一雍正五年以後將原定公件統加覆核留必須之用其餘題報歸公而有司不善奉行於地方應辦公事不免復派於民是從前所定公件轉成厲階而公件浮多處所民益苦累請敕諭地方大吏將公件浮多之州縣悉予寬減嚴禁借端派累俾民沾實惠疏

下總理事務王大臣議令督臣尹繼善撫臣張永隨會同藩司詳酌妥議具奏嗣張允隨會同尹繼善覆奏公件最輕之廣南等十五府州縣毋庸更議增減其餘公件浮多之元江等四十九府州縣併邱北州同所管地方總以額編條糧之重輕與原定公件之多寡兩相比並就中攤減請於乾隆二年爲始統照所減之數征收如地方官奉行不實有額外私派者嚴參再經部議如所請行五月奉旨教習庶吉士奏言江蘇安徽鄉試合爲一省定額中式九十九名下江應試士子較多於上江是以每科中式名數下江十分之七上江十分之三查下江應試諸生實較浙閩江西加衆上江應試諸生亦多傑出非小省可比請將下江解額照浙閩江西之例定爲大省上江解額照山陝河南之例定爲中省又陝西解額中六十七名內有聿丁兩字號額中三名緣地當極邊應試人少是以定額三名以示鼓舞今人文漸盛請將聿丁字號格外量增數名又各省貢監生在京鄉試者分編南皿北皿字號各取中三十六名累科來雲南貴州四川廣西四省應順天鄉試者照例編入南皿字號緣文藝不能與江浙諸省頡頏榜發無中式者請嗣後四省貢監入北闈者照會試五經分南北中卷例另編字號約十五名取中一名

庶邊方入監士子俱有科名之望疏下部議尋議下江中額照中省之二等取中七十三名上江照小省之二等取中四十八名共增額二十一名陝西聿丁字號量增一名共額四名其順天鄉試之雲南貴州四川廣西四省應另編中皿字號每十五名取中一名如零數過半加中一名均於本年鄉試舉行八月名時寢疾上遣太醫診視日給參藥九月卒遺疏上得旨楊名時係皇祖簡用舊臣服官年久學問醇正品行端方朕仰體皇考聖意宣召來京正資委用今聞溘逝深爲憫惻已賞內庫銀一千兩遣內務府官一員經紀其喪派散秩大臣帶領侍衛十員賜奠茶酒加贈太子太傅入祀賢良祠賜祭葬如例諡文定

黃叔琳子登賢

黃叔琳順天大興人康熙三十年一甲三名進士授編修累遷侍講四十四年丁父憂服闋補原官授山東提督學政四十八年遷鴻臚寺少卿留學政任五十一年遷通政司參議五十七年遷左僉都御史五十八年晉太常寺卿六十一年遷內閣學士尋遷刑部右侍郎雍正元年三月充江南鄉試正考官調吏部侍郎九月命偕兩淮鹽政謝賜履赴湖廣同總督楊宗仁酌定鹽價革除陋規每鹽一包

減價六釐昂不得過一錢二分四釐其安豐場鹽較梁垛場再減二釐從之二年二月奏言兵糧撥運支給俱布政使糧道爲政先期打點方撥臨近標營否卽撥遠汛加徵運費輸輓累民兵丁嗷嗷待哺查標營汛地各有定所屯衛徵收亦有定額乞諭督撫確查兵數先儘本州縣衛所額米撥給不敷再於附近州縣撥運庶民無苛擾兵獲飽騰上是之下部議行是月授浙江巡撫奏言各部書吏紹興人冒籍順天等處已定議改正見任浙江首領佐雜及在部候選候補之員掣得浙省缺及各省俸滿升補浙省者籍開順天直隸如實係原籍浙江均請查明咨部改補部議從之時御史錢廷獻請濬浙江東西湖蓄水灌田部議叔琳會同總督滿保確勘定議叔琳等奏言仁和錢塘海寧三縣田數萬頃全藉省城上下兩塘河水灌溉兩河水源皆自西湖流注湖居省西匯南北諸山水週三十餘里水由湧金門入城其出艮山門者入上塘河由臨平達海寧出錢塘者由三閘至松木場桃花港與武林門之水共注響水閘凡湖墅支河與古蕩西溪沿山之田皆資其利餘水入下塘河而仁和北鄉及錢塘之下八鄉實霑蔭焉其所以灌溉利溥者一由沿湖山水暢流入湖一由山水來路設閘以阻浮沙一由上塘五十里

外有東湖爲之停蓄自開廢土淤民占爲田埂內植桑柏蕩內栽荷蓄魚利甚微而所損三縣田畝逾鉅萬請照西湖舊址清出歸湖去埂塞開通水源其淤泥葑草則幫築於舊隄之上以固隄址沿隄釘椿編竹不使淤泥入湖裏湖各橋建開啟閉城內河道一爲東河一爲小河又有中西北之分係西湖血脈應酌量修濬其上塘河一帶河身支港浙省至江南吳江縣界官塘運河支河港汊壩堰陡門俱關水利應一律疏濬部議如所請三月諭曰爾到任未久於薦舉人才處頗涉輕率嗣後當加慎重八月有密奏叔琳赴楚查鹽時受鹽商吳雨山賄關說派充總商並庇海寧陳氏僕其弟御史叔璫巡視臺灣過杭州家人與鋪戶爭鬪叔琳拘責鋪戶至死到任後杭城罷市三次諭曰黃叔琳因前差江南主試及任吏部侍郎聲名頗好故用爲浙江巡撫自命下日屢次召見觀其精氣頓異語言浮泛跪領朕一切訓旨總不安詳存神敬聽彼時朕卽疑之及到浙撫之任舉薦不公敷奏不當密摺奏請之事件件支離兼多先請託在廷諸臣奏聞而黃叔琳之摺隨繼之此等作用徒自取罪戾耳朕頻降嚴諭而黃叔琳置若罔聞今覽此奏事雖屑小黃叔琳初任卽如此肆志將來故縱何事而不忍爲也大負朕之任用著

解任陳氏僕人黃叔璥兩案與罷市三次情由著將軍安泰等秉公嚴審吳兩山一案著侍郎李周望等嚴審定擬具奏八月安泰等奏稱叔璥庇陳世侃僕金寧祥爭毆罪杖斃店民賀懋芳屬實並無伊弟叔璥拘責鋪戶及罷市事部議革職擬流十一月李周望等奏訊叔璥向吳兩山借貸並非賄求詔免窮究三年正月命赴海塘效力乾隆元年二月授山東按察使八月疏言向例佐雜官不准相驗嗣廣西巡撫臣金鉉奏印官公出委佐雜相驗不必請鄰封但佐雜不足資彈壓又事非切己吏誤填報夤緣賄囑多致蒙混及印官承審之時惟據屍格定傷難成信讞應請仍照舊例行九月又言審案定限欽部案件四月命案六月盜案一年限滿不結揭參後具扣限四月審結逾限二參照易結不結例議處立法至善嗣經河東督臣田文鏡題定四月限者州縣兩月解府州府州一月解司司二十日解督撫六月限者州縣三月解府州府州一月半解司司一月解督撫一年限者州縣七月解府州府州兩月解司司一月半解督撫逾限分別議處雖以清釐適啟通融挪改之弊案件遲延多不揭參至定案時攤爲逾限不及一月例得免議竟無易結不結處分請仍照舊例庶承審官不敢仍前怠玩部議均從之二年



九月遷山東布政使三年八月奏言東省師生空缺銀例由州縣解交學政學政造冊移司如遇按試遠郡轉解需時或解到正值封門校士不能隨到隨收趕副奏銷州縣多罹參處請嗣後令學政開印後覈造應扣銀數移司其銀卽令州縣徑解司庫收兌又言養濟院孤貧口糧每名歲給銀米三兩六錢於地丁項下撥給但編銀州縣二月開徵可依期給發至編米例於九月隨漕徵收春夏秋三季米係州縣將養廉折銀墊給儻養廉不能及時支領或牧令更換卽給發愆期請酌借司庫存公耗羨銀給發至秋收徵米除給冬季口糧餘米不必易銀解還司庫卽留備次年春夏秋口糧存倉遞及報銷部議俱如所請四年丁母憂七年服闋授詹事以山東布政使任內誤揭屬員諱盜革任十六年諭曰原任詹事黃叔琳以康熙辛未探花年臻大耋重遇臚傳歲紀洵稱熙朝人瑞著從優加給侍郎銜二十一年卒子登賢官至副都御史

### 高其倬

高其倬漢軍鑲黃旗人父廕爵任口北道其倬由康熙三十三年進士改庶吉士散館授檢討尋兼佐領四十一年充四川鄉試正考官四十五年遷右中允尋轉

左四十六年遷侍講四十八年提督山西學政五十一年丁父憂服闋補侍講遷右庶子五十五年轉左五十六年二月遷侍講學士十一月遷內閣學士五十八年正月以河南南陽鎮標兵挾忿圍辱知府命其倬同刑部尙書張廷樞往鞫得實寘首犯於法總兵高成等論罪如律二月丁母憂五十九年授廣西巡撫六十年二月署雲貴總督十二月實授雍正元年九月疏言雲貴兩省土司承襲向有陋規上下衙門每因文結舛錯藉端需索苦累臣已嚴行禁革并請嗣後咨部文冊內數字舛錯無甚關係者免其駁換於疏內代爲聲明庶承襲事易結措索弊除得旨嘉獎十二月疏言雲貴魯魁山土目楊方普李四姓糾衆剽掠不聽約束本年十月內其酋方景明等率猓夷數百殺元江猓目施和尚焚其寨臣遣兵分剿擒景明及猓夷三百二十六名分別正法報聞先是青海台吉羅卜藏丹津肆逆謀侵西藏定西將軍策旺諾爾布檄各路偵禦其倬以雲南邊外中甸阿敦子地方爲進藏要路檄遊擊劉宗魁劉國侯等嚴防並遵旨令提督郝玉麟以兵二千由中甸進駐察木多副將孫宏本以兵五百赴中甸爲聲援二年二月羅卜藏丹津爲大軍所敗竄準噶爾青海平中甸喇嘛營官番日等攜三千五百戶繳

僞筭納土歸誠其倬疏聞上嘉其妥協給騎都尉世職十月貴州狝家苗酋阿近與弟阿臥倚險作亂其倬以狝家苗聚處定番廣順二府境其附近苗寨多被迫脅遣人招撫阿近等勢窘爲官兵所擒疏至諭部優敘加三級尋請增雲南楚姚鎮兵六百並增鎮屬景蒙營參將守備各一千總二把總四兵千卽以新裁援剿左右兩營弁兵撥補部議從之十一月條奏中甸善後事宜一中甸開墾商民日增請設撫番清餉同知及經歷巡檢等官管理一番日舊有營官神翁列賓名目聽堪布喇嘛指使請給外委守備千把總筭付聽中甸文武官管轄一中甸向行滇茶請照打箭爐例設引收課由麗江府收報一中甸沿江數百里及山谷曠土甚多請給牛種房屋招佃開墾三年後起科供增駐官兵歲糈一中甸僧衆千餘寺屋數百收藏軍械易於宿奸番人舊給喇嘛費甚多應裁減除出身西藏之喇嘛外其本地喇嘛選誠實者三百名咨給度牒餘以次選補器械入官每年量給青稞酥油並銀三百兩爲口糧衣單資至番日受外委筭付亦分別歲給銀兩青稞養贍又條奏魯魁山善後事宜一魯魁山內通哀牢外界異域須重兵控壓請設普威營置參將一駐普洱守備二分駐威遠土州及茶山千總四把總八分汛

控禦一賊巢全在元江協與新嶠營所轄地新嶠營隸臨元鎮不隸元江協兩界互相推卸誤事請移新嶠營及擬設之普威營均隸元江協以臨元鎮統轄一威遠土州爲野賊逋逃藪請改土歸流設撫夷清餉同知及經歷并大使巡檢等官分管鹽井地方事務一方姓普姓土職糾衆滋擾請停襲一威遠新開之按板抱母二鹽井歲獲息銀二萬餘兩請充新兵餉一裸目施利尙之姪膩勒等妻子請移駐元江府城威遠土官刁光煥子弟家口移省城安置一九龍江口夷人出入處請設汛照山海關例給印票客商兵役往來一例盤察毋得出境滋事村寨各編里甲戶口以資稽察一設義塾數處夷人子弟有志讀書者入塾誦習於元江府附考額外加取二名一勸誨夷人墾田請照雍正元年定例旱田十年水田六年後陞科又條奏貴州苗疆事宜一定番廣順頑苗皆就擒請於西猛設汛調定廣營千總駐防一定番廣順二州路通廣西泗城土府請於西藤斷杉樹二處設汛衛行旅一請改大定鎮爲協裁中營遊擊以左營兼中營仍守大定移中營守備一千總把總各一分防廣順州所屬長寨遮貢安順府所屬十三枝普定縣所屬五枝等處移把總一防羊城壘統歸定廣協轄至都勻府屬之獨山州接廣西

南丹土州苗性尤頑請移都勻守備駐防一黔省境連川楚姦人勾結掠販人口爲害請定例地方官一年內分別拏獲人數議敘其不能查緝爲他處拏獲者亦照人數議處客人有買貧民子女者報官用印不得至四五人違者照輿販者科斷一黔省與楚蜀滇粵接壤請定例夷人越界拏送本省滋事者卽於其地審辦又黔省有拏白放黑之習被人刦殺力不能報將無干之家奪其人畜暗插冤單令其轉爲報仇否則索贖請加應得罪一等一土司等貧困不支往往以有糧田詭稱無糧與紳衿商民買主收無糧之田土司納無糧之賦久之完納無資或派令屬苗代完請澈底清查令執業者輸納又土司下設立權日人等報明有司後有事發併懲一黔地潮溼倉米易朽請核計兵米存二年之蓄餘於春秋減糶著爲例一黎平府與楚省五開衛同城民苗雜處分隸兩省請改五開衛爲縣隸黎平銅鼓衛亦歸併五開古州八萬等苗疆均屬黔省事權歸一又言向來雲貴兩省拔補千總把總皆以本營補本營之缺伏思同爲兵丁一旦難以約束卽同輩千總亦羣非笑其不肖者則又護庇兵丁將備稽查不易爲力請嗣後拔補本營時卽於外營對調不必仍留本營詔如所請三年二月加兵部尙書銜五月疏言

近聞策妄阿喇布坦萬里效順籌度經久之計正在此時臣以爲兵宜酌減備禦未可全撤西路形勢臣所不知至阿爾台一路臣曾運米二次自殺虎口出經蒙古各部落約三四千里大兵駐筭極邊甚有關係似宜兵數量減米數微增則遠戍倍加踴躍上嘉納之六月晉太子少傅十月調福建浙江總督其倬以雲南鶴慶府鄧州嵩明騰越三州六和浪穹二縣土軍丁賦係明嘉靖萬曆間因夷人作亂暫撥民人協防隨立太和所鳳梧所名目每丁徵銀一兩伊等既納民賦於本籍又輸軍賦於防所相仍未革疏請豁除允之四年抵閩浙總督任疏言福興漳泉汀五府地狹人稠自平定臺灣以來生齒日繁山林斥鹵之地悉成村落多無田可耕流爲盜賊勢所不免臣再四思維惟廣開其謀生之路如開洋一途前經嚴禁但察富者爲船主商人貧者爲頭舵水手一船幾及百人其本身既不食本地米糧又得沾餘利歸養家屬若慮盜米出洋則外洋皆產米地慮透消息則今廣東船許出外國豈福建獨慮洩漏慮私販船料則中國船小不足資彼之用以臣愚見開洋似於地方有益請弛其禁詔下怡親王會同大學士九卿議行五年四月疏言臺灣水沙連等社番民自朱一貴作亂後不納餉賦肆行焚劫臣令臺

廈道吳昌祚同知王沂參將何勉等率弁兵番壯分路裹糧進剿擒爲首骨宗等二十名各社相繼歸誠報聞十月以李衛爲浙江總督命其倬專管福建總督事六年二月條奏福建鹽政事宜一謹產地之收曬閩省鹽場福清最大請做保甲法添設團長甲長查報日曬之鹽設總倉封鎖以杜私賣日免雨水之患修砌莆田各團涵窟以資防護一嚴銷地之售賣閩鹽向係商行後改官運近用水客商販請暫令水客認銷而以官運接濟三年無誤報部充爲商人再發引以立成法場鹽多產之時仍照官運例動課收積一定鹽課額數閩省鹽課有額徵公費二項請照定數作正數其溢行之鹽所獲銀數造爲盈餘報查除支給鹽道各衙門公用外餘造冊報銷解部水腳卽於長價等項內撥納一酌辦理之人員閩省舊設鹽務各官雍正二年裁汰請嗣後於佐雜官內遴辦毋庸另設下部議行六月以原任山西道御史蕭震於康熙十三年遭耿逆之變與原任邵武府知府張瑞午等合謀討賊事洩殉身妻妾媳婢同時死節端午業蒙卹典而震獨遺疏請入鄉賢祠致祭旌其門詔如所請七年六月因與臺灣革職知縣周宗瑄濫致書札又未審出加徵耗穀各實情部議革職命降三級留任尋疏言閩省戰船多係平

臺灣時所獲長闊不稱請酌定丈尺隨時更改閩安協右營之船多鐵板沙線請改爲平底以適進哨之用又請改福建同安泉州長福邵武四營遊擊爲參將增設灌口安海二汛守備各一移泉州府糧捕通判駐安海汛連江縣守備駐東岱汛移東岱汛千總駐筭門汛部議從之閏七月來京陛見御製詩賜之有操凜冰霜功帶礪匡時重鎮眷良臣之句八年二月晉太子太保四月回任先是上以其倬通曉堪輿術命詣福陵恭視形勢工程其倬奏言陵前左畔水法因夏口溢流稍更故道弓抱之勢微覺外張必須順導河流方稱盡善至是大學士等議如所奏濬修五月調江西總督復命來京六月疏參巡臺御史李元直任性滋事狀下部察議元直降三級調用九月以其倬隨怡賢親王允祥相度萬年吉地於易州境內泰寧山太平峪特授一等輕車都尉世職併前所得騎都尉爲三等男諭曰高其倬歷任封疆其樹績建勳揚名垂譽者不可悉數原不以此爲宣力見長之地乃能悉心籌度務期萬全一毫無瞻顧推諉實出於一片忠愛至誠之悃不僅才識超羣已也是月命署雲貴廣西總督九年疏言雲南昭通府四面環山請委員專辦墾務定爲水旱生熟四項分給兵民徠土各戶墾種按年收穀還本後起



科輸米以省兵米運費下部議行十一年正月命仍回兩江總督任會雲南普洱府屬思茅土把總刁國興勾苦葱蠻煽元江夷攻普洱府城通關大寨擺夷復附苦葱蠻過阿墨河犯他郎城地方其倬檄提督蔡成貴等分路進剿擒其酋并賊屬五百餘斬級甚衆疏至報聞九月命以總督銜管江蘇巡撫事十二年以瞻徇知縣趙崑理承修海塘工程賠項部議降調尋授江蘇巡撫十三年疏參淮關監督年希堯庇縱玷職詔嚴鞠削年希堯職乾隆元年正月以疾召還京四月授湖北巡撫尋調湖南二年七月以湖南城步綏寧二縣猺糾黨焚劫其倬偕總督史貽直遣兵分剿賊黨悉平諭部優敘加三級三年三月擢工部尙書尋調戶部十月卒於寶應舟次遺疏入諭曰高其倬練達老成宣力年久今聞溘逝深爲悼惜著沿途官弁護送回旗尋賜祭葬如例諡文良

### 趙國麟

趙國麟山東泰安人康熙四十五年進士五十八年授直隸長垣縣知縣雍正二年遷永平府知府九月遷大名道四年四月調清河道八月遷長蘆鹽運使五年擢福建布政使七年調河南布政使八年擢福建巡撫十一年疏言福州府常平

倉向裁大使歸知府管理倉儲府廳縣額徵米穀四十餘萬爲數繁多請將興化府倉大使移調常豐興化府倉歸經歷管理九月請設臺灣府學及臺灣鳳山諸羅彰化四縣學訓導各一皆下部議行十二年調安慶巡撫十三年疏言壽州新分鳳臺縣田賦淆混等則莫辨無魚鱗底冊可稽有豪強兼併愚懦包賠之弊請履畝清查如有隱漏及避重就輕者准自報其地少糧多之戶亦令勘明歸正不得逾八月之限部議從之乾隆元年御史蔣炳奏准州縣徵收錢糧照部頒定額刊印由單申送布政使核明分發花戶倘有飛洒增添將原單交甲長里長赴州縣改正仍令花戶於錢糧完日繳單彙送布政使查核國麟以安省大州縣不下十餘萬戶合計通省卽有數百萬由單由司核發恐誤徵收并遲兵餉且花戶繳單不齊必差役催取或偶遺失更啟索詐現在每年照實徵簿刊易知單徵收日給花戶花戶查對不符請於完糧時照簿改正甚屬便民似應仍舊至里長久爲民害已裁未便復設所有由單送司繳司甲長里長改正之處請停止部議准行二年疏言安省舊置官田收租養馬歲入稻豆萬五千四百餘石歲豐取盈歲歉減收除驛站額支外尙餘六千五百餘石報出歸公遂成定額兵部奏銷與正項

無異無論豐歉照額取盈民多賠累請豐年仍照額收歲歉卽以收成分數酌減至有馬田州縣通水者例碾米解省水腳係州縣捐發請每石給水腳米三升卽於馬稻內開銷庶免延累其不通水州縣收積無所用請照時價糶銀充餉官民有裨下部議行先是內閣學士方苞條奏常平倉穀原定存七糶三法南省地氣卑溼應分別糶半存半糶七存三因地制宜部議以南省各屬高下燥溼不同應糶七糶半令督撫詳覈議奏至是國麟請將安省所屬州縣不濱大江地氣高燥及卑溼而非最下之區仍遵存七糶三例其臨近江湖地形卑下及山陬嵐霧尤甚者糶半存半部議如所請行三年授刑部尙書十月調禮部尙書尋兼國子監事四年授文華殿大學士兼禮部尙書二月充會試正考官三月請頒發御纂經書十三種貯禮部順天府俟鄉會兩試期送內簾應用庶評文有所依據上如所請六年三月御史仲永檀疏參內閣學士許王猷邀同九卿往民人俞長庚家弔奠國麟親往跪奠以物議沸騰復將原帖追燬國麟請解退得旨仲永檀奏參大學士等弔奠俞姓之事經王大臣查訊全屬子虛其言出於于枋伊已自認與大學士毫無干涉趙國麟被謗之處已明無庸置辯着照舊供職是年四月國麟復

請解退上仍慰留之先是給事中盧秉純奏參國麟於永檀劾奏經皇上面詢時佯爲不知出後告伊威原任光祿寺卿劉藩長自鳴得意又稱藩長於奉旨休致後國麟告以係蔣炳所參上命大學士鄂爾泰張廷玉等面質藩長國麟藩長稱曾以國麟回奏事告秉純秉純遂揣摩情狀入奏言詞過甚又堅稱國麟並無蔣炳曾參之語上以此事有無在疑似間從寬免究六月諭曰趙國麟素稱理學且身爲大學士與市井庸人劉藩長結姻且在朕前保奏甚屬不合較仲永檀所參之事其過孰爲重大朕令大學士鄂爾泰張廷玉等諭以大臣之義進退之禮伊自當朝聞命而夕拜疏乃遲之數日竟無求退之本是其意以爲朕雖責備仍復轉念優容朕御極之初見其人屬老成且素聞伊留心理學是以內陞尙書復將伊補授大學士數年來所匡贊者何事所建白者何言爲朕所倚重而必不可棄者何具尙可忝竊大學士之職乎伊初有福建巡撫任內薦舉劣員王德純一案部議降調朕留中未發今既不知自處不得不明加處分著降二級調用留京候補尋授禮部侍郎七年正月擢禮部尙書二月以病乞休上未允七月復乞休諭曰趙國麟以獲罪降級之員朕加恩復用爲侍郎伊彼時以官止亞卿照常供職

使人見其無悻悻求去之意及洊擢尙書卽託病求罷朕屢次慰留伊仍執奏再三儼然以進禮退義之大臣自居夫進退大臣之禮朕豈不知如遇當以禮待之大臣而年力衰邁卽臥理中書可也或優詔歸田亦無不可然非所論於趙國麟伊試返而自思外任巡撫內任大學士尙書何所樹立而忽於末路託名進禮退義以自表其風節居心不可問矣趙國麟著革職在咸安宮效力行走八年恩准回籍十五年八月恭祝萬壽恩賜禮部尙書銜十六年十一月故

清史列傳卷十四終

清史列傳 卷十五

大臣畫一傳檔正編十二

李紱孫友棠

李紱江西臨川人康熙四十八年進士選庶吉士散館授編修累遷侍講學士五十四年充武會試副考官五十六年充日講起居注官尋充雲南鄉試正考官五十七年九月充武會試正考官十二月奉命祭告南海五十九年六月充浙江鄉試正考官九月擢內閣學士十二月遷左副都御史仍兼學士六十年二月充會試副考官榜發下第舉子擁至紱寓喧鬧匿不奏爲御史舒庫所劾革職發永定河工效力雍正元年正月特旨給還原職署吏部右侍郎尋充經筵講官六月命赴山東催漕七月遷兵部右侍郎九月奉命截留湖南等幫漕糧於天津收貯二年三月督運抵通得旨嘉獎四月授廣西巡撫八月奏言廣西賀縣界大金蕉木兩山產礦砂五十里外爲廣東梅崗汛又數里爲宿塘寨礦徒盤據時時竊發臣抵任後擬嚴禁聞督臣孔毓珣條陳開採恐傷協恭之誼因而中止近經平樂府

報稱礦徒二百餘流入蕉木山知縣會同富賀營守備千總三路驅逐始退又聞廣東連山縣宜善司巡檢以梅崗宿塘等處礦徒梁二等聚集多人汛兵子弟往附勢難防緝願罷職歸臣思開礦甚有關係目下卽幸無虞將來或恐滋事諭曰礦砂之利窮民私採猶當禁之何況明目張膽而行之者此中利害朕甚知之今旣聚衆自稱頭目是斷不可一日姑容少寬禁捕今將批諭孔毓珣之旨鈔錄示汝汝等可協力設法嚴禁永令地方無此等事方好須再三留心籌畫而爲之慎勿輕忽孟浪凡事悉如此據實入奏纔是此奏朕甚嘉之如宜善司巡檢所言卽使少過朕亦樂聞而不加責也諸如此類何妨預防於未然耶十月疏陳練兵事宜一先定操地次定操期嚴賞罰一陣法各有所宜四門方陣止可施於平原曠野而廣西援剿常在山溪之間背山而戰用一字陣山曲用三才陣夾溪用雙龍陣八面受敵用八門陣四圍合攻用圓陣亦曰風雷掃地陣羊腸鳥道用山路連環陣宜令演習如式一兵丁無論馬步各帶腰刀然馬上步下宜知用法一猺獞土苗所用鳥槍較營槍更長可及百五十步惟礮可以制之五子礮施放便利宜增製一山賊不時出沒調兵剿擒帳房鑼鍋宜豫備諭曰留心武備殊屬可嘉但



須實力行之方有成效先是康熙五十三年廣西巡撫陳元龍奏准開捐五十五年停止共捐穀百十七萬八千餘石至是紱奏言臣聞開捐之始每石折收銀一兩一錢發州縣買貯止三錢而穀價常在三四錢以上勢難購買率以價銀遞相交盤歷任撫臣責州縣買補臣抵任嚴催尙欠四萬餘石請寬限一月補足免將見在州縣官參劾得旨俞允會提督韓良輔條奏墾荒六事命紱議行紱疏言經費有出然後開墾可行廣西捐穀偏積於桂林柳州南寧四府久貯恐致朽蠹請卽動支爲開墾費諭曰朕觀李紱之意不過爲開銷廣西昔年捐納穀石之計此項捐穀原係陳元龍經手其閒有名無實首尾不清之處甚多朕知之最悉此時李紱難於料理故借開墾之名以爲開銷虧欠之地可著陳元龍等往廣西將此項澈底清查儻有不清著李紱據實參劾以聞至墾荒諸款皆巡撫職所應爲之事不必瑣瑣陳奏十二月諭曰捐穀一事李紱務須澈底清查如有虧空卽著落陳元龍等辦理清楚此原屬舊案與李紱無涉伊若以從前未經查清卽卽隱諱瞻徇是將他人虧空認爲己有後經發覺罪皆歸於伊身紱因疏參當日收捐穀價數倍於正項請將管捐之布政使今任福建巡撫黃國材等質問詔許諸

臣將分肥實情供奉免其治罪並令國材解任赴質嗣審明督撫司道府廳共分肥銀八十二萬四千七百餘兩勒限分賠有差諭曰爾於此事秉公執正實屬可嘉初絨署吏部侍郎因議絨年羹堯子富等捐造營房一事不肯從優爲羹堯所嫉及奉旨天津截漕估變米價盈餘銀五千兩交守道桑成鼎貯庫絨赴廣西成鼎以原銀解交廣西絨以事屬直隸因具摺送直隸巡撫李維鈞會奏維鈞匿不以聞三年二月絨據實陳明諭曰此一事大奇乃伊等誣捏欲傾陷汝也年羹堯來京陛見時奏汝巧取此項適李維鈞亦在都中朕因不信其言向李維鈞降旨云李絨斷不爲此舉李維鈞解會朕意卽回奏云李絨原未全吞論理此項伊可以入己伊因路遠止取數百兩作盤費其餘未經交發仍爲伊封好收貯在彼但伊應將此項奏聞纔是朕隨諭李維鈞既如此爾應寄字詢問看李絨作何回覆此彼時之言也殊不料伊等蓄意如此朕今始洞悉矣爾若根基不牢則已墮其術中大約皆係年羹堯之所指使但此等作爲朕頗不解其意何居鄙哉小人實爲可愧前項旣經伊等送到粵西朕又已了然明白可卽留充公用是月以審擬生員陳爲翰毆斃何壯深一案擬絞候部駁仍照前具題部臣改爲斬候奉旨著

九卿等會同詳議尋議應如絨所擬從之四月奏言南寧思恩太平三府屬土司界連安南土夷劫掠成習伊國王未必盡知應行令自行禁戢但總督有行文安南之案而撫臣並無舊案可稽督臣遠駐廣東文書往還需時請嗣後遇土夷爭奪細故一面咨會督臣一面卽行文安南庶事可速消允之六月奏言太平思恩府界流言安南內亂奸徒潘騰龍冒認莫姓子孫其黨黃把勢陳亂彈等以護送歸國爲名互相煽誘臣嚴飭文武員弁查拏擒治諭曰所奏已悉封疆之內極宜整理振作至於安邊柔遠最忌貪利圖功須當慎之又慎八月疏言柳州府轄二州十縣地廣事繁賓州上林等州縣猺獞錯處請改賓州爲直隸州轄附近之上林來賓遷江武宣四縣其與柳州相近之七州縣仍歸府轄再梧州府治西南至鬱林州三百餘里請改鬱林州爲直隸州轄北流博白陸川興業四縣其與梧州相近之五縣仍歸府轄又泗城土府及三江地方上林安隆二營請俱改歸泗城副將轄下部議行九月奏言猺獞頑梗修仁之十排天河之三疇尤甚劫掠積案纍纍修仁十排臣已捕獲渠魁三疇週八百里萬山重阻所種田在隘口外乘秋稼未收發兵守隘斷其收穫投到者許以免死其爲首八人見俱投到諭獎其辦

理得宜旋授直隸總督四年三月抵任先是左都御史蔡珽薦其故吏已革知縣黃振國起用爲河南信陽州知州巡撫田文鏡劾振國貪劣不法絀由廣西來京陛見奏言振國無罪文鏡以絀與振國同年劾其袒護至是絀疏辨奉旨訓飭五月廣西提督韓良輔等條奏雲南廣西接壤貴州安籠鎮之土司及改流地方均歸安籠鎮節制詔絀前往與雲貴總督高其倬會議尋合疏言雲南廣羅協廣南營廣西泗城協上林營鎮安營距安籠鎮遠恐鞭長不及惟廣西安隆一營較近但改隸後該鎮又須受兩廣總督提督節制隔省咨呈未便均應照舊管轄部議從之十月奏請增直隸河員天津州州同青縣子牙河主簿各一隸天津道轄涿州霸州州判吏目各一宛平良鄉固安永清東安武清六縣縣丞主簿各一隸永定河道轄北運河同知通判各一要兒渡縣丞東陽村主簿各一薊州灤州州判各一玉田縣縣丞豐潤縣主簿各一隸通永道轄霸州清河吏目一隸清河道轄又請將河閒天津所屬旗民案件改歸新設之天津理事同知轄部議如所請行十一月奏言在京部科及直隸藩臬等衙門向有積年書吏盤據招搖役滿雇人承辦仍陰主其事謂之缺主臣遵旨嚴查逐令出境並飭各州縣毋許容留一人

但訪得部科缺主尙有潛居通涿昌平等處者請敕部科諸臣查開姓名移咨一併驅逐得旨俞允尋奏言各省候選訓導之歲貢前經田文鏡奏請預行驗看臣思廩生必二三十年而後出貢又三十餘年而後選官亦未必俱能得選見在驗看未老人員至得選時已老豈能懸斷其可否供職且教職領憑必經巡撫考驗又何必預驗於十年二十年之前徒令窮老寒士奔走跋涉廢業失館請將此例停止上以其識慮卑淺嚴訓飭之十二月諭曰爾自被擢用以來識見實屬平常觀人目力亦甚不及朕但取爾秉彜之良直率之性而已凡朕一切誨諭如果傾心感服將來智慮自當增長擴充若硜硜固執鄙見妄自矜高不但終見棄於朕恐將來噬臍莫及爾其欽承毋忽會御史謝濟世疏劾田文鏡及黃振國事諭曰李紱自廣西來京陛見卽奏田文鏡參劾黃振國及汪誠邵言綸甚爲冤抑張球居官聲名甚劣田文鏡並不糾參且言黃振國此時已爲田文鏡監斃滅口未幾黃振國從河南解赴來京依然無恙不知李紱受何人意指而捏造此無稽之言敢於冒昧陳奏也至田文鏡所參黃振國各案朕差侍郎海壽史貽直到豫已審訊明白定擬具奏其張球一案田文鏡早經認過請罪部議亦於張球諱盜案内

將田文鏡處分至汪誠邵言綸皆係庸劣不堪之人田文鏡奏參處分並無冤抑乃謝濟世所言黃振國張球邵言綸汪誠等事竟與從前李紱所奏一一脗合朕思封疆大臣能爲國家實心任事卽爲國之棟樑朕之股肱若不保護而受人傾陷則朕何顏對天下封疆大臣乎此種結黨營私排擠傾陷之惡習不可不嚴加懲治是以令內閣九卿等公同研究謝濟世所奏各款皆茫無憑據俯首無詞則其受人指使情弊顯然謝濟世既自命爲報效國家之人著革職令往阿爾臺軍前效力贖罪此案亦免深究尋召紱來京補工部右侍郎五年二月署廣西巡撫韓良輔奏天河縣獄內拘禁莫東旺一名係李紱批飭枷責追贓結案之犯遷延一載尙未發落致蠻獍糾衆劫去得旨著李紱明白回奏尋奏稱莫東旺一案經臣審結卽赴直隸新任其因何遲延一載尙未發落之處無由得知諭曰舊令尹之政必以告新令尹古人於罷官之後尙以國事爲念豈有李紱身任總督不將此事明白交付接任之巡撫囑其早行完結之理著交部察議尋諭曰雲貴總督鄂爾泰曾奏稱廣西泗城土司甚屬不法請飭廣西巡撫提督懲治朕曾降旨詢問韓良輔據奏請往雲南與鄂爾泰面加商酌朕思此事甚有關係非韓良輔與

鄂爾泰面議不可昨都察院奏原任廣西州判程日控告土司羅文剛一案羅文剛糾衆肆惡吞噬十一處村落竟敢與官兵相抗不容設立塘汛李紱身爲封疆大臣逡巡畏縮苟且彌縫但爲掩飾一時之計而於地方之利害民生之休戚毫不關心甘汝來時爲臬司亦因循怠忽不能整頓昨令廷臣詢問二人俱俯首無詞李紱甘汝來相繼爲廣西巡撫著二人前往廣西辦理土司之事從前疏縱之兇徒羅文剛等著卽責成李紱甘汝來速行擒拏不得容其兔脫韓良輔前往雲南時李紱一同前往李紱甘汝來負朕擢用深恩今加寬宥容其效力贖罪務將廣西境內不法之苗夷與地方不法之奸民悉心料理俾盡革凶頑遵奉國憲以安良善以靖地方儻疏縱之羅文剛等不能擒獲及伊等料理土司之事虛文掩飾以卸目前之責將來仍有兇苗妄行干犯王章者定將李紱甘汝來從重治罪又如礦賊盤據兩廣之閒兩省官員互相推諉以致宵小肆行良民時受其擾著李紱甘汝來會同阿克敦將兩省疆界一一清查分別防範管理使汛地各有專責匪徒無計潛藏毋得仍前怠忽自干重罪三月紱由廣西赴雲南與鄂爾泰等酌籌粵黔分界泗城改流等事會直隸總督宜兆熊等疏參原任大名府知府曾

逢聖原任清苑縣知縣王游虧空錢糧上以二人均絨所保薦令明白回奏閏三月戶部議覆絨在總督任內奏懷來縣倉廩坍塌小民竊食顆粒無存之處應行令確查諭曰官倉米數至六千餘石之多豈有小民敢於私取竟至顆粒無存之理明係李絨有意市恩庇護知縣借口巧爲開脫今部議行令確查與李絨本意不合可卽將米石令李絨賠補以成就其市恩之意八月宜兆熊等復參大城縣知縣李先枝私派累民諭曰李絨任直隸總督時將李先枝題陞天津州知州朕調來引見看其人甚屬庸常故令仍回知縣原任今以私派被參劣款見有明據常見科甲出身人員多有夤緣黨庇之惡習而貪贓枉法者尙不多見今李先枝目無國法公然私派科斂苦累小民實爲科目中之匪類而李絨乃敢在朕前特薦題補天津要缺是李絨不但有心袒護且必有暗受李先枝請託之處著將李先枝革職拏問其私派情由該督等一併嚴審定擬再將如何請託李絨之處究出具奏李絨受朕深恩不思報效敢於營私欺罔甚屬可惡著革工部侍郎職前因廣西貴州查勘疆界及擒拏羅文剛二案將李絨發往廣西彼時降旨若不能拏獲羅文剛卽將李絨在廣西正法今羅文剛已經緝獲是李絨在廣西無可辦



理著行文令李紱來京見在應行質問案件甚多且李紱曾在朕前奏稱蔡珽爲人粗疏鹵莽則有之若貪婪不法之事臣可保其必無今蔡珽諸事敗露在四川任內受賄貪贓劣蹟昭著李紱敢於庇護私黨在朕前妄奏此處亦應審問十二月議政大臣等會議紱罪凡二十一款私受門生大城縣知縣李先枝請託妄爲保題徇顧師生罪一將貪婪無厭之蔡珽保奏固結黨援罪二袒護同知黃振國及息縣知縣邵言綸固始縣知縣汪誠密奏被參冤抑又控稱田文鏡欲致死黃振國滅口罪三蠻獍莫東旺一案不早結致刼獄罪四天津道葉前係不應送部引見之員故違諭旨送部罪五奉旨天津建造營房漠不關心任意遲延罪六擅將不應離任之通水道高鏞等題請離任另補罪七將庸劣之廣西上林縣知縣柏宏智妄行特薦罪八所解慶豐司羊毛等項不據實查明混爲咨覆罪九奏請帶往廣西之都司岳咨縱兵串通礦賊奉旨詢問並不認罪罪十西隆州土目王尙義等歷爭歪柒等案並不早結罪十一明知清苑縣知縣王游虧空不查參反飭阜城縣知縣陸篆交代勒逼出結密奏王游爲直隸第一好官罪十二擅增直隸兵米價值罪十三順義等十八州縣靜海等二十七州縣虧空錢糧擅批豁抵

罪十四與蔡珽表裏爲奸奏大名府知府曾逢聖操守並無不好罪十五收受直隸守道桑成鼎銀五千兩巡撫李維鈞銀一千二百兩罪十六被參清苑縣知縣姜任修發審串供不嚴究罪十七上年田文鏡奏報豫省糧船正月出境李紱妄奏偶遇大水僥倖出境將來恐未必能及今年糧船出境更早又稱誤聽人言罪十八與布政使德明張适面奉諭旨回奏時俱舛錯罪十九以故殺馬順之楊四稱爲救父情急妄引鄭雄救母之例減等罪二十不早除逆賊羅文剛以致脫逃反參州判程日浮躁罪二十一律應斬決妻子財產入官奉旨李紱旣知悔過認罪情詞懇切且其學問尙好著革職從寬免死令在纂修八旗志書館效力行走其妻子財產入官之處俱著寬免七年十月以謝濟世在阿爾臺軍前供出昔年參田文鏡出於李紱蔡珽之授意上召見廷臣命紱隨入諭曰朕在藩邸懶於交接人所共知並不知蔡珽李紱之姓名因馬爾濟哈通曉醫理常在府中行走後補授清江理事同知朕問明於醫理之人伊舉蔡珽以對朕因令其來見而蔡珽辭以職居學士不便往來王府且醫理粗淺不能自信朕聞其言深爲嘉許後年羹堯來京力稱蔡珽才守識見實超羣類朕告以招之未來之故年羹堯因見蔡

珽面言而蔡珽仍堅辭如前朕是以更器重之次年蔡珽補授四川巡撫時朕扈從避暑熱河蔡珽以身屬外員遠行在卽向年熙轉求欲到朕園中一見朕相見時則極稱李紱才品操守爲滿漢中所少是時朕方知李紱姓名也朕御極之初延訪人才以資治理因起復李紱原官旋授侍郎又命辦理漕務旋授爲廣西巡撫伊具摺密奏黃國材收捐積弊且稱黃國材廣通聲氣其子弟親戚布滿朝列今臣盡發其私必謀傾害朕諭以爾公忠爲國朕必加恩保護豈料伊在朕前如此陳奏而暗中則爲黃國材事事周全其工於欺妄如此至署直隸總督徇私廢公沽名邀譽倉穀虧空則代爲隱免屬吏貪庸則曲爲庇護以致吏治廢弛人心玩愒又如塞思黑從西大通調回朕令暫住保定俟各督撫提鎮回奏到日再降諭旨未幾李紱奏稱塞思黑患病不數日奏報病故而奸邪黨與及庸愚無知之人遂有朕授意於李紱而戕害塞思黑之誣語今李紱在此試問朕曾有授意之處否乎在塞思黑之罪原無可赦之理其從前之所以將伊暫留保定者蓋因阿其那允禔俱在京師其事未曾定案而邪黨衆多人心叵測不得不留意防範豈料伊遂伏冥誅而李紱並不將塞思黑自伏冥誅之處明白於衆以致敗匪黨之

疑議則李紱能辭其過乎至田文鏡之在河南公忠爲國而李紱蔡珽以其參劾黃振國汪誠等遂極力陷害朋比爲奸指使謝濟世捏款誣參欲令言臣挾制朕躬必遂其私怨而後已此風何可長也李紱蔡珽著交部訊取確供入於謝濟世案內歸結尋廷臣遵旨訊紱並請交刑部治罪得旨寬免十三年八月今上御極九月命給侍郎銜管戶部三庫事十月補戶部左侍郎仍管三庫十一月奏言近來督撫諸臣往往疏請揀發人員備任使而候選之員亦藉之以僥倖躁進及赴該省缺少人多有四五年不得官者多羈縻失所而九卿驗看又不過取辦俄頃別無考驗之法且揀發分發變簡爲煩徒費章疏應請停止疏下部議除雲貴川廣甯人仍准題請揀發外餘省概停從之乾隆元年正月奏請增派翰詹科道磨勘試卷得旨允行五月以保舉新進士過多又在朝班囑九卿保舉奉旨詢問紱奏臣多言滋事今懍承天語訓誨永絕妄言諭曰朕卽位以來並未因臣工多言卽加以處分者今李紱明係妄舉乃自謂妄言避重就輕希圖蒙混著交部嚴加察議尋議降二級調用十一月補詹事十二月充三禮館副總裁二年五月遣祭夏禹王等陵十月丁母憂六年三月充明史綱目館副總裁尋補光祿寺卿六

月充江南鄉試正考官八月授內閣學士絳平日講學謂朱子道問學之功居多陸九淵尊德性之見爲卓上躡其言八年以病致仕陸辭上問有所欲陳否絳以慎終如始對賜以詩曰三朝曾侍陛七十竟懸車進退誠無忝邱園信有諸病餘宜樂志老去尙耽書素悃依閭魏高年息闔廬學嘗兼慕陸節應上同蘇尤喜臨辭闕嘉謀實起予十五年卒孫友棠原任工部右侍郎

### 孫嘉淦

孫嘉淦山西興縣人康熙五十二年進士改庶吉士散館授檢討雍正元年九月晉國子監司業十二月充江西鄉試副考官三年提督安徽學政四年七月授祭酒九月調順天學政十二月入直南書房五年十月疏言八旗官學生由佐領申送國子監考錄酌定年幼學清文稍長學漢文每旗額滿洲六十蒙古二十漢軍二十缺出通一旗揀選不拘每佐領各送一人之例現在官房狹隘另撥寬敞者居住酌給錢糧俾專心誦讀疏入議行十一月考試八旗文童正紅旗佐領常鼎倩槍手冒子常克試入學嘉淦查參治罪上獎其秉公下部優敘加二級六年正月署順天府尹二月疏參古北口監督傅紳於昌平州屬喬子村蘇家口黃花

城私立關稅橫徵革職論罪如律四月丁憂回籍七年特旨授順天府府尹八年二月充會試副考官三月疏請選拔八旗生員入監肄業學成量補助教等官從之六月授工部左侍郎仍兼府尹祭酒事九年充經筵講官十年二月調刑部尋署吏部侍郎十月充順天武鄉試正考官十二月引見期滿教習奏對失實諭曰孫嘉淦於雍正元年尙係檢討朕看其人似屬樸實屢加遷擢數年間官至侍郎望其殫竭誠心爲國家宣猷效力乃伊偏執自用從前屢有陳奏皆迂闊瑣碎不可見之施行朕訓其開擴識見至近日則緘默不言矣伊爲祭酒乃瞻顧私情將親弟孫揚淦薦爲監丞行事乖張士論不服以致孫嘉淦聲名大損國子監教習自應分別用舍以示激勸卽稱職人員之中有可膺牧民之寄者亦有可勝司鐸之任者是在祭酒秉公陳奏始免冒濫名器用違其材之弊今於引見教習時遽稱宋鎬一班六人俱屬可用及朕詢問忽稱方從仁實不堪用任意反覆顯係欺罔應加重懲以爲人臣詐妄負恩者戒著革職拏交刑部究擬具奏尋議照挾詐欺公律擬斬得旨孫嘉淦免其治罪著在戶部銀庫效力行走十二年署河東鹽政十三年七月疏言鹽池之西有硝池一其西又有小池六皆產鹽附近居民或

私澆私曬或以硝版和官鹽致味苦澀引張壅滯亟宜設法嚴禁而鹽官皆駐運城距遠稽察難周查硝池小池皆在解州境該州州判職務甚簡請令專司巡緝再鹽池北岸係澆曬之場弓兵斗級皆在池北其南岸地方遼闊奸匪竊鹽此爲淵藪且迂迴百有餘里私鹽最易透漏請設馬快八名令運城巡檢督緝又疏言殺虎口監督於邊關收鹽稅從未知會鹽政無案可稽請每年收稅數目則例一併知會查覈至口外蒙古鹽原不禁邊民買食但進口宜立規條行銷宜有界限請敕山陝督撫詳查沿邊州縣應食蒙古鹽處會同鹽政酌定毋令侵越其載鹽進口定稽查收稅例遵行又言每年鹽政養廉萬三千兩應減爲八千兩運司一萬兩減爲六千兩皆足敷用以下無庸議減又言鹽池設弓兵二百五十三每名月給銀五錢食用不足請月增銀五錢皆下部議行八月今上御極命來京以侍郎用九月補吏部右侍郎十一月晉都察院左都御史仍兼吏部侍郎事乾隆元年四月命同左都御史福敏查廢員案五月嘉淦參奏福敏偏執又經年不至署諭曰孫嘉淦與福敏係同堂辦事之大臣參商如此若不從重議處無以警戒將來著總理事務王大臣查奏尋嘉淦瀆奏失大臣體應降一級福敏遲緩拘執應

降三級均准抵免調七月充江南鄉試正考官十一月遷刑部尙書二年三月兼管國子監事五月條奏太學事宜一六堂肄業人員每堂定額內課三十外課二十擇品端文優年壯學勤者充補一諸生於時藝外令各明一經治一事做宋胡瑗立經義治事齋例俾爲有用之學一肄業期滿拔貢生有經明事治才品卓絕或才未裕而學識醇正者分別等第帶領引見一等分發知縣二等卽用教職部議肄業期滿拔貢生分發卽用未免過優應以知縣教職分別選用餘如所請七月充律例館總裁九月充順天武鄉試正考官十二月充經筵講官三年四月遷吏部尙書仍兼刑部時有僞造嘉淦奏稿者傳播流言諭曰一月以來京師喧傳尙書孫嘉淦密參在朝多人如大學士鄂爾泰張廷玉徐本尙書公訥親尙書海望領侍衛內大臣常明皆在所參之列諸臣皆朝廷簡用之人守法奉公實心盡職而鄂爾泰張廷玉尤係皇考特簡之大學士爲國家棟梁以孫嘉淦較之識見才猷豈能與二人比朕特以操守廉潔向有端方之名故屢加擢用非以其才識在二人上也如其才識在二人之上朕何難卽用爲大學士而仍在尙書之列乎且朝廷政務正賴宣猷佐理豈有將諸人悉行罷斥專用孫嘉淦之理至諸臣有



可參之事孫嘉淦何不登之露章而乃見之密奏既云密奏則惟孫嘉淦自知之伊又豈肯漏洩於人以招衆怨是或忌嫉孫嘉淦之人造爲此說以排擠之耶或趨附孫嘉淦之人造此以揚其特立孤行之直名耶但傳言已久姑不深究其令步軍統領巡城御史嚴禁之八月充順天鄉試正考官九月直隸總河朱藻誤公貪劣爲總督李衛所劾命偕尙書公訥親往鞫得實革職論罪如律十月署直隸總督尋命實授疏言永定河南北兩岸現議建閘開引河查北岸之張客閘不必石工但建草壩分洩水緩不致衝刷水漲不虞洶湧南岸之金門閘已築石工但上下宜多建草壩使南洩之水常多水小仍歸引河水大聽其漫流將來草壩朽壞舊河悉改而南卽以淤高之河身障北趨之路天然隄岸堅實可恃下部議行十一月疏奏刁民王宰謀吞生員馬承宗產賄太監劉金玉等投獻貝勒允祐門下請交刑部究審允祐交宗人府察議諭曰孫嘉淦履任伊始卽能秉公執法據實糾參甚屬可嘉著交部議敘尋命兼管直隸河工先是順德府民焦普爲奸徒郭允樞以邪教誣陷至是嘉淦審明奏釋治允樞罪四年正月疏言前奏金門閘上下多建草壩使河漸復故道但建壩必開引河誠恐汎水大出不無旁決今於

金門閘下增設草壩一其引河不必復挑卽歸金門閘引河中蓋此卽永定河故道由中亭玉帶以達津歸海臣循舊跡開濬其新建草壩四分過水使引河之中時有水流可因勢利導一二年後村莊城垣保護完固然後多開草壩使水大出則故道可全復得旨果能如是誠爲善舉但今尙不可必其如此且試爲之二月疏言熱河喀喇河屯化育溝歲需兵米二萬四千餘石倉儲不敷查承德州四旗通判向經採買備賑除已運外現存米九千餘石鄰近州縣倉庫充裕無須領運請此項留撥兵米仍於採買案內報銷至口外莊頭歲歉交米不能如數請撥司庫銀發八溝同知四旗通判豫買一年兵米運貯熱河等倉三月疏言直隸向設旗莊官專管旗戶一年任滿實心化導者議敘如旗人犯不法等事照地方官失察民人例議處嗣經裁併理事廳轄該丞倅兼管旗民所轄又較旗莊原數過多議敘久停議處尙仍舊例請嗣後失察之丞倅如與州縣同城一例處分否則照該管知府例議處俱議行時上以直隸河工緊要命借總河顧琮悉心辦理嘉淦疏言天津地方南北運河與淀河交會西沽而入於海河臣觀南運河水甚濁與永定河相似一入海河水皆濁流久必淤墊況通省之水會於一線之海河秋潦

時至勢必宣洩不及大學士鄂爾泰前曾奏准於靜海縣獨流地方開引河實下游治水之關鍵但開河易達海難設中途梗阻則漫溢爲患且海口開深又恐潮水倒灌臣等現委員勘通省水道凡衆河交會及入淀入海之路有急宜修濬者卽於今夏興修報聞又言直隸旗圈地畝旗人止收地租民人村莊在圈內者自居祖遺屋租種旗地兩不相涉如民人有占旗地蓋屋及旗人將民人祖遺之屋妄行告訐圖取租者俱照違制律治罪下部議行五月晉太子少保五年九月疏言直隸經流之大者永定子牙南運北運四河與東西兩淀臣議於永定葉淀之東疏引由西沽北入海濬子牙河之新河使上游諸水歸淀開舊河東隄漸引由西沽南入海北運河兩岸去沙裁直深濬減河培補隄岸南運河兩岸再築遙隄濬河身以行正溜安陵鎮建閘一濬減河三十餘里入老黃河以達於海此四河之大略也西淀則開白溝河故道以入中亭玖橋南另疏一河並濬青門河別派分流下游已暢達再將金門閘之西引河改由東道於苑家口疊道建木橋五使瀝水通行至東淀應將上游三岔河淤淺處濬令寬深楊家河卞家河窪等處多疏淀河數道使並行而東會西沽則四河順軌兩淀暢洩各州縣之水可消從之

尋奏永定河改歸故道各工俱竣上嘉之時江南總河高斌進京取道直隸命會同嘉淦等議河務善後事宜十月合疏言永定河應於固安城南霸州城北之間順流東下由津水窪接連東淀直達西沽入海則上游漲水自消霸州城北築護城圍隄保定縣城西千里長隄自新莊迤北至城東路曠村隄根逼溜應加寬厚其路曠以東至艾頭村接連營田圍埝約五十餘里議築越隄作重障又疏言永定河改歸故道一切修防裁省所有石壩引河及築隄放淤可分責各道員其直隸河道總督缺請裁俱議行十二月疏言大名府屬東明長垣等處與山東河南交錯奸匪易藏舊設河捕通判兼管隄工且駐府城鞭長莫及請將河務歸同知管理通判移駐東明專司捕務從之六年正月諭曰昨聞永定河放水經理未善以致固安良鄉涿州雄縣霸州村莊地畝被淹難以耕種居民遷移不無困乏孫嘉淦不能辭其責也尋經大學士鄂爾泰查勘請暫塞金門閘上游放水口嘉淦奏旋開旋築實與放水本意相左將來泥沙壅入玉帶恐爲患更大諭曰此奏固是但大學士等亦係慎重欲籌萬全之意卿不必固執已見總之此事卿所任甚力而辦理未善朕亦不能爲卿諱然朕總以卿爲是者以卿不似顧琮爲游移巧

詐之計耳上於丁亥年巡幸天津閱河御製中亭河紀事詩曰中亭入玉帶玉帶  
卽清河中亭洩渾漲壑窄難容多蕩漾沙遠留至此爲澄波受小不受大此理信  
不磨嘉淦督直時謬聽人言訛謂渾河故道卽此實非他建議放乎此千村歎淪  
過知誤乃改爲民已嗟蹉跎不十不變法語誠不我詔經過得親見悔過成新哦  
是年八月調嘉淦湖廣總督七年五月疏言治苗之法於各寨中立頭人爲寨長  
一崗中取頭人信服者爲崗長使約束而統於縣令城步苗崗五設正副長十綏  
寧苗崗四設正副長八每名歲給工食銀十二兩有過則易置之自可令行禁止  
又疏言城步綏寧兩縣止有九崗設協似覺過重應改設遊擊一駐長安守備二  
左營駐城步老寨右營駐綏寧鎮彝哨歸靖州協轄理猺同知亦駐長安以資巡  
緝綏寧臨口司水路上通靖州運糧較便再令綏寧營守備移駐防護九月疏言  
湖南永綏協之花園汛向無文員專管請將龍團巡檢移駐理詞訟守倉查奸永  
綏右營守備帶兵百會同防查均議如所請十月諭曰前孫嘉淦奏荆襄隄工必  
須親往相度方爲有益今聞行至安陸卽便回省朕思近日襄陽府城有匿名逆  
示若孫嘉淦前往料理固屬不可今因查勘隄工適有此事何以半途而反總督

舉動關係觀瞻孫嘉淦畏惠至此豈不有玷封疆八年正月命來京候旨二月署福建巡撫未赴湖南巡撫許容疏參糧道謝濟世狂縱各款嘉淦奉旨密辦革濟世職會御史胡定以許容挾私誣陷奏四月命侍郎阿里袞往會鞠先是濟世訪擊衡陽縣知縣李澎家人書役浮收漕米經長沙府知府張琳枷責申詳署糧道倉德批結而許容參濟世款內稱浮收事屬風影至是布政使張璨復飭改原詳及批倉德因孫嘉通揭部科事聞諭曰都察院奏倉德通揭上司抑勒換詳一事曾申詳總督孫嘉淦孫嘉淦批令婉曲善處且云審時不問此款等語孫嘉淦身為總督又承旨審辦此案接到倉德揭帖時卽應奏聞審理乃故寢其事不行陳奏而審案內並無一語及倉德所揭情由扶同許容甚爲徇庇俟此案結後交部嚴察議處尋諭曰謝濟世一案許容冤誣鍛鍊孫嘉淦瞻徇扶同不准會審今聞楚省營伍廢弛致盜賊肆行無畏水師哨船無人駕用致有船多於兵之謠是孫嘉淦許容惟事虛文並無實際因而文武效尤上下頹廢其罪已不可問矣孫嘉淦許容著來京候旨九月阿里袞鞠實具奏謝濟世原參革職照例開復止失察衙役犯贓十兩以上降一級留任許容奏事不實張璨扶同換詳革職論罪有差

據札淦照溺職例革職命修順義縣城工贖罪九年工竣授宗人府府丞十年遷左副都御史十二年以老乞休允之十四年特召來京入直尙書房十五年正月授兵部右侍郎八月擢工部尙書署翰林院掌院學士十一月上以嘉淦內廷行走勤慎黽勉特命照現在品級給其子孝愉廕生分部額外行走十六年三月充會試正考官六月教習庶吉士七月諭曰孫嘉淦以所著詩經補注間日進覽於興觀羣怨之旨頗有發明朕亦時折其中從此薈萃成書足備葩經一解著傳恆來保孫嘉淦充正總裁若需用纂修人員令孫嘉淦舉所素知一二人奏聞充補則幾務之暇可資佩文以次成書可詔來學十月充會典館正總裁十七年晉吏部尙書協辦大學士十八年正月獲僞造嘉淦奏稿之犯江西衛千總盧魯生守備劉時達解京鞫實治罪如律八月充順天鄉試正考官十二月卒遺疏入諭曰協辦大學士吏部尙書孫嘉淦老成端謹學問淵醇宣力有年勤勞懋著前因患病卽遣太醫調治並命皇子前往看視尙冀速痊今聞溘逝深爲軫悼著派散秩大臣一員侍衛十員往奠茶酒賞銀一千兩辦理喪務尋賜祭葬如例謚文定子孝愉官至直隸按察使

魏廷珍

魏廷珍直隸景州人康熙五十二年一甲三名進士授編修五十四年遷侍講命入直南書房五十五年充日講起居注官五十六年轉侍讀五十八年命祭告中嶽及濟淮兩瀆五十九年充江南鄉試正考官擢詹事尋遷內閣學士六十一年管理兩淮鹽政雍正元年授湖南巡撫諭曰爾向日爲人清正和平朕所悉知但欲爲避垢離塵以求自潔而不肯任勞怨今膺巡撫重任非當日清高閒散之職可比處事貴剛果嚴厲不宜因循退縮地方利弊之應革應興屬員賢否之應舉應錯須盡力振作一番方冀可收成效二年二月因審辦辰溪縣革生黃先文故殺一案率依鬪殺擬絞援赦請免又會同縣民譚子壽等因姦斃三命率擬斬候均經部駁諭責其草率朦混下部議處尋因咨撥綠旗兵餉應題不題部議降三級調用諭曰魏廷珍向在內廷行走朕知其爲人老成學問操守俱好是以用爲湖南巡撫自到任以來甚乏理煩治劇之才凡料理一切刑名錢穀非過則不及率多罷輒糊塗著照部議調回以京堂用九月授盛京工部侍郎三年授安徽巡撫四年三月題報涇縣戶書王時瑞等假印私收錢糧一案並不嚴審止以追變



家產著落各官賠補爲辭刑部議駁諭曰此事部駁是魏廷珍前任湖南巡撫時甚屬柔懦不能整頓地方是以將伊調回去年安徽巡撫員缺朕因一時不得其人故將魏廷珍補授伊赴任之日朕切加訓諭伊在朕前奏稱力改舊習今觀伊所辦事件仍然瞻徇姑息可見言行不能相符著嚴飭行五年閏三月疏言臣自莅任以來督率清釐錢糧第官役侵虧現在易於發覺而往往匿於數年以前民欠中官吏數易難以清查此弊不清積久終無底止臣請分作二等如徽州府屬民欠至十七萬餘兩者勒限一年寧池太廬鳳滁和等府州屬民欠五萬餘兩上下者勒限六個月責令知府直隸州督率州縣細查如係官役侵蝕卽著落官役並前失查上司分賠如實欠在民卽督催徵解限內不查出知府直隸州降級留任酌予展限准其開復如再徇延卽當與州縣官一並參處又稽查若不親身止憑書吏粉飾將官役侵蝕捏作民欠卽將督令造冊之府州縣分賠仍革職問罪清查後接任官能查出前捏造花名將此捏欠盡著前捏造之府州縣獨賠與接任官無涉接任官不能嚴察致再有侵蝕亦著獨賠不得推諉前府州縣臣更有請者州縣錢糧惟憑交代出結出結後查出虛捏卽干徇隱朦混之咎是以州縣

一經出結莫敢自爲發覺請嗣後有民欠之州縣許於出結後隨查隨報免其處分詔如所請行嗣因清查之限太迫州縣官降罰者多敕部改定原限一年者爲二年六個月者爲一年仍給展限八個月廣東總督孔毓珣因陛見道出江南奏宿州靈璧縣地方溝洫不通雨水停積諭曰魏廷珍身爲巡撫於本省事務漫不關心以致低窪之處被水停注甚屬疏忽怠玩著交部嚴查議處其應行疏濬之水道交署布政使噶爾泰先動正項錢糧辦理皆於魏廷珍名下追補還項以爲封疆大臣忽視地方利弊者戒十一月疏言臣年五十有九精力遠不如前乞內補修書之地俾得自效諭曰汝蒙朕簡任封疆惟務潔己自好於民生國計毫未補益而遽望內轉清要安閒適志以保祿全名如是則爲臣不易之語謬矣汝其勉之果能奮勉精神經理有效令朕嘉悅豈止內補修書之地而已乎七年二月遵旨條議安徽各官養廉俱倣江蘇定議訓飭之五月以自陳用題本爲通政使王廷揚所糾諭曰魏廷珍遵例自陳應用奏本而用題本伊並非不知條例之人且由學士至於巡撫歷任多年上次又曾經自陳而此番忽而錯謬豈得謂出於無心蓋伊之意以爲外任文武大臣題本奏本誤用者朕間常降旨寬其處分而

伊自知無邀免之理特有意誤用甘受參罰使天下之人謂朕之待伊事事苛求而伊之獲譴皆屬無心之過假此一節欲以掩蓋衆愆其用心甚屬奸僞夫本章不合體式而免其察議者或係武職大臣不通文翰或係初經外任未諳體格其情皆有可原又如督撫等有降級罰俸之案而寬免者亦因其人平日爲國家實心效力朕不忍以小過處分是以沛恩於常格之外凡此寬嚴輕重之間朕皆準情度理出於至公如魏廷珍苟且因循朕念其何長而寬其循例之處分今又將明知之例故意錯誤以干參處人臣事君之道固如是乎著魏廷珍明白回奏部議廷珍自陳不職應照才力不及例降二級調用得旨寬免八年三月請將潁州州同移駐方家集專司巡緝兼管水利鹽務部議從之五月調署湖北巡撫九年四月命來京十月授禮部尙書十年二月授漕運總督五月疏言淮安貧民草房葺牆竹籬易於引火臣標現建營房與民舍相連俱以瓦覆費亦不多且可經久上是其言七月疏言漕標城守營兵餉各州縣旋解旋支併無預備請撥司庫銀三萬兩貯淮安府庫兵餉未到遇有急辦之事先爲動支解到補項下部議行九月署兩江總督十月疏言漕標東海營汛改設趕漕船應增兵九十二名並設防

汛千總一管船把總一部議從之十一年回總漕任十二年遷兵部尙書十三年正月充皇清文穎館副總裁二月調禮部尙書九月今上御極命赴泰陵守護乾隆三年授左都御史四年遷工部尙書五年以老病乞休諭曰魏廷珍歷任中外凡事推諉從不實心供職皇考世宗憲皇帝曾屢降諭旨申飭此衆所共知朕御極之初仍留尙書銜派往泰陵料伊或勉勵思奮痛改前非嗣因左都御史缺出復行起用旋陞工部尙書詎伊到任以來並未擔當一事建白一言亦未奏請面陳一語從前習氣並未悛改今又以老病乞休希圖始終保全更冀在家食俸似此因循懈怠持祿保身之陋習斷不可長魏廷珍著革職十三年上東巡過景州廷珍迎鑾賜林泉耆碩額并給還原銜御製詩二章賜之曰杖許扶靈壽衣看服遂初遺榮辭魏闕頤老返鄉閭便道因來爾同堂憶贊予白駒誠不駐林下幾三餘皇祖栽培士於今賸幾人豈無師濟輩獨惜老成倫絃誦遺風在桑麻樂事真如懷退憂志里教勉還淳十六年賜詩曰高年引養客向日弼諧卿鶴髮猶然健葵心不改傾遂初孫著作樂志仲高平別後今三載刪裁可就成尋命賜其子錫麟一品廕生二十一年二月諭曰予告尙書魏廷珍本係舊臣今年將九十道左

迎鑾允稱人瑞伊惟一子前經賞給一品廕生例應內外兼用著加恩賞給員外郎職銜在家侍養以昭眷舊至意并賜廷珍詩曰懸車辭魏闕回駕返蓬廬望九人中瑞無雙林下居精神益軒若風度尙彬彬如娛老詢何物三朝有賜書三月卒遺疏八諭曰魏廷珍簡任中外年近九旬允稱人瑞今春迎鑾道左朕親召見行殿加以優遇復賞給伊子員外郎職銜令其在家侍養忽聞溘逝深可憫惻應得卹典該部察例具奏尋賜祭葬如例諡文簡

### 甘國璧

甘國璧漢軍正藍旗人父文焜雲貴總督逆藩吳三桂反殉難有傳康熙二十八年國璧以父廕授河南陝州知州累遷江南蘇州府同知浙江寧波府知府四十二年擢陝西甘山道丁憂回旗四十九年補山東登萊青道五十二年擢江蘇按察使五十三年遷山東布政使五十四年擢雲南巡撫五十七年二月疏言鶴慶永北皆迤西邊要路今備兵防守宜多儲糧查蒙化麗江等府州縣應徵糧米例係四年折徵一次茲屆折徵請仍徵本色十二月疏言撒甸苗傾心歸順請移武定府同知駐撒甸分防治理下部議俱從之五十九年五月奏雲南迤西向未設

驛今大兵出口自安寧州起至塔城止請添設二十一站又疏言州縣因公挪用虧空錢糧請照霉爛倉穀例革職留任限年賠完其霉爛倉穀者不論在任解任及分賠之知府限內全完准其開復均下部議行先是都統武格將軍噶爾弼會兵進藏議糧專用川運年羹堯奏蜀糧不足兼供滇蜀兵九月國璧偕總督蔣陳錫奏撥運雲南糧上責其不能預先料理幾致遲誤蔣陳錫甘國璧俱革職自備資斧運米進藏雍正元年撤兵二年命赴雲南賠補運糧倒斃牛馬并侵用銅錫等項銀八萬兩十年回京十月授鑲白旗漢軍副都統十一月擢正黃旗漢軍都統十三年五月命隨同王大臣辦理苗疆事務未幾兵部參奏國璧朦混奏免西安糧道祖允焜應追軍需議以降級留任諭曰甘國璧以輓運軍糧貽誤革職已成廢棄之員前歲朕以辦理旗務一時不得其人念伊尙無貪贓劣蹟將伊用爲副都統旋授都統之職實冀其殫心供職以圖後效乃伊狡猾性成諸事瞻徇沽譽毫無抒誠報效之處深負朕恩著革職在都統任內效力贖罪六月疏言八旗世管參佐領等官由外任襲替之人有於得旨後卽請領俸者有於到任後請領者事不畫一嗣後凡有外任襲替者除在軍人員俱令到任後支領從之七月命

管理八旗屯田乾隆元年疏言屯田各戶有緣事咨回本旗者請停補缺將原領田房交州縣賃種部議令國壁實力確查耕種者改爲屯戶照地畝輸糧其咨回本旗者原領田房交州縣賃租國壁等奏酌改屯莊事宜一各戶給田有公有私公田糧石原係儘收儘報今旣改屯應酌定額數照畝輸糧一三堡旗民雜處難於約束請將各戶原領田房交各州縣卽於咨回井戶所遺房地內撥給一八旗屯戶有子者頂補無子寡婦請留地四十畝養贍卽令本屯人代種輸糧俟伊身故將地交官一井田原撥霸州固安永清新城四屬地今議改屯令防禦管轄就近防禦祇有二員請將近霸州者令霸州防禦管轄近固安者令固安防禦管轄一各戶向設鄉長一人督率農務稽察奸匪請仍留供役遇屯長缺出拔補一原設驍騎校應撤回另補但該員回京候補並無房屋請暫留種地俟補缺日令其交地回京部議如所請十一月命往熱河同將軍申慕德訓練兵丁三年七月授綏遠城右翼副都統九月疏言熱河兵一千移駐歸化城係臣帶往請分十起行走從之四年奏歸化城自官兵移營以來生聚日蕃需糧倍昔請撥存公銀採買糧石分貯歸化綏遠託克託城三處命交山西巡撫議行五年四月隨綏遠城將

軍伊勒慎劾原任將軍王常貪婪不職國璧首其侵冒匠役名糧應將王常交部治罪國璧雖經自首咎亦難辭奉旨革職十二年卒

圖理琛

圖理琛滿洲正黃旗人姓阿額覺羅氏康熙二十五年由監生考授內閣中書三十六年轉中書科掌印中書尋遷內閣侍讀四十一年監督蕪湖關稅務四十二年充禮部牛羊羣總管四十四年以缺牲被控革職五十一年四月特命復職出使土爾扈特初土爾扈特汗阿玉奇從子阿喇布珠爾嘗假道準噶爾赴西藏謁達賴喇嘛已而準噶爾台吉策妄阿喇布坦與阿玉奇構怨阿喇布珠爾不得歸請內屬詔封貝子賜牧嘉峪關外黨色爾騰嗣阿玉奇遣使薩穆坦入貢上諭阿喇布珠爾欲遣歸至是命圖理琛偕侍讀學士殷扎納郎中納顏齋敕往諭假道俄羅斯五月圖理琛等自京啟行七月達俄羅斯境駐楚庫柏興以假道故俟其國察罕汗信五十二年正月信至始行回烏的柏興越柏海爾湖而北抵厄爾庫其駐託波爾之噶噶林遣屬博爾科尼來迎噶噶林者彼國所稱總管也圖理琛等欲行博爾科尼言噶噶林令迎天使由水路行而昂噶拉河冰未泮請駐俟之



三月由昂噶拉河乘舟抵伊聶謝柏興登陸五月抵麻科斯科復乘舟由揭的河順流而行所經者曰那里穆柏興蘇爾呼特柏興薩瑪爾斯科狄穆演斯科七月至託波爾噶噶林名馬提飛費多里魚赤者迎至署留八日仍遣博爾科尼護之行抵鴉班沁登陸由費耶爾和土爾斯科越佛落克嶺抵索里喀穆斯科以路寧守凍十月始行所經者曰改郭羅多黑林諾付喀山西穆必爾斯科十一月至薩拉託付是爲俄羅斯與土爾扈特界水自東北來折而南俄羅斯呼爲佛爾格土爾扈特則呼爲額濟勒阿玉奇汗駐牧地曰瑪努託海距此十日程以雪盛不能行五十三年四月阿玉奇遣台吉祥偉徵等來迎五月圖理琛等渡額濟勒河阿喇布珠爾之父納扎爾瑪穆特遣獻馬卻之六月朔至瑪努託海阿玉奇擇吉聽宣敕我使語之曰阿喇布珠爾已賜爵優養欲遣歸爾牧以策妄阿喇布坦惡爾恐戕之爾若欲令阿喇布珠爾歸當自俄羅斯來迎阿玉奇曰我雖外夷然冠服與中國同俄羅斯乃嗜欲不同言語不通之國也天使歸經其國當察其情俄羅斯若以往來數故不假道則我無由入貢矣阿喇布珠爾荷厚恩與歸土爾扈特等復何疑慮於是阿玉奇及納扎爾瑪穆特等各贈馬及方物圖理琛等以越境

無私交卻不受阿玉奇待之有隆禮留十四日筵宴不絕復附表奏謝圖理琛等  
遂行由舊路歸俄羅斯遣護如初五十四年三月還京是役也往返三載餘經行  
數萬里蓋土爾扈特爲俄羅斯所隔遠阻聲教而俄羅斯又故導我使紆道行圖  
理琛自奉使及反命無辱焉旣歸圖理琛撰異域錄首冠輿圖次爲行記一卷呈  
覽上嘉悅授兵部員外郎阿喇布珠爾亦遂留牧黨色爾騰不復遣再傳至其子  
丹忠於雍正九年遷牧額濟勒河四月圖理琛遷郎中雍正元年七月命赴廣東  
盤查藩庫九月卽擢廣東布政使三年正月調陝西布政使四月署陝西巡撫七  
月實授九月疏言西安延安兩府地廣事繁請改商州同州華州乾州邠州耀州  
鄜州葭州綏德州俱爲直隸州分西安府屬之鎮安雒南山陽商南四縣隸商州  
朝邑郃陽澄城韓城四縣隸同州華陰蒲城二縣隸華州武功永壽二縣隸乾州  
三水淳化長武三縣隸邠州同官白水二縣隸耀州延安府屬之雒川中部宜君  
三縣隸鄜州吳保神木府谷三縣隸葭州米脂清澗二縣隸綏德州部議從之四  
年四月奏請支庫銀六萬兩採買芻豆爲西安兵丁備用諭曰圖理琛向任廣東  
布政使時密奏不准官兵預支俸餉廣東及各省原有歲暮預支兩月錢糧之例

伊亦固執不行以致兵丁度歲艱窘怨謗繁興撫臣年希堯強之而後給發隨經具摺奏聞此時朕恐圖理琛在廣東未必相安故改調西安旋有西安巡撫員缺遂爾擢用今圖理琛奏請預支銀兩採買豆草以備用是圖理琛爲布政使時則但知有錢糧而不知有兵丁今爲巡撫又但知邀兵弁之歡心而不復計錢糧之出納身爲大臣乃偏執己私遂至前後大相矛盾況雍正元年題定兵馬豆草折銀之例悉照酌中之價若遇豐年價賤兵丁可得餘銀若遇歉年價貴許該管上司題請增給是兵丁原無歉年匱乏之慮今西安兵丁之豆草請預買以備用則他處兵丁之豆草獨不當預備乎圖理琛身在西安卽欲加厚於西安旗標兵丁豈此外兵丁皆不當蒙惠乎西安總統滿洲兵馬乃將軍延信專責圖理琛卽謂有益於兵丁亦當與延信同奏今妄憑臆見獨自敷陳顯欲侵將軍之職掌著傳旨申飭五月保送游擊查爾扈諭曰嘗見滿洲爲上司則以滿洲爲可信任漢人爲上司則以漢人爲可信任漢軍爲上司則以漢軍爲可信任不思身爲大臣管轄之人滿漢俱有一有偏向則諸事皆不得其平何以服人心而舉庶務前令陝西督撫提臣各保遊擊一員守備一員送部引見朕意以陝西武弁可用者甚多

而征討桌子山等處又多效力有功之人地方大臣當從公保薦以副朕留心人材之意乃圖理琛於遊擊內將查爾扈保送前來查爾扈曾在乾清門侍衛行走用爲陝西撫標游擊滿洲在陝爲綠旗武官者只有查爾扈一人而圖理琛卽將伊保舉豈此外遂無可保舉者乎且查爾扈係朕深知熟識之人又何必進京引見著卽令回任又潼關修造滿兵房屋延信圖理琛特差旗員四人前往監造若云滿兵房屋漢官監造未必合宜何妨指示規模令其照式爲之而必欲差委滿洲謂其不致侵蝕浮冒是明以漢人爲不可信用而以滿洲爲可信用卽有意偏向之明驗矣著交與延信圖理琛不時稽查若所差旗員不善辦理或有侵蝕浮冒或在地方生事滋擾朕少有所聞定將延信圖理琛一併從重議處十月疏言靖邊定邊二所距保安塞膚施三縣甚遠請將靖邊所地丁錢糧歸附近之鎮樂寧塞二堡令靖邊經歷司徵收定邊所地丁錢糧歸附近之磚石鹽場二堡令定邊縣縣丞徵收下部議行尋遷兵部右侍郎五年四月轉左六月調吏部右侍郎八月偕喀爾喀郡王額駙策凌等往定喀爾喀與俄羅斯界十二月仍調兵部右侍郎六年三月追議前定界時與俄羅斯使臣薩瓦鳴礮謝天私立木牌於定

界處所旋焚之擅納俄羅斯貿易人入界又前任陝西巡撫時將天下兵數繕摺私給延信命逮治鞠實擬斬十一月宥免十二月命往築扎克拜達里克城十三年九月今上御極授內閣學士十二月授工部侍郎乾隆元年諭曰圖理琛年老昏庸不勝工部侍郎之任著仍爲內閣學士二年乞休允之五年卒

### 莽鵠立

莽鵠立滿洲鑲黃旗人姓伊爾根覺羅氏初隸蒙古正藍旗曾祖富拉塔居葉赫地天聰時來歸祖莽吉圖崇德三年隨睿親王多爾袞征明過北京至山東屢敗敵兵克威縣城六年圍明錦州擊敗松山杏山兵又敗洪承疇三營援兵順治元年入山海關敗流賊李自成追至望都縣敍功授騎都尉三遇恩詔洊晉世職爲二等輕車都尉十四年由參領擢正藍旗滿洲副都統十五年從征明桂王朱由榔於雲南十七年凱旋追論在軍勦鞠磨盤山敗績事誤坐前鋒統領瑚哩布等罪革一雲騎尉降三等輕車都尉十八年十二月以征雲南時手受礮傷解副都統任康熙十五年卒莽鵠立於康熙二十八年授理藩院筆帖式四十三年遷內閣中書四十四年授理藩院員外郎五十二年任右翼監督五十八年任濟墅關

監督六十一年十一月世宗憲皇帝御極命協辦理藩院侍郎事十二月擢監察御史以精於繪事諭令恭繪聖祖御容雍正元年正月擢入滿洲鑲黃旗以本族人戶另編佐領使管之五月巡視長蘆鹽政疏言長蘆各商行鹽地方有額引全不能銷者有額外多銷者苦樂未均請照代銷例准通融運銷并量增引目庶商無包課之累民無淡食之虞下部議行二年八月疏言雍正元年之引蘆商未領運者十萬餘道臣請寬予展限部議不准良是但衆商實因先運康熙六十一年積引以致元年之引未完請展限二年將現在未完之引每年帶運一半三四年之內積引可以全完此後年銷年額不至壅滯特旨如所請山東運學歲科取文童八名附入府學無廩貢亦無武學莽鵠立請比兩淮河東長蘆一體補廩增按期出貢廩膳銀聽各商自給并添設武學八名從之九月疏言山東額引順治年間二十三萬道自後生齒日繁額引加增康熙五十七年加至四十五萬五百餘道其節次加增引目未經分別州縣正按引數派散於是易銷之州縣則嫌引少難銷之州縣又苦引多商人苦樂不均未免欠課而東運與長蘆事勢迥異長蘆以一商專辦一州縣之引山東則一州縣多至數十商名每名或數十引數百引

不等此長蘆之法未可行於東省也欲得其平莫如均引請以引多之魚臺等三十一州縣額引減去二萬七千七百道量增於鹿邑等二十一州縣行銷庶商因可甦鹽課無欠又以增復引日向係按引分散富商多引者分多貧商引少者分少請照現辦商人三百八十餘名按名均分並得旨允行三年三月疏言東省竈丁原額二萬餘額征丁銀六千餘兩其中有上中下三門九則之分故每丁有完銀一錢六七分至三錢不等自康熙十八年額定由單報部迄今四十餘年未經編審而戶口之消長丁產之貧富迥異乃征收循舊丁多額少者不加增丁少額多者不稍減甚有丁亡戶絕額課虛懸則里甲有包貼之累爲恤竈計莫若編審請自今逐戶清查消耗者開除孳長者增補不分門則按現在丁數均派並遵康熙五十二年恩詔審丁不加賦之例此後五年一編餘丁止令注冊不特窮竈無偏累而竈課亦易征收矣下部議行五月疏言長蘆鹽政惟竈地一項因久未清查圖冊無存有竈戶逃亡荒地被民暗占入民糧者亦有地久典賣於民而糧仍竈戶完納歷年久遠竈地失迷惟知糧從戶徵得地者踞無糧之地失地者納無地之糧民竈構訟皆由於此臣愚以爲宜清查竈地請敕直隸督臣山東撫臣委

員清丈照民地之例造魚鱗冊典賣與民者俱准回贖失迷侵占之地斷歸竈業並嚴懲恃衿抗糧之竈戶以肅法紀庶竈無失業民無爭訟場課易完又請禁仕途投拜門生禁主考求索外任門生抽豐並敕九卿議行是月擢大理寺卿留鹽政任時直省裁併衛所天津始改衛爲州隸河間府莽鵠立奏改爲直隸州分武清靜海青縣近津百里之地轄之又言新奉特恩查議東省民丁攤入地畝徵糧竈丁亦應歸入竈地以廣皇仁但東省竈地瘠薄丁多地少若以六千餘兩丁銀加八千餘兩地糧內每兩應加七錢有零未免太重且竈丁有煎曬之役自應仍足額數不容缺少請以丁銀之半歸入地畝仍以其半於實在竈丁按名均攤則賦額未缺而丁糧較輕下部議如所請十二月擢兵部右侍郎仍留鹽政任四年五月命御史顧琮巡視長蘆鹽政仍命莽鵠立監理七月候補道程之煒條奏雲南鹽務上令莽鵠立核議覆奏長蘆之產鹽以場雲南之產鹽以井事雖不同而大局相似如條奏所云不使竈戶有餘鹵餘鹽并令井官按日冊報此長蘆現行之例也嚴催場官使鹽盡歸坵不令餘剩在灘私梟無所得鹽卽不使竈戶有餘鹽之意也某日某商告運某州縣鹽若干包分司同批驗所稱掣過關造冊報查



卽按日冊報之意也在雲南亦宜行之至如鹽道差親信人各井監查則恐不得其人轉以滋弊不若仍責提舉大使爲便下部如議行十月調禮部右侍郎先是天津詔設水師建營房限秋間完整竣事命莽鵠立偕顧琮監督十一月工未竣諭曰莽鵠立正直有守但性偏執本不能而自以爲知致將營房遲誤著調補刑部右侍郎來京效力五年三月復署長蘆鹽政四月調禮部右侍郎兼理鹽政十月命署甘肅巡撫尋實授六年三月提究禮縣武生何登鼈窩盜窩拐並請革禮縣知縣周紀等職諭嘉實心辦理時西藏有阿爾布巴等作亂上命大臣領兵往鎮莽鵠立赴西寧料理出口事宜奏言豫備軍需米麪料豆草束及西安解到鞍屨澆薄改製如式拮据無誤而西寧道劉之珍知府江洪以驟失夫逃爲總督岳鍾琪參革逮問莽鵠立不早查參部議降調諭曰莽鵠立市恩沽譽袒護屬員若舊習不改其罪不止於降調姑從寬留任尋以援赦擬貸盜犯及審案徇庇屬員得旨切責降二級調用解任回京十月署正藍旗滿洲副都統七年正月擢正藍旗蒙古都統九年七月署步軍統領十年六月調鑲白旗滿洲都統十二月兼管火器營十三年十月署工部尙書十一月調正藍旗滿洲都統自初署副都統時

兼管理藩院侍郎事後數遷調仍兼管如初乾隆元年九月卒年六十有五年病劇上遣太醫診視賜之葭遺疏入諭部議卹賜祭葬如例諡曰勤敏

范時繹

范時繹漢軍鑲黃旗人大學士文程孫兵部尙書承勳子初授佐領遷參領雍正元年正月授馬蘭口副將二月擢總兵四年四月詔署兩江總督八月遷正藍旗漢軍都統仍署總督五年六月調鑲白旗漢軍都統仍署總督疏言江南通州地勢西高東下河水由江入海以通州爲咽喉必水口深通蓄洩得宜則泰州如臯均受其益通州運河入海之口凡三處觀音壩逼近大江地屬浮沙鹽倉壩之水高於江水俱難建閘惟唐家壩舊存閘基距江二十里中間稍淤請復建旁有兩小閘一律開通改爲石涵洞於農田水利有益十二月奏將江蘇安徽各州縣應徵丁銀勻入地畝內徵收以雍正六年爲始均從之先是給事中許承宣條奏揚州水利敕下時繹等定議六年二月覆奏五塘久淤成陸民墾爲田難以改挑惟塘內溝汊築土壩截水塘外帶子溝烏塔溝槐子河可挑通接入運河之水以灌兩岸民田至串場河爲高郵寶應江都泰州興化鹽城如臯等州縣湖河入海尾

閩年久未挑海口浮沙仰面河身淺窄宜挑濬而下河七邑興化地最窪諸水匯歸分流東注有猝新車路白塗海溝界河等河應疏深俾直達場河其場河自泰屬富安場至鹽屬伍祐場王家港牛灣等處宜深挑又泰州城北鮑家壩之運鹽河應築土隄劉莊之青龍橋鹽城之石礎口天妃口廖家港草堰口如臯之苴洋黃沙洋宜增建石閘董家溝徐家涵等處應設涵洞以資宣洩三月疏言江屬蘆洲坍漲不常丈勘之年以漲補坍致彼此混淆請將兩江蘆洲田地遴員清丈分割疆界錢糧案件酌歸附近州縣管理均下部議行是月擢戶部尙書仍署總督六月條奏兩淮鹽務七事一各竈燒鹽處令商人舉幹練殷實者按場酌用數人設竈長巡役查核鹽斤多寡盡入商擔以杜竈丁私賣一各場大使將入擔鹽斤按月冊報巡鹽御史衙門察核一州縣場司設十家保甲遇私販據實首明治罪私鹽變價分別賞給誣者反坐徇隱州縣場司官照例議處一兩淮所轄隔省鹽務案件請飭湖廣江西河南各驛鹽道督緝就近審結一兩淮地方遼闊私梟易於盤據飭官弁兵役巡查緝拏一場員雜職賢愚不等請令督撫將所屬場官甄別留任餘請揀發家道殷實之候選同知等員管理場務一貧民許負鹽四十斤

於不銷官引地方易米度日如有假託運送窩囤嚴拏治罪又言漕標廟灣鹽城二營沿海汛遠兵少稽察難周請於射陽湖口窈子港增守備把總各一兵二百沙船分撥遊巡部議從之七月上以蘇松等處盜風不息巡撫陳時夏不以時嚴拏懲治范時繹戢盜之才亦覺不足詔將江蘇所屬七府五州盜案俱令浙江總督李衛管理七年詔發帑銀交各督撫提督營運濟兵江南督標兵千一百七十應領銀六千時繹慮標員有侵擾弊奏請將應領銀承買入官變價房產交坐落州縣官招租解總督衙門發中軍以備急濟上嘉其妥協時李衛訪得江寧有張雲如者以符咒惑人謀不軌遣遊擊馬空北齋文提拏而時繹及按察使馬世炘回護失察咎又私與雲如往來輾轉關查不解八年二月衛疏劾之命尙書李永陞會鞠得實解時繹任論世炘罪雲如等伏誅五月命時繹協理河東河務七月河東總督田文鏡參時繹於伏汛時安坐誤工請革職嚴審諭曰范時繹乃一旗員朕念其爲勳臣之後加恩擢用諄諄訓誨望其克紹先聲乃在江南總督任內玩愒廢弛因循苟且無一察吏安民詰奸禁暴之善政且其居心行事詐僞不誠巧令朱鴻緒在朕前奏其操守廉潔至於日食不敷朕聞之惻然動念急令江南

江西巡撫等爲伊籌畫養廉之道及查明之後始知伊於應得之項原係收受並不至於艱窘而朕猶欲俾其用度寬餘仍令加增以與之無非成就其操守使之專心殫力於封疆也乃江浙地方漸藏匪類生事不法蠱惑人心朕令李衛悉心查拏又密諭范時繹務必慎密拏解勿使漏網豈料范時繹袒護私交縱容匪類竟有與馬世炘通同作弊之事各犯供據確鑿不能掩飾朕又密諭李衛於審訊定案之時留意保全勿使罹於重罪蓋猶諒其交結黨逆之心不過瞻徇情面之所致且范氏一門現今爲大員者止范時繹范時捷此兩人耳勳臣後裔漸至零落朕心不忍所以委曲成全之者至矣范時繹到京朕不肯令其罷斥廢棄特命料理太平峪吉地工程以爲效力自新之路適因北河總督不得其人於是命伊前往膺茲重任伊出京之時朕面加訓勉伊自陳感恩悔過願圖後效情詞懇切豈料范時繹下愚不移以本身專司之務又當伏汛危急之時田文鏡所委各員俱上緊搶護而范時繹安坐於旁竟同陌路視國事如弁髦視民命如草芥此等負恩溺職之愆在他人尙且不可況范時繹之身乎著革職將一切工程交伊加緊防護俟伏汛過後拏送來京將伊從前所犯罪案悉行查出從重定擬具奏部

議歸於張雲如案內論斬十一月奉旨釋放授鑲藍旗漢軍副都統十年四月授工部尙書兼鑲黃旗漢軍都統七月兼管刑部事尋命兼管兵部事不必再兼刑部十一月兼內務府總管十二年上以時繹玩愒性成革尙書任十三年四月侍衛保柱又以時繹行賄瑣事參奏詔交部治罪尋遇赦釋放乾隆六年卒

### 憲德

憲德蒙古正白旗人姓西魯特氏祖明安達禮官至吏部尙書有傳父善官頭等侍衛康熙五十七年憲德由廕生授理藩院主事尋遷刑部員外郎雍正二年遷郎中四年二月授湖北按察使四月奏臣抵任有原任布政使張聖弼來謁查係虧空革職擬斬監追之犯臣牌行武昌府立拏監禁諭獎其秉公執法十月擢巡撫五年三月請於漢口鎮增設巡檢一員分巡居仁由義二坊以循禮大智二坊隸舊巡檢轄部議從之先是四川夔州府知府程如絲自販私鹽而捕楚民之販私者槍斃甚衆川陝總督年羹堯劾之適四川巡撫蔡珽威逼重慶府知府蔣興仁自盡被劾至京召見陳冤抑且力保如絲爲四川第一好官事下甘肅巡撫石文焯亦言其冤抑如絲遂免逮擢四川按察使至是年羹堯敗上閱其黨汪景祺

逆書備載如絲貪殘不法珽受如絲重賄及文焯妄斷狀於是命侍郎黃炳赴川覆案其事日諭憲德將楚民被害者查帶往鞫已而鞫實如絲珽擬斬決文焯永停給俸憲德尋調四川巡撫疏言川省驛鹽茶三項向皆臬司兼管稽核未周請增設驛鹽道專司其事詔如所請尋請設鹽茶大使從之九月疏言成都府灌縣都江堰口廟祀秦蜀守李冰之子二郎相傳父子鑿山穿江溉田至今民享其利請賜封號疏下部議封李冰敷澤興濟通祐王二郎承績廣惠顯英王十一月奏各屬增設裁改事宜一復設成都府之華陽縣增知縣教諭訓導典史各一裁府屬之稅課大使一改資縣爲直隸資州轄仁壽資陽井研內江四縣裁縣原設之典史改綿州爲直隸州轄德陽安綿竹梓潼四縣改茂州爲直隸州轄汶川保二縣及各土司裁威州併入保縣一馬湖府應裁所屬屏山縣歸敘州府通判移駐馬湖舊治轄雷波等各土司部議如所請是月奏程如絲在監自縊上嚴飭之六年正月疏言上年程如絲斬決部文到在十月二十九日而京報小鈔前五日已到洩漏實由於此請將各省提塘通行裁革上以提塘之設由來已久未便遽革諭九卿確議尋議提塘多係微末職銜承充且無保送不實處分請令各督撫於

本省武進士及候補候選人員內揀選咨部頂補地方官出結有犯分別議處又安置入川人戶事宜一人戶衆多該管官挨查取結編入保甲一戶口姓名人數移查各原籍有犯事故者逐回餘酌撥地畝令墾一願回籍者不必給口糧將姓名人數咨明本籍川省仍造冊存案再至者懲之一川省無著地畝現在清丈事畢應分科則編字號計留川人戶之數按畝均分認墾三月又請留川人戶以一夫一婦爲一戶給水田二十畝或旱地五十畝兄弟子姪成丁者丁給水田十五畝或旱地二十五畝一冊內老幼丁多不敷養贍者臨時酌增俱給照票並牛種口糧分年陞科均如所請行七月疏言夔州關稅向委知府監收請照濟墅准關例差監督一員徵課按年輪替十一月請改成都府同知爲管糧水利同知經理都江以下各堰工並從之尋請令清查地畝之員搜查鹽茶積弊諭曰川省鹽茶二項既經特設道員專司其事自應責成該道令其公誠督察期於清楚倘不能勝任卽屬溺職當予參黜另用賢員今乃言該道亦茫然無端委則設立專官何爲耶至於差往科道京員係爲清理地畝以息豪強之爭奪兼安插流民之得所儘足辦理矣若又將鹽茶等事交手經營便寬予限期豈如該道之久在川省可



比稽察過急必致騷擾民間滋生事故脫有遺漏將來反得推卸且據汝奏內搜查挨查之說更屬謬妄鹽茶積弊相沿已久自應商酌從容清理之法安可如此嚴急從事觀汝一切料理處過緊而欠通變祇圖己身免咎而已不肯擔當從利害實心任事於此一奏心術畢見非朕委信之意也嗣後當深以爲戒十二月奏於達州拏獲年羹堯案內要犯靜一道人得旨議敘加一級七年正月奏天全州應司改流等事一天全改爲州設州吏目各一駐碶門州同分駐始陽一天全州應隸府轄請陞雅州爲府設知府經歷各一增置附郭一縣設知縣典史各一卽以新置之一州一縣及名山榮經廬山三縣歸府轄從之尋定雅州附郭縣曰雅安十月疏言川省州縣先因地廣事簡將雙流等縣裁併今生聚日繁請復其舊成都府復設雙流崇寧彭三縣綿州復設彰明羅江二縣重慶府復設大足璧山定遠縣夔州府復設大寧新寧二縣潼川州復設安岳縣眉州復設彭山青城二縣嘉定州復設威寧縣設知縣訓導典史各一裁羅江驛驛丞驛務歸知縣管理裁打箭爐沿村二驛丞驛務歸雅州同知及爐定橋巡檢管理十二月疏言黎大所地方爲西南孔道漢夷雜處請裁原議之千總改置一縣隸雅州府轄設知縣典

史各一以典史分駐泥頭又建昌之寧番衛已改爲冕寧縣應裁去冕山所千總議從之尋定黎大所新設縣曰清溪八年正月請於新設寧遠府漢境內擇大村堡照義學例建學舍延塾師令熟番子弟俟學業有成往教生番子弟如所請行四月署川陝總督查郎阿奏言川省塾江忠州等屬奸民楊成勳等造妖謠吹螺嘯聚事覺成勳自縊獲其黨陳文魁楊成祿等訴狀怨白等稿內列丈量田地科派需索累民等事有禍冤起於戊申年奉旨清丈民田及上憲愛民如子察冤如神之語諭曰四川清丈之舉始於馬會伯之奏朕惟恐不便於民諭令憲德悉心酌議以定行止隨據憲德奏稱蜀省昔年以來人民稀少田地荒蕪及至底定歸復祖業者從來未經勘丈是以多所隱匿迨歷年既久人丁繁衍奸猾之徒欺其界畔無據遂相爭構訟今應明白曉諭令將所管田畝分立地界各執本名立戶載入版籍每年納糧俱以串票爲據如此則侵隱欺奪之患可以悉除又川省詞訟爲田土者十居七八大率爲界址不清亦非勘丈無以判其曲直憲德之奏如此朕又詢問岳鍾琪據奏與憲德之言相同隨交九卿會議九卿亦以應當舉行合詞覆奏朕於是慎選科臣高維新等前往辦理伊等陛辭之日諄切訓誨

務期剔除積弊安插善良並非爲加增賦稅起見又復頒發諭旨百姓果有冤抑下情准其數十人同到督撫及欽差官員衙門控告爲之秉公審理此從前遣官清丈之始末也其勘丈造冊等費俱令動支帑金各官供應等項俱令從公支給不使幾微煩擾閭閻上年冬月丈量之事將竣朕又念各屬徵糧科則輕重懸殊其田地肥瘠不等則賦稅自難畫一又復降旨凡隱瞞科則等處止據實按則更定至於額糧稍重之州縣卽比照就近適中地方之科則令其核減以紓民力今年正月憲德以清丈事竣具本代達州民謝恩之詞稱通省士民咸稱清理疆界使強無兼併弱無屈抑又荷鴻慈將田不敷糧之戶悉予開除疆界旣已分明額賦尤爲公溥等語朕亦以爲經理得宜矣豈意奸民嘯聚竟引清丈苛虐爲言怨白中公然寫爲奉旨清丈豈非該撫憲德等但以清丈之事稱爲奉旨於己身奏請之處並未曉諭於衆耶陳文魁訴狀內稱上憲愛民如子察冤如神伊旣稱頌川省上司是必憲德等有沽譽干名之道何不將朕之德意廣爲宣播而乃朦混含糊使奸民得以藉口耶憲德旣稱通省士民歡呼感戴何以尙有陳文魁楊成祿此等匪類暗結邪黨肆行誹謗可見平日地方大吏化導之未周董戒之不力

則深山窮谷安保無惑於妖言而妄爲邪議者乎清丈一事既曾奉旨朕豈肯推卸於臣工但其舉行之由始於該撫陳奏而非朕本意朕不肯推卸於臣工臣工又安可推卸於朕耶數年來朕以此事時爲慮念昨據各省謝恩之奏而論似於地方有益其功亦憲德之功若果如奸民所言則該撫失於覺察咎有所歸朕在九重之上萬里之外安能代爲之謀耶著憲德將朕此旨刊布曉諭務令遠鄉僻壤共知之十一月請改成都府屬之松潘衛歸龍安府轄又請復設川北道駐保寧府九年二月又請將平武縣之關家村石子村檢石壩紅豆樹等處歸江油縣轄播鼓坪鄧家渡等處歸石泉縣轄青蓮壩五郎溝等處歸彰明縣轄彰明與龍安府附近請卽改隸龍安並如所請先是建昌總兵趙儒奏請於會川寧番等處開採鉛砂事下憲德議行十年三月紫古別廠商民爲兒斯堡生番所殺憲德言礦廠八處其獲砂多者請仍開採少者封閉以杜弊端諭曰從前趙儒奏請開採彼時朕卽不然此舉詳詢憲德回奏極言有利無害是以交部議行乃兩年以來並無成效徒滋煩擾當日奏請是何意見憲德著交部察議所開礦廠概行封閉尋議降一級調用得旨從寬留任十一年正月諭曰川省爲產米之鄉歷來聽商

買販運從長江至楚以濟隣省之用雍正九年巡撫憲德以川省米價稍昂又復碾辦軍糈奏請暫禁商販此不過一時權宜之計至雍正十年川省收成豐稔米價平減憲德卽當奏請開禁乃至今照前禁遏以致米價不能流通楚省不能得川省之益甚非大臣公平辦事之道況今江浙有需米之州縣望濟於楚省而該撫不令川米赴楚則隣省何以資賴卽傳諭憲德速弛米禁毋蹈遏糴之戒五月請移保寧府同知駐南部縣鑄給茶鹽同知關防又墊江縣新設縣丞移駐高灘場梁山縣丞駐沙河鋪從之八月奏鹽道曹源邠混發引日累商諭曰凡一省中鹽課引務莫非汝等督率之責果曹源邠著有貪婪不法形跡卽當列款糾參若止改撥不當汝等何難商酌合宜而更正之今但云不敢隱蔽祈朕敕部察議竟將鹺政視如無涉然不知是何意見覽奏朕甚鄙汝等有玷督撫統轄訓飭之任也十二月召來京尋授工部尙書十二年六月兼議政大臣七月調刑部尙書兼工部尙書事署滿洲正紅旗都統乾隆元年命赴秦陵督辦工程二年疏劾承辦工程之工部郎中宏通在場私赴鄭州又藉覓料估之人來京日久未歸曠官廢職請交部嚴議尋議革宏通職憲德失察降一級留任五年卒子夢麟官工部侍

耶

碩色

碩色滿洲正黃旗人姓烏雅氏雍正元年由候補小京官授戶部主事遷員外郎五年擢西安按察使兼河東鹽政六年疏言河東鹽池向例撥額引羨餘銀五千兩歲修渠堰而池牆不入歲修請於添設餘引羨餘內歲撥六千兩以三千兩歲修池牆以三千兩貯運庫爲五年大修用此等工程連同不能兼理請揀附近州縣五六員監修疏入下部議行七年上命偕提督岳鍾琪巡撫西林翰逆犯曾靜之徒張熙詭名投書案得實九卿擬罪如律八年遷西安布政使十一年擢陝西巡撫乾隆二年調四川巡撫九月碩色疏報川省陋例相沿火耗羨餘外銀百兩提解六錢名曰平餘充各衙門公用諭曰川省耗羨向因公用不敷每兩完銀二錢五分朕御極以來加惠閭閻減去一錢止存一五之數欲使民力寬餘受國家休養之澤也今據碩色奏不勝駭異火耗報官原以杜貪官污吏之風若耗外仍聽其提解非小民又添一交納之項乎一項如此別項可知一省如此他省可知朕思此等浮多之費取之商民層層剝削其數必不止此難免地方擾累著碩色

永行革除以杜官吏借端需索之弊倘公用有必不可少之項著於存公耗羨內支給報銷三年碩色同川陝總督查郎阿提督王進昌合疏言郭羅克番人數年來結隊行劫向設把總一兵二十不能防範請於附近標協酌委都司守備一員領千把總各一兵二百按年輪班駐劄彈壓廷議如所請又條奏駐防郭羅克事宜一運郭羅克軍糈道路崎嶇腳價不敷請一夫負米五斗每站給價一錢口糧按季運交營員支放每石耗米三升作正報銷一松潘至郭羅克二十二站皆屬番地軍糈委於佐雜不無可慮應派千把總一輪班押運一出口馬步兵工給馱馬一例折銀八兩每鞍屨折銀六錢五分均於松潘廳庫支給一郭羅克霜雪不時自守備以下須製皮衣請守備一員借銀一百兩千把總二每員四十兩外委千把總二每員十二兩馬兵十八每名六兩步兵一百八十每名四兩亦於松潘廳庫動支部議皆如所請四年調山東巡撫五年六月諭曰朕五月間聞山東郟城至蒙陰俱成赤地上年被災地方官不實心辦理民人逃往鄰省者甚多以致拋荒故土未曾耕種兩月來碩色未將雨水情形奏聞巡撫身任封疆應辦之事孰有大於此者特降旨詢問之據碩色奏郟城蘭山蒙陰三縣連歲歉收是以流

移獨多經臣奏明招徠回籍者二千二百餘口而郟城一縣共收貧民一百七十戶大小五百八十口俱已安插接濟並未拋荒故土至收成分數郟城高阜地畝確有七分低窪地畝確有八九分蒙陰高阜地畝確有七分低窪地畝確有九分今時雨豐降秋禾遍野並徵赤地之說毫無確據等語朕覽奏稍慰廬念今據左都御史陳世倌奏稱山東沂州府一帶數百里上年先旱後水二麥俱未播種流民散至湖廣江西者將及萬人湖廣送回饑民經過江寧揚州竟有搶奪之事及到山東碩色並不賑恤且以上年開報收成六分本年尙在徵比錢糧等語陳世倌此奏與碩色前奏迥然不同地方水旱災荒撫綏安輯乃封疆大吏之責碩色稍有人心何致粉飾蒙蔽至此著兵部侍郎阿里衮僉都御史朱必塔馳驛詳勘務期秉公據實不必絲毫瞻顧如有災荒應辦事宜一面辦理一面奏聞閏六月阿里衮疏稱臣等查勘沂州一帶雖非赤地二麥收成不過二三分至四五分而止六月前並未停徵碩色奏殊失實七月上以碩色才識不能開闊不宜大省前任四川地方情形尙係熟悉調四川巡撫七年疏言重慶渝關木稅水漲則木筏順流而下一歲可得數年之木涸則已伐者積於深溝淺壑不能到渝自乾隆二



年部臣議以五千兩爲歲額三年四年缺額三百餘兩經收各員屢以無力賠補爲請五年水漲木多原額外贏餘至三千八百餘兩議全解贏餘請免缺額而部臣終格於行懇恩豁免疏入詔如所請八年調河南巡撫九月碩色子穆克德官光祿寺署正以民人爭地事寄字家奴囑其照應事覺碩色奏請革審諭曰碩色因伊子干預外事據實參奏甚屬可嘉此事尙在未行碩色自必嚴束其子不致滋事穆克德著革職交與伊父收管其餘人等亦著碩色就近外結下部議敘尋加一級十一月疏言前撫臣雅爾圖以豫民不知撙節約爲寄糧法與社倉一體出借每石亦收息一斗以五升爲修倉鋪墊用以五升給原寄之人遇水旱聽領本爲借行之未久有空報寄數穀不入倉者有呈報數多交倉無幾者有旋寄旋領勉强輸納者有名無實請停勸寄專行社倉之法疏入上是之又言豫省存留漕穀勸捐社倉自乾隆元年至七年借出未還者二十三萬四千四百餘石向以災歉分年帶徵仰懇聖恩免息止徵本穀詔如所請先是戶部尙書訥親侍郎梁詩正請裁雍正二年後續添新兵碩色議南陽鎮屬右營兵五十汝寧營兵七十二歸德營兵四十二陝州營兵五十二信陽營兵三十五應裁汰餘新兵一百七

十名留資保衛河北鎮屬募新兵五百一十三已裁四百五十二僅存開封營六十一名差繁兵少應留供差防下部議行時河南按察使王丕烈疏稱河南地產小鹽四十斤以下照肩挑背負易米度日之例不必禁四十斤以上許本地籬筐挑賣外販者禁碩色議豫省鹽土煎淋卽成土鹽礮土硝土之底亦成土鹽名曰小鹽弛其禁則官鹽壅滯奸商轉借引行私且產無定所出無定時未便招商辦課若必稽查老少分別本境外境則巡緝者非誣卽縱請嗣後小鹽止許食用不得煎販照例禁爲便部議如所請十二月疏言豫省社穀責成正副社長請於息穀十升內酌留一升以爲正副社長雜項之用疏入上是之十一年碩色疏參河南學政汪士鐸試文童拔取縉紳子弟試武童不較馬箭止射步箭一士論不服上命戶部侍郎雅爾圖會審褫士鐸職十三年三月山東巡撫方觀承疏請北五省勸輸義倉命碩色議因言社倉外更立義倉分捐穀石仍止此數若僅捐義倉則社倉虛設且社倉散於春歛於秋緩急可貸民猶樂從義倉止以備賑取甲散乙小民心存爾我不能奉行轉滋勒捐仍行社倉便得旨如議十月擢兩廣總督十四年八月碩色疏參左江鎮總兵楊剛交結田州土官岑宜棟違例放債上命

擬剛職擬罪如律十五年正月調雲貴總督七月廣東總督陳大受奏參碩色任廣東總督時徇庇糧驛道明福婪贓各款上以碩色素性柔懦諸事含糊屬員劣蹟一無覺察殊屬徇縱交部嚴加議處尋鑄三級留任十六年閏五月碩色疏報刑訊布政使宮爾勸多收銅斤案上申諭曰碩色等奏到辦理宮爾勸一案甚屬舛謬前此傳諭令其嚴行查辦者因該督等奏宮爾勸於出署日暗行寄頓夫藩臬大員而懷狡詐鬼蜮伎倆則其侵欺屬實是以有卽加刑訊亦不足惜之諭並非謂無論實與不實必當夾訊也宮爾勸如果在廠多收銅斤婪贓肥己則由廠內歲入可澈底清查而其囊橐亦必甚豐如不過沿習陋規及家人私收加秤則漁利甚微與郭振儀案等耳今據供祇收歸公養廉路耗銅斤俱已報解充公而其任所原籍貨產僅止此數已大槩可知何用加之夾訊乎且奏內稱嚴加刑訊又稱刑訊再三茹刑不承徒辦成刻酷之形意謂奉旨刑訊無論虛實不敢不加之三木究之外省辦事祇應虛名雖滿紙張皇焉知非以套夾塞責轉使無知之輩謂將布政使用刑嚴訊乃因查追家產滋傳聞竊議之端碩色等如此辦理甚屬不知輕重著嚴行申飭此案宮爾勸究屬有無入己著再秉公詳晰分別另行

定擬具奏尋宮爾勸以故縱侵盜錢糧杖流如律六月疏言隆茂廠工丁聚至二三萬人勢必流而爲匪宜籌漸次解散之法其出入隘口卽在騰越雲龍州等處從此許入不許出禁其續往則廠民漸少邊防得以寧謐疏入廷議如所請七月疏言滇省各標鎮協營內設管隊頭目爲一隊之長向例本名糧外多食步守糧半分名曰火糧並有占全分者雍正十一年督臣尹繼善請仍給隊日火糧半分所食空糧改養餘丁以充營伍部議以名糧不宜虛占概令招補餘丁尹繼善復以隊長當差需費令給餘丁糧一分卽其子弟年未及歲亦准充補迨後日久弊生兵日成丁子弟不願充補餘丁其充補餘丁者自八九歲至十二三歲不等不能執械差操委屬有名無實請將滇省餘丁三千二百餘名裁汰仍按原請火糧額數先儘隊日精壯子弟充補如隊日無子弟親屬卽挑選招募補足原額於營伍汛防大有裨益疏入廷議如所請二十一年調湖廣總督二十四年九月卒於任賜祭葬如例謚恭勤子穆和蘭現官河南巡撫

傅鼐

傅鼐滿洲鑲白旗人姓富察氏初任侍衛雍正二年授漢軍鑲黃旗副都統尋授

兵部右侍郎三年調盛京戶部侍郎四年五月疏言倉庫關係錢糧盛京戶部庫除掌印監督外設司庫二員接續辦事惟倉止監督一人任滿交代其出入數目有無情弊難稽請選本部賢能章京協辦庶不致虧缺部議如所請並將倉監督照京城吉林一年任滿例年終揀選正副保題更換八月因侍衛任內爲浙江被參糧道江國英關說受賄事發部議革職抵罪諭曰朕從前因傅鼐素性巧詐不守本分曾降旨令隆科多不時稽查乃隆科多將三年內傅鼐所行劣績盡爲隱瞞且奏言甚是安靜今傅鼐諸事敗露卽如騙詐江國英銀萬餘兩人所共知傅鼐亦自認不諱又傅鼐曾在朕前口奏隆科多子岳興阿甚怨其父言我家受恩深重理應將生平所行之事盡情據實奏聞若稍有隱瞞掩飾罪更不可道等語而該旗承追隆科多婪贓罪案審實應追之項則奏言岳興阿並不將伊父藏匿寄頓之贓私據實交出與前傅鼐所奏絕不相符蓋傅鼐原與隆科多交結甚密乃故意枉奏其爲隆科多保全岳興阿之情節顯然著將傅鼐革職鎖拏來京交刑部質審訊明之日從寬免死發遣黑龍江九年七月召赴北路軍營效力十二月給原銜授軍營參贊大臣十年準噶爾賊掠喀爾喀額駙策凌等敗之於額爾

德尼昭賊由推河竄走將軍馬爾賽擁兵不追傅鼐以機不可失請兵殺賊至跪求不從事聞馬爾賽坐罪伏誅十二年八月命偕內閣學士阿克敦副都統羅密宣諭準噶爾台吉噶爾丹策零十三年三月還八月命給都統銜食俸是月今上御極命署兵部尙書十二月授刑部尙書兼理兵部乾隆元年六月疏言刑罰世輕世重乃帝王宜民宜人之權我朝律例布於順治三年酌議於康熙十八年重刊於雍正三年臣伏讀世宗憲皇帝遺詔曰凡各衙門條例有從前本嚴而朕改易從寬者此乃從前部臣定議未協朕與廷臣悉心斟酌而後更定以垂永久者應照更定之例行若從前之例本寬而朕改易從嚴者此乃整飭人心風俗之計原欲暫行於一時俟諸弊革除之後仍可酌復舊章此朕本意也向後遇此等事件再加斟酌若有應照舊例者仍照舊例行臣思聖心惓惓於此蓋必有所軫念而未及更正者也我皇上御極以來皆以世宗憲皇帝之心爲心每遇奏讞時斟酌詳慎臣查大清律集解附例一書現今不行之例猶載其中如竊盜三犯今已改議分別贓物十兩上下遞爲輕重而例內所載乃係贓數不多奏請改遣如遣犯脫逃行兇爲匪今已改議分別所犯情罪遞爲重輕而例內所載乃係卽行正

法此類頗多恐問刑之員援引舛錯吏胥因緣爲奸請簡熟悉律例大臣詳加核議除律文律註仍舊外所載條例有先行今已斟酌定議者改之有因時制宜應行斟酌而未逮者酌照舊章務期平允逐條繕摺恭請欽定纂輯成書頒行以昭畫一七月又言斷獄全憑律例引用貴審全文若摘引律語入人重罪是爲深文周內非平恕也查律載官吏懷挾私仇故勘平人致死者斬監候又載若因公事干連在官事須問鞫依法拷訊邂逅致死者勿論律意本極平允數年來各督撫矯枉過正遇屬員用刑不當誤將在官人犯拷訊致死題參律擬動輒刪去懷挾私仇四字摘引故勘平人一語擬斬監候刑部尙書張照又奏准如將笞杖人犯故意夾拷致死二命以上及徒流人犯四命以上者俱以故勘平人致死律論擬斬監候殊不思既非懷挾私仇其於故勘之義何居若謂在官之人本屬無罪則必有誣告之人應照律以誣告之人抵罪不應以依法拷訊邂逅致死之官抵罪若謂輕罪不應夾訊則命盜等案情僞百出當首從未分安能預定其爲杖笞徒流不行拷訊若謂拷訊不依法則當引決罰不如法之律分別杖徒不應摘引故勘平人之律若謂拷訊不依法致死二命四命以上則當引決罰不如法之律議

以加等不應摘引故勘平人致死之律議以斬罪況案犯受刑後有因病而死者亦當分別請將各省從前以故勘平人致死定擬之案或赦免或減等發落敕法司酌改平允通行遵守均下部議行八月以勒借商人銀兩奉旨傳詢回奏不實部議革職杖徒得旨著革職從寬准其納贖尋命暫署兵部尙書先是傅鼐違例爲內務府總管常載乞廕至是並下部議照例降二級調用註冊二年授滿洲正藍旗都統三年二月因違例誤給署參領和德等俸奉旨發往軍臺效力尋病卒

石雲倬

石雲倬山東德州人康熙四十五年武進士授三等侍衛四十九年補陝西平涼遊擊五十一年遷鎮番營參將五十四年調赴巴里坤軍前效用明年遷慶陽副將留軍前雍正元年回慶陽任二年調河標副將三年五月改授洮岷副將尋擢江西南贛總兵劾前鎮臣黃起憲冒糧二百三十五分勒索規禮九江副將署贛鎮王用侵餉并拔補把總馬成功謝晉索銀帛等物並革職擬罪上嘉雲倬不徇情面據實直陳七月疏言兵丁編造名冊原以稽察奸僞若年貌不符名姓互異冊籍將焉用之臣久處營伍習見僞冊互相頂替前在鎮番慶陽剔清此弊今贛



鎮十六營尤非鎮慶兩營可比請更定舊冊以杜奸僞四年二月詳核兵丁清冊以聞得旨所奏甚是下部議敘加署都督僉事七月擢浙江提督適雲倬丁父憂奏乞終制予假回籍治喪卽赴新任五年三月奏言浙省營伍當積廢後軍裝損壞教場公署已廢揆其致此之由一則惜公費而潤私囊病在侵蝕一則務虛名而忘實效病在矯情前任提臣如王世臣吳都隱空糧數百名一切營制置之度外此侵蝕之尤者及吳陞接任糧餉稍輕尙存公費糧一百五十名造烏槍千桿營伍稍爲整頓王安國署事督臣滿保檄將公費名糧俱裁雖矯情一時實貽誤營伍楊長春到任因公費無出於五營內存糧五十分凡遇領餉季報稍資涓滴張溥署事盡行裁去此又矯情而貽誤者也臣請各營按計百名內存留三名以備公用庶營務不致廢弛又奏營規四款一冊報宜審造四柱清冊開列領銀用銀實數以杜捏飾一經費宜節修葺衙署及鋪墊名色祇許添湊不准冒銷一製造宜覈軍裝旗幟等項責令將備選料造作如法期經久可用一收貯宜謹凡軍器擇高燥房屋藏貯以防損缺交代時驗收並得旨俞允十二月調福建陸路提督六年三月參奏巡撫常賚家人擅坐大轎途遇不避敕該督嚴察四月疏言聞

省歷任提臣馭下無術兵驕將疲營伍大壞必須大爲整剔且各營員弁半係本籍以致積習牢不可破竊思陸路官守如汛防墩鋪錢糧操演等事卽他省人俱能辦理非若水師必須本地人方能熟悉水性周知洋面請皇上於別省人員簡發數名來閩遇缺題補以清積弊又言浙省陸路兵旣不若陝西之精銳水師又不如福建之純熟往往不得其用上年特諭陝督岳鍾琪挑選弓馬嫻熟之兵百名來浙俾臣分發各營教習不數月間浙省陸路兵馬步騎射漸次可觀而水師士卒仍慮生疏請仿此例揀選閩省熟練水兵五十名撥發浙營輪班教習將見風潮礁石在在周知瞭椗斗柁人人熟諳借閩人所長補浙人所短行之數年浙省水師之兵亦不弱於閩省矣六月奏言臣標員弁向有私賣隨糧每名三五兩不等糧出則以養廉不足爲詞懇求上司補足皆起於提臣吳陞專信家人親戚全不破情整飭更難解者營中弓箭盡裁拔補名糧令兵領去官槍省其置弓箭之費一時相習成風人人博寬厚之名不肯任勞任怨汰一老弱兵則以爲刻薄募一弓箭手卽以爲苛求少食數名隨糧則以爲清廉而不究其頂賣之弊虛應故事卽以爲安靜而不問其利弊所關丁士傑承積弊後以吳陞邀虛譽於前

不得不效尤於後此營山所以日弛也臣亟加整飭惟念隨丁一項常祿外設此養廉豈容暗中頂賣今欲永杜此弊似宜按照定例一體補足不令彼此參差臣接收丁士傑所留隨糧六十分查明五營將備千總有隨丁額缺者照數補給共發二十五分而各官養廉盡行補足現留三十五分臣隨帶家人無多足資日用內又發隨糧二十分先製號衣一時將弁各踴躍辦公願先發隨糧以辦緊要軍裝俟公項完日仍還各官養廉如有前項情弊當不時查參以期成效諸疏入上深嘉之八年五月疏言提標中營所轄徐州墟桃州隘二汛在萬山中瘴氣薰蒸官兵病故者多請將駐防徐州墟之守備調回府城其原汛改設長坑地方以桃州隘千總一員移駐再派外委一員步兵一百十名居中扼要至徐州墟設兵十  
一名桃州隘設兵十名卽於長坑汛內按月輪撥以均勞逸下部議行時大軍征準噶爾雲倬疏請軍前效力十二月命馳赴肅州聽寧遠大將軍岳鍾琪委用九年授西路副將軍十年正月賊犯哈密岳鍾琪令雲倬領兵赴梯子泉截擊雲倬遷延不進賊遁去鍾琪以違令縱賊糾參革職解京十一年議政大臣會同三法司訊擬斬決得旨改監候乾隆三年減等擬流四年杭州安置七年九月卒

冶大雄

冶大雄四川成都人康熙五十八年由行伍從征西藏克裏塘巴塘五十九年招撫結敦落籠宗說板多打籠宗等處擒逆惡番僧五雍正元年拔補提標左營把總隨出松潘黃勝關口剿撫熱當十二部落二年正月剿郭隆寺連奪嶺三破寨十五追斬康布喇嘛於西海四月從征桌子山碁子山攻奪山梁戮賊首阿呀子哈隆漢七月追剿羅卜藏丹津擒丹津琿台吉於花海子三年川陝總督岳鍾琪保送大雄引見特授藍翎侍衛四年授貴州撫標右營遊擊五年往古州等處化誨生苗六年正月米貼土婦陸氏叛往烏蒙辦軍需十月遷陝西莊浪營參將七年加副將銜賜孔雀翎領兵赴巴里坤軍營八年五月署督標中軍副將十二月準噶爾賊犯克什圖莪崙磯等卡倫大雄偕總兵樊廷以兵二千當賊二萬轉戰七晝夜拔出兩卡倫兵會總兵張元佐等殺賊無算得旨褒嘉給騎都尉世職賞銀五千兩九年三月授直隸山永協副將八月命署湖北夷陵鎮總兵十年二月實授疏言夷陵距省千餘里向例兵餉兩季兼發於季首領貯州縣庫按月給散秋冬二季七月赴司庫請支春夏二季必俟正月開印後請支往返月餘餉到已

仲春後兵自十二月初領餉度歲無餘候至仲春難免賒借之累請改爲夏秋及冬春兩次支免候開印又臣標五營分防各州縣者半因山路難運俱支折色其半駐夷陵城冬春領折色夏秋領本色春夏青黃不接米價正昂秋冬農有餘粟糴米較易請改秋冬折色春夏本色爲便上以所奏甚合情理令督撫酌行十二年調署山西大同鎮總兵十三年奏劾前任總兵李如柏冒銷營私濫用公項銀千餘兩如柏亦奏大雄挪用製帳房銀廢弛營伍經副都統佛保等訊俱實禡如柏職以總兵銜領班兵往北路軍營效力大雄革職免罪乾隆元年發湖廣以副將用二年五月署衡州協副將十二月實授五年城綏苗獠不法大雄駐長安堡剿老寨江平寨擒斬甚衆焚其巢餘相率就撫下部議敘六年二月擢襄陽鎮總兵三月調鎮筭鎮七年總督孫嘉淦劾大雄貪縱敕革審尋湖南巡撫蔣溥奏審大雄無貪縱事止失察標兵犯贓請照例開復降留命送部引見十年授雲南楚雄鎮總兵十一年調昭通鎮十二年敘剿苗功加都督僉事銜十三年隨征金川五月至卡撒統滇黔兵進剿色底光多等寨並抄出昔嶺中峰之西會總兵哈攀龍任舉兵三面攻礪是月克大小戰礪十石城一平礪百三十六月攻克昔嶺溝

底石城水卡十四年正月經略大學士傅恆奏大雄曾經出兵人尙老成現委任總理營盤甚屬妥協請賞戴花翎允之二月金川酋沙羅奔等乞降撤兵大雄授雲南提督十五年二月敘功加左都督銜五月陞見賞其子繼鈞藍翎侍衛令送父回任十六年疏言藏地喀拉烏蘇等處與準噶爾連界準夷盜竊滋擾是其故智今藏之北鄙卽我之雄邊防邊自可弭盜請嗣後駐藏大臣仍設重兵沿途安臺站以資防守得旨藏中照前駐兵矣此奏具見留心十七年奏劾子繼鈞前至常德接家眷中途私借回民銀有玷官箴奉旨革繼鈞侍衛嗣因大雄見事不可揜先行參奏取巧革提督以哈密總兵效力行走二十年正月署安西提督四月赴巴里坤查驗馬駝軍糧十一月署陝甘總督方觀承奏參遊擊鍾世傑等接收軍營換回馬匹千九百沿途倒斃過多請革職治罪諭曰前據冶大雄奏明四千有零何以該弁所領止千九百餘匹冶大雄並未查明實數冒昧具奏著交部嚴查議奏二十一年正月陝甘總督黃廷桂復遵旨查奏大雄遇事不能悉心酌籌任性推委託詞取巧又將料豆議裁致解營馬匹倒斃不堪部議革職解京治罪四月行至西安卒孫正宗襲騎都尉三十二年諭曰向來綠旗世職無承襲罔替

之例第念官弁等果能宣力效忠勳猷卓越則國家延賞酬庸誼無歧視軍機大臣會同兵部詳查國初以來凡有功冊可稽者分別等差列名具奏尋復奏大雄軍功較著奉旨俟將來襲次滿日賞給恩騎尉世襲罔替

### 來保

來保滿洲正白旗人姓喜塔臘氏康熙三十八年由庫使在批本處行走三十九年奏事處行走四十年授藍翎侍衛四十六年以失儀革職五十年授三等侍衛五十五年以奏事錯誤革職五十七年復授三等侍衛遞擢一等侍衛雍正元年正月管理南苑事二月授佐領四月授內務府總管三年二月兼理奉宸院事十一月內府披甲人等因議裁額聚鬩廉親王府復刼總督李延禧家來保等奏不實革職四年五月授景陵掌印郎中八月授三陵總管九年還京遣往土爾扈特給二品頂戴十二年喀爾喀車臣汗部辦事十三年十月還京仍授內務府總管署工部尙書十二月奏言滿洲騎射較優於漢人沿邊古北口一帶提鎮副參遊守等官請兼用滿洲於控制爲宜從之乾隆元年三月總管咸安宮官學十二月大學士管浙江總督嵇曾筠江蘇巡撫邵基疏請停辦戊午年銅運已清積欠下

部議來保奏言積欠數盈在六百萬自應停辦一年已清舊項但己未以後仍招商採買行之數載積欠復多則停辦之請又難不允臣查戶部銅儲積數十年方餘一歲鼓鑄之用今既停辦一年合以從來所欠缺額約及二年目下市中錢價已覺稍昂停辦之說卽行錢價之昂必甚請敕下部令督撫等出示曉諭聽商人自攜貲本出洋採買不必先給價值該商隨到卽收毋拘多寡但不得尅扣抑勒重滋商累總理王大臣議復允行二年六月上以運河水淺糧艘至臨清以北尤多阻滯由於衛水上游各渠口居民私洩過多敕直隸河南督撫等照前河臣靳輔題定例稽察嚴禁來保奏言水淺運阻查禁不得不嚴但衛水發源河南至臨清五百餘里沿河居民不知幾千萬家需灌之地不知幾千百頃現今秋成在望已非灌溉之期所慮者有司奉行過當後雖運河不致淺阻而一入五月渠口盡行堵塞坐使有用之利置之無用恐不無廢時失業者非我皇上仁育萬民之意也其如何使漕運不致淺阻民田亦得灌溉抑或暫禁於淺阻之年而不禁於深通之歲應令督撫河道諸臣悉心調濟以期兩便疏入命侍郎趙殿最侍衛安寧會各督撫查勘酌議十二月實授工部尙書兼議政大臣四年八月以病請解任



上不允十二月授內大臣賜紫禁城騎馬五年調刑部尙書充律例館總裁初來保世隸內務府六年正月上以其奉職勤勞特命擡入正白旗所立佐領准世襲三月充繙譯鄉試正考官四月管右翼監督六月御史沈世楓疏奏來保誠慤有餘習練不足不勝刑部緊要之任諭曰來保人實可信然沈世楓所言頗中其病倘因此自知省惕則心志虛公而才識亦將日進矣此聞過而喜所以稱賢也七年上以來保善相馬御製相馬歌賜之曰伯樂善相馬車下老驥出今豈無其人來保稱第一曩時有黃海親授相馬術謂不相其皮亦莫稱其力心端德自優萬中無一失天閑雲錦羣一顧靡不悉爲余辨驪黃六飛協安吉此術固云美相人亦可則況茲居八柱亮采汝所職勉此空冀心佐予敷九德是年因審擬福海毆斃贖身家人焚屍滅跡一案擬罪舛錯詔革職從寬留任九年御史和其衷疏劾奉天將軍額洛圖尅扣軍餉勒派旗民並因建橋受賄狀又盛京工部侍郎留保奏請將瑚納瑚海等處所收木稅令各監督遵例報部查核上年建橋時多伐木植請著落城守尉巴海率商折銀交納命來保偕祭酒鄂容安往會同侍郎兆惠查審議奏八月來保等覆奏額洛圖所犯屬實應論罪如律留保所請二事皆可

行從之十年三月調禮部尙書總理樂部兼管太常寺鴻臚寺事加太子太保四月授領侍衛內大臣十二月充玉牒館副總裁十二年三月管左翼監督是月授吏部尙書協辦大學士十二月晉武英殿大學士十三年六月教習庶吉士九月命爲軍機大臣十一月充經筵講官十四年二月金川凱旋議敘晉太子太傅三月兼管兵部事四月解兵部兼管刑部事充平定金川方略正總裁九月仍兼管兵部事十五年三月來保七十生辰賜之以歌曰七十古稀亦常有綸閣中人不多觀居然晉袞臻黃耆平生誠敬獲福厚金門朝夕宣勤久給背精神尙抖擻漢萬石君今其友作歌春酒爲卿壽詞取易達卿祇受勉力贊襄予左右十六年兼管吏部事充詩經館正總裁二十年七月充平定準噶爾方略正總裁二十五年來保年八十復賜詩曰八袞黎貽第祿增三朝禁近亮勤稱溫城過闕毋忘下東海爲閩知有興好合齊眉叶琴瑟徘徊繞膝侍孫曾皤皤元老多黃髮自是明廷大吉徵二十六年五月兼管禮部事二十九年三月卒諭曰大學士來保老成端謹誠篤恪勤年躋大耋久任綸扉宣力三朝勤勞懋著前以患病特命御醫診視並賜參餌以冀速痊昨具摺陳情降旨慰留但令不必兼理部務茲聞溘逝深爲

軫悼著加贈太保入祀賢良祠並賞銀三千兩辦理喪務朕親臨奠醑應得卹典該部察例具奏御製詩悼之曰一世篤勤行三朝禁近臣老成惜多謝厚重有誰倫那問生由命因知壽底真且看市塵上應有輟春人尋賜祭葬如例諡文端四十四年御製懷舊詩列五閣臣中詩曰初供批本職後充侍衛護弓矢固所習慤勤更其素止進恆有常不失尺寸處洊陞掌內府亦久蒙恩遇因命長部曹旋贊絲綸布更踐既已深老成遂獨許雖無赫赫名卻有休休度讀書通大義萬石猶後步

### 史貽直

史貽直江南溧陽人父夔由編修官至詹事貽直康熙三十九年進士改庶吉士散館授檢討五十年充雲南鄉試正考官五十一年提督廣東學政五十二年丁父憂服闋補原官五十六年遷贊善累遷侍讀學士署掌院學士雍正元年三月命在南書房行走擢署吏部右侍郎尋授內閣學士仍署吏部右侍郎七月實授御製詩賜之曰率屬分曹地望崇位躋卿貳賴和衷彤墀迹躡中臺履玉佩聲含曉殿風勿憚賢勞親吏職好將兢業亮天工公忠不負衣冠選槐棘均叨雨露同

十一月充武會試副考官二年二月轉左侍郎閏四月充經筵講官五月疏言直省武鄉試請照會試例擇弓馬嫻熟技勇出羣者另編好字號下部議行尋充大清會典副總裁八月充會試副考官三年四月山西巡撫伊都望疏參原任川陝總督年羹堯於管河東鹽務將其子年富年斌僞編商民隱占鹽窩並私行印票又授意咸寧知縣嚴士俊與曲沃知縣魏士瑛誣參鹽商王欽菴及富民高科等私販勒罰銀命貽直偕刑部侍郎高其佩往鞫得實部議羹堯已於別案革職侯提拏至京正法一等子年斌應革職年富已於別案拏問從重歸結嚴士俊等論罪如律十二月調工部右侍郎四年十月轉左十二月兼理戶部侍郎事五年三月充會試副考官八月調戶部左侍郎十二月兼理吏工二部侍郎事尋兼管順天府府尹六年八月轉吏部左侍郎仍兼理戶部侍郎十月命往福建察審原任巡撫朱綱劾按察使喬學尹及巡臺御史禪濟布劾臺灣知縣周鍾瑄並與原任巡臺御史景考祥互揭二案七年正月審明學尹故出人罪應杖流鍾瑄加徵耗穀賊入已應絞禪濟布受吏役私餽又重債牟利景考祥庇年姪冒籍均應交部嚴議上獎其審擬公當四月署福建總督閏七月疏言各營巡哨兵之設原以防

海口而察奸宄乃包攬客貨偷漏過關臣據閩海關監督準泰咨呈立飭該營將備查拏嚴禁諭曰可嘉之至大凡國家事體皆當不分彼此一秉至公方無忝封疆大臣之任也八月疏言倉穀向有存七糶三之例惟福興泉漳四府積穀年久有司因其地產米甚少買補最難因循不敢糶易紅朽堪虞查四府額貯穀九十五萬五千五百餘石每年臺灣應碾赴泉漳平糶兵米及廈門金門兩標兵米共八萬三千餘石若停臺灣碾米照一米二穀以穀十六萬六千餘石運至廈門令福興泉漳四府屬按積穀之多寡分運各倉將舊穀碾米爲平糶兵米之需各倉陸續轉換旋易旋補輪至六年可盡易新穀存倉嗣後歲歲遵照更易經久可行至臺灣改米爲穀運腳自增四府由廈門運穀入倉亦不能無費查臺灣米賤內地米貴四府倉穀雖照時價酌減平糶尙有盈餘卽以此項加增腳費亦足敷數又言臺灣各營換班兵向派內地千把總管押過臺送往各營收伍卽將期滿兵帶回此輩經過番社恃勢役番勒供酒食柴草牛車稍不如意輒肆凌虐臺灣鎮臣因非己屬不便嚴加約束番社每受擾累請嗣後內地弁員押兵至臺灣時鎮臣於本標另委妥員轉押詔均如所請行十月疏言臺灣革職參將林子龍經總

兵陳倫炯以縱兵聚賭廢弛營伍等款揭參臣到任後提審事均無據卽招會焚  
賊一款亦歷審並未入己子龍曾效力戎行亦得兵民心若遽棄置殊爲可惜請  
量加錄用得旨復子龍原官八年三月請移福清縣縣丞駐平潭從之四月調署  
兩江總督貽直以本籍疏辭詔弗允五月請整葺營汛資防禦上嘉之六月授左  
都御史仍署總督尋請以舊隸江寧府之溧陽縣改隸鎮江府從之九年正月還  
京兼理吏部戶部事時大軍征準噶爾陝甘二省辦理軍需命貽直偕侍郎杭奕  
祿署總督鄭禪寶等率庶吉士六部學習人員國子監肄業拔貢生前往宣諭化  
導八月協理陝西巡撫事十一月擢兵部尙書仍留陝西十年署陝西巡撫疏劾  
罷軟廢弛之提督陳天培總兵徐起鳳均革職十一年六月遵旨議禁燒鍋事宜  
言欲杜燒鍋之原當嚴造麩之禁臣於今歲麥收時遍示民間毋許私自造麩並  
禁晉商赴販日後本地糧食充裕百姓借燒鍋以覓微利亦謀生一道若概禁止  
誠如聖諭恐不無煩擾臣當因時酌量視年歲豐歉審民力盈虛或示禁或勸諭  
務使儲蓄資生兩有裨益諭曰覽奏可謂得因時制宜之意所見甚屬妥協八月  
湖廣總督邁柱請疏湖廣荆子關至陝西龍駒寨河道貽直奏言龍駒寨至荆子

關有丹河夾兩山之中紆折三百七十里巨石淤沙備極諸險夏秋間豫陝兩省民借之灌田築堰蓄流涓滴不容滲漏雨後山水驟發輒斷絳路輓運實多未便臣前因楚米解陝艱難奏請停運於河南府及陝州沿河各屬積穀就近輓輸則疏濬此河尤屬可緩上躋其言十二月調戶部尙書總理陝西巡撫事十二月疏言西安糧驛二道同駐省城所理事煩簡不均請將通省鹽法事宜改歸驛傳道管理將糧鹽道改爲督糧道驛傳道改爲驛鹽道部議如所請十三年三月四川巡撫鄂昌因乖謬不職被劾革審上以鄂昌前署陝西巡撫時貽直曾保薦訓飭之四月請升直隸同州爲府裁知州州同吏目缺設知府通判經歷各一改西安府同知爲同州府同知增置附郭一縣設知縣典史各一其同州原轄之朝邑郃陽韓城澄城四縣直隸華州與所屬之華陰蒲城潼關三縣並現屬直隸耀州之白水一縣俱歸同州府轄直隸耀州與所屬同官縣改歸西安府轄部議從之定所設同州府附郭縣曰大荔七月命還京十一月貽直條奏三事一科道銓除之宜用正途也國家用人惟才原可不論出身但六科有封駁之任御史爲風憲之官吏部掌握銓衡禮部職司典禮請照舊例用正途出身之員一官員遷擢之宜

循資格也資格雖不足以致奇士而可以造中材捐棄階資則倖進者不以爲獎勵之公而陰喜進取之獨巧沈滯者不自咎才具之拙而徒怨進身之無階請照舊例循階按級以次銓除果有才猷出衆治行卓然者仍許破格薦擢一河南開墾捐輸之宜速罷也臣聞河南各屬報墾無慮數千百頃非河灘砂礫之區卽山岡确磧之處皆自古不毛之土非人力所能施甚至墳側河隄皆欲墾以犁鋤數年後按畝陞科捐斥鹵爲膏腴勘石田以上稅小民將有鬻兒賣女以應輸將者又勸捐一節郡縣官手持簿籍不論鹽典紳民慰以好言令其書寫貲鏹隨之實有損國體但承上官意指屬員安敢有違請特簡廉明公正大臣撫綏其地則情弊立見而河南百萬生靈食福無旣疏下總理事務王大臣議如所請是月命貽直往署湖廣總督乾隆元年五月疏言舊例州縣官虧空倉穀革職留任勒追嗣九卿議每穀一石作銀一兩定罪侵蝕至千石以上挪移至二萬石以上俱擬斬候臣思各省穀價平時不過三四錢貴亦不過五六錢若以銀一兩計是該犯實止虧空銀數錢而罪已入於一兩之律況積數愈多獲罪愈重往往計贓罪止徒流而竟入於斬絞重刑者有之再州縣倉穀之外尙有米粟高粱麥豆青稞各色



雜糧其價有倍於穀者有僅值穀之半者今概照每石作銀一兩定罪如侵蝕倉穀至千石卽擬斬其有侵蝕倉米九百九十石以下准徒之類是同一侵蝕贓輕而其罪獨重贓重而其罪轉輕揆諸計贓論罪之條既有未協參以一米二穀之例尤爲未符恐啟法司故出入之弊請於各項食糧內酌中定價通行各省如遇承審虧空之案視其侵挪何項照核定價值分別計贓科罪庶立法平允部議侵挪米一石者作銀一兩穀及雜糧一石者作銀五錢治罪永爲例八月疏言武昌沿城西南一帶當江漢二水之衝舊有長隄日就傾圮應及時修築臣遴員確勘自望山門外王惠橋起至武勝門外土城磯止正岸綿亙千三百一十九丈護岸六百八十八丈工料需銀十萬一千九百三十七兩有奇卽於藩庫所存商捐修築銀及一切公項內動支無庸動正項限三年分段修完詔如所請行二年三月兩淮鹽政尹會一條奏湖廣例銷淮鹽因壞接川粵隣私侵越請將不銷官引之州縣清查或募水商專運或令官運官銷或設公店發賣下湖廣總督酌議貽直奏言楚省所銷淮鹽每年計七十餘萬引淮南運赴漢口小販轉運各口岸行銷內有距漢遠而距川粵近之湖北巴東歸州興山長陽湖南道州寧遠

永明江華新田九州縣時或買食隣私蓋因商販不肯賠本而運鹽民情萬難舍賤而買貴如巴東等處萬山中距漢口二千餘里運費每斤非三四分莫辦而本地鹽價貴不過一分商販安肯賠墊已資運赴折本莫售之地此募水商轉運之難也准鹽既難運行而該地之民距川粵行鹽地近輒就趕集趁墟之便以米穀買換零鹽若令官運官銷勢必照本發賣強民舍賤買貴誰肯率從如照隣境之價則必貼賠運費州縣養廉有數何以堪此此官運官銷之難也至設公店之議更不可行巴東等處地瘠人稀卽盡食准鹽爲數無多勢必減價行銷是欲淮南舍現獲之原貲而清無益之綱地鮮有不陽奉陰違者夫兩淮鹽課楚省約居其半每年通計額引有增無損與其更張而公私交困孰若仍舊而商民兩安部議如貽直所奏行時湖南城步等兇苗蒲寅山等糾黨肆劫貽直偕巡撫高其倬調兵督剿盡擒之諭曰此次辦理苗搖之案史貽直高其倬調度有方俾兇首黨惡各犯不至漏網甚屬可嘉着交部從優議敘加三級九月疏陳洞庭湖舵桿洲石臺工程善後五事一臺北面應增築護隄以緩水勢一存贖帑銀應交商生息以資歲修一歲修石料應預爲貯備一歲修應責成專員經管並立勸懲之法一舵

梹洲等處應增設救生船部議從之尋命回部辦事三年七月調工部尙書十月調刑部五年五月兼理兵部事九月調兵部尙書教習庶吉士御製詩賜之曰中樞掌九伐峻望近三台經畫資心膂訐謨佐鼎梅常存葵藿志不愧棟梁材書思恆有納嘉猷佇獻來七年正月遷吏部尙書七月署直隸總督十二月協辦大學士九年正月授文淵閣大學士命紫禁城騎馬十年三月充會試正考官加太子太保十三年以雲南知府樊廣虧空參本錯擬票簽諭革職從寬留任詳陳世倌傳十四年兼管工部事十五年三月上西巡回鑾貽直接駕後遽退召見不至訓飭之八月兼理刑部事十八年兼理吏部事二十年前任廣西巡撫鄂昌與逆犯胡中藻唱和案發詞連貽直爲次子署甘肅布政使奕昂屬鄂昌事諭曰鄂昌與史貽直札稿內有玉成佳器之語朕初不知所指召問史貽直則據奏曾經致書通候並未有所請託今訊之鄂昌則供稱史貽直致書與伊有河道之缺已補甘藩之任尙懸乞爲鼎力玉成等語而史貽直尙不承認及刑訊鄂昌又問及此條仍與初供無異鄂昌所犯之罪甚重何獨於此一事而加刑堅訊且伊向日尙與史貽直相厚何至誣賴史貽直又已年老本不至因此事而革職刑訊也但爲伊

子請託於前又不據實陳奏以圖掩飾且向日亦非安靜之人本應重治其罪念其邇年尙屬勤慎奔走著從寬以原品休致勒令回籍閉戶家居尋奉旨史奕昂來京以京員用二十二年正月上南巡貽直迎駕於沂州命在家食俸賜詩曰歸林緣舐犢辭閣匪思鱸能改無過矣知仁何礙乎迎鑾方出戶咨政挈同途風度猶然在江山秀助腴三月諭曰原任大學士史貽直從前爲伊子致書是以令其休致兩年以來家居安靜業已改悔茲朕南巡前來接駕見其精神未衰尙堪任使且宣力年久本係舊臣現在內閣需人史貽直著仍補授大學士入閣辦事六月諭曰聞大學士史貽直中途患病旅次恐無良醫深爲軫念着派乾清門侍衛扎拉豐阿帶同御醫粟世功馳驛前往診視七月至京兼理工部事十二月加太子太傅二十三年二月充經筵講官二十五年八月上以貽直爲康熙庚辰進士今週甲尙在朝洵昇平人瑞賜詩曰庚辰先進杏花芳週甲重看葢榜黃早識家聲孝山史羣稱風度曲江張本衙門有新佳話國史院無舊等行寧獨摺紳慶人瑞贊予文治底平康十一月諭曰大學士來保史貽直年俱八旬嗣後凡遇祀典不必隨班行禮二十六年正月貽直生辰賜詩曰皤皤黃閣領朝裾矍鑠聯行尙

弼予前度庚辰淡墨榜兩看辛巳澣金書滿千卷似沈鈔罷開八秩過白注餘聲望老成需贊治名高漫卽擬懸車十一月恭祝太后七旬萬壽貽直與來保預香山九老會御詩比之宋臣富弼文彥博有元豐二相今猶在履道諸賢詎可方之句十二月特命於紫禁城內乘轎二十七年以年老請解任諭曰大學士史貽直年逾八旬精力雖非強健然在大臣中齒宿資深足爲班聯盛事茲以老病奏請解任情詞懇切因念部務煩劇高年難以兼顧所有工部事務著不必兼攝以示體恤至內閣禁地事清朕已恩准史貽直以肩輿入直原可無庸解退嗣後可令自行酌量或嚴寒盛暑卽不必每日進署俾可從容頤養副朕優眷至意尋諭曰史貽直已不兼工部事務著於戶部飯銀內每年賞銀五百兩二十八年正月貽直直第三子山西知府奕瓌俸滿引見請留京侍養特命以四品京堂用五月貽直卒遺疏入諭曰大學士史貽直練達老成年登耄耋敷歷中外參贊綸扉宣力三朝勤勞夙著前以衰老乞休奏請解任朕降旨慰留並令肩輿入直俾得從容頤養近聞患病遣醫診視尙冀速痊茲遽溘逝深爲軫悼着派皇六子前往奠醊加贈太保入祀賢良祠並賞銀二千兩治喪應得卹典仍着該部察例具奏尋賜祭

葬如例諡文靖子奕昂官至兵部侍郎

清史列傳卷十五終

清史列傳 卷十六

大臣畫一傳檔正編十三

陳世倌

陳世倌浙江海寧人父詵官至禮部尙書有傳世倌由康熙四十二年進士改庶吉士散館授編修五十年七月充山東鄉試副考官十月充順天武鄉試副考官五十二年遷左中允五十三年四月遷侍讀五月充廣東鄉試正考官十月充日講起居注官十二月丁憂服闋補原官五十七年命祭西嶽五十八年充順天鄉試副考官五十九年提督順天學政累遷侍讀學士六十一年丁憂雍正二年服闋擢內閣學士閏四月授山東巡撫七月疏言社倉通有無濟豐歉古今可行每鄉立印簿捐者自登穀數不拘多寡酌給花紅匾額示獎舉公正鄉約三人輪管出入冊報官查春夏之交民間乏食借領至秋每石收息二斗歉則分別減息十年後息倍於本祇收加一第小民可與樂成難於慮始請令各督撫於一省中先行數州縣俟一二年後著有成效然後廣行下部議行九月疏言左道惑民律有

嚴禁如回教不敬天地不祀神祇另立宗主自爲歲年黨羽衆盛濟惡害民請概令出教毀其禮拜寺諭曰此種回教原一無可取但其來已久且彼教亦不爲中土之所崇尚率皆鄙薄之卽彼教中之稍有知識者十居六七若似有出於不得已之情從無平人入其教門之理由此觀之則彼之所謂教者亦不過止於此數非蔓延難量之事至彼之禮拜寺回回堂亦惟彼類中敬奉而已何能惑衆朕令汝等嚴禁新奇眩幻駭人動衆之事如僧道回回喇嘛等其來已久今無故欲一時改革禁除不但不能徒滋紛擾有是治理乎未知汝具何意見也三年七月奏山東通省丁銀請攤入地畝徵收部議從之九月遵旨會議沿海防衛五事一僻處礮臺虛設應撤衝處應另建堅實一弭盜莫如保甲應飭文武官協力嚴查一窩家應搜變產賠贓並着落鄰保查察舉首得實獎之徇隱枷責一文武官皆有緝盜之責胥役追賊至汛汛兵不卽協拏以致疏脫應按盜賊名數議處一分遣標員遊巡倘不竭力捕賊分別參處如所請行四年十月丁母憂回籍命督修江南水利尋因遲誤工程革職仍命赴曲阜督修文廟十三年十月署左副都御史十二月實授乾隆元年十一月疏陳臺灣事宜一在臺置產流民例得搬取妻子



不許攜帶親族但日久弊生應確實查驗其未置產並不守分之徒概禁搬眷出洋一熟番地多爲漢奸所占請敕巡臺御史及臺灣道親勘招墾定以疆界並請停番民樂輸穀石一命盜案內向俱招解內地院司完結但過海動經歲月請由臺灣道招解御史審結知會內地督撫下部議行二年授倉場侍郎三年調戶部左侍郎四月遷左都御史五年六月疏言近今各部院辦案及議覆事件並奉旨發九卿會議之案每多遲延請敕照定限完結違者議處從之九月轉工部尙書六年授文淵閣大學士七年三月充玉牒館副總裁六月教習庶吉士八月疏言江南淮徐鳳泗等處被災特命部臣周學健往會督臣德沛辦理查黃淮泛漲皆有分洩故道以達江海挑濬宣洩又有成案可稽請敕河臣星夜疏濬引導異漲歸江歸海又請令該督撫遴選幹員經理撫卹並令久於其任十一月諭曰今歲江南疊被水災河防水利甚關緊要深爲懸念大學士陳世倌屢次陳奏朕見其中有中肯綮者必有以成底績之功著卽馳驛前往會同周學健等查勘辦理尋奏水勢高下情形必須親勘請帶測量人員同往從之十二月同周學健等奏積水消涸情形并辦理事宜諭曰朕將謂大學士陳世倌別有奇謀碩畫且臨去時曾

奏於歲內可使積水全消覽奏仍俟明年二三月間且所辦理原不過就高斌周學健所辦理之規模而潤色之又何必勞此一番往返乎九年正月給假回籍請開缺上不允四月奏言臣出都道經山東聞有劇盜田豬頭等屢劫州縣署及庫又沛縣巨窩姚乾等叅盜有年現均就獲因各省俱有劫案關訊待質臣以爲此等大盜但數案審實卽應題請正法若因彼此關訊連年不結恐有疎虞請敕山東巡撫喀爾吉善等就案速結毋使巨盜久稽顯戮上韙其言十月假滿還職十年加太子太保十三年九月命紫禁城內騎馬十一月以錯擬票簽諭曰雲南巡撫圖爾炳阿續參趙州知州樊廣德虧空一本例應撫參督審今內閣所擬票簽仍交該撫審擬經朕看出查詢始據改正且請交部察議夫察議者不過降罰了事而已然以五人在閣似此向有定例之事竟至辦理錯誤使朕萬幾之煩尙須審詳至此於心何忍豈不有愧張廷玉來保陳大受均在軍機處行走尙有交辦事件或係一時疏忽而陳世倌史貽直著交部嚴查議奏尋議革職得旨陳世倌自補授大學士以來無參贊之能多卑瑣之節綸扉重地實不稱職著照部議革職又諭曰朕前降旨謂陳世倌多卑瑣之節並非泛論卽如伊乃浙人而私置產

兗州冀分孔氏餘潤豈大臣所爲今既革職著諭山東巡撫不准伊在兗州居住十五年八月來京恭祝萬壽賞原銜令回籍十六年三月命仍來京入閣辦事九月兼管禮部事十七年充會試正考官十九年再充會試正考官策問黃河下流諭曰策問時務用覘士子學識主試官不當以已見立說上年順天鄉試問黃河北行故道今春會試問黃河下流皆孫嘉淦陳世倌一已私見究亦空言無補若以此爲去取將啟士子窺探迎合附和之弊其漸尤不可長嗣後有似此者必治其罪二十二年以老病乞解任諭曰大學士陳世倌雖年近八旬而精力未甚衰邁簡任綸扉歷有年所今以老病奏請解任回籍情詞懇切大臣中齒宿望高宣力久任皤皤黃髮爲班聯表率誠熙朝盛事然老倦而思故鄉亦常情所有果其以衰老陳情者朕自由加體卹俾得榮歸鄉里以資頤養初未嘗強爲羈留如張廷玉之年力旣衰朕卽允其歸田迨後輟轉獲咎乃其自取實非朕初意所及料也且陳世倌奏內旣稱爲其生母修改墳塋此亦人子未竟之責自宜及身而爲之著照所請准其回籍現任漢大學士原有二人不必開缺另補聽其自爲酌量如一二年後精神清健仍可來京辦事以昭優念老臣之意尋命加太子太傅二

十三年二月陛辭御製詩賜之詩曰夙夜勤勞言行醇多年黃閣贊絲綸陳情無那逾孔緯食祿應教例鄭均自是江湖憂未釋原非桑梓隱而淪老成歸告能無惜皇祖朝臣有幾人賜銀五千兩命在家食俸世倅未及行病四月卒諡曰大學士陳世倌老成端謹學行兼優簡任綸扉勤勞懋著前因衰老乞休情詞懇摯業允其所請復降旨優加錫賚並賦詩以寵其行俾得榮歸故里頤養天和俟一二年後精力未衰仍來京供職永承恩眷旋聞抱疴邸第特遣御醫診視時命大臣存問冀其速痊得遂歸田之願乃聞溘逝朕心深爲軫悼著再加恩賞內庫銀一千兩經理喪事派散秩大臣一員帶領侍衛十員前往奠醊應得卹典仍著該部察例具奏尋賜祭葬如例諡文勤

阿克敦

阿克敦滿洲正藍旗人姓章佳氏康熙四十八年進士改庶吉士五十一年授編修五十二年二月充河南鄉試副考官十月充日講起居注官五十三年十二月特旨阿克敦學問好前典試聲名亦好著授侍講學士五十五年轉侍讀學士五十六年九月朝鮮國王李焯病日遣使來購空青命阿克敦賚賜之十月充經筵

講官尋遷詹事府詹事五十七年十月擢內閣學士六十一年四月朝鮮國王李昫請以其弟李吟立爲世弟命阿克敦偕侍衛佛倫往封十月擢兵部右侍郎十一月兼翰林院掌院學士時恭纂聖祖仁皇帝實錄命阿克敦爲副總裁雍正元年三月恩賜二品廕生四月充日講起居注官七月命專管翰林院掌院學士事尋充四朝國史副總裁二年五月充大清會典副總裁十一月充繙譯鄉試副考官十二月命偕散秩大臣舒魯封李吟爲朝鮮國王三年二月充治河方略副總裁七月兼左副都御史十二月授禮部左侍郎仍兼兵部侍郎四年三月充繙譯鄉試副考官四月調兵部左侍郎兼國子監祭酒是月兩廣總督孔毓珣奏准汀州府引課知府總其成歲具印領自備鹽價水脚赴潮領運分發八縣協辦銷售上命阿克敦往署總督兼署廣州將軍福建汀州府八屬例銷粵鹽毓珣奏准汀州府引課知府總其成歲具印領自備鹽價水脚赴潮領運分發八縣協辦銷售十二月阿克敦疏言汀州八屬雍正元年至三年其未完課餉銀四萬九千四百二十八兩請仍照前督臣楊琳所奏委官辦理發帑融銷以雍正四年爲始先完額引方輪舊引帶銷庶免新舊混淆其未完銀勒限清款部議如所請每年所銷鹽斤銀除歸還水脚等項仍儘數解庫又疏言粵省瀕海一帶盜賊出沒全賴左

翼碣石二鎮總兵訓練巡防方能安戢聞碣石總兵陳良弼秉心貪黷凡漁船出口俱勒陋規拔補亦多索取左翼總兵藍奉令二子冒名補把總倚勢累兵似此劣員實不宜於重鎮得旨據實上奏殊爲可嘉現採擇勝任之人爾卽具本題參可也初廣東巡撫楊文乾議將高要等五縣圍基頂衝改築石工次衝改作椿埽計費數十萬金借庫銀修築且有開捐之議阿克敦意與相左文乾專摺奏請五年正月阿克敦疏言查廣東沿江之高要高明四會三水南海五縣向有圍基俱係土工開竇建牖以時蓄洩每年十一月後地方官督率鄉民按畝分工加卑培薄民不爲苦官無所費至田畝間有被淹圍基衝決多因江漲但水性不猛非必石土椿埽方能抵禦請仍循舊法令地方官農隙督民修補倘遇江水驟漲遣員巡查以防衝決圍基卽能保固無庸改築費帑且無一勞永逸之理得旨所奏甚是尋請以廣州肇慶屬圍基專遣廣南韶道肇高廉羅道督修與毓珣會疏聞下部議行廣西梧州府蒼梧縣之芋莢山產礦砂奸民聚黨偷挖經毓珣通緝未獲至是阿克敦嚴飭捕役緝獲潘十八譚六等十四名皆有旗械爲首之李亞展亦於陽江緝獲訊實事聞奉諭此案朕時刻繫念今覽此事就緒甚爲慰悅四月調

吏部左侍郎六月署廣東巡撫八月疏劾肇高廉羅道王士俊侵稅羨銀千餘兩請徹底清查疏聞諭曰徹底清查固屬當然但士俊尙屬可用之員當嚴加訓飭令其遷改九月署廣西巡撫十二月疏報廣西省雍正四年分民屯田六十六頃四十五畝有奇應徵銀米水田於六年起科旱田於十年起科部議如所請先是文乾密參阿克敦於廣南韶道林兆惠採買木廠被刦不嚴緝新會縣獲盜犯龍門營汎被刦軍器均囑令屬員審作竊賊從寬批結電白山聚盜多人白日沿刦匿不奏又侵蝕粵海關火耗銀令家人索取暹羅國米船規禮銀請查審嚴追又毓珣奏參阿克敦侵蝕太平關火耗銀並請查追六年六月特旨阿克敦著革職交孔毓珣楊文乾審奏尋文乾卒八月上特遣通政使留保工部郎中喀爾吉善往會毓珣署廣東巡撫傅泰嚴訊嗣留保等奏訊阿克敦稱盜犯承審官覆審是竊非盜並未囑令串供又各盜俱經嚴緝因失事未久旋即離署未題粵海太平兩關火耗銀舊規分作司事束修工食並非侵隱至內地洋船無票者例繳船禮爲雜項公用船戶葉舜德係福建人非暹羅米船向有舊規實非勒取但均未禁革願賠補等語阿克敦所供究屬矯飾除諱盜侵耗輕罪不議外應坐令家人索

取暹羅米船規禮依律擬絞又因士俊前揭告阿克敦袒護布政使官達婪贓不行查參毓珣等遵旨會訊定擬具奏並下部議斬監候七年十二月山東巡撫費金吾以疏濬濟寧嘉祥及江南徐州沛縣水道請派員督修特旨原任侍郎阿克敦前在廣東任內尙無貪贓犯法等情著寬免釋放往江南河道工程效力以贖前愆九年七月上以準噶爾擾喀爾喀游牧命撫遠大將軍馬爾賽由阿爾台進勦授阿克敦爲內閣額外大學士協辦撫遠大將軍軍務十一年十二月命阿克敦辦理扎克拜達里克糧餉十二年六月召還七月西路北路將軍皆言兵力有餘賊勢窮蹙可進剿上特遣阿克敦偕侍郎傅鼐副都統羅密往準噶爾諭噶爾丹策凌以寬大之恩開其迷誤畫清邊界不得踰越十三年四月回京奏稱噶爾丹策凌請將哲爾格西喇呼魯烏蘇爲我喀爾喀游牧地界上以阿克敦等奏摺併地圖密寄北路副將軍策凌詳悉定議尋策凌議奏往者喀爾喀游牧尙未至哲爾格西喇呼魯烏蘇應如所請行至彼處厄魯特游牧必以阿爾台山嶺爲界若游牧逼近防守實難斷勿令過山嶺上從其議閏四月署鑲藍旗滿洲副都統五月署工部右侍郎八月充八旗通志副總裁九月命守護泰陵乾隆元年恩賜



二品廕生二年閏九月管理泰陵工部事務三年正月噶爾丹策凌遣使求策凌  
轉奏喀爾喀與厄魯特以阿爾台山嶺爲界俱照現在駐牧上以其詞恭順命阿  
克敦爲正使偕副使侍衛旺扎爾台吉額默根賚敕往諭定地議界十二月阿克  
敦等率噶爾丹策凌來使哈柳自準噶爾回京奏稱噶爾丹策凌今議定界請循  
布延圖河南以博爾濟昂吉勒圖烏可克嶺噶克察爲界北以孫多爾庫奎多爾  
多輝庫奎至哈爾奇喇博木喀喇巴爾楚克爲界彼處之厄魯特毋踰阿爾台山  
嶺喀爾喀亦祇於扎布堪游牧相距遼遠庶可兩無牽掣又請進藏煎茶並懇貿  
易上以噶爾丹策凌旣遵旨定界嗣後近邊居民各安故土更無爭競允其進藏  
煎茶貿易事欽派大臣與來使哈柳議行是年授工部右侍郎四年七月轉左侍  
郎八月充繙譯會試副考官十二月充一統志副總裁五年三月調刑部右侍郎  
尋轉左四月教習庶吉士閏六月調吏部左侍郎七月充經筵講官六年四月協  
辦步軍統領刑名事務七年三月署正白旗漢軍都統八年六月授鑲藍旗滿洲  
都統十年三月充會試正考官五月充五朝國史副總裁兼翰林院掌院學士六  
月充日講起居注官十一年閏三月擢右都御史兼議政處行走五月授刑部尙

書十二年八月充順天鄉試正考官十三年正月命協辦大學士事務四月奉旨不必協辦是月翰林院奏進孝賢皇后冊文繙譯錯誤奉旨此非無心之過文意不通可比且此文留於中欲細覽交出及看出大不敬背謬之處欲傳旨詢問則阿克敦等皆散去此皆阿克敦因前日解其協辦大學士之故心懷怨望且伊於皇考時獲罪起用朕洵用至尙書數年來實無出衆宣猷之處而每以文學老成自命不得陞用輒懷怏怏阿克敦著革職交刑部治罪部議以阿克敦怨望大不敬依律擬斬監候六月奉旨阿克敦著照革職留任之例在內閣學士上行走效力贖罪仍署工部侍郎事務閏七月上諭刑部事務緊要滿洲尙書員缺朕於各部侍郎內詳悉評量或才堪辦事而踐歷未久或才力未充而統率非宜一時未得其人阿克敦前雖獲罪尙係舊人且其獲罪不因辦理部務錯謬尙可棄瑕錄用著署刑部尙書是月卽以原銜充經筵講官協辦步軍統領衙門刑名事務授鑲白旗漢軍都統九月充會典館總裁又充清漢篆文副總裁十月兼翰林院掌院學士事務充日講起居注官十二月協辦大學士充國史館總裁十四年二月以金川平加中外在事諸臣秩諭曰阿克敦久膺要任歷著清勤宜一體加恩以

昭風勸著加太子少保七月上幸木蘭命留京辦事兼署步軍統領十月賜紫禁城騎馬十二月賜御書協中輔治額十五年七月上巡幸河南命留京辦事九月兼署左都御史十六年正月署步軍統領十九年四月上以阿克敦七十壽辰賜御書贊元錫嘏額五月上幸盛京命留京辦事二十年正月以日疾請假上允之遣太醫診視復經屢次陳情命以原任致仕二十一年正月卒遺疏上得旨阿克敦簡任中外宣力有年上年因患日疾俾予致仕使得安養冀其痊愈今聞溘逝深爲軫惻遣散秩大臣率同侍衛往奠茶酒賞銀一千兩辦理喪事應得卹典察例具奏尋賜祭葬如例謚文勤子阿桂現任大學士以軍功封一等誠謀英勇公

### 劉於義

劉於義江南武進人康熙五十一年進士改庶吉士散館授編修雍正元年四月充日講起居注官入直南書房五月遷左中允七月遷侍講尋提督山西學政三年遷右庶子奏請每年以銀四萬兩於太原平陽潞安大同買米貯倉春糶秋補擇賢能州縣或府佐貳董其事以功過議敘處分得旨所奏常平倉貯事宜甚爲有益著交山西巡撫伊都立酌量舉行四年二月遷侍講學士六月授順天府府

尹五月授詹事仍兼府尹事六月擢倉場侍郎七年命查西寧軍需八年六月遷吏部左侍郎尋偕刑部右侍郎牧可登查賑山東九月命審山東按察使唐綏祖揭參濟南府知府金允彝一案九年正月授直隸河道總督嗣翰允彝袒鄒平縣革職知縣袁舜裔虧空抑勒交代等款屬實論如律於義赴總督任七月條奏天津截漕留糧事宜一漕米進倉津貼諸費截留俱可不用其額設落崖進倉腳價令旗丁備給一旗丁雇剝每百里給飯米一石耗米一石今截留省剝費每米百石應給地方官耗米一石庶支放不致虧缺一漕船例有隨糧席片於截留處並交應用下部議行八月奏言青龍灣等處工程革職侍郎何國宗議建雞心十四座未免阻隔水勢請卽停止其展壩面四十丈使暢無礙運道並保河西隄工從之九月擢刑部尙書仍理河務尋署直隸總督十二月奏參巴里坤軍營回京之內大臣阿濟圖侍讀學士查克丹等擾驛遞上嘉勉十年署陝西總督十一年正月疏稱甘涼肅承辦軍需總匯糧草價增數倍兵餉不敷養贍請酌借籽種牛具給兵於瓜州等處開墾分兩次扣還秋收留來年籽種餘糧鎮標中軍經營以濟兵食從之四月授吏部尙書仍署總督事八月奏肅鎮標兵除防汛外現覺單弱

請撥駐涼州之河南綠旗兵五百移駐十一月奏軍營屯種撥馬應用省買牛費  
十二月奏回民移瓜州者不諳農事請募耕夫二百照屯田例給口糧工價委員  
督率教導俟一年熟練自種又奏赤金靖逆之北泮帶湖一帶築墩臺十八塔兒  
灣築堡一東西各築墩臺一以資保障又安家窩鋪渠口之上另開渠一以資屯  
種又安西廳衛及效力各官並書役等聽其自備工本開墾均如所請行十三年  
二月疏劾總理屯田左都御史孔毓璞侵糧盜帑盤剝肆橫等款鞠實治毓璞罪  
如律尋奏前定甘涼肅各屬贖罪捐監米照時價爲額今該地歲豐價減應增米  
數以符銀數至他處赴捐有運費照本地酌減六月奏寧夏鎮標原設中左右前  
後五營雍正五年裁後營兵歸新設大通鎮今請仍設以成營制改大壩堡都司  
爲寧夏城守大壩堡增千總俱下部議從之七月命大學士查郎阿管理陝西總  
督給於義欽差大臣關防留肅州俟軍需竣回京九月奏言金塔寺肅州北面藩  
籬請改遊擊爲副將並所屬威魯堡俱於現駐金塔寺新募兵內撥增又增轄屯  
田通判州判縣丞主簿等官道員督查俱從之先是於義奏甘涼等處設馬廠以  
千把總爲牧長外委爲牧副頒太僕寺條例定考成至是十一月請以馬孳多寡

爲弁兵陞降賞罰詳列章程入奏下部議行乾隆元年二月奏言甘肅巡撫許容辦賑不善奉旨嚴飭解任命於義署理疏請於哈密城北圈築倉廩令司糧文員專啟閉設墩臺四撥兵守又於新城東門外築關廂爲商賈市區從之時捐贖例已停於義奏發遣革職知州許啟盛董仲請贖罪諭曰所奏俱非常赦所不原者准其贖罪朕前因官爵有關名器仕途不宜濫冒是以停止捐納至贖罪一條原係古人金作贖刑之義況斟酌情有可原者方准其事尙屬可行嗣後贖罪例照舊辦理七月查郎阿入覲於義署陝西總督十二月奏稱瓜州令戶民五十家守壩閘巡渠道並可兼種地請免納糧草及他差徭從之二年二月內召回吏部任時兵部侍郎孫國璽因審屯政侍郎蔣河侵挪一案劾於義瞻徇並有誣參糧道杜濱曖昧事命刑部侍郎馬爾泰倉場侍郎崔紀往查尋問擬河斬監候於義瞻徇有跡所參濱身占甥妻諸款係據屬誣稟失察均下部議處援赦免三年四月查郎阿奏參承辦軍需道沈青崖黃文煒張體義等私運侵帑詞連於義侍郎馬爾泰復奉旨往同督撫嚴審於義解任赴質尋鞫實擬青崖等斬監候於義徇縱杖流浮開麥稞價銀三萬三千零留蘭州着追五年十一月特命署直隸布政使

七年二月實授三月授福建巡撫時閩鹽課額外多於加派義同督臣那蘇圖請分別裁減允之八月漳州奸民陳作謀不軌聚衆圍城於義擒之議敍加一級十二月臺灣居民王永興等樹旗散筭騷擾旋就獲奏人報聞八年二月調山西巡撫十月補戶部尙書九年正月調吏部協辦大學士事五月御史柴潮生請修直隸水利上以於義諳習情形令同總督高斌辦理七月以原銜充經筵講官十二月奏陳水利事宜一錢糧令清河天津二道核轉一事關通省陸續報銷以清案牘一工程三萬兩以上委專員分辦各自報銷以下委員同地方官報銷一河渠隄埝橋閘有關要工應專員典守者於通省員弁內奏移一築隄開河間占熟地旗地就近撥補民地給價除糧一工料價用市平給發又奏勘初次應舉各工一濬宛平良鄉涿州境內牝牛正支各河一開新城雄縣境內白溝河支流趙北口淀內各支河一開東淀河道徑直以暢尾閘一另疏子牙河口閘築隄分清渾一疏舊減河入鳳河消瀝水一掘塌河淀淤塞利宣洩一引唐河由舊渠歸保定河一以渠閘引河淀沃田一濬正定縣各泉爲渠成自然之利一修復營田舊渠閘一給百姓營田工本均下部議從之十年二月署直隸總督三月加

太子太保十月奏初次工程告竣善後事宜一各州縣新工官入交代民均力役一唐河兩岸設涵洞一新建河閘駐汎員一閘座設額夫一保定通判改爲水利通判專管唐完滿城清苑安州五屬河道一定興縣丞改駐新城司河防一新設堡船汶夫分隸東西兩淀一子牙河隄分隸廳汎一子牙長隄建營房防護一河隄栽柳州縣佐雜及河工效力等官捐種議敘十二月奏勘二次應舉各工一還鄉河裁灣取直建滾壩一薊運西隄並袖針舊河分別修築一張青口下接挑支河一新安縣之新河開挑寬深一廣利渠展爲河接連府一望都以下沿白草溝河至清苑安肅開道溝一廣利依城二河挑減河分洩一疏定興安肅泉水廣灌溉又奏永定河身兜灣十處均宜裁直以順其勢灣處截築攔水壩河沙淤者挑深隄缺薄者加培均議行十一年三月奏勘三次應舉各工一場河淀漲水由七里海引歸薊運河一津邑東北賈家口舊河挑洩積水一靜海迤東蘆北口接開支河一南運河捷地汎改挑引河又奏續勘三次應舉各工在慶雲縣者濬馬頰河引瀝水歸海開城北湖於王家窪渠通西南高慕台窪均引入老黃河疏四鄉洩水溝渠去積滂在鹽山縣者濬宣惠河洩合縣之水通縣東之明泊窪入宣惠



引歸老黃河均議行又奏慶雲鹽山二縣請於水師節省項下酌給銀多砌磚井仍令民開土井資灌溉再撥用商捐貯銀委員赴張家口買牛給貧民耕種並度土性買栽棗杏桃柳三萬株以備食用從之尋疏請減慶雲縣額賦諭曰直隸慶雲縣土瘠民貧連年荒歉朕心深爲軫念多方籌畫蠲賑並施以甦民困惟是元氣難以驟復必須大沛恩膏俾小民永沾實惠著將該縣每年額征地丁銀蠲免十分之三永爲例七月署直隸河道總督十二年四月直隸水利工程竣議敘加二級尋回京七月諭曰協辦大學士吏部尙書劉於義年近七旬現兼理戶部輪班奏事連日往返未免過勞所有戶部事務着不必兼管十三年二月卒諭曰劉於義才品優長簡任銓衡協贊機務宣力中外勤慎素著忽聞溘逝朕心深爲軫惻應得卹典着察例具奏五月賜祭葬如例諡文恪

徐本弟杞 子以烜

徐本浙江錢塘人吏部尙書潮子潮自有傳本由康熙五十七年進士改庶吉士散館授編修雍正元年恭修聖祖仁皇帝實錄充纂修官四年署日講起居注官五年提督貴州學政尋授贊善遷侍讀六年疏言各省府學皆從屬州縣撥入惟

黔省自爲府籍額多濫充嗣後府籍佳卷不足應於州縣內酌撥又學臣去任時不許諸生混請給頂用防冒濫府州縣考取代書嚴禁劣生包攬貢監歸學臣約束地方官造冊申送有但冀榮身不思應試者於捐後文結內註明讀書貿易錄科照冊查對以杜頂冒下部議行七年遷貴州按察使八年調江蘇按察使尋遷湖北布政使十年擢安慶巡撫奏言現定比緝盜賊章程凡提比竊案責之府州大盜責之臬司其案多未獲之處臣親提比並照例立限分別勸懲沿江委員巡哨省城另募幹捕分發臬司衙門聞刦立即擒拏各屬恐干考成必加奮勉上嘉之十一年三月條奏權政四條一蕪湖關收稅庫平輕重各殊請照藩庫頒給餘悉銷燬一鳳陽關已裁監督缺關務歸巡撫倉務歸糧道兼管其稅大使攢典人等應汰一銅斤水脚經前撫魏廷珍題明附入正耗徵解給商稅單內應一體填註杜書吏暗索一貨船隨驗早晚開放兩次免致淹守五月疏言雲貴廣西不法土司安置內地蒙恩每十名給官房五間地五十畝安慶城內計安插二十一名所給地畝俱遠在來安縣不便耕作請將原撥地畝令地方官變賣先動存公銀附近買撥俾得耕食毋致失所均得旨允行六月疏言徵糧事宜一州縣糧櫃向

由府道給貼封條俟申報拆封另發更換胥吏以州縣不聽自擅致有藏匿補投等弊請改用州縣封條俾得覺察吏胥道府仍委員秉公拆兌稽察短少一民間完糧前準科臣顧祖鎮奏用十截串票查花戶不足一分之數卽不能掣票或一截有餘勢必扣回餘銀花消拖欠况分釐小戶概分十截數目零碎百弊叢生應仍用三連由票一小民零星之戶完銀不便酌凡銀一錢以下每分完制錢十文其仍願輸銀者聽下部議行七月奏壽州濱淮河積盜聚族而居假捕魚爲業商賈每遭劫掠今陸續擒治將大小魚船取連環互保編甲乙嚴查其孫平焦鄧諸姓久習爲匪設族正不時舉發得旨嘉獎又言江岸蘆洲人煙稀少向設游兵等營於夾口磯頭備塘船巡緝亦可救遭風客船近船多破廢應令州縣會營員估修從之十二月疏言上江向設分巡兵備道八陸續裁汰僅留廬鳳道一所遺驛鹽事務歸下江驛鹽道漕糧事務歸江寧糧道兼分巡池太二府查江寧糧道統管十府漕糧再分巡上江鞭長莫及廬鳳一道亦難令兼巡通省請增設道一員分巡安徽寧池太五府廣德一州駐安慶其滁和二州就近隸廬鳳道下部議行尋遷左都御史十二年正月充經筵講官三月擢工部尙書十月協辦大學士事

先是浙江奸民王益善邪教聚衆謀不軌命本往同浙督程元章鞠治至是事竣合疏言衢州最易藏奸前設總兵後改副將今請仍改爲總兵其下設遊擊三守備三查衢協原設都司二應以一改中營遊擊一改城守都司再增左右兩營遊擊右營駐江山左營駐常山原設守備三以爲城守都司中軍守備一改中營守備一改右營守備防守龍游縣再增設左營守備防守華埠渡守備標下各設千總二把總四於通省簡僻營內撥兵三百增補提標轄嚴州協楓嶺營處州鎮轄蘭谿汛俱就近改隸衢鎮金衢嚴三府幅幘甚廣棚民雜處請設巡道一駐衢巡查江山縣之青湖鎮增設同知駐防下部議行十三年正月充文穎館總裁五月命同果親王允禮大學士鄂爾泰等辦理苗疆事務八月今上登極十月調刑部尙書命協辦總理事務乾隆元年三月充律例館總裁十一月授東閣大學士兼禮部尙書時恭纂世宗憲皇帝實錄充總裁官二年十二月直南書房尋以協辦總理事務議敘賞給一雲騎尉三年軍機處行走四年正月命紫禁城內騎馬五月加太子太保六年律例告成議敘加二級七年兼管戶部尙書九年正月以病請解任上慰留六月具疏力請得旨加太子太傅准解任八月諭曰大學士徐本

老成謹慎宣力有年今以抱恙懇請回籍調理朕心眷注特賦詩篇以寵其行並錫御用冠服及內府文綺貂皮等物令御前侍衛都統永興齋往宣朕諭旨朕於本月二十五日行幸南苑當親至大學士邸寓慰問之詩曰枚卜資賢輔調元贊藐躬摠忠一心切論道八年同績茂台衡列勤宣警蹕中百司方仰矩二豎偶興戎遽爾辭榮祿能毋遂退冲青門名不減黃閣惜何窮別緒紛秋日歸舟急北風尙期食履健重入綵扉崇九月疏請給其子侍講學士以烜假送歸允之命在籍食俸十年上念本歸里將一載御製詩賜之詩曰道義愜同好衣冠崇老成八年資襄贊千里睽音聲宿疾今何似秦醫胡不靈每懷故老凋錯落如晨星臨風瞻越雲惘惘心靡寧長夏宜林居山水秀且青峯迎南北翠月印三潭明卿雖適江湖豈不念朝廷努力加餐飯慰予跂望情跂望情何極頻年共濟人爵祿非可私義難阻歸輪常謂二疏去於道昧致身卿以謝病返安忍責愬分愬分亦已久日歷冬春夏乃知白駒速寸晷不相假看禾新雨後把卷萬幾暇披薰對南風心因到越下所願眠食佳早整歸朝駕十二年本卒遺疏入諭曰大學士徐本持躬端謹才力優長歷事三朝宣力中外朕御極之初簡任綸扉多資翊贊後以抱恙令

伊子隨侍回籍又加恩給以本俸以資頤養予告以來又經四載時加存問方冀宿疾就痊赴闕供職今聞溘逝深爲震悼着晉贈少傅就近在浙江藩庫內賞銀一千兩辦理喪事着巡撫顧琮親往祭奠以昭朕恩禮老臣之意應得卹典該部察例具奏尋賜祭葬諡文穆子應衡襲雲騎尉二十二年上南巡禮部以本未入賢良祠不請遣祭諭曰徐本宣力多年勤慎懋著卽如前者過常州時已故之巡撫潘思榘禮部尙猶奏請徐本視潘思榘爲何如耶朕巡幸所經郡縣名臣舊輔皆卽致祭乃國家念舊酬功之典該部自當慎重辦理何得膠柱鼓瑟乃爾卽命本入浙省賢良祠並遣官致祭五十一年命入京師賢良祠本弟杞康熙五十一年進士改庶吉士授編修雍正四年充廣西鄉試正考官尋授山東道御史巡察順天永平宣化等處八年掌京畿道轉禮科給事中十年遷通政司參議十一年署甘肅布政使辦理噶斯軍需十三年遷太常寺少卿尋實授甘肅布政使乾隆三年五月奏言州縣虧空錢糧知府盤查不出咎在疏忽較有心徇隱者情尙可原向無開復之例未爲平允嗣後本犯已經限內全完者其失察知府令該督撫出具考語送部引見俾因人獲罪之員尙可錄用失察與徇隱處分亦有區別下

部議行六年奏言寧夏頻年水旱積貯無多茲幸屆豐收請於本年山西河南解到備貯項內撥銀採買以實倉儲上是之七年奏言甘省土瘠地磽產糧有限兵糧多係折色又係隣省協濟其協濟之餉向例惟春季預撥銀七十萬兩先於年前解到其餘四月解半九月解完兵丁買食已屬艱難青黃不接時尤爲拮据請於四月前多解銀五十萬兩預行存貯於關秋餉時一併預領令營員趁秋收價平及時買備仍按期給發不得先給花費庶兵糧有備無虞部議從之十二月奉旨以京員補用八年三月署湖北按察使旋授湖南布政使九年遷陝西巡撫十二年七月奏言潼關協營歲需糧草取給於潼關閿鄉尙有不敷將華陰縣屯民額徵糧草歸管理屯戶撫民同知徵收支放但糧草歸廳管戶隸縣屬難以稽查並滋考試冒籍之弊應將革除屯民額糧戶口統歸同知經理疏入報聞又言歲收厚薄不齊原資商販流通乃奸徒先給鄉民賤價預買秋收量載而去又或於新糧上市時勾通牙行零糴整囤待價出糶富買壟斷居奇應請禁止得旨嘉勉並令直省督撫出示嚴禁預囤糧石者按律治罪上以杞年力漸衰着來京十三年補宗人府府丞十五年休致三十四年卒本子以烜雍正八年進士改庶吉士

授編修乾隆五年遷國子監司業八年遷侍講九年授侍講學士十年遷詹事府少詹事十一年遷詹事十二年丁父憂十五年服闋補原官十八年授內閣學士尋提督順天學政十九年擢禮部侍郎留學政任二十一年充經筵講官二十二年以失察僱倩代考降一級調用二十三年補太常寺卿二十四年丁母憂二十七年服闋署內閣學士二十八年署禮部侍郎三十一年患病告假回籍三十六年卒

邁柱

邁柱滿洲鑲藍旗人姓喜塔拉氏聖祖仁皇帝康熙四十八年三月由筆帖式授國子監助教十二月遷工部主事五十一年十一月遷戶部員外郎五十四年四月授監察御史五十五年九月巡視福建鹽課世宗憲皇帝雍正元年巡視寧古塔三年十二月命往湖廣荊州同將軍武納哈籌議以原任將軍阿魯家產抵還尅扣兵丁銀兩事合疏覆奏令荊州就近一百五十里內有窮民情願賣地者官給時價置買或給兵丁耕種或給民種起租遇窮乏兵丁有婚事者給銀十兩喪事給銀二十兩其官員子弟及饒裕兵丁不得濫給以期永遠有益下部議從之



三月擢工部右侍郎七月調吏部命往江西審理德安知縣蕭彬武寧知縣廖科齡虧空並清查通省錢糧民欠流抵諸弊尋命署江西巡撫十二月疏請以江西省額徵丁銀照直隸等省之例攤入地糧從之五年二月授湖廣總督命料理江西錢糧事務完畢赴任三月奏江西倉穀虧缺其弊有三一在無穀無銀捏報實貯在倉及至交代又捏報發價在民或借領在民俱以素日信用書役人等公具認領新任官按石徵追顆粒俱無一在出糶倉穀得價侵收及至交代概以二錢一石折算交出接任者因不敷買補以至倉貯久懸一在虧空報完以銀二百兩抵穀一千石因價不敷積久不能買補併價亦侵用又捏稱民欠多方掩飾皆因前任巡撫裴倖度布政使陳安策張楷徇庇所致請察究追完詔革裴倖度等職質審究追又言江西公用銀兩原係提解官役俸工及節規恐州縣無可養贍或致挪墊虧空亟宜裁革但通省需費甚繁惟有比照河南湖廣等省之例提解各州縣耗羨二分以充公用另提解一分五釐及七釐六釐四釐不等斟酌均勻爲各員一歲養廉之資其餘概留州縣自行養贍則通省之用無虧各員俱有養廉不致私行派累至巡撫衙門向有平餘一項爲薪水之資今既議裁亦於提解一

分五釐耗羨內與司道量行支用又現在被災州縣設廠煮賑米價每石已至一兩三四錢將來勢必愈昂酌定未被災州縣有產米稍多米價略賤者預發價銀委員分買運發被災州縣貯備俟青黃不接時照原買之賤價平糶則市價自平至南安贛州爲閩廣交界之區最易藏奸鄱陽湖界址渺茫出沒難稽萬載寧州十數處又係聚集棚民流匪素好多事雖時處太平武備不可不講現已嚴整塘汛操演標兵添設藤牌挑刀等械補實空糧以充營伍得旨嘉其條畫詳晰令新任巡撫照行六月疏言南昌前衛饒撫二所屯糧屯丁屬江南之建德東流二縣徵比而督催仍在南昌饒撫三府隔越千里鞭長不及請以此項編徵改隸江南池州府掌管下部議行八月審奏虧空知縣蕭彬等俱論斬並請令徇庇之上司分賠一分得旨邁柱身爲現任督撫若非秉公持正實能自信無一毫瞻顧者不能如此甚屬可嘉交部議敘上司分賠一分之處從前未曾定例仍照舊完結自雍正六年以後俱照所請永爲例部議邁柱加三級十二月赴湖廣總督任六年正月奏隄工八事一每年修隄業戶按糧均派有賣富差貧以少派多之弊應確估土方夫數及每糧一石應出夫數造冊存案仍出示曉諭使業戶悉知以杜浮

開濫派之弊一長江大隄漫溢時多應相舊隄之勢無人行走之處修加土一尺人馬往來之地修加土一尺五寸增寬之數亦如之不如式者所司以溺職論一向來修隄諸弊非不嚴禁無如陽奉陰違應令照河工例治罪其包折夫工者照包攬閘夫溜夫之律一名枷杖二名以上附近充軍一護隄插柳以一弓一株爲準連種蘆荻如所司奉行不力以誤工論一州縣雖各有疆界田畝同一隄塍豈分彼此應定例同隄有險無分隔屬水利各官業戶協力搶護推諉抗阻者治罪一支河曲港隄內溝洫應責成水利各官於冬晴水涸之時督同業戶盡力深濬度其形勢或設木閘或砌瓦筒以時閉洩庶旱澇無虞一隄塍衝潰之處必積浮沙遽加土填根脚難固應刨刷至底然後層土層礮引錐鑽試灌水不漏者方爲堅實草率者責令賠修一隄外沙礫不堪取用隄內取土又慮潰濫無常應於農隙時水利及印官率民豫爲擇地取土酌量壘積險隄高廣之處無事可作歲修有險可以搶救亦思患豫防之一策諭獎辦理允當三月疏報各屬隄塍業戶按糧派夫照上年水痕加高修築支河亦自行挑濬諭曰修築江隄百姓踴躍從事可嘉宜沛特恩賜帑銀六萬兩令邁柱酌量工程多寡分給使小民均沾實惠工

程永遠堅固以副愛養楚民至意四月奏鎮筭兇苗倚恃險阻野性難馴時入內地竊劫害民雖特設重鎮多布汛防必待轉報而後遣兵兇苗已遠颺竄匿難於弋獲臣廣爲諮訪聞原任雲南提督張國正先任鎮筭總兵以鷓鴣之法治苗甚善凡遇失事探實賊蹤爲何寨何苗一面飛報一面攜兵馳往圍寨搜擒出其不意如鷓鴣之捕鳥取其疾速而鳥可必得也諸苗畏憚大斂兇鋒臣今與總兵周一德循行此法但期緝獲罪犯而止不敢過爲殺戮以廣皇仁得旨據理而論制服兇苗自當如此但情形究難遙度全賴大吏詳審熟籌方收因地制宜之效六月疏請移漢陽府通判駐漢口鎮荊州通判駐沙市又請裁施州大田二衛所併爲縣尋定縣名曰恩施九月奏請清查湖北湖南積欠銀三十萬餘兩得旨與巡撫馬會伯王國棟一同辦理十一月疏言各州縣起解錢糧例於兩文一批一文投巡撫衙門掛發一文同批投藩司衙門兌收並同錢糧交與解役解役與庫書一氣多有壓匿文批將錢糧不歸藩庫徑交庫書之家拆分挪用及放債圖利等弊巡撫藩司均難知覺請嗣後起解錢糧令先期三日將現解某項某數錢糧於某日起程緣由具文由鋪遞通報府道督撫衙門併將某州縣離省城路程於文內

聲明如逾限不到嚴行查究既杜侵盜之弊亦可免中途遲滯疏失之虞下部議通行各直省一體遵行七年三月疏請以湖廣省額徵丁銀攤入田糧其續報勸墾及自首隱匿所報陞科俟再遇編審時攤入從之五月以永順保靖桑植土司改土歸流請於永順設知府府東南西北各設一縣保靖桑植地各設一縣從之尋定新設府曰永順其東南縣曰永順西北縣曰龍山保靖桑植所設縣仍其名七月奏湖南積欠十一萬已完過六萬六千兩湖北積欠二十萬七千已完過八萬四千兩又條奏苗疆事宜一湖南民人往苗土貿易者令將所買何物行戶何人運往何處預報明地方官給與印照註明姓名人數知會塘汛驗照放行不得夾帶違禁之物如有官吏兵役借端需索者一併查究一苗人至苗地貿易請於苗疆分界之地設立市場一月以三日爲期互相交易不得越界出入仍令各州縣派佐貳官監視一苗疆州縣請選擇諸苗悅服之人立爲苗長以稽捕緝之事三年無過量爲獎賞其有生苗歸化者給以寨長千百戶執照三年無過亦予獎賞造冊彙報兵戶二部一請照川省之例於苗疆州縣選安分勇敢之士苗每處用一二十名充當民壯以備差遣訪緝仍行文武互相覺察之法以防勾通推諉

等弊俱下部議行八年七月疏言永州府屬之道州寧遠永明江華四州縣與廣西接壤應添設官兵以資防守請改永州府同知爲理峒同知移駐江華城中控制上五堡等處管理四州縣苗疆捕務仍於道州江華各設遊擊一員千總一員寧遠永明各設守備一員抽調各標營兵一千五百名每月與廣西桂臨營訂期會哨三次於地方實有神益下部議從之八月奏沔陽錢糧自康熙五十五年至雍正四年積欠銀八萬九千二百餘兩里民一聞清查爭先完納其實在民欠乞與一年之限分作三次徵收以紓民力有官侵役蝕包攬未完者請暫緩究治一年追完逾限治罪上諭戶部曰朕之清查積欠者原以防貪官污吏及不法衿棍借民欠之名恣意侵蝕不得不清釐懲治今果查出沔陽州侵蝕包攬銀三萬餘兩而里民之間有拖欠者因田地近水常有滂溢力量未免不敷並非有意頑抗俟冊到日酌量豁免卽令停止催徵其有侵蝕包攬者照所請辦理九年二月疏言黔苗不靖請停止湖南醴陵桂東等十二州縣礦山開採以絕藏奸又疏言湖南各營兵米例以六錢折給今改設永順三營係開闢苗疆產米既少商販亦稀價值昂貴請自雍正元年爲始永順以一兩折給保靖桑植以八錢折給上是其

言俱如所請三月邁柱遵旨將沔陽州實在民欠糧銀三萬二千餘兩分晰造冊具奏諭曰朕愛養元元時下減賦蠲租之詔每思豁除舊欠則頑戶獨得蒙恩蠲免新糧則善良公同被澤此天下人所共知惟是沔陽民欠與他處不同該州近水常有滂溢之患其未完民欠均從寬豁免十年十二月奏給價收繳六里鎮算土司藏用鳥槍其木杷機弓各色完整者撥給兵丁充用餘不合式製者改造鋤犁農具賞給力田土苗得耕作之實用至於土苗所用環刀標槍不宜比戶藏蓄亦令逐漸給價收繳諭曰所奏深得賣刀買犢之意至環刀標槍亦自應收繳可順其願不宜強迫又疏言收捐貢監穀石原爲充裕積貯且備江浙等省緩急撥用現今川米禁販不得到楚江浙等省搬運甚多各省米價日增若本省仍收捐納穀石必甚昂貴請暫行停止從之十二年九月疏言本年楚省大稔前兩年停收捐貢穀石應仍收捐但楚省向日議捐原以裕常平積貯兼爲鄰省緩急之需今隣省俱嫌倉穀貯久色變自赴產米地方採買不必代爲豫備至楚省常平倉貯穀一百十四萬三千餘石又社倉貯穀四十五萬四千餘石現今俱屬充裕隣省又無赴倉買運若將應行流通之穀多積於不待用之地似非隨時制宜之道

況戶部暨雲貴廣西甘肅江浙等省皆因軍需海塘急務現有收捐事例更當酌量緩急停止楚省收捐貢監俾願捐者赴戶部雲貴等省捐收折色以濟急需上是其言下部議行十三年三月奏准改容美土司地爲州其所屬五峯司地設縣治改彝陵州爲府尋定新政府曰宜昌附郭縣曰東湖容美所設州曰鶴峯五峯所設縣曰長樂並原立之直隸歸州長陽興山巴東皆隸焉又於恩施縣建府治曰施南設宣恩來鳳咸豐利川四縣七月疏言前於湖南永定九谿二衛適中之地建設安福縣治人民田賦附近安福者歸安福遠在各屬者撥歸各屬惟二衛撥歸慈利永順二縣所徵屯糧疆界不清民屯差互官民多有未便永定衛四面環山一水四達人民聚居商賈輻輳請於永定衛地改設一縣以原撥永順慈利二縣所轄軍戶與慈利縣分出民人並現在改土歸流之茅岡司地計周圍八百餘里建縣治設知縣一員典史訓導各一員下部議從之尋定所設縣曰永定是月諭曰邁柱簡任封疆宣力有年著授爲大學士來京辦事尋授武英殿大學士兼吏部尙書今上御極命暫管湖廣總督事十一月至京乾隆元年二月兼管工部二年十一月以病罷兼部務尋解任三年正月卒年六十有九賜祭葬如例諡



文恭

黃廷桂

黃廷桂漢軍鑲紅旗人父秉中官福建巡撫有傳康熙四十九年廷桂由監生襲曾祖憲章所遺雲騎尉世職五十二年遷三等待衛五十九年補參領雍正三年授直隸宣化鎮總兵五年二月擢四川提督六月疏陳營伍地方五事一軍械宜速製川省三面環夷自平西藏青海後多缺額不堪用現飭確查修補一馬廠宜別建川馬本不高大又日繫槽致多羸斃現訪得豐樂場後荒山六十里派弁督牧其附郭舊廠追出募墾一士卒驕奢宜禁川省自年羹堯濫賞放縱至今習氣未除現飭服用絹布毋僭官制一番蠻防範宜密每歲十月間生熟番蠻至內地傭工名爲下壩次年夏初始歸近禁攜婦女隻身合夥成羣肆惡應飭攜家屬數名口方許至內地形跡可疑者查禁一汛守地宜均成都屬德陽仁壽二縣南北距數百里歸一把總駐防永寧協駐貴州永寧縣城中隔河河東隸黔西隸川兵民歧視非邊隘所宜奉旨與總督岳鍾琪會商行十一月奏嚴緝竊賊及賭具諭曰牧民之官果肯執法懲奸諒未有不畏懼者大都褻玩之生率由日久懈弛有

意縱捨所致故禁令之弗行其咎在不公不明而不在於不嚴也夫法猶治病之藥取攻疾而已過於峻利則元氣必大傷知乎此斯知過猛之不足爲貴矣又奏建昌番蠻新隸版籍竊掠時聞臣飭擒嚴懲又省城設防火堆棚三十每營救火兵二十得旨嘉獎六年二月請設義學於提標五營及城守兩營諭曰義學一事各省提鎮及駐防將軍等往往以此奏請朕俱未准行從來文武並爲國家器用不可偏有重輕汝意專以崇文爲善舉歟子弟讀書一道非魯鈍者所能須俊秀者方可夫以少年聰穎之資既習禮儀稍通文墨猶思荷戈執戈甘爲前驅乎勢必漸染日久流爲怯懦將來俊秀者咸不願爲兵而亦不能爲兵矣營伍中所餘無非魯鈍一流欲求干城之選豈可得哉是非興文之良策實乃廢武之歧途譬猶驅鄉塾生童教習櫓盾徒誤其文而已武亦莫能就也似此邀虛名而無實益之舉將焉用之至云營伍錢糧冊籍乏人查對因此之故而令闔營俊秀子弟皆致文武兩相廢棄詎不更謬凡事但宜隨時斟酌損益期於辦理無誤則已何必思及分外創新立異始爲美談耶三月奏報烏蒙米貼苗婦陸氏不法傷雲南兵已檄永寧遵義將弁援剿諭獎其機宜妥協會四川雷波士司楊明義陰助陸氏

誘附近結覺阿路阿照平底等苗劫糧陸氏就擒廷桂及鍾琪請勦明義詔廷桂偕總兵張耀祖會剿九月軍至拉密擒明義並獲造謀人卑租及匪目業姑物租等諭曰首惡渠魁陸續被擒朕嘉悅覽焉撫剿餘逆無涉輕率詳慎爲之尋奏結覺賊酋雙尺阿路賊酋魯佩及阿不羅賊酋覺通均就擒斬馘近萬諭曰覽奏斬獲情形何啻獵人弋獲禽獸倘兵退仍復如故將如之何亦豈有盡行殺戮不留噍類之理乎當詳思善於措置之道爲要十月奏剿附近黃螂之確里密等處枝夷底定後併力剪除阿多及阿驢報聞十二月確里密賊酋利耶爲我軍斃斃阿都苗擒獻其酋阿必阿驢苗亦就撫七年正月廷桂奏軍事竣諭曰此番底定之功仰荷上天垂庇聖祖錫佑兼賴汝等提鎮大臣及將弁兵丁胥能效忠奮勇之所致也朕深爲嘉悅尋疏陳苗疆地方情形得旨番俗苗情歷歷如繪絲毫無隱朕甚嘉之惟善後一著最爲要務殫心竭力共相籌酌必得良策庶冀永寧四月奏湖北容美土司田雯如遣土遊擊至四川建始縣界征花絲銀已咨湖北督撫提督查究諭曰楚蜀各土司中惟容美最爲富強緣自前明官吏玩愒弛縱遂至越分僭禮相沿成習迄今尙未改也地方大吏應曉以大義漸令革除若據濫給

委牌科歛絲花等款卽坐以狂悖之罪似若太過已密諭楚督邁柱令其嚴飭田  
雯如矣汝等慮其疑畏不遽根究之意甚是尋奏籌畫瞻對賊蠻得旨瞻對雖微  
亦不可輕視凡事概以敬慎處之七月奏太平營都司郜見信讒虐兵致合營交  
甲求退請革職疏人諭曰借輕信讒言苦虐衆兵一語遂欲倖免結黨挾制之罪  
豈可得乎類茲刁風不宜滋長當嚴查爲首者重懲示儆郜見若仍留本營勢不  
相安另揀賢員調補十一月請開採黃螂等處銅鉛資鼓鑄諭曰此奏識見殊屬  
庸愚之至所謂守突奧之熒燭未仰天庭而睹白日者也雷波黃螂一帶地方與  
新撫涼山諸夷壤疇交錯第宜示以靜鎮胡可興起利端若聽民開採各處流亡  
無籍之徒勢必羣相趨赴萬一釀生事故所關非淺汝其會同憲德速將金竹坪  
白蠟山等處凡出產銅鉛礦廠概行封禁嚴加防範稍有奉行不力脫至紛紜黃  
廷桂憲德之身家性命未足以償厥辜也廷桂奏謝聖訓得旨向後一切事宜務  
須詳慎爲要率爾之見何可瀆陳朕覽所奏尙亦如汝遽卽見諸施行竟至滋擾  
地方其害曷勝枚舉豈引咎頌聖數語所堪了結者如云曾經審思原非率爾則  
己之才識實屬不逮可知愈當加勉詳慎十二月奏緝獲妖言逆犯楊大銘等十

九人並檄西陽土司獻首惡楊七諭曰此事最宜詳慎勿俾無知弁員憑威逼脇激出事端朕意或係奸匪捏詞妄供希圖推卸亦未可定料該土司未必有此事也八年正月奏楊七果獲於楊隘嘴並非西陽境內諭曰朕非有過人技能但較汝等克誠克公耳凡人爲一己利害是非之心切則遇事接物動輒有過不及之失勉公與誠斯爲對證之藥嗣西陽改土歸流事詳鄂昌傳十二月奏報裸賊滋事調兵戰克金鎖關墨鐵關黃草坪等處恢復永善得旨官兵之奮勇爭先汝之調度合宜深爲可嘉據鄂爾泰亦有川省將領此番效勞較勝滇省張耀祖遠甚之奏勉旃九年三月大軍剿噶爾丹策凌上以川陝地廣又理軍需總督一員難於控制特增設四川總督卽以廷桂補授兼管提督印務六月請將川省常平倉捐穀改銀款數悉照雲貴現行例諭曰川省乃產米之鄉籌畫積貯尙易爲力該督撫遽請開捐誤矣且欲改穀作銀又復將銀買穀轉輾滋弊更屬悖謬但通省倉廩止有四十餘萬石爲數太少著另議增貯十年八月奏遣總兵趙儒剿捕兒斯賊番諭曰務期一舉戡定以收永遠綏靖之功毋得潦草結局今賊番敢於猖獗者皆由汝從前未經料理妥協所遺之患設不能奮勉立效以贖前愆二罪並

罰恐汝等難以克當矣十二月捷奏至奉諭嘉獎十一年奏獲大竹縣奸民文興貴文射斗等上嘉之十三年五月疏報夏熟收成分數諭曰際茲盈寧之慶當益加凜畏更勉公忠試思川省屢蒙天佑頻錫豐年豈文武不和各立門戶排擠乖爭之風所能感召者耶若因此而自以爲是任情肆念殊非所以仰答天貺矣亟宜返躬內省倘有不慊於中極力改悔毋稍逡巡六月奏貴州古州逆苗包利與漢奸張九萬等糾衆陷清溪餘慶等縣四川建昌永寧俱苗疆界連貴州臣飭各員弁加意撫輯苗民勿爲煽惑諭以不動聲色靜鎮慎密爲要乾隆元年正月西陲軍務竣裁四川總督廷桂乃爲提督其總督缺後於十三年復設十二月命來京候旨二年補鑾儀使尋署天津鎮總兵三年實授五年遷古北口提督六年七月諭曰古北口爲畿輔藩籬該提督所屬弁兵素稱勁旅今因出口行圍親臨簡閱見隊伍整齊技藝嫻熟洵由統領大員董率有方將弁兵丁勤於練習所致朕甚嘉之黃廷桂已賞馬二匹著再加恩賞上用緞二疋九月授甘肅巡撫九年疏奏恤孤貧瘞枯骨勸輸社倉清查監獄開渠灌田及教民種樹紡織各事均得旨嘉獎十二年署陝甘總督十三年四月奏練兵三事一技藝分三等以資激勸一

馬步兵逐名考驗一前鋒旗纛毋許遠迎露積詔如所請行十二月授兩江總督十四年五月疏言江西俗悍有司因循姑息致不安分之人動輒喧鬧滋事臣飭嚴拏究辦又各營僅按日輪操南方晴少雨多轉多閒曠臣令於陰雨時擇公所及寬敞寺院內如式操練又挽強命中最爲要技現飭造七力及十力硬弓教演其弱者不得過六力諭曰汝至江南頗出力整飭振作但不可欲速而要之以久可也九月議奏裁併衛所事宜擬將漕船最少之儀徵併入揚州衛金山衛併入鎮江衛揚州四幫併入三幫鎮江中幫併入前後兩幫共裁守備二千總四下部議行尋奏立限清查積案報聞十五年二月加太子少保七月奏赴運河豆班集漫口撫災戶諭率屬詳查妥辦八月奏奉賢縣奸民李如岡等聚衆結猛將會擾害地方臣飭屬拏獲首從各犯得旨重處示警毋姑息十月疏參江蘇巡撫雅爾哈善於奏銷錢糧奉旨訓飭忽將知縣許惟枚等十一員特參送臣會稿畫題臣查惟枚等經徵未完均不及一分例止停陞罰俸今盡請革職人必以爲欽奉嚴旨非巡撫本意其居心更屬巧詐得旨所參甚是雅爾哈善交部嚴議尋議革職留任十六年聖駕南巡御製詩賜之曰迎鑾衛警蹕建節久旬宣體我勤民德嘉

卿率屬賢何須張錦帳惟喜閱鱗田細驗剛柔俗周諮豐歉年咸中方有慶虛己自無偏此地人文盛還淳尙勉旃是年調陝甘總督十八年正月調四川總督八月奏川省歲豐穀賤命轉輸二十萬石賑淮揚被水州縣御製詩紀其事曰全蜀幸逢年教開移粟船不因讀漢詔飢溺自應然十二月晉吏部尙書留川督任十九年二月重慶奸民譚二陳琨等謀逆廷桂擒首從十四人置於法九月疏言川省惟成都府屬地平衍又有都江大堰灌溉餘各屬山田臣令勘修塘堰引灌新都蘆山等十州縣及青神縣蓮花壩樂山縣平江鄉三台縣南明鎮悉變膏腴報聞二十年五月請增鼓鑄爲通省修城用諭曰有益地方之事詳妥爲之是月晉武英殿大學士兼管總督事六月打箭爐外孔撒麻書兩土司構釁金川及綽斯甲布袒麻書革布什咱及德爾格忒袒孔撒互攻殺廷桂偕提督岳鍾璜飭諭解散尋調陝甘總督十二月奏言軍營文報緊要向派大員管理不若就近責成沿邊提鎮詔如所請二十一年二月奏從前各處調解軍營之馬多不堪用一由口外嚴寒一由弁兵作弊自安西至哈密經戈壁十餘站飼飲不時致多疲斃現派都司守備等官分站專管河州靖邊兩副將往來稽查將積貯草豆經過馬匹住



歇時刻行走標分各情形按日呈報臣令標員赴各站查察並安西提督及哈密防鎮不時就近督催得旨嘉獎四月命駐肅州督辦軍需五月奏西北兩路軍營向通商販後因撤兵禁止今巴里坤軍營一應牛羊等物專由肅州一帶販往路遠價昂難資接濟請照舊通商部議從之十月請設巴里坤理事同知一上允之十一月奏吐魯番回人莽阿里克與厄魯特潛謀叛逆其人在巴里坤哈密貿易者甚多恐暗通信息臣調安西兵千赴兩處分駐但數尙少若向內地調撥又慮張皇現有派赴巴里坤種地兵五百塔勒納沁種地兵二百卽令同往防守再晉省解到之駝出關未久若趕赴軍營須撥兵防護已截留安西一帶牧放其續調馬亦於哈密附近留牧至馬匹尙須豫籌陝甘兩省選得三萬令加緊飼牧備調但陝省距肅路遠按站行需五六十日請先調來甘分撥加意飼養陸續行走可收實用諭曰黃廷桂經理軍務籌畫精詳一切調度甚合機宜大臣能如此明決擔承實心體國深可嘉悅著賞雙眼孔雀翎並加賞騎都尉世職令其子承襲二十二年正月上以廷桂與巴里坤辦事大臣雅爾哈善札商戰馬一事意存推諉訓諭之三月奏言臣節次解送出口馬二萬七千五百餘統於三月十五日以前

全抵巴里坤餘隨後補解又出口駝四千二百餘續到者亦隨時解往應用報聞尋軍營大臣奏廷桂所解馬依限到且臆壯堪用諭獎其辦理妥速交部議敘十月命續解馬八千廷桂奏前自準噶爾脫出之官兵等久居邊地爛牧務請卽令解往得旨俞允十一月又續解馬四千無誤諭部議敘十二月奏言甘省有墊辦軍需銀十萬餘兩請飭各員自行彌補其半上嘉廷桂賢勞在事各員奮勉特命蠲免並賞廷桂銀一萬兩二十三年二月奏軍需辦解將竣卽屆春耕請暫停可緩之糧運又預備正餘馬一萬七千駝五千餘陸續解巴里坤諭獎其悉心調劑四月諭酌議伊犁駐兵屯田事五月疏參甘肅布政使武忱糧道成德怠玩誤公膜視軍務詔革職時奉旨於直隸山東山西河南陝西購馬一萬由肅州轉送巴里坤備來年進剿之用廷桂酌定飼牧事宜又籌運糧十萬石於巴里坤諭曰甘省連年辦理軍需黃廷桂急公集事俱無貽誤今歲春夏以來一切轉運糧餉復甚妥協深慰朕懷著加恩再賞銀一萬兩七月奏言臣因兩路大兵駐庫車糧運甚要聞有自哈密直趨吐魯番之路委員勘得夾山路徑騾駝皆可行較由巴里坤路近現奉旨籌庫車阿克蘇等城糧運可否行走臣已委員迅勘若俟覆到日

始由巴里坤辦運未免稍遲不若先徑運至吐魯番界由彼轉運因擬將哈密現辦車驟留半運巴里坤所貯糧分半竟由哈密運至吐魯番收貯仍俟直督及山陝撫臣購駝驟到日均由哈密運軍營回空時將吐魯番糧轉運軍營較巴里坤省往返二十餘站諭曰黃廷桂所奏籌辦庫車等處糧運一摺甚合機宜若拘泥成規必俟查明道路解到駝隻始由巴里坤起運卽極力償赴已需時日朕正在降旨籌辦而黃廷桂卽能計慮及此請糧石運貯吐魯番與朕旨適相脗合閱奏不勝欣慰黃廷桂身體素弱如此悉心計畫朕不惟嘉之且深憐之也是月加少保十二月廷桂奏臣奉旨購辦牛羊查內地牛羊不習口外水土成羣趕解易斃且耕作屆期未免難購惟羊尙可購四五萬此時口外嚴寒請於來年二月起程接濟軍食又酌撥銀二十萬解阿克蘇買回城米詔如所請行尋諭曰大學士管陝甘總督黃廷桂忠誠素著老成練達西陲用兵以來雖未身歷行陣而籌辦一切軍需動協機宜多有朕所降諭旨尙未到肅而適相脗合旋卽奏到與朕所規畫不約而同者數年以來若非黃廷桂體國奉公不遺餘力安得精詳妥協若此而毫不累民內地若無事者然此其功爲尤大宜晉崇階用彰勞績著由騎都尉

晉封三等伯並賞紅寶石帽頂四團龍補服以示優異尋賜所封伯爵號忠勤二十四年正月廷桂以督辦軍需抵涼州病劇猶勉視事布政使蔣炳具疏以聞上命額駙福隆安帶御醫往診視甫行而廷桂卒遺疏至諭曰黃廷桂忠誠敏達幹練老成歷任封疆勤勞懋著西陲用兵以來籌辦軍需事事精詳妥協倚毗方深是以迭加寵錫用彰勞績昨據蔣炳奏到在涼偶感風寒力疾視事舊恙增劇卽派福隆安帶同御醫馳驛前往診視以冀速痊遽聞溘逝深爲震悼覽其遺摺當彌留之際尙拳拳以西師垂竣籌辦軍需爲念益見體國奉公赤忱罔斁不覺聲與涕俱難以自禁卽著福隆安前往奠醑賞銀一萬兩交地方官料理喪事並入祀賢良祠其伯爵卽令伊子承襲應得卹典仍著該部察例具奏尋諭廷桂靈柩所過地方文武員弁出城奠醑並派員沿途護送賜祭葬如例諡文襄御製輓辭曰華鐙廣樂正陳時扼腕驚聞辰尾騎慈慶朝儀難並輟強酬節物淚雙垂屈指軍興逮五年儲胥事事合機先直惟良弼蒼生福痛惜摧心敢問天馬利軍行粟賑民彌留兩事尙諄諄鞠躬盡瘁今誠已葛亮而來此一人運籌力疾尙勞心驛館誰爲下鵲鉞賜賻行將歸故里椒漿寫痛定親臨封疆歷三十餘年公正廉明

衆共傳皇考時臣所餘幾鼻酸然復思愀然廷桂柩至京上親臨奠醑詩曰事繁食少赤星頽易簣諄諄餉務裁公瑾卒官父子感馬光遷陝士民哀忍將巫祝先桃茆載共公卿酌玉鬯奪我良臣一何遽不教留聽凱歌迴二十五年凱宴成功諸將士上追念廷桂御製詩中有獨憶儲胥宣力者凱迴未見惜斯人之句尋命圖形紫光閣御製贊曰外任封疆內司綸綍俾理儲胥經權弗詘殫誠盡智事協予心未同凱宴痛惜曷任四十四年御製懷舊詩列廷桂於五督臣首詩曰西陲用兵時軍需信要務統勳旣罷斥特用就熟路擘畫實盡勞諸事皆弗誤而以民爲重從不加徵賦遇災仍賑恤入告直陳故可比主吏蕭關中勤供輸以此論功勳章服錫異數爲政頗尙嚴赫赫名久著然而公無私任勞任怨素兩朝所造就似此誠罕遇廷桂孫嘉襲伯爵卒子文燦襲現任鑲白旗漢軍副都統嘉弟模歷官湖廣鎮筸總兵降藍翎侍衛檢歷官福建巡撫漢軍副都統降藍翎侍衛廷桂原襲之雲騎尉世職從弟廷樞襲

張允隨

張允隨漢軍鑲黃旗人祖一魁福建邵武府知府有政績祀名宦祠允隨由監生

捐光祿寺典簿康熙五十三年授江南寧國府同知五十七年擢雲南楚雄府知府雍正元年六月調廣南府旋丁憂二年十一月特用曲靖知府十二月擢雲南糧儲道五年六月遷雲南按察使十一月擢布政使八年五月調貴州布政使八月授雲南巡撫十年十月疏言鎮沅府恩樂縣新改土爲流請設鎮沅府教授一員恩樂縣教諭一員二學取進童生各八名下部議行十二月疏言滇省各府州或兵少米多或兵多米少米少則輓運維艱米多則紅朽可慮請將廣南廣西鶴慶永昌曲靖永北尋甸羅平南寧太和南安鎮雄保山新平支山會澤等處額徵條銀每兩折收米一石阿迷寧州雲龍雲州鎮南通海蒙自姚州元謀等處額徵秋米每石折銀一兩其普洱攸樂威縣鎮沅等處以一兩折給兵丁不敷買食請酌增以癸丑年爲始停止採買十二年九月疏請於廣西府開鑪鼓鑄均議行十三年八月疏報蒙化府墾田二十六頃有奇乾隆元年疏請昭通府屬之永善縣增設縣丞一員駐筇副官村其副官村巡檢移駐古寨歸魯甸通判轄二年署理雲南總督十月疏言滇省水利與別省不同非有長川巨浸可分疏引注其水各由山出勢若建瓴水高田低自上而下宜疏濬溝渠使盤旋曲折加以木規石槽

引令飛渡閒有田高水低處則宜車戽遇雨水漲迅流直下不能停瀦則宜濬塘築壩蓄洩得宜兩岸均沾灌溉至低窪之處下流多係小港水發未能暢流恐致淹漫則當疏水以資宣洩如遇山多沙積又當築隄以護田畝滇省水利情形大概如此歷年已興之水利內有官民協修者有借公項修分年還款者有動帑興工造冊報銷者見在勘修水利如田閒溝洫及一二村寨開壩與應修之舊有溝隄工小費輕者令地方官查明於農隙時按田出夫督率興修如工程稍大於出夫外有應需工料者令地方官率士民公議需費多寡於有田用水各戶名下按田分定銀數造冊詳借司庫公項工竣後分年還款儻有工大費繁非民力能勝者則勘定情形繪圖貼說請委員覆勘報結卽於雍正九年題明官莊變價留爲水利之用項下動給工竣另委確勘取具冊結題銷如此則已興之水利既得永遠保固未興之水利亦可次第查修報聞三年三月疏請停鑄運京錢五年三月疏言滇鹽不敷民食查安寧州有洪源鹽井試煎一年獲鹽二十一萬六千餘斤運至省地行銷麗江府有老姆鹽井試煎一年獲鹽一十八萬四千一百一十餘斤分撥鄧川劍川浪穹三州縣行銷俱定爲年額奉硃批此事若能妥辦實有

益之事也六月署理貴州總督六年三月疏報獲粵省妖言結夥事發私逃之要犯黃順等諭曰汝不以五日京兆而於此等事宜盡心辦理實屬可嘉是月疏劾台拱營參將趙國儀縱兵搶火盜帑誣良上獎其不避嫌怨四月署雲南總督七年三月奏請木欽古地方設汛兵一百名駐劄文職一千總一外委一並於川江兩岸設六塘每塘兵十名所設弁兵於昭通鎮標四營抽撥一百東川本營兵六十遴選千總外委各一文職將就近巡檢移駐部議准行六月疏言准部咨各省標營增添兵丁量加裁減雲南惟昭通鎮普洱鎮有增設兵額均屬極邊衝要未可裁減惟有通覈合省之標鎮營協按其兵額多寡均勻攤減分計則兵之裁無幾合計則糧餉之省仍多且於通省營制亦無畸輕畸重之患請將督提二標各裁兵一百撫標裁四十臨元等九鎮各裁五十廣羅等十五協營各裁三十順雲營裁二十共應裁兵一千一百六十名先裁餘丁四百四十八名遇缺出漸漸開除停補於營制並無更張從之先是允隨請開通金沙江水道上命都統新柱四川總督尹繼善會勘十一月疏言臣與新柱尹繼善和衷商議沿江查勘金沙江發源西域入滇經麗江鶴慶永北姚安武定東川昭通七府至敘州府匯入川江



源遠流長實爲西南大川自東川府以下南岸係滇省北岸係川省夾岸營汛分布田廬相望至大井壩以上南岸尙有田廬北岸俱高山峻嶺山後卽沙馬阿都兩土司所管地從前棄在番境舟楫不至自烏蒙改流設鎮滇省每年赴川採買兵糧均由敘州新開灘至永嘉縣黃草坪五百八十里泝運其黃草坪至金沙廠六十里亦商賈販運之川路臣等次第相度內有未漢漕凹崖三腔鑼鍋耳等灘水勢險急冬春之際南船難行應興工修理俾下游無阻上游自金沙廠至濫田壩二百二十七里一十二灘濫田壩最險次則小溜筒臣等親至灘頭相度小溜筒繫於山根百丈右嘴近江之處出石槽旁無溪箐雖因江水未退石槽尙未露而江流迅急斷無沙石淤塞之患濫田壩灘長四里見在水長丈餘南岸所開子河亦未露出詢之水手俟江水再退數尺卽可通舟至開鑿子河之處離山甚遠下係稻田無俟防其衝塞自雙佛灘至蜈蚣嶺險灘鱗接石巨工艱縱加疏鑿下水仍屬堪虞臣業令改修陸路以避十五灘之險新柱尹繼善意見與臣相同滇南僻處極邊民無蓋藏設遇水旱米價騰貴今以次開通川道可以有備無患諭曰旣可開通妥協爲之以成此善舉十二月疏言普洱府係新闢苗疆所屬寧洱

縣管轄苗寨遠者五六百里每年納秋米供普洱鎮兵糧沿途高山密箐牛馬不能馱運肩負往返須十餘日之久兼有刀耕火種產米無多及山地祇堪種菽不能植稻之處完納本色甚爲艱苦請照從前攸樂縣例每石折徵銀一兩地方官採買給兵下部議行八年五月疏言大理府洱海發源鶴慶府之瀾沮河至大理合蒼山之十八溪匯而成海下合趙州蒙化之水由波羅甸出天生橋入合江鋪而總匯於瀾滄江實迤西巨浸但海身長百二十里廣二十餘里而出水之天生橋一帶海口闊不及一丈每當大雨水漲海口子河不無沙石衝塞河傍各溝衝沙成埂水溢倒流致太和趙州鄧川及浪寧賓川之沿海田畝不免淹浸而鄧川之東湖西湖低田時被水患臣飭令太和等州縣調集民夫於正月興工築壩將海口子河開寬二丈濬深五尺餘自波羅甸劉家園打魚村清風橋黑龍橋子河橋三道子橋直達天生橋逐節開濬或施人力或用牛犁疊石砌隄外栽柳樹其最要之趙家園拱沙龍則用梨木爲樁傍溝亦俱修石壩外栽茨柳沙去流暢不特近水州縣無漫溢之患且涸出海口約一萬餘畝卽令附近民認墾照民隄民修之例責成墾戶五年大修一次按田出夫合力疏濬報聞是月授雲南總督兼

管巡撫事務九年四月疏報東川府阿壩租地方開採銅礦試煎一月獲銅四萬餘斤上獎爲甚善之舉十年三月加太子少保十二年三月授雲貴總督七月奏言貴州在在苗疆僉設土弁原爲綏輯苗民豈容私收濫派甚至串通蠹役藉端嚇詐查苗獠雖種類各殊皆具人心如果撫馭得宜自不至激成事變臣嚴飭苗疆文武毋許滋擾至苗人滋事率由漢奸勾結臣飭令地方稽查儻有外來奸匪入寨煽惑者立即擒拿究治奏入諭曰此所謂中肯綮之論也實力爲之十月疏言黔省思州等府與湖南接壤今辰沅一帶饑民百餘人赴黔挖蕨度日彼地秋收旣薄被災諒不止此百餘人恐交冬後乏食貧民來者益衆採蕨不足資生臣仰體皇上愛養黎元聖意卽飛飭貴州布政使糧驛道於備公銀內動支三百兩差員星往思州會同地方官按大小口每名酌給三箇月口糧銀兩以資接濟並飭查明續到人口卽一體散給安置上嘉之十五年正月授東閣大學士兼禮部侍郎三月加太子太保十六年三月卒遺疏上諭曰張允隨簡任中外宣力有年忽聞溘逝朕心深爲軫惻應得卹典察例具奏旋賜祭葬諡文和

### 查郎阿

查郎阿滿洲鑲白旗人姓納喇曾祖章泰以軍功授雲騎尉祖查爾海復以軍功晉襲一等輕車都尉父色思特由護軍從征噶爾丹於烏蘭布通陣歿入昭忠祠查郎阿初襲世職兼佐領康熙六十年授參領雍正元年授吏部郎中二年特擢吏部左侍郎三年二月署鑲黃旗滿洲都統七月疏言直隸州州同州判向用捐納貢監恐不足統所屬科甲出身之知縣請將舉人及恩拔副貢補用下部議行五年四月遷左都御史仍辦吏部事十一月西藏噶卜倫阿爾布巴等戕總理藏務貝子康濟鼐扎薩克台吉頗羅鼐以聞命查郎阿偕副都統邁祿率兵進藏六年四月授吏部尙書九月奏言臣等五月自西寧出口八月抵藏駐藏副都統馬喇學士僧格及頗羅鼐已擒阿爾布巴卽會同鞠實誅之餘黨悉抵法十一月又奏藏事已定達賴喇嘛移居裏塘臣遵旨留陝西四川兵各千交駐藏大臣調遣報聞十二月奏言頗羅鼐爲唐古特衆信服請令總理後藏事務其前藏據頗羅鼐舉二人一色珠特色布騰一策凌旺扎爾俱授噶卜倫但新任恐未妥協前後藏不遠暫令頗羅鼐兼管俟達賴喇嘛移居畢昭地兵撤頗羅鼐乃專管後藏允之七年二月奉旨查郎阿自藏回到西安協同川陝總督岳鍾琪辦理軍需不必

來京四月署川陝總督八月奏改西安管糧通判爲水利通判移駐涇陽縣之王  
橋鎮專管涇陽醴泉三原高陵臨潼五縣隄築從之十月兼理西安將軍印務加  
太子少保尋奏安西沙州等處屯民豐收恐口內囤戶乘機輿販射利請嚴查禁  
並諭屯民時存一年所需餘卽糶諸本地以濟兵民食用諭曰禁止奸徒射利辦  
理甚是但民戶餘穀祇許在本地糶賣尙未妥協朕思民戶盈餘之穀原期糶賣  
以爲日用之資若本地糶穀者少則出糶未免艱難不可不爲計及著該地方官  
酌量情形動支官銀照時價糶儲備用毋得勒賣滋擾十二月奏言甘肅近嘉峪  
關兵馬出口頓宿米豆草價俱昂肅銀兵餉本色少折色多不敷糶買請量增從  
之八年十月命往肅州辦理軍需仍兼川陝總督九年二月增設四川總督查郎  
阿改署陝西總督四月奏言大學士公馬爾賽等因岳鍾琪撥駐肅兵四千出口  
肅州兵單議將撥到甘涼之滿洲蒙古兵暫駐肅俟山西綠旗兵千五百並附近  
肅州之提標兵三千五百派調到肅再將滿洲蒙古兵移駐安西業奉俞旨臣查  
肅州附近標營止有甘涼二州甘州提標兵除派撥外止有千五百餘新募三千  
軍裝及馬未齊涼州鎮標除派撥外止供汛守不便再撥肅州現駐寧夏涼州固

原兵千五百又調山西兵千五百合鎮標兵六千餘又寧夏滿洲兵千五百統計萬餘足資彈壓不必移應駐安西之滿洲蒙古兵亦無庸再派五月又奏言奉旨於湖廣買米循舊道運貯商州備轉運臣查大學士等原議自襄陽至龍駒寨運價及造船濟河每石費銀一兩龍駒寨至安西每石二兩較西安米價已逾數倍商州處萬山中丹江環之地氣潮溼商南雒南等縣環山濱河亦難久貯陝省各屬存糧百二十餘萬石更有扣存五分社倉銀經督臣岳鍾琪奏明存庫未糴請動此項於新穀豐收時酌量採買分貯州縣可省運費而散貯各處每年出陳易新亦易均如所請十月準噶爾賊犯阿濟卡倫蒙古游牧被掠敕查郎阿安緝之十年七月諭曰西路軍營事務岳鍾琪辦理總不妥協著卽回京署陝西總督查郎阿年來辦理軍務事事合宜克勝大將軍之任著署寧遠大將軍印務但肅州路遠未便來京請訓今特命大學士鄂爾泰馳驛前往肅州傳朕訓諭並賞銀一萬兩十一年四月疏劾駐防廋集副將紀成斌駐防烏克克嶺總兵張元佐漫無偵察致賊刼掠糧車逃遁得旨紀成斌在軍營正法張元佐降三級調用八月奏報庫爾墨圖山賊五十餘來犯我兵擊斬二十餘人餘俱生擒無一脫者上諭獎

之九月條奏禁止逃兵四事一律載官軍從征私逃初犯再犯及知情藏匿俱分別治罪誠恐愚誤罹重典請令該管大臣飭將領頭目等明白曉諭俾知凜遵一自將領至什長旗俱有管兵之責嗣後兵逃什長旗卽日報明查緝逾限及徇隱者罪之如一營內一月報逃二名以上逾限不獲該管分別治罪一逃兵自悔報到無論初犯再犯俱免罪入伍總以文到一月爲期許於所在赴官投首轉押回營逾限自首者減二等治罪仍准入伍自首復逃獲卽王法一逃兵必經汛卡汛兵能查獲者視離營遠近酌賞官弁記功如別經拏獲各汛卡失察弁兵分別議處治罪軍機大臣議如所請尋疏劾總兵曹勳奉派駐防哈密縱賊捏報奉旨卽在軍營正法十月奏言冬令雪深應分大兵駐防臣酌令副將軍張廣泗駐北山常賚駐南山臣與參贊穆克登等留駐大營仍不時親往南北兩路巡察並派總兵張朝良等分防要隘尤之先是查耶阿疏劾副都統阿克山觀音保所管馬倒斃走失有心玩誤部議卽在軍營正法十二年三月查耶阿奏阿克山觀音保所屬兵久居南方不知牧法較退縮竊換者微別請暫停正法在軍營通衢枷號詔徧諭軍營將士示警五月諭北路定邊副將軍策凌來京會議軍務九月張廣

泗奏大敗賊於鄂隆吉爾大坂俘斬甚衆命議敘在事將弁並諭曰署大將軍查  
郎阿雖奉調遣來京然自統兵以來與張廣泗同心協力整飭戎行鼓勵士氣此  
番克捷亦由平日訓練整頓之所致著一併從優議敘十三年五月噶爾丹策凌  
乞和查郎阿遵旨以次撤大兵還六月奏西路駐防事宜一邊界定後廷議留兵  
於巴里坤二千哈密二千查巴里坤隘口處處可行二千兵盡數派防亦不足用  
至哈密二千屯田則不敷巡防則難徧且兩處中隔南山大坂呼應未便與其分  
駐兩地不若合駐山南請增兵一千合爲五千哈密實駐三千其西三堡沙棗泉  
東北塔勒納沁並有城堡各駐一千聯絡方嚴密一哈密夏熱軍營馬駝應每年  
草肥之時撥兵二千攜至山北呼齊爾台沙山子鹿心山等處牧放增斥堠防守  
秋深仍回山南又南山大坂爲哈密北面屏藩烏克克嶺爲三堡沙棗泉要隘塔  
勒納沁河源爲塔勒納沁要口應分設斥堠撥兵瞭望一哈密貯糧充足且有察  
巴什達里雅屯田可供三處兵糧無庸輓運一留駐巴里坤兵已閱七載應悉撤  
預選安西瓜州兵四千俟巴里坤兵撤回卽令大員領赴哈密駐防以均勞逸得  
旨允行又條奏六事一巴里坤兵撤後廷議於安西增提鎮各一兵一萬攜眷駐



防聲援哈密查兵萬需糧十萬安西屯糧不敷城堡營房事事需籌不若於甘肅提督肅州涼州西寧安西四鎮各撥兵一千更番迭戍無庸於安西增兵一撥陝西督標兵千固原提標及各協千五百延綏千寧夏千河州五百合五千在赤金靖逆柳溝布隆吉爾橋灣五處駐防附近俱有牧場一赤金等五處兵期以二年全行更代哈密兵年更一半其半熟練即可教習一半新兵一哈密及赤金等處兵五千應以總兵二員副將二員統領分轄赤金等處總兵副將於兵丁更代時俱更哈密總兵副將令一年更代庶屯田斥堠有新舊大員相間管領一哈密兵屯種收穫足供口糧其各衛所管屯田畝應悉與安西鎮標營兵丁屯糧如再不敷照例給折色一肅鎮臨邊請增城守一營設都司千總各一把總二撥步兵二百專司城守汛防廷議如所請行並議再令提督一員駐哈密節制兩鎮居中調度從之先是上軫念從征將弁敕陝西等省現出各缺十中令三陞補出征之員至是西路兵出凡陞補他省者應各赴新任查郎阿奏言陞補中缺甘肅人員隨征年久今甫回籍又遠赴新任或無力攜眷同往留又無人養贍請將現在軍營陞補直隸省之千把總留陝甘各營遇缺挨補上以候缺需時令現任千把總未

出征者開缺以留陝人員補用七月授大學士仍管總督事諭曰西路官兵前因岳鍾琪調度失宜諸事廢弛遂致軍氣不揚士心不振自雍正十年查郎阿統兵以來與張廣泗同心協理事務整頓時時訓練凡行間將士俱知奮勇效力營伍爲之改觀所以十一年十二年賊人兩次侵犯卡倫俱爲我兵擒剿未令免脫且賊人因我軍嚴整畏憚懼服從前狡獪伎倆不敢復逞此皆查郎阿辦理妥協之所致今大兵撤回查郎阿張廣泗俱著交部從優議敘尋議加三級八月命爲文華殿大學士兼兵部尙書是年仍改陝西總督爲川陝總督乾隆元年三月奏言巴里坤兵現違旨撤還內有勇健營一千一百名係新設別無營汛撤回難於部署且係十五省所選伎勇離家日久聚處恐不相宜請各歸本省發督撫提鎮隨標入伍效力不願者聽上報可初查郎阿以甘肅地瘠請酌撥陝西倉儲預籌協濟以裕民食詔會同陝西巡撫劉於義確議五月會奏協濟六事一原奏撥陝糧六萬石以四萬濟平涼二萬濟慶陽今固原等處缺糧請增撥二萬石俟麥秋後陸續撥運照軍需例給價一撥糧原按西安十二州縣倉貯多寡均派咸寧長安各三千石涇陽醴泉興平各六千石乾州七千石咸陽五千石永壽四千石富平

三原各六千五百石高陵藍田各三千五百石合六萬石今增撥二萬應於附近各屬酌撥一糧由北路運往若逐站轉運則富平等縣止數十里總匯於乾州永壽等處接運勞逸不均應令各州縣直送各處交收一原奏所運糧分貯涇州長武查長武屬陝西涇州距慶陽各屬尙遠今議以二萬石由涇陽九條溝直運慶陽其餘六萬石仍運至涇州分別接運勻貯再會寧安定靜遠三縣山田歉收附近無可協濟應於運涇糧內在靜寧固原二州多貯數千石以備三縣不時之需一口袋舊存十四萬五千條或雙套或修補即可備用至慶陽涇州卽留備接濟分運仍按數收貯一甘民素無蓋藏平慶尤甚豐年盡糶所有則價頓減稍歉則價頓昂請嗣後豐年隨時採買積貯民免熟荒之累得旨妥協之至著照所議行六月疏劾原任甘肅巡撫許容匿災殃民營私樹黨各款命革職拏解來京部擬杖徒援免八月奏陝甘標營生息銀兩五事一營運之宜變通也各營兵借債輸利貧無底止欲除私借須籌官借之條凡兵丁急需許呈明該管千總把總轉查實係無力卽以生息銀會同地方官借給每兵不得過五兩一分起息於應領餉銀內分五季扣除扣還仍准借給一生息之宜因地也地方有豐裔生息亦應有

重輕延綏鎮協地處極邊當商領運應照例一分起息此外量爲輕減一本銀之宜畫一也生息銀兩原係惠濟兵丁向止議及督撫提鎮各標營而協路各營未及應照雲貴例每兵一名給銀二兩營運生息以乾隆二年爲始按各標營協路兵數均給一收放之宜慎重也營中收貯經理恐不免私弊請地方官貯庫聯銜動支該管大員不時盤查如通同徇隱及失於覺察照例議處賠補一賞恤之宜酌量也各營生息既作賞銀宜量入爲出應先儘現派駐防哈密赤靖等處兵萬名酌定其家遇喪事賞銀六兩吉事賞銀四兩存營兵照防兵減半又言口外大通地方既設營汎流移蒙古不便容留原有該管之札薩克卽交收管否卽查附近各部落分別安置如已立產地方官估價給令另置無則查按戶口給半再違例容留者兵民治罪衛營官失察議處疏入詔均如所請行九月來京陛見諭速回西安十一月奏言陝省屯田之賦更重於民田昔年糧從地起丁由人出故屯田賦重而丁銀稍輕經前督臣岳鍾琪奏將通省丁銀攤入地糧屯田地每畝一石折銀一兩均載丁銀一錢五分糧輕丁重民戶減除甚多糧重丁輕者有增無減請照前奉恩旨豁除俟下屆編審將通省新增應完之丁銀均攤於民戶地糧

漸補足原額卽行停止永不加賦則以糧載丁之案不必紛更而屯累稍紓再查陝西馬步俱係招兵食餉獨督火器營兵一千於咸長等州縣屯丁內拔補每名月給餉銀七錢餘皆屯民津貼或本人當兵合衛代完錢糧或出營僱人其人稍不遂意逃避勒措又向本衛拔補滋擾無已請照鎮標步兵例招募差操不在屯衛拔補庶各縣屯民永免幫貼之累又言屯衛地丁久歸州縣初時恐公務浩繁應役需人將屯丁留用二千每丁受旱地一頃將額徵米二石二斗豆一石八斗布銀四錢二分留爲應役工食近來差務漸減各衙門皆有經制人役且一丁受地一頃終歲服役不遑盡力農畝俯仰何賴更有本身不能應役僱人代替亦有各衙門不用供役勒折軍錢弊難枚舉請將屯丁二千裁留一千各衙門少一千屯軍卽各州縣多一千農夫錢糧歸於有用屯困亦稍甦其留丁一千名工食外再給銀二兩計共銀二千兩在司庫按季支領均從之先是查郎阿奏銷軍營節年倒斃及竊失馬駝過多經戶部勒令賠補二千十月奏言軍營調度在大將軍果指示得宜何至牲畜被竊所有雍正八九十等年巴里坤被竊馬駝應責岳鍾琪賠補十一年五月柏楊溝被竊馬駝責臣賠補惟雍正九年鄂爾多斯牧廠走

失馬駝仰祈聖主念該部落隨征數年尙屬奉公副將馬順暨滿洲驍勇等營官兵亦頗著勞績均准免賠至節年倒斃馬駝因從內地出口跋涉數千里軍營氣寒耕作馳驟筋骨俱傷是以更多懇恩軫念末弁窮兵免其賠補上特許之三年三月疏參肅州道黃文煒軍需道沈青崖庫官石日璉營私侵帑請革審劉於義總理軍需縱容徇庇併附參上命左都御史馬爾泰等會鞫得實治罪如律五月奏言涼州莊浪建滿城並衙署營房原估銀五十二萬八千六百餘兩緣募附近番土民人用工少而得力多節省銀二十二萬三千有奇臣查閱邊地見肅州涼州城垣坍塌平番大通河橋梁被衝請撥銀三萬六七千兩興修從之又言章家呼圖克圖奏請以裏塘巴塘等地方賞給達賴喇嘛經議政大臣等令臣悉心籌畫咨商雲貴總督慶復妥議臣查達賴喇嘛爲番夷各部落所尊崇聖祖仁皇帝時克西藏設牀加封駐兵戍守洵安邊至計然由滇蜀至西藏途遠勢隔是以將裏塘巴塘等處收歸內地以利糧運雍正三年將察木多以內各處頭人給土司職銜爲打箭爐保障察木多以外給達賴喇嘛每年賞達賴喇嘛茶五千斤班第額爾德尼茶二千五百斤加恩已渥今若再賞裏塘巴塘令番衆赴藏納差將來

駐藏兵撤倘有叵測打箭爐外沿途無不阻梗惟是藏中大小箭廟千餘所常住喇嘛四十餘萬用度浩繁今章嘉呼圖克圖亦止因日用不敷起見請照裏塘巴塘等處每所細數目在打箭爐商稅銀內按數賞給於每年達賴喇嘛差人領茶之便給令帶回其地仍隸內地奏入上嘉納之十二月奏言寧夏地震臣聞報卽攜銀馳往撫綏被災兵民又撥固原兵六百協看巡防得旨嘉獎四年三月奏言督標四圍空地及收回將材等項地畝計十八頃有奇前督臣岳鍾琪奏准招佃收租借給乏食兵丁照社倉例加二起息還倉以備補造器械比年因雨澤愆期積欠二千餘石請准豁免並請嗣後查實在乏食兵丁准將所借照市價於月餉內陸續扣還免其加息報聞五年四月命還京入閣辦事五月加太子太保七月御製詩賜之詩曰玉佩資調燮西陲運計籌持鈞推舊德補袞著嘉猷可繼蕭曹業還同韓范儔江湖與廊廟莫釋一心憂六年奉命偕侍郎阿里衮清查黑龍江吉林烏喇等處開墾地畝事竣還京十二年三月因衰病乞休命以原官致仕九月卒子邁拉遜襲世職

稽仲筠

稽曾筠江南長洲人父永仁以生員隨福建總督范承謨幕康熙十三年逆藩耿精忠叛誘執承謨脅永仁降不屈亦被執十五年與承謨同遇害四十七年承謨子時崇任廣東巡撫以永仁隨承謨殉難疏請贈卹並從祀承謨祠部議生員無贈銜例特敕追贈國子監助教准其從祀雍正二年入祀昭忠祠曾筠母楊氏守節八年賜忠節流芳額乾隆二年賜人倫坊表額並建坊曾筠康熙四十五年進士改庶吉士散館授編修五十六年充日講起居注官提督山西學政六十年遷左中允尋遷侍講雍正元年正月命入直南書房復命兼尙書房行走二月擢都察院左僉都御史署河南巡撫三月充河南鄉試正考官六月遷兵部左侍郎是月河決河南中牟縣詔曾筠往督築七月奏劉家莊漫口合龍十一月奏十里店漫口合龍俱下所司知之向例江南河廳各員每歲冬領帑購料備用曾筠疏請豫省黃河兩岸工料亦照此例於每歲冬預撥司庫銀發沿河州縣買貯備用不敷近河百里內外亦發銀購買量給運價庶險工應手不致遲誤下部議行二年正月疏言沁黃交會之銚期營秦家廠一帶皆頂衝請於倉頭口對面橫灘開引河一道俾水勢順流由西北逕達東南勿令激射東南再釘船幫大壩宜鑲建雁



翅幫護更於大壩上下酌建挑水壩二三座頂衝勢可減壩工穩固詔允所請又言兩岸隄工久未加幫在在危險北隄起滎澤縣訖山東曹縣界南隄亦起滎澤縣訖江南碭山縣界臣同總河齊蘇勒勘明最險應修處共長十二萬三千七百九十六丈請動帑興工部議從之四月特授河南副總河駐武陟縣專管河南河務曾筠奏河工調遣不敷請設標下河兵王大臣議駁得旨若無標下河兵難供驅策著再議尋議就近撥河南撫標及河營兵弁隨工調用七月疏言鄭州大隄石家橋迤東一帶大溜南趨應於迎溜處下埽簽樁復於埽灣處建磯嘴壩一中牟縣拉牌寨黃流逼射應下護岸埽加工鑲墊建磯嘴挑水壩二其穆家樓隄工坐當頂處亦應下埽加鑲又陽武縣黃河北岸祥符縣珠水牛趙二處隄工近因南岸中牟迤下新長淤灘大溜北趨成頂衝勢應下樓岸順埽下加鑲墊以資鞏固部議均如所請十月疏言小丹河自辛句口至河內縣清化鎮水口二千餘里輝縣五閘安陽縣之萬金渠及恆河閘昔人建閘開渠引水灌田照官三民一之法通漕便民但日久弊生守口之夫違禁賣水致運河淺澀請嚴飭管河各員稽查三日放水濟漕一日塞口灌田如賣水阻運嚴治其罪下部議行三年三月疏

言祥符縣南岸回回寨對面淤灘直出河心致河勢南趨回回寨以下迤南等處係單隄且逼省城關係甚重應由北岸舊回回寨至官路李家店一帶舊河身濬引河一道引溜直行俾成東西之勢隄工可得保固諭與齊蘇勒酌量相度而行五月同齊蘇勒奏勘地形西高東下引河可開並於南岸建挑水壩一逼流入引河上報可四年二月疏言衛河水勢奔騰河底浮沙隨濬隨淤請於汲縣湯陰內黃等處築草壩二十六直隸大名縣張兒莊亦建草壩一首尾接應以濟漕運四月又言鄭州薛家寨等處隄卑溜衝請增修埽壩等工均如所請行五年正月命兼管山東黃河隄工二月條奏河工六事一埽料以柳束爲重豫省向有柳園漸爲河水所浸而此埽彼淤官無界址民多隱占請敕撫臣將現存柳園勘明立界淤地查補還額並飭河員廣爲栽種一印官專司民事係撫臣題授河員專司河工係河臣題授設官分職雖有定制民事河工原無歧視請令河臣撫臣會同保題陞調一豫省隄工向例撥江南河兵千名輪班防守嗣因往返需時拔堡夫五百代充但工長汛險不敷驅策請仍照千名之數於堡夫內拔補足額其江南撥到千把總六員令各歸專汛另設千總二把總四分隸開封南岸河廳管轄毋庸

調撥江南千把總再於原駐武陟千總二員內移其一駐歸德汛所分撥河兵百  
名交該弁管領一豫省大隄每二里設堡房一令堡夫居之修墊水溝巡查鼠穴  
今臨河月隄請照大隄例增建堡房防守一祥符縣隄長八十餘里止有管河縣  
丞應增主簿一開封下北河地方增巡檢二分駐祥符等縣適中之地協同廳汛  
搶護並稽察逃盜一歲搶工程全賴汛船運料今豫省上自武陟下至虞城撥運  
無船不能接濟請照江南汛船例每汛造船五隻駕運俱下部議行五月遷吏部  
右侍郎仍留副總河任是月奏蘭陽縣管梁蔡耿四水口一帶隄工河勢衝嚙請  
將梁蔡耿三水口下埽加鑲並於四水口隄南各築月隄作重障又祥符南岸李  
盤寨程家寨等處應增築月隄陳留縣七八九堡大隄汛水直射隄根隄北舊有  
隔隄應一例增培部議從之十二月轉吏部左侍郎六年二月疏言儀封北岸水  
勢衝急雷家寺上首灘崖刷成支河請將舊隄加幫高厚接築土壩一道跨斷支  
河勿使掣溜侵隄再青龍岡一帶水勢縈紆將上灣淘作深兜與下灣相對請乘  
勢開引河一道導水東行則大河之水自暢詔允所請尋擢兵部尙書四月轉吏  
部尙書仍管副總河事九月奏蘭陽縣耿家寨北岸隄工因積水深潭黃流洶湧

請下埽簽椿加幫築壩並將月隄增高加厚從之七年三月授河南山東河道總督兼管運河四月疏言運河五廳額設淺溜橋閘等長夫冬春小挑大挑不敷力作增設酌募夫役各夫工食舊額多寡不同請酌定歲給工食並量給器具各銀確數畫一支給按工計夫按夫給價毋浮冒下部議行八年五月命署江南河道總督疏言豫省黃河北岸荊隆口大溜頂衝應開引河一道自黑岡口至柳園陟崖河尾工長三千三百五十丈請動帑興修允之六月抵南河總督任十二月疏言高堰山盱石工最要奉旨發帑興修爲久遠計臣莅任後嚴催集料興工題估幫築戩隄今查石工內有椿腐石欹順砌卑矮者應築越壩拆修加高一律堅實其年久傾圮者應全拆修砌穩固始垂久遠至興石工築壩攔水湖面水勢浩大一線孤壩難保惟有借舊石工連土留寬二丈暫爲外障俟新土築定根基再拆舊石選用其舊底應留二層以禦風浪其清水潭未建石工應一律戩建九年四月疏言禹王臺壩工爲江南下游保障查流水源長性猛請於現在竹絡石壩二十七丈外依其頂衝形勢統建石工六百餘丈其接連岡阜仍築土隄沱河口門大爲挑濬順其入海之路務須壩堅隄厚堵截流水循故道直趨入海俱如所請

十年五月以揚州府屬芒稻河閘座工程向例商人捐款修築多草率奏請歸近河各印官轄並增設閘官一司啟閉從之十二月加太子太保十一年四月授文華殿大學士兼吏部尙書仍總督江南河道十月疏言河設堡夫防守挑積土牛資修補隄工之用請責該管汛弁逐堡挨查督令按月照數挑積造冊交代以專責成再河兵於霜降後亦照堡夫積土請責該弁查覈入交代項下照例辦理庶兵夫無閒曠既資防守之責復成積累之功又葦蕩營所產柴束請立定章程儂運交工濟運俱如所請行十一月諭曰大學士嵇曾筠自簡任河道總督以來整理有方調度合宜朕念伊父之忠義伊母之節操雖已贈卹褒旌尙未膺一品封典今以特恩給予大學士應得封典以示優眷十二月丁母憂諭曰大學士嵇曾筠之母楊氏撫孤守節教子成名前以特賜旌褒並給一品封典今以疾終官署加恩賜祭一壇賞銀一千兩以爲喪事之用河防關係重大嵇曾筠歷練老成著有成效伊母壽登耄耋榮封一品在人子之顯揚已極嵇曾筠著在任守制給假三個月回籍料理喪事畢仍回河道總督之任照常辦事伊子嵇璜亦著給假六個月回籍襄事現今河道總督印務著高斌暫行署理嗣曾筠籲懇回籍終制得

旨據奏情辭懇切具見悃忱准其回籍終制總河印務仍著高斌署理再嵇曾筠本籍常州距淮安不遠明歲工程亦可就近往來協同經理在伊終制之心既已得遂而河防事宜亦大有裨益矣十二年四月同高斌奏增築海口辛家蕩月隄及閘座九月同副總河白鍾山奏修清江龍王閘先濬通鳳陽廠引河利漕運俱從之十三年三月諭曰大學士嵇曾筠於閏四月安葬伊母之後卽赴工管理總河印務今上御極特命總理浙江海塘工程乾隆元年正月兼任浙江巡撫三月諭曰大學士嵇曾筠現爲浙江巡撫著照李衛之例改爲浙江鹽政六月條奏鹽政四事一商人自僱商捕皆壯健有力熟悉梟販蹤跡每月工食幾及守兵兩分名糧一旦革除數千人失業勢將轉成梟販請改爲官役地方官造入卯簿不時約束一水路私梟積販所在賴兵役駕舟巡緝緊要隘口有司會同營汛確察責商修理巡船編號造冊存案巨商領運官鹽每有飛渡灌包夾帶之弊鹽引相離卽屬行私巡船兵役一體查拏交地方官訊究一兵役宜分別賞罰拏獲私鹽鹽船入官私鹽變價卽於所變項內酌量給賞倘圖賞混拏誣指並受財賣放自行夾帶私販者按律治罪一緝私須責成文武官弁互相稽查遇有奸徒搶鹽及鬩

開場竈之事立即擒拏獲犯過半並獲首犯者免其處分否則照盜案例參處限  
年緝拏地方官弁一年內無參案者准紀錄一次三年准加一級大計無鹽案參  
罰方准卓薦若隱匿不報照盜案例革職或將大夥之案巧爲開脫者照失出例  
處分下部議行十月疏言江海形勢南坍則北漲臣派妥員於南岸堆沙乘冬令  
北風易爲衝刷今東西兩塘根俱漲有護沙應建魚鱗石塘卽在舊塘基開槽築  
壩如式整砌後面全憑土戩寬厚一律高堅以成一勞永逸之鉅工海寧迤西翁  
家埠一帶柴草工程加鑲高厚尤爲萬全無弊詔允所請十月來京陛見加太子  
太傅二年八月嚴州府屬之淳安縣淳河發源於徽州之徽山建瓴而下急湍奔  
流直趨北岸侵民田廬請築石礮八十五丈護之三年四月又言樂清縣地處海  
濱田廬賴頭隄禦潮今坍缺請急修築八月又請撥省城義倉穀運温台等府屬  
平糶俱從之九月諭曰大學士嵇曾筠在浙江年久今海塘工程已漸就緒著入  
閣辦事十一月以痰疾奏請便道回籍調理得旨暫回原籍賜人漚一斤復賜詩  
曰海疆三載耀台星沙漲金隄瀆協靈此日黃扉資贊化昔年絳帳憶談經旌揚  
浙水行來遠路指燕山望裏青料想微疴應早復丹誠平格享遐齡十二月卒遺

疏入諭曰大學士嵇曾筠才品優長老成練達久任河道總督茂著勤勞繼膺浙督之命經理海塘工程漸次就緒朕心嘉慰念其外任多年宣召入閣辦事旋聞身患痰疾精力衰頹特遣伊子嵇璜回南省視並賜葺藥准其回籍調養以俟痊可入都嗣聞病劇遣太醫馳往療治不意溘逝深爲傷悼加贈少保加祭一次應得卹典該部查例具奏尋賜祭葬如例謚文敏四年四月諭曰大學士嵇曾筠管浙江督撫事督修海塘具有成效民生受其利益應祀於浙省賢良祠十一月又諭曰已故大學士嵇曾筠前在江南河道總督任內悉心籌畫殫力宣勞疊蒙皇考諭旨褒嘉至今河渠受益前任河臣靳輔齊蘇勒俱建有祠宇永享禋祀嵇曾筠勞績可媲美二人著照靳輔齊蘇勒之例一體祠祀子璜現官大學士

高斌子恆 孫樸

高斌滿州鑲黃旗人初隸內務府雍正元年正月由內務府主事遷員外郎兼佐領四月遷郎中四年管理蘇州織造六年授廣東布政使尋調浙江七年調江蘇九年二月調河南九月遷河東副總河十年調兩淮鹽政兼署江寧織造十一年二月諭令就近學習河工十二月署江南河道總督十二年四月疏言范公隄逼



臨江海爲鹽場藩籬年久多殘缺計六萬四千一百三十八丈請按相距里程設堡夫三百五十六及時培修汛官稽其勤惰又宿桃中河安清中河宿虹外河山安揚河海防江防等廳前經河臣嵇曾筠等題准分畫所轄界址更正銜名關防其各河營守備與廳員同汛協防請一體更正部議如所請八月回鹽政任十二月仍署河道總督十三年四月回鹽政任十二月授江南河道總督乾隆元年六月疏言河工搶修工段需用土方請照兵四夫六之例責令河兵挑運十分之四准用民工十分之六約計需費銀兩與酌給之數相符將此項據實報銷又葺蕩左右二營額採蕩柴分爲廠運自運二項共需運腳萬餘兩請將蕩柴分內給各廳領運若干照漕規繳價若干其所應給運腳卽於應繳價銀內扣除餘充兵餉至自運易滋弊竇應歸廠運十二月又言江南河工向因未設河庫道凡各省州縣外解書夫等項河銀並關稅計十八萬五千餘兩係各廳自行收支多弊混請將此項河銀自乾隆二年爲始悉歸道庫一切收支解放兵餉修船之費俱由河庫道經管隨時報明查覈均下部議行先是上以河南永城江南蕭縣等處黃河爲患命高斌會同兩江總督趙宏恩河南巡撫富德等籌辦疏通之策至是高斌

等奏言黃河南岸徐州府碭山縣之毛城鋪向有減水石壩一蕭縣之王家山有天然減水石閘一邳州睢寧縣之峯山有減水閘四俱建自康熙年間誠分黃導淮以水治水之善策因年久淤淺苦水發爲患查毛城鋪原有洪溝巴河二河爲減洩黃水故道因閘下地勢東北高於西南是以水向南行漫入祝家口請自今水涸後將二河濬令深通並挑寬河頭百餘丈再於二河上首逼近毛城鋪口門之處將舊有之蔣溝河疏通祝家口潘家口等處築夾土大壩攔截南流務使減下之水盡入蔣溝洪溝巴河分流下注則永城碭山一帶均可無淹漫之虞至王家山天然閘減下之水亦會入徐溪口閘下舊有引河中自齊村橋至堍集閒被淤墊宿州境內灰谷堆燕子口等處亦有淤淺應一律疏濬又峯山減水四閘歷年旣久自閘塘以至孟山湖六十餘里引河多淤應一並估挑又奏淮陽運河自清口至瓜洲三百餘里其上源係分清口洪澤湖之水入天妃閘建瓴而下經淮安寶應高郵揚州以達於江惟借東西兩岸一線漕隄以爲防固請於天妃正越兩閘之下相距百餘丈各建草壩三草壩之下酌建正石閘二越河石閘二又於所建二閘尾各建草壩三重重關鎖層層收蓄則水平溜緩洪湖之異漲可禦運

河之水勢可減再查湖水三分入運七分會黃其山盱尾閘之天然南北二壩原以宣洩洪湖異漲令運道無虞高堰大隄堅固將來非有異漲二壩俱不可輕開使清水全力禦黃河高寶諸湖之水循軌入口不至泛溢下河則高寶興鹽等州縣民田可免洪湖洩水之患疏下均議行會御史夏之芳主事孫濩孫先俊條奏河工事宜命高斌會同大學士嵇曾筠副總河劉永澄等詳度妥議時安徽布政使晏斯盛廣東學政王安國等復請疏濬海口命高斌同趙宏恩及江蘇巡撫邵基會勘二年三月高斌以淮運湖河各事宜有面奏請訓之處疏請來京得旨允四月至京適趙宏恩亦以戶部尙書內擢命王大臣會同高斌趙宏恩將諸臣所奏海口清口運河運口各事宜逐條詳議御史甄之璜鍾衡等復奏毛城鋪工程有礙運道民生請停止諭曰朕前因蕭永等處屢遭水患應作何辦理爲又安百姓之計令該督撫總河等勘明妥議嗣據奏稱疏濬毛城鋪迤下一帶河道經徐蕭睢宿靈虹等州縣下至泗州之安河陡門紆迴曲折六百餘里以達於洪澤湖復出清口仍與黃會已經該部議行據淮揚京員夏之芳等聯名陳奏以爲未便朕以該員等生長淮揚所奏毛城鋪引河不便開通之處果有所見亦未可定

此事關係重大是以復降諭旨令總河會同該督撫悉心籌畫今據高斌趙宏恩來京進呈河圖面奏情事乃知夏之芳等所奏俱非見在情形據夏之芳等稱毛城鋪引河一開則高堰可危淮揚運道民生可慮今據高斌等奏稱毛城鋪減水壩原因徐州一帶兩岸山勢夾束河水屢屢爲患是以前河臣靳輔於康熙十七年題明建設減下之水使歸洪湖以助清刷黃六十年來上下河道民生均受其益是見在毛城鋪濬河乃因壩以下舊有之河身淤阻量加挑濬使水有所歸並非開鑿毛城鋪之壩也況減下之水紆迴曲折六百餘里經由楊疇等五湖爲之停蓄一入湖邊卽已澄清從無挾沙入洪湖之患亦無洪湖不能容納之虞又豈至如夏之芳等所言危高堰而妨淮揚之運道民生乎朕令高斌趙宏恩公同總理事務王大臣與夏之芳等悉心講論而夏之芳等身未親歷其地徒以惑於浮言復固執偏見及王大臣略與辯論卽多遁詞其原無定見可知矣今日忽據御史甄之璜鍾衡抗疏陳奏甄之璜奏稱毛城鋪開河淮揚百萬之衆憂慮惶恐致直隸地方雨澤愆期夫淮揚與直隸相隔數千里直隸之亢旱與毛城鋪引河何涉而乃爲此支離妄誕之語鍾衡條奏二摺皆係毫無裨益之事將毛城鋪牽引

敘入尤屬巧詐鍾衡甄之璜著革職交部嚴審定議具奏夏之芳等既以冒昧之識阻撓河務於前又以巧詐之私希冀掩過於後此並非尋常奏對不實者比著交部嚴察議奏三年正月准揚運河工竣得旨嘉獎下部議敘四年三月諭曰從前河道總督高斌因議疏濬毛城鋪水道之時並請另開新運口堵塞舊運口以避黃河倒灌近據外間傳說及南來之人多言黃河淤墊之處究未刷洗淨盡所改新口雖離黃稍遠而上流水勢旁洩其力已弱不能直注黃河將來倒灌阻塞之患終不能免人言如此是否確情朕實難以遙定惟有命大學士鄂爾泰乘驛前往庶與朕親臨閱視相同四月鄂爾泰勘奏新運口宜開如高斌議下大學士九卿議行詳鄂爾泰傳七月疏言淮揚所屬黃運湖口隄工額設堡夫堆積土牛原以備增卑培薄之用但土牛虛鬆雨淋每多塌卸莫如改築子堰爲善部議如所請八月請陛見諭令霜降後起程賜詩曰禹功萬古仰平成疏濬隨時賴俊英淮浦建牙資保障黃流奏績久澄清息機早是無穿鑿順性猶然矢樸誠潘靳嘉猷編簡在千秋惟爾繼賢聲九月命於進京時取道直隸與總督孫嘉淦總河顧琮會勘直隸河道六年八月疏言黃河自宿遷歷桃源至清河二百餘里河流湍

急險工林立北岸止有縷隄一道並無遙隄重障又內逼運河唇齒相依運河南岸雖有縷隄卑薄不足以資捍禦請將連河南岸縷隄通作高厚作爲黃河北岸之遙隄更於縷隄內酌建格隄九道又江都三汊河爲瓜儀二河口門江廣漕鹽船必由之要津但瓜河地勢卑不能蓄留淮水引入儀河請設瓜河舊口門改向洋子橋營房迤下另挑越河以減淮水入瓜河之分數則儀河可分流刷淤濟運並塞瓜洲應惠閘上之舊越河於閘下另開一道由城河西行以會閘河則水勢均平於運道更爲便利又請將鎮江南岸河道塌卸埽工改建輒工下部議行尋調直隸總督兼管總河印務賜詩曰淮揚底定早垂勳節鉞新開紫氣分自是經綸方藉展可知魚水正需殷人言久慶江南雨物望應歸冀北雲保障繭絲須識取編氓一路頌聲聞十二月奏籌永定河全河機宜惟在使尾閭通暢請於三角淀舊淤傍南稍淺處開爲引河下接大清河之老河頭上接鄭家樓水口挑去積口所挑土卽於北岸廢埝之南圈築坡埝以防北軼南岸之尾亦量爲接築以遏南溜其下口河脣隨時疏通至上游應籌分洩之道請於南岸六工之雙營北岸三工之胡林店七工之小惠家莊各增建三合土滾壩一隄身俱較石壩減落尺

寸南岸郭家隄舊有草壩亦應一律修築如式大學士等議行七年三月疏言直隸山西沿邊副參遊都等缺恩許揀用滿洲人員直隸爲京畿重地請將已補邊缺通曉營伍者調補內地別於京員補用邊缺則滿洲人員更可疏通四月又請拓天津水師營汛增駐滿洲兵千合舊額爲三千滄州亦增兵二百合舊額爲五百均從之七月上以淮揚屢被水災高斌久駐江南於地方事宜熟悉命同侍郎周學健往會總督德沛等辦理賑卹水利事宜十二月奏言永定河上游爲桑乾河北岸自山西大同縣屬之西偃頭村起至直隸西寧縣屬之辛其村止南岸自大同縣屬之冊田村起至西寧縣屬之揣骨疃止可各開築灌田桑乾河由西寧石閘村入山經宣化縣之黑龍灣懷來縣之和合堡宛平縣之沿河口兩山夾峙一線中趨若於山口取巨石錯落堆疊做竹絡壩之意作爲玲瓏水壩以殺洶涌之勢則下游之患可減矣疏上議行九年四月以病聞命醫診視五月奏言見今戶部議准直隸藁城縣知縣高封呈請自備工本赴山東開礦臣思開礦之事向惟行於滇粵邊省山左內地且近代嶽孔林似屬不宜況擾民滋怨奸竊易生尤爲可慮請卽停止上嘉是之十年三月加太子太保五月授吏部尙書仍管直隸

水利河道工程六月議政處行走十一月兼管內務府大臣十二月充經筵講官協辦大學士軍機處行走十一年三月以御史楊開鼎疏劾河督白鍾山駁減工費需索河員漫口衝決匿災不報命高斌往江南會同總督尹繼善查辦尋奏駁減需索等款皆虛惟陳家浦衝刷淹沒事實鍾山坐革職四月疏言准黃二瀆每年伏秋水漲其大小總以老壩口水誌爲準則今應酌定以乾隆七年最大水誌連底水一丈四尺七寸爲準每年水勢較此尙差若干令河臣明白奏報以便驗度水勢之大小至各處閘壩開閉則應以就近石工一定不易水長之尺寸爲度如黃河則有徐州城外石隄可驗河水則有洪湖山盱石滾壩可驗於此立定準則驗度閉啟在工人員皆得遵循無誤如黃河南岸洩水門戶則有碭山縣之毛城鋪壩王家山之天然閘睢寧縣之峯山四閘毛城鋪壩應以徐城石隄連底水長至七八尺爲度卽行開放秋汛過後至九月初一日卽行堵閉再壩外引水支河見有四道而蔣家營一河河頭直順迎溜水洩尤多今應止留三道其上流之汪家莊引河應行堵閉蔣家營河頭因改爲倒勾從前大順之口門堅築草壩堵塞以防引溜過多之患天然閘應以徐城石隄連底水長至八尺爲度卽行開放



水落壩閉不必拘定日期峯山四閘在徐城之下非遇異漲勿許輕開至黃河北岸洩水門戶則有宿遷縣之竹絡壩清河縣之王家營減壩安東縣之馬家港竹絡壩口門應收窄二丈止留四丈其內外之臨黃束黃二壩亦應一例收小酌定每年於十月內東省煞壩後始行開放以濟來歲重運過完卽行堵閉王家營減壩應照乾隆八年原議必俟非常之漲始行開放馬家港與此一例毋庸常時開放於清水則以洪澤一湖爲灌輸蓄納之地水弱則不足禦黃濟運水大則高堰一帶工程受險其積水之處山盱三滾壩外則有盱眙之蔣家閘南北天然壩二蔣家閘應酌定以洪湖水長與山盱南壩相平始令開放南壩一不過水卽行堵閉天然南北二壩應酌量於南滾壩過水三尺之時始將土壩開放俟南滾壩一平卽行堵閉又運口分淮入運淮揚運河三百里進水之源不過借以通舟濟運水勢原不宜過大其草門壩口應酌定以四尺爲度二壩三壩亦須照式收小至南壩壩墩應照北壩改作磨盤式以便重運輓行出口疏入議行七月運河水漲海州一帶被淹命高斌往勘八月會齊河工見行事宜一六塘河謝家莊龍溝口等處隄堰應照原估丈尺量地勢高低酌加寬厚六塘河經由之武漳義澤六里

各滾壩應照原議加倍增長再將六塘河尾閘之中墩河項家衝東門河挑濬寬深卽於口門建石滾壩以利宣洩沈陽前後兩河應將舊有子堰及見議增築處所一律增培高厚一海州州同應移駐大伊山鎮管理運河以南六塘河子堰閘壩等工再增設州判一管理運河以北之贛榆縣及薔薇南橋等河子堰閘壩等工裁溧水縣縣丞改爲沈陽縣縣丞管理一切河道圩岸從之尋請將海州沈陽贛榆乾隆十年以前積欠地漕銀米及淮安分司所屬之板浦徐瀆中正莞瀆臨洪興莊等六鹽場未完折價帶徵銀一體豁免得旨俞允十一月充玉牒館副總裁十二年三月授文淵閣大學士四月諭往江南同新任河道總督周學健辦理防汛事宜其直隸河道總督印務交直隸總督那蘇圖暫管五月直隸水利工程告竣上獎高斌及劉於義勤勞下部議敘十三年三月命同左都御史劉統勳赴山東查辦災賑先是浙閩總督喀爾吉善劾浙江巡撫常安婪贓各款命高斌偕總河顧琮往訊嗣又命大學士訥親往會審論罪如律至是高斌與顧琮會奏不能按款窮究請交部嚴加議處諭曰高斌初審以常安婪贓納賄七款皆虛惟失察家人勒索議以革職其意謂罪至革職事已兩平可以顧頊了局如諺所謂和

事老人者經朕嚴切批示諭令高斌回浙再行嚴審高斌回奏謂將題本內看語摘敘簡略未經聲明等語朕看其終始有飾非護過情形因命大學士訥親前往而高斌等於訥親未到浙之先卽倉忙審出常安婪收銀兩更察出原參款外婪取差役贓銀此明係聞訥親往浙之信爲此先發掩飾之計高斌顧琮承審此案若謂其有意瞻徇常安朕可保其實無是心而身爲大臣於特交查審重案乃不知秉公辦事模稜兩可尙以爲識大體而沽名譽則實有負委任咎無可辭著交部嚴察議奏部議革職詔從寬留任閏七月兼管江南河道總督事務十二月以查辦周學健家產徇私瞻顧命革去大學士仍留河道總督任十五年三月以前所築十字河竹絡壩之臨黃臨運二壩辦理未協部議革任特予寬免十六年三月上南巡命仍以大學士銜管河道總督事閏五月暫管兩江總督印務八月旰南陽武漫工未合龍詔往相度堵築命未下高斌奏請赴豫協辦諭獎其急公任事得大臣體十一月工竣交部議敘尋命同侍郎汪由敦往勘天津一帶河工十七年三月高斌年七十賜詩曰早參黃閣侍金鑾晚覺扶鳩步履難臥理藉卿爲保障成工告我永安瀾讀書未懈平生志益壽何須九轉丹黃髮皤皤在朝衆勤

勞軫念久河干十八年七月奏洪澤湖水漲泛高郵車邏壩決邵伯迤北運河二閘下河高郵寶興一帶被淹下部嚴議是月學習河務布政使富勒赫劾奏河南虧帑事命署尙書策楞尙書劉統勳往查屬實八月諭曰富勒赫初奏時朕意高斌等爲屬員蒙蔽咎在失察今據策楞等查出浮冒蒙混種種滋弊如外河同知陳克濟海防同知王德宣虧缺皆至二三萬高斌等豈毫無覺察乃置之不聞不問竟視虧帑爲應然彌補爲故智二人之罪豈可道乎至通判周冕應辦物料全無貯備以致二閘被衝束手無策仍不據實題參摺問僅稱誤事撤回另委接辦此尤其乖謬之甚者若非策楞等前往則該員竟至漏網高斌等之居心尙可問乎高斌張師載俱著革職留工效力贖罪九月黃河復決銅山縣張家路南注靈虹諸邑歸洪澤湖奪淮而下諭曰秋汛已過何致衝漫河隄其中顯有情弊該管同知李燉著革職摺問高斌張師載身任河督日久不能留心查察致該處隄身單薄疏鬆一時潰決漫延數邑其罪實無可道伊二人見在留工效力如邵伯二閘決口已塞著同往銅山工次上緊堵閉若尙未完卽令高斌赴銅山勒限堵塞如不能剋期告竣卽嚴參治罪策楞尋奏李燉及革職守備張賓侵帑誤工狀諭

曰李燉張賓著卽於該工正法使在工人員知所懲戒此皆由高斌張師載負恩徇縱實無可貸念高斌尙係舊人不忍卽寘重典張師載因並寬宥然國有常刑雖於法外矜全亦不可不使知儆惕著將高斌等縛赴行刑處所令其目覩行刑訖再行釋放二十年三月高斌卒於工次命賞給內大臣銜並內庫銀一千兩料理喪事二十二年上南巡諭曰原任大學士內大臣高斌前任河道總督時頗著勞績卽如毛城鋪所以分洩黃流高斌設立徐州水誌至七尺方開後人不用其法遂至黃弱沙淤隱貽河患其於黃河西岸汕刷支河每歲冬季必督率廳汛實力填築近年司河工員疏忽因有孫家集奪溜之事至三滾壩洩洪湖盛漲高斌堅持堵閉是以數年之間下游州縣屢獲豐收其功在生民自不可泯沒至於癸酉張家路及運河二閘之決則又其果於自信抑且年邁志滿之失朕不得不治其罪而要其瑕瑜自不相掩在本朝河臣中卽不能如靳輔而較齊蘇勒嵇曾筠朕以爲有過之無不及也茲者翠華南幸追溯前勞特沛恩綸用孚公論可與靳輔齊蘇勒嵇曾筠一同祠祀以昭國家念舊酬功之典且亦使後之司河務者知所激勸二十三年賜諡文定四十四年御製懷舊詩列五督臣中詩曰本朝善治

河靳輔齊蘇勒斌實可比倫弗圖保工急至其於齊也有過無不及惟是閉三壩自信過於力下河曾受福異漲害亦迫用此抵以罪勸懲國之則然終諒其心予祠復原職壬午復南巡清口親定式預拆東西壩頻年已受益昨秋黃河決洪湖漲因逼無已徐起壩未至衝潰棘使斌而有知應歎初未識五十一年命入祀賢良祠子高恆乾隆五年由廕生授戶部主事累遷郎中監督山海關稅務調署長蘆鹽政十六年署天津鎮總兵十七年監督淮安關稅務二十年三月丁父憂六月監督張家口稅務二十一年仍監督淮安關二十二年授兩淮鹽政二十五年疏劾前經保薦之淮南監掣同知張永貴狡黠不職得旨嘉獎革永貴職二十六年六月署蘇州織造是年湖廣總督李侍堯奏楚鹽陡貴請飭淮南商定價命高恆赴楚會議二十九年正月議定楚鹽之價照淮南成本每包以二錢三分一釐爲制得旨允行五月授上駟院卿仍管兩淮鹽政三十年四月以從兄高晉任兩江總督應迴避命署戶部侍郎八月以前於揚州拏獲盜銷金冊之太監張鳳諭部優敘九月授總管內務府大臣三十一年授正白旗漢軍副都統三十二年調正白旗滿洲副都統署吏部侍郎三十三年江蘇巡撫彰寶兩淮鹽政尤拔世查奏

兩淮提引歷任鹽政藉端侵肥一案詔革高恆職翰實論斬如律高恆子高樸乾隆三十二年由武備院員外郎調吏部三十五年調顏料庫兼吏部行走三十六年五月遷廣西道御史六月奏年滿書吏應卽撤回原處不准私人衙署上是其言十月轉給事中十一月命巡視山東漕務三十七年三月奏言各省漕船向例每船止准帶土宜一百二十六石如逾額者治罪見經部議額外多帶之貨免其治罪與民船一體徵稅恐嗣後運丁任意攬載必致漕船過重遇風搶溜不能便利請仍舊例嚴禁軍機大臣議行四月擢都察院左副都御史九月以救護月食不列班諭曰高樸年力正少朕特因其人尙明白遇事頗知奮勉是以加恩擢用非他人可比向日方慮其性近喜事不無過當之處何至遇有公事輒行退諉不前則其平日辦事在朕前或有意見長而退後遽圖安逸豈足副朕造就裁成之意著交部嚴加議處尋議降一級調用得旨從寬革職留任三十八年正月署工部侍郎九月署兵部侍郎三十九年三月奏見在軍營文武官員未及請封者請自凱旋之日爲始展限一年按恩詔以前各原品補給得旨允行四月授兵部右侍郎七月奏內監高雲從洩漏道府記載左都御史觀保侍郎蔣賜棨吳壇在九

卿班私論記載優劣詔革觀保等職交刑部嚴審雲從伏誅諭曰此案高雲從以下賤太監肆無忌憚豈可不亟爲整飭以肅綱紀但不屑因此遽興大獄故將高雲從卽行正法不復一一窮治豈觀保等所能狡詞倖免乎觀保蔣賜榮吳壇等清夜捫心若自知身獲重愆朕加恩不爲窮究感愧無地尙得謂之稍有人心若覩顏以爲實無其事甚至少涉愆尤致無知之徒聞之妄以觀保等爲無辜受誣且議高樸爲小人多事則是觀保等良心漸滅殆盡必爲天理所不容高雲從之事大臣中豈無見聞獨高樸爲之陳奏衆人撫躬內省對高樸應多自慚然此乃大臣應奏之事而並不以此賞鑒高樸重加任用若衆人因高樸具奏此事私心銜恨計圖巧爲傾陷則自取其死豈能逃朕洞鑒也若高樸以此沾沾自喜遂因而高興多事卽屬器小易盈或高樸因此事已顯其公正不復自知謹慎肆意妄爲轉致營私舞弊則高雲從卽其榜樣朕亦不能曲爲寬貸也十一月以岫巖城倉糧出糶減價過多命高樸往查將率請減價之城守尉雷健革職尋奏出糶善後事宜言旗倉米價應照月報市價酌減每石不得過二錢月報僅令文職專司亦恐浮開預留地步請一體會報將軍等轉咨在京戶部以備稽查出糶時城守



尉呈報盛京戶部並令該管將軍副都統各派員赴倉監糶大學士等議如所請十二月兼公中佐領四十一年三月授鑲藍旗滿洲副都統八月調補正白旗滿洲尋兼署禮部侍郎十一月命往葉爾羌辦事距葉爾羌城四百餘里有密爾岱山產玉久經封禁四十三年二月高樸奏言回民往往私採防範維艱莫若以官爲開採年開一次可杜懷竊營私之弊詔如所請行九月阿奇木伯克色提巴勒底以高樸勒派回民三千餘採玉婪索金寶並串商盜賣官玉首之烏什辦事大臣永貴以聞詔革高樸職鞠實論斬如律尋諭曰高樸在葉爾羌苦累回民採辦玉石串商私賣又復婪索金銀盈千累萬回衆嗟怨經阿奇木伯克色提巴勒底向永貴呈控永貴據情奏參隨查鈔高樸家中所有寄回金玉等物與原參開單之項大略相符茲復據永貴奏查詢原控告款俱實並查得高樸彼處仍見有銀一萬六千餘兩金五百餘兩高樸貪婪無忌罔顧法紀實出情理之外已降旨將高樸革職嚴審卽於該處正法矣高樸貪縱負恩若此較伊父高恆尤甚不能念係慧賢皇貴妃之姪高斌之孫稍爲寬宥也五十二年二月諭曰原任大學士高斌宣力年久伊之子孫皆經獲罪見在並無服官者著將伊孫候補通判高杞調

取來京以內務府郎中補用以示朕軫念前勞眷注舊臣之意高杞見官兵科給事中

顧琮

顧琮滿洲鑲黃旗人姓伊爾根覺羅氏祖顧八代禮部尙書贈太師諡文端有傳父顧儼歷官副都統顧琮由監生修算法議敘康熙六十一年授吏部員外郎雍正三年七月授戶部郎中十二月遷監察御史四年五月巡視長蘆鹽政九月奏稱州縣於私鹽案每監斃人命請嗣後除大夥興販照例審結其餘易結之案延至四月外一案監斃三人一年監斃三案者照司獄監斃例議處下部議從之十一月授坐糧廳八年遷太僕寺卿九年授霸州營田觀察使十一年正月協理直隸總河二月遷太常寺卿七月署直隸總督八月授直隸總河十二年四月奏報永定河口深通上流始得暢注入淀近因淤正議挑濬仰蒙天賜引河二十餘里顯著嘉祥諭曰朕因畿輔河渠關係重大時時軫念今於河臣籌議疏通之地仰蒙天賜引河自然開刷不勞民力順軌安流河神福佑羣生功用顯著應虔誠展祀以答靈貺十月疏言直隸向無額設囚糧多致飢斃請一體准設以廣皇仁得

旨俞允十二月疏言直隸河道煩多廳員應改撥就近管轄再於要處酌增河員  
通水道屬增糧河通判一駐薊州管京東諸河並僱運船清河道屬滹沱河經正  
定保定河間三府順德府同知難以防範撥歸正定府通判兼管束鹿縣有滹沱  
新工增主簿一瀦龍河滙滋河等水入白洋淀增管河通判一駐祁州蠡縣增縣  
丞一祁州增州同一分管本州及博野兩處民工大名道屬魏縣增縣丞一分防  
漳河順天府屬牯牛新河與永定河南岸咫尺撥歸永定道轄霸州係牯牛下口  
仍令清河道轄涿州北房山等處山水小河並無隄防就近歸霸昌道兼理天津  
道屬三角淀長淀等河增通判一駐王慶坨武清縣增縣丞一東安縣增主簿一  
歸通判轄泊河通判所管清河縣運河二十里故城縣河道十六里撥河間府同  
知轄天津同知所管南皮縣運河撥歸通判管理靜海縣唐官屯千總所管運河  
隄岸錯入靜海青縣南皮滄州境內改分隸州縣管理其千總令督河兵淺夫毋  
庸裁汰至天津清河二道向無搶修物料請照通定通永二道例酌工程險易預  
採大名道無歲修銀應於清河道庫撥用臣標左營黃崖汛右營西儀汛俱距河  
遠並無河務應改隸天津鎮標轄南運河沿河一帶營非臣標所轄汛報稽遲應

將天津鎮標安陵汛歸臣標轄並於永定北運河兵內選熟練樁埽者數名教習南運河淺夫歸唐官屯千總轄潮河上游增外委把總各一駐北口白河上游增外委把總一駐石塘路永定河上游增外委把總一駐水關下部議行乾隆元年正月署江蘇巡撫六月奏海塘善後事宜一松江土塘自上海迤西連寶山縣境甚卑弱其舊寶山一段更頂衝宜加幫迅築一寶山對江墩急宜接築土塘現在塘形陡削者俱加高寬一寶山護城圩係民自築併入歲修估培一塘岸壓占民田免額徵錢糧一塘路綿長請增海防道一駐松太適中地專管一通潮小港泥沙易積令道員以時修濬下九卿議行九月疏言常平倉穀例存七糶三從前糶價現未買補又被水偏災須賑若穀賤方買恐來歲青黃不接無穀可糶請令各州縣遵新例於隣近產穀州縣買補倘隣近亦係歉收卽委員赴江西湖廣採買下部議行十月丁父憂回旗二年三月協辦吏部尙書事七月永定隄決命顧琮往同總督李衛等搶修八月署河道總督三年正月授朱藻爲總河顧琮仍同辦理時畿輔西南諸水匯於東西兩淀淤墊漫溢爲患顧琮奏設袋船撈泥委三角淀通判清河同知司其事經大學士鄂爾泰並李衛朱藻等詳酌議行十月授顧

琮河道總督五年四月疏陳青縣之興濟滄州之捷地兩減河善後事宜一兩減河均以岐口海河爲歸宿連年河尾淤高不能驟達應疏尾閘均於李連濱家口會通直接岐口俾無阻塞一上半截隄偪河身單薄可危應各就南北岸展築遙隄再擇隄身單薄險要處幫築坦坡於河底取土開挖深寬一下半截隄宜相地勢截成拉沙俱使河水由此漫入以緩水勢兼肥地畝一兩處閘口俟河水歸漕設板下閘使下游窪地涸出可種麥一多設涵洞減河水落時將兩岸積水放入掘開中間土埂流通歸海一壓占地已給價出糧將隄內灘地令民佃種收租作搶修費六年六月疏言河間縣縣丞跨管子牙河東西兩隄百二十里巡防維艱請將東岸隄歸駐河東之景和鎮巡檢兼管老漳等河亦就近歸地河鎮巡檢兼管祁河通判改設於子牙河將青縣靜海子牙河主簿文安大成兩縣縣丞主簿霸州州判所管隄工均隸該通判其祁河通判原管河工改隸清河同知俱議行八月題銷永定河修築銀諭曰前顧琮題報漫工疏內稱專管官並不加意搶護及請開銷竟不著落各員分賠明係有心徇庇此項銀俱著顧琮賠補尋裁直隸總河缺命回京候旨十二月授漕運總督七年十月奏漕務十條一嚴禁胥役措

勒並受兌弁兵刁索一各幫旗丁俱令長運不得仍前逐年僉換一江西湖廣等幫由長江至儀徵例不定限浙江幫在大江之南每藉風色遲延應咨督撫嚴催出境一各幫頭次過淮卽委桑園遊擊儂行二次過淮糧道儂行通幫告竣臣循例督催北上一江南山東河道淺阻處預爲挑挖一漕丁遇閘壩卽停泊至兩省交界因弁兵不能越催更多逗遛委標員催儂無許遲誤一黃河北至臺莊臨清北與直隸交界處汛遠兵稀酌添浮汛接催一飭各閘啟閉得宜閘員不得託詞蓄水稽留一江廣幫船遠涉長江多帶木植護船至內河船重難行令酌定水大至臺莊南水小至揚州卸賣一漕船抵通卸還查販米卸乏之幫將副丁應得餘米銀存三給七俾回空不致拮据上是之下部議行十二月奏獲刦鹽船匪徒並於安東山陽各汛遠處暫增浮汛六撥兵防察上嘉其留心經理十年六月疏請於貓兒窩以下馬莊集宿遷阜河以上曹家店各建石閘一束上游之水不致直瀉無餘並將駱馬湖入運處改從阜河以上之駝車頭地方建閘挑渠引水濟運又十字河之竹絡壩當開放後黃水湍激橫截運河糧船提溜頗難應於竹絡壩下之東黃壩迤東接隄堵截別開河頭接入舊有蘇家閘閘南濬河一道越

黃入運從之十一年閏三月署江南河道總督九月回本任十二年九月浙閩總督喀爾吉善劾浙江巡撫常安貪婪各款命同大學士高斌往訊卽授顧琮浙江巡撫嗣又命大學士訥親前往會審皆實論罪如律十三年部議顧琮承審常安案不能按款窮究擬革職奉旨從寬留任尋調河東總河十七年正月疏言運隄向無堡房兵夫遊巡雨夜難以棲止有名無實請照黃河例每二里建堡房一共四百座撥司庫充公耗羨項興造每年酌給歲修銀十八年四月同巡撫蔣炳合疏言陽武五堡民埵並十二堡大隄因雨沁黃並漲以致漫溢現在搶築斷流上游進水地方亦趕緊攔河築小壩又五堡外地勢極窪灘水匯聚急應疏通去路現於壩東開引渠灘水至此循民埵東去漫入灘地以分水勢奏入俱報聞十九年二月因江南總河任內浮費河工銀部議革職諭來京候旨十二月卒

### 牛鈕

牛鈕滿洲正白旗人姓他塔喇由官學生補工部筆帖式康熙三十九年二月武清縣筐兒港水決工部尙書薩穆哈遵旨派賢能司員筆帖式監修以牛鈕監築減水壩六月補本部主事五十年二月上自和韶屯乘舟閱工諭於引河前崖及

減水壩前各增壩一於三里淺挑水壩下又增壩一俱長三四丈上至河西務登岸步行二里許諭牛鈕曰濬河不礙村落方善復指示曰此沙地著濬河寬十丈長四百七十餘丈平坦處深四五尺高阜處或七八九尺不等其河灣處著建小挑水壩二濬河之士卽置兩邊對新河上口舊河下流著建挑水壩二高與岸等於是取儀器置地親視方向命諸皇子大臣等分釘椿木紀丈量處交牛鈕監修三月遷本部郎中五十九年擢左副都御史尋命總管北運河事務六十年九月河南武陟縣馬營口河決上以牛鈕諳練河工面授方略偕侍講齊蘇勒等往堵築十月以巡撫楊宗義與河督趙世顯互諉不亟備料奏敕宗義專其事牛鈕恪遵聖訓在釘船幫興工十一月工竣奉旨詳勘河工自孟津起至清口止以儀封縣白家樓虞城縣黃堎壩徐州以上碭山縣定國寺及胡家樓徐州以下長樊大壩五處應挑引河邳州董家堂宿遷縣大古城桃源縣七里溝三處應建挑水壩奏交署河督陳鵬年督辦六十一年二月直隸長垣縣常村集隄南水勢暴漲逼山東濮州等處遣牛鈕順道往勘會黃河積凌水發馬營口復決牛鈕馳還武陟同宗義於秦家廠堵築六月奏言秦家廠攔河壩自三月興工擇於本月初五日



合龍初三日大雨水漲所留水口稍狹兩邊壩臺墊陷二十七丈幸埽固未動已屬楊宗義備料趨修臣以大雨時行通州運河亦屬緊要卽遵旨回京諭宗義速行堵修先是牛鈕議於黃河北岸自沁河隄至詹家店十八里無隄處接築遙隄以資捍禦宗義以沁黃並漲時水無所洩恐致衝決不若仍留空隙備宣洩雍正元年正月河督陳鵬年奏現在河勢北趨較前情形不同無隄攔束亦屬可虞請如牛鈕議從之七月遷兵部侍郎八月疏禁官民人等服用五爪龍下部議行二年七月疏言江寧杭州荊州京口廣州福州等處駐防兵請令習水師部議江寧等處俱係防守地方並無戰船未便學習惟京口現設戰船應如所請令將軍選兵二千操演得旨允行十二月調禮部右侍郎三年二月因遲延應奏事件降三級調用七年三月覺羅巴哈布首牛鈕監修筐兒港隄工時索其金三百銀千四百兩宗人府傳詢牛鈕抗不赴諭曰牛鈕貪婪無恥其嚇詐之處甚著人所共知乃宗人府傳喚數次抗不前往甚屬可惡著革職拏交刑部治罪尋議照枉法婪贓擬絞監候從之八年正月北運河青龍灣議築減水壩以侍郎何國宗督修諭曰原任侍郎牛鈕在北運河管工年久於地方情形甚爲熟練爾等會議料理牛

鈕卽偕何國宗抵海口溯引河而上估工條議以聞得旨作速料理少有遲誤疏虞惟何國宗是問一應動用錢糧與牛鈕無涉著何國宗一人察核工竣回京乾隆二年七月卒

海望

海望滿洲正黃旗人姓烏雅氏雍正元年由護軍校授內務府主事尋遷員外郎二年賜戴孔雀翎四年遷郎中八年六月擢總管內務府大臣九月管理戶部三庫賜二品頂戴尋偕兩江總督高其倬相度太平峪萬年吉地得旨嘉獎議敘加二級九年七月遷戶部左侍郎仍兼管內務府事八月授內大臣十一年正月命偕直隸總督李衛勘浙江海塘先是總督程元章奏海寧縣潮勢自東而西侵仁和縣界石草各塘坍卸勢甚危險大學士等請特簡大臣通盤籌畫以垂永遠故有是命四月海望等疏言浙江省海塘情形門戶有三省城東南龔赭兩山間曰南大壘禪機河莊兩山間曰中小壘河莊山北河海寧塘南曰北大壘謂之三壘南大壘久淤成陸數十年前水由中小壘入後漸徙北大壘年來桑田廬舍已成滄海若欲遏江海之狂瀾仍歸中道恐非人力能爲查海寧東南有尖山聳峙鎮

鎖海口其西有小山俗名塔山相去百餘丈今江水大溜緊貼北塘直趨尖山塔山之間而海潮激塘護沙日刷若俟冬初水落建石壩堵塞使江水海潮仍向外行則北岸護沙可望復漲至仁和海寧海塘自華家衝以東尖山以西有草塘條石塘塊石塘各工草塘易朽石塊塘亦易坍應改建大石塘並於海塘內增築土備塘一道庶可衛護民生咸成樂土諭曰所議俱屬妥協著交部照所奏行朕思尖塔兩山之間建立石壩以堵水勢似類挑山壩之意所見固是若再於中小壘開引河一道分江流入海以減水勢似更有益從前雖經開挑旋復擁塞者皆因惜費省工之故今若加工開濬兩工並舉更覺妥備石壩建後卽有漲沙而石塘亦可漸次改建以爲永久之利著程元章等相度遵辦是月海望等又奏海塘四事一管工人員工竣日分別議敘一工價銀米兼發於米賤之地買運搭放一增設海防兵備道一總轄塘工同知一與舊設一員分轄守備二兵一千備調遣一新設道駐海寧同知駐仁和與守備分駐海寧東西分防塘汛部議如所請八月又言從前塘工未固由監修之員每多草率所致請敕浙江駐防將軍副都統就近選派旗員協同監修允之十三年振武將軍傅爾丹虐兵婪索事發命海望赴

北路軍營拏解來京治罪八月今上御極命在總理處協同辦事署戶部尙書九月諭曰海望前自北路軍營回京時奏稱鄂爾坤發遣人犯在彼種地並無實濟且恐日久之後人數漸多致生事端應改發他處彼時皇考以鄂爾坤現有大兵駐劄豈有不能彈壓之理此奏不合曾經降旨教導令總理事務王大臣及辦理軍機大臣等議覆此事並無定議之語殊有觀望之心及朕降旨諭再議而王大臣等仍然復游移其說介在兩歧是王大臣等尙未知皇考聖意也朕伏思皇考之意蓋以此等發遣之犯原係身獲重罪之人今發往軍前種地者乃保全之大恩令其效力贖罪耳若其中果有情罪冤抑不應發往者乃辦理刑名大臣之錯誤自應聲明具奏寬釋其罪方於情理允協若本無冤抑之情祇因其不善開墾遂爾改發內地以兵民代之是獲罪重犯又不肯急公趨事轉得遂其僥倖之心且兵丁等平時職業惟有騎射當差耕種之事非其所素習若以不能力田爲辭則將遷移內地之民往耕邊塞之地乎此事之斷不可行者若以此地不應聚積多人則將嗣後發遣之犯改置他處尙屬可行似此已發之犯豈有更改他處之理且無論大軍在彼儘足彈壓卽彼處無兵亦毫無可慮者若以伊等不能耕種

則自應令該將軍大臣等嚴加督率定爲賞罰之條以示懲勸況耕種本非難事非工作技藝之可比若肯用力人人能之其所以苟且因循未收實效者皆該管官員疏忽怠玩之所致也海望心地純良但識見平常且有固執己見之處伊所陳奏豈可盡以爲是爾等之意想以朕降特旨將海望署理戶部尙書且不時召見遂起觀望之心將伊陳奏向奉皇考申飭仍復含糊議覆甚屬不合向後當以此爲戒十月授戶部尙書兼議政大臣上疏言大兵現駐防鄂爾坤官駝數萬若以給臺站蒙古等令其運米則運價大省於蒙古生計亦有裨益王大臣等議如所請乾隆二年四月秦陵工竣奉旨優敘給雲騎尉世職十二月因總理事務議敘復給一雲騎尉四年晉太子少保六年二月請停各省捐穀例諭曰從前停止各項捐納之時在廷諸臣及翰詹科道等議留捐監一條俾各處積穀以備民間荒歉之需且使士子廣其應試之路洵爲兩便並非捐官可比朕已久行昨據御史趙青藜請停止捐監又經大學士九卿會議以爲事屬難行應仍其舊朕已降依議之旨矣今據海望奏稱外省收捐繁難赴捐之人甚少原議各省捐貯穀數共應三千餘萬石今報部者僅二百五十餘萬石合計尙不足十分之一不若且

停止各省之捐穀仍照九卿原議在部交銀將所收之銀扣抵各省買穀銀款俟倉貯充盈之後將應停止之處再行請旨朕思納粟貯倉原爲備荒發賑預爲籌畫之計外省捐穀繁難且有弊竇不若在部投捐之易誠如海望所奏朕亦知之嗣後仍准在部收捐折色至於外省收捐本色之例亦不必停在內在外悉聽士民之便地方積穀不厭其多賑卹加恩亦所時有正未易言倉貯充盈也先是海望爲郎中時充崇文門監督洎擢尙書任滿命管理如初至是御史胡定疏陳關稅浮徵事言崇文門貨物上稅有挂錘頂秤名目每百斤必作百四五十斤稅額雖未明增實已加至數倍其零星貨物由各門入者任意需索更有數倍於稅額者至外省各官如杭州北新關自南而北不過十餘里盤查共有七處雖無貨客商必索飯錢多方留難有貨者應納之貨不過數分而入口給票出口繳票之費七次苛索竟什百於零星貨物所值之數推其原故蓋由管關之員務欲所解稅課盈餘浮於舊額以免部駁而見己長吏胥巡攔藉得恣睢無忌請嚴禁諭曰關差一項從前司稅之人歸之私索者後令報出卽爲盈餘耳並非現徵之外有所增加也雖管關之人賢愚不一或有奉行不善欲增課以見長因而需索累民然

此十之二三耳較之未經澄清以前已覺減少者蓋多矣朕臨御以來又復核減稅課不下數千萬兩且不時嚴飭該管諸臣剔除諸弊至再至三今條奏關稅者尙屬紛紛如海望係皇考及朕簡用之大臣豈不知國體而但知言利者比其管理崇文門稅務不過儘收儘解盡行報官不似先前之入私橐因而見其獨多耳朕卽另派大臣管理想亦如其數也若如胡定所奏苛索種種朕可以信其必無何爲如此過甚之詞耶崇文門稅務不必另議至外省關課皆久經該督撫就近稽查除現設口岸報部有案者照舊設立外其有私增口岸逐一詳查題報應留者留應革者革此番清查之後司權之員若再有違例苛索者胥役嚴處官吏嚴參該督撫不行查察經朕訪聞必於該督撫是問至濟甯北新二處係江浙大關尤爲緊要著交兩江總督楊超曾浙閩總督德沛照此稽查辦理十二月海望調禮部尙書兼管樂部太常寺鴻臚寺事十三年署戶部尙書十四年調戶部尙書十七年四月與侍郎三和等遵旨查奏兩郊壇宇工程所發物料銀過多自請嚴議六月議革職詔從寬留任十九年以前在侍郎任內承審鹽商王會民匿課行私一案誤以未完作完議革職詔留任二十年卒諭曰戶部尙書海望老成敬慎

文和

清史列傳

辦事實心宣力有年勤勞懋著昨患痰症亟賜醫藥尙冀痊可遽聞溘遊朕心深  
為悼惜著賞銀二千兩治喪遣散秩大臣博爾木查帶領侍衛往奠茶酒應得卹  
典該部察例具奏尋賜祭葬如例諡勤恪

清史列傳卷十六終

097-792



21101000160829